


Библия пы сэргицко
ромско чиб



Portions of the Holy Bible in the Servi dialect of the Vlax
Romani language of Ukraine

**Библия пы сэрвицко ромско чиб
Portions of the Holy Bible in the Servi dialect of the Vlax
Romani language of Ukraine**

copyright © 2021 Pioneer Bible Translators

Language: Romani (Romani, Vlax)

Dialect: Servi

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-15

PDF generated using Haiola and XeLaTeX on 29 Aug 2024 from source files dated 15 Apr 2023
f17a2de7-6044-5cab-b8ec-c68fba3b8280

Contents

Руфъ	1
Иона	6
Лукастар	9
Бути	63

Лил пала Руфь

Элимелехо тай лэхкэро ёри пэрэлдэн Вифлеемостар ды Моаво

1 Калась, ды връма сундисарэн, ды пхув Иудея авиля бокх, тай екх мануш Вифлеемостар екхтханэ ромняг тай донца чывэнца пэрэлагля ды пхув Моаво.

2 Кадылэ манушэ акхарэнас Элимелехо, лэхкирэ джювля — Нооми, а дон лэхкирэн чывэн — Махлоно тай Килионо. Вонэ джювэнас ды Эфрато паш ды Вифлеемо, со ды Иудея. Вонэ авиле ды пхув Моаво тай ачилепэ котэ.

3 Элимелехо , мурш Нооми, муля, тайвой ачиляпэ донца чывэнца.

4 Вонэ лиле пэсти джювлен моавитянкен; екха акхарэнас Орпа, авря — Руфь. Вонэ проджюдэ котэ паша дэш бэрш,

5 тай тунч Махлоно тай Килионо кади ж муле. Нооми пэрэджюда дон чывэн тай пэхкэрэ муршэ.

Нооми рисявлэл ды Вифлеемо екхтханэ моавитянкага Руфь

6 Кала Нооми уджянгэла ды Моаво, со РАЙ срапирда пала пэхкирэн манушэн тай дынга лэнди хамо, вой закамля тэ рисявлэ пхутятар Моаво ды пэхкири пхув, тай лага скамле тэ джя дуй латирэ боря.

7 Нооми ачывда тхан, тев джюда, тай лакирэ боря джиле лага. Вонэ джиле ды дром павпалэ ды пхув Иудея.

8 Нооми пхэнда пэхкирэнди дуенди боренди:

— Рисявлэн цэрэ, дэ тумарэн чяче ёрен! Мэй РАЙ дэл тумэнди лачимо, сар и тумэ дэнэс лачимо пэхкирэ мулэнди муршэнди тай манди.

9 Тэ дэл РАЙ тумэнди тэ аракхэн бахт ды цэр нэвэ муршэгэ.

Вой чюминдэня лэн, нэ вонэ фартэ подлиле гвалто тай заровине.

10 Тай пхэндэ:

— Амэ джягэ туга, тирэ манушэндэ.

11 Нооми пхэнда:

— Чея, рисявлэн павпалэ. Пэ со тумэнди тэ джя манца? Чи авэна мандэ инте чывэ, соб тэ авэн тумэнди муршэнца?

12 Рисявлэн, чея мурэ, мэ фартэ пурани, соб тэ выджа пала ром. Тэ думисаравас бы мэ кади: «Мандэ исин надежда!», тэ пэрэрятяравас бы мэ кадыя рят ромэга тай тэ быйяндёнпэ бы чывэ,

13 со калэстар? Тумэнди тэ дожутярэ, кала вонэ выбарёна? Со калэстар, тэ ачепэ тумэнди на пала ром? На трэбуни, чея. Мурэ джювимо фартэ кырко, мэ фартэ пала тумэн пэрэджював. РАЙ счюта пы ман пэхкири холи.

14 Вонэ упалэ подлиле гвалто тай заровине. Орпа чюминдэня пэхкири сасуя тай джиля, а Руфь отпихэндалэ тэ уджя.

15 Нооми пхэнда:

— Дыкх, тири ятровка рисявлэл пэхкирэ манушэндэ тай пэхкирэ дэвлэндэ. Джя и ту лага.

16 Нэ Руфь пхэнда:

— На манг ман тэ ачывав тут тай тэ рисявлэн. Мэ джява пордэ, тев ту джях, тай ачывапэ котэ, тев ту ачехпэ; тирэ мануша авэна мурэ манушэнца, тиро Дэвэл — муро Дэвэл.

17 Тев мэрэгэ ту, котэ и мэ мэрэва, тай котэ мэй ман гаравэна. Тэ помарэл ман РАЙ, кацик мэримо розачывэла амэн!

18 Нооми полиля, со Руфь всаекх джяла лага тай пэрэачиля тэ мангэ ла тэ уджял.

19 Вонэ джиле дуйдженэ ды Вифлеемо. Кала вонэ авиле, ды форо подлиялэ баро гвалто:

— Када со, Нооми?! — типисявшас джювля.

20 Нооми пхэнэлас лэнди:

— На акхарэн ман будэр Нооми, ай акхарэн Мара, колэсти со Всазорако бичялда манди бида!

21 Кала мэ уджяvas, мандэ сля вса, нэ РАЙ рисарда ман павпалэ нисога. Пэ со тумэ акхарэн ман Нооми? РАЙ сундисарда ман, Всазорако бичялда манди бибаахталимо.

22 Кади рисардапэ пхуятар Моаво Нооми тай лага латири бори моавитянка Руфь. Кала вонэ авиле ды Вифлеемо, ачиле тэ стидэ ячменё.

2

Руфь тай Боазо

1 Муршэстэ Нооми сля родо пав лавэ Боазо, мануш пативало, колэстар родостар, со и Элимелехо.

2 Моавитянка Руфь пхэнда Нооми:

— Мук ман тэ джя ды маля тэ стидэ ворзо, саво тэлэдыня, котэ, тев манди сикавэна мищимо.

Нооми пхэнда:

— Джя, чей мури.

3 Руфь джилия пы маля, тев стидэнас ворзо, тай ачиля тэ подлэ кода, со тэлэдэлас пы пхув. Тай ачиля кади, со кодыя маля сля маля Боазостири, саво сля родо Элимелехости.

4 Ды кадывы диво еджино Боазо авиля пордэ Вифлеемостар.

— РАЙ түмэнц! — пхэнда вов бутярнэнди.

— Тэ авэх бахтало РАЕСТАР! — пхэндэ вонэ лэсти.

5 Боазо пхучля пхурэдэр бутярнэстар:

— Кахкири када чей, кадыя тэрни джювли?

6 Пхурэдэр бутярно пхэнда:

— Када моавитянка, сави Нооми анда пхуятар Моаво.

7 Вой пхучля: «Мукэгэ ман тэ стидэ ворзо, саво тэлэдыня». Авиля дэнзор тай ачиляпэ вой катэ, тай на прыбэшля тэ отцинявэ.

8 Тунчи Боазо пхэнда Руфяти:

— Чей мури, пошун. На джя тэ стидэ ворзо пэ авэр маля, на уджя катар, нэрицаарлаа пашэ мурэ бутярненде.

9 Дыкх, тев тирэн бутярнэ, тай джя пав шпэра бутярнен. Мэ прыпхэндом пэхкирэ манушэнди тэ на холярэн тут. Кала скамэгэ тэ пэ, поджя тай пи хкорэстар лэн пани мурэ копыли.

10 Вой тэлийлэсти ды пхуха тай пхэнда:

— Сости ту сикавэх манди кацаво мищимо? Сости ту чювэх пы ман сама, мэ ж авря пхуятар?

11 Боазо пхэнда лати:

— Манди роспхэндэ пала кода, со ту стирдан пэхкирятси сасуяти, кала муля тиро мурш: сар ту ачявидан дадэ тай да, ачявидан пэхкири пхув, тев аракхлянпэ, тай джилиян манушэндэ, савэн ды калэ на джянэгас.

12 Мэк РАЙ воздэла тути пала тирэрындоря, савэ ту тирдан, тай дэла бахт тути Дэвэл, РАЙ Израилекоро, пала лэхкирэ пхака ту камэх тэ ушаравэпэ!

13 Вой пхэнда:

— Рай муро, ту сикавэх манди кацаво мищимо. Ту дынян пачя тирия копыляти, кала мэ на тирэ копылендар.

14 Кала авиля врязма тэ ха, Боазо пхэнда Руфяти:

— Джя кордэ, ха тай обмук пэхкоро котор мандро ды шуклима.

Руфь бэшля пашэ бутярнэн, тай вов дыня лати присардо ворзо. Вой чялия, тай латэ интэ ачиляпэ.

15 Кала Руфь упалаэ джиля тэ стидэ ворзо, Боазо прыпхэнда пэхкирэ манушэнди:

— Тай кала вой закамэла тэ стидэ помашкар снопуря, на холярэн ла.

16 Кала авэна тэ стидэ, на залэн вса тай ачявэн лати. Мэк подлэл, тай тумэ нисо на дэдүмэн лати.

17 Ды бельвель Руфь стидэлас ворзо пэ маля. Нэ кала вой обмарда лэн, выджиля ёаш гоно^{*} ячмени.

18 Кала авиля ды форо, Руфь сикавда сасуяти, скацик вой стидыня. Тунчи вой доросля кода, со ачиляпэ хаматар, тай отдыня Нооми.

19 Сасуи пхучля латар:

— Тев ту стидэгас? Тев ту тирдан авдивэ? Тэ авэл бахтало кодыва, саво дыня тути зор.

Руфь пхэнда сасуяти, каастэвой тирда пэ маля.

— Манушэ, пэ маля каастэ мэ авдивэ слём, акхарэн Боазо, — пхэнда вой.

20 — Тэ дэл лэсти РАЙ баих! Вов патив тховэл и пы джюдэн тай пы мулэн! — пхэнда Нооми боряти. — Кадыва мануш амаро пашутно родо, каастар авэла амэнди зор.

21 Руфь моавитянка пхэнда:

— Вов пхэнда манди тэ рицарэпэ екхтханэ лэхкирэ бутярнэнца ды колэ, кала вонэ стирэнэ всаворэ бутя пэ лэхкирэн мален.

22 Нооми пхэнда Руфяти, пэхкирия боряти:

— Чяёри, мишто, кала ту авэга лэхкирэ бутярненца. Тунчи нико на холярэла тути пэ авэр маля.

23 Руфь рицардапэ екхтханэ бутярненца Боазостирэнца тай подлэлас када, со тэлэдэлас ды колэ, кала постидыне ячмени тай див. Джювэлас вой тунчи пэхкирия сасуяса.

3

Руфь тай Боазо пы токо

1 Екхвар латири сасуи Нооми пхэнда лати:

— Мури чей, на трэбуни ли манди тэ аракхав тути тхан, соб тути тэ авэл мишто?

2 Хыба Боазо, пэхкирэнца бутярнянца, савэнца ту слян, амэнди на родо? Авдивэ бельвелягя вов жужкарэл ячмени пы токо.

3 Тай кади, джя, выхалавиз, помакпэ лаче мастинаага тай уряв тири лачи ѫда. Джя пы токо, кацик на сикавпэ лэсти ды кодыя врязма, кала вов на пэрэачела тэ ха тай тэ пэ.

4 Кала вов пэрэла, рапир кадыва тхан, тев вов пэрэла. Тунчи джя, оттер ушардо ды лэхкирэ пурэн тай пэр. Вов пхэнэла тути, со тэ тирэ.

5 — Мэ тирава вса, сар ту пхэндан, — пхэнда Руфь.

6 Вой джиля пы токо тай тирда вса, со пхэнда лати тэ тирэ латири сасуи.

7 Кала Боазо пэрэачиля тэ ха тай тэ пэ, тай ачиля лэсти мишто, вов отджиля, пээля ды угло скирдатэ. Руфь локхэ поджиля, оттерда ушардо лэхкирэ пурэндэ тай пэля.

8 Ды ёаш рят вов сдарыняпэ, порисардапэ тай додыкхля джювля, сави пашёллас ды лэхкирэ пурэн.

9 — Ко ту? — пхучля вов.

— Мэ тири копыля, Руфь — пхэнда вой.

* **2:17** Пав пуррано еврейско чиб «екх эфа», тэвсс 20-22 литра.

— Ушарав ман тирия ёдага, ту же екх пашутнэндар родостар амэнди, саво лиджял лав пала амэн.

10 Вов пхэнда:

— Тэ дэл тути РАЙ бахт, чей мури. Када лачёрындо барьидэр колэстар, саво ту тирэгэс дыкалэ. Ту на ачилян тэ пхирэ пала тэрнэн муршэндэ — на пала барвалэн, тай на пала чёрорэн.

11 На каны, мурч чей, на дара. Мэтира важ тути вса, со ту помангэга. Всаворо муро форо джянэл, со ту пативали джювли.

12 Мэ пашутно родо, нэ исин родо пашэдэр тути.

13 Ачпэ пы рят катэ. Дэнзор, кала вов скамэла тэ вытинэ тут, када мишто — мэктэй и тэ авэл. Нэ сар на закамэла, чичимага, сар кода, со джюдо РАЙ, када тирава мэ. Сов катэ ды дэнзор.

14 Тайвой сля ды лэхкирэн пурэн ды дэнзор, нэ вшиля дыкалэ, кала ек мануш раздыкхэла авэр манушэ. Боазо пхэнда ды пэ: «Мэктэй нико на джянэл, со пы токо авэлас джювли».

15 Вов пхэнда лати:

— Да манди упрани юда, сави пэ тут, тай рицар ла.

Кала вой тирда када, вов выгчюта ды кадыя юда баро гоно ячмени * тай вытина лати зор тэ зачюэ пы пхикен. Тунчи вов рисардапэ ды форо.

16 Кала Руфь авиля пэхкирия сасуята, Нооми пхуччла:

— Нэ сар ту, чей мурч?

Тай Руфь роспхэнда лати пала вса, со тирда Боазо важ лати

17 тай прыхэнда:

— Вов вытина манди юаш гоно ячмени тай пхэнда: «На рисов пэхкирия сасуята шүүшэ вастэнца».

18 Нооми пхэнда:

— Поач, мурч чей, кала на уджянага, дыко вса доджяла. Кадыва мануш на прыбэшэла, вов авдивэ затирэла кадыва вындо.

4

Руфь ачел ромни Баазостири

1 Баазо джилия тай бэшля ды форохкирэн ударэн. Тай акэ дыкхэл: джял кодыва родо, пала савэ вов дэдуманя. Баазо акхарда лэ тай пхэнда:

— Амал, поджя, бэш.

Кодыва поджилия тай бэшля.

2 Баазо анда дэшэн манушэн пхурэдэрэн ды форо тай пхэнда лэнди:

— Бэшэн катэ.

Вонэ бэшлэ.

3 Баазо пхэнда родости:

— Дума джял пала майя Элимелехостири, амарэ родохкири. Нооми рисиля пхурялт Мояво тай битинэл лэ.

4 Мэ думисардом, со трэбуни тэ пхэн тути пала када. Камэх, вытин кадыя майя англа всавэрэн, ко исин катэ, тай англа пхурэдэрэн мурэ народостар. Камэх — вытин. Сар на камэх — пхэн манди, соб мэ тэ джянов. Тути трэбуни англэ тэ вытинэ када, мэ — авэр, кести трэбуни тэ вытинэ.

— Мэ вытинава, — пхэнда кодыва.

5 Баазо пхэнда:

— Кала вытинэгэ маля Ноомиятири, тути трэбуни тэ лэ моавитянка Руфь, кастэ муля ром, соб, кала тумэндэ баяндёлэлэ чаворо, всаворо хаббэ тэ ачелпэ лэсти.

6 Тунчи пашутно родо пхэнда:

* **3:15** Пав пурано еврейско чиб «шов мера ячмени».

— Нат, манди на выджал тэ вытинэ. Дарав, соб тэ на хасявэл мандэ вса. Мэк пала тут вса авэла, вытин ту, мандэ на выджал.

7 (Англал ды Израили сля упхэнимо: кала пэрэдэнас вытинимо тай парувэнас, соб ды калэ тэ авэл зор, мануш слэлас пэстар цэрюли тай отձлас аврэсти. Кади ды Израили саstryэрэнас упхэнимо.)

8 — Тин ту, — пхэнда пашутно родо Боазости тай слия церуля.

9 Боазо пхэнда пхурэдэрэнди тай всаворэсти народости:

— Тумэ допхэнимаря: еххатар мэ тинав Ноомиятэ вса, со сля Элимелехостэ, Килионостэ тай Махлоностэ.

10 Кади ж моавитянка Руфь, со сля ромни Махлонохири, мэ лав пэсти ды ромнен, соб ко авэла латар тэ авэн хулая пхуяти, со сля лэстэ, тай соб тэ на хасявэл лэхкиро родо ды амаро форо. Тумэ калэсти допхэнимаря!

11 Всаворэ ко котэ сля пашэ ударэн тай пхурэдэра пхэндэ:

— Акэ, амэ допхэнимаря! Мэк РАЙ дэла ромнити, сави заджял ды тиро цэр, бут чяворэн, сар сля Рахилятэ тай Лиятэ, савэндар джилия всаворя нородо Израилёхкоро! Тэ авэх зорало ды Эфрат, тай тэ джянэн тут ды Вифлеемо.

12 Мэк РАЙ дэла тути чяворэн кала тэрни джювлятар! Мэк тиро цэр авэла пхуджило пы цэр Парецостиро, савэ Тамар быянда Иудасти!

Руфятэ аракхэлтэ чяво

13 Боазо лиля Руфь пэсти ды ромнен. Вонэ сле екхтханэ, тай дыня РАЙ, вой быянда лэсти чявэ.

14 Джювляя пхэндэ Нооми:

— Наис РАЕСТИ, саво на ачявда тут би чяворэндиго! Тэ лашарэлпэ вов ды Израили!

15 Вов рисарэла тути джюимио тай подрицарэла тут ды пуранэн бэршэн! Бори тири, сави камэл тут, быянда лэ! Вой важ тути фэдэр, сар ефта чявэн.

16 Нооми пхиравэлэс пы вастэн чяворэ, саво быяндапэ, тай дыкхэлэс пала лэ.

17 Пашэ джювляя дэдүмэнас:

— Ноомиятэ быяндапэ чяворо!

Вонэ дыне лэсти лав тай акхардэ лэ Овидо. Када дад Иессеехкоро, саво сля дад Давидохкоро.

18 Акэ родо Давидохкоро, саво джял Парецостар: Парецо сля дад Хецронохкоро,

19 Хецроно сля дад Рамости, Рамо сля дад Аминадавости,

20 Аминадаво сля дад Нахшоности, Нахшоно сля дад Салмоности,

21 Салмоно сля дад Боазости, Боазо сля дад Овидости,

22 Овидо сля дад Иессеести, Иессеи сля дад Давидости.

Ионастиро лил

Иона нашэл Дэвлэстар

1 Сля лав РАЕСТАР Ионасти, чаяв Эмиттаёхкирэсти:

2 — Вщи, джя ды Ниневия, баро форо, тай роспхэн ды лэ, со дума пала врыти рындурия кадылэн манушэн доджиля ды ман.

3 Нэ Иона вшилия, соб тэ нашэ ды Таршыш РАЕСТАР, тай авиля ды Яффа, аракхля корабли, саво оджялас ды Таршыш, потинда, соб лэ тэ пролиджян, и заджиля ды лэ, соб тэ авэ РАЕСТАР ды Таршыш.

4 Нэ РАЙ бичялда пы море састо балвал. Тирдапэ баро гвалто, и кораблести трэбуни сля тэ розмарэпэ.

5 Матросура здарэнэгэ тай ачиле тэ типисявэ кожно пэхкирэ дэвлэсти. Вонэ вычютэ всаворэ бужэ кораблестар ды пане, соб тэ авэл локхэдэр.

Нэ Иона ды калэ смукляпэ андрэ, пыля тай састэс засута.

6 Капитано кораблехкоро авиля лэстэ тай пхэнда лэсти:

— Со ту совэх? Вщи, типисяв тирэ Дэвлэсти. Ко джянэл, Вов ушунэла амэн, тай амэ на хасявага.

7 Матросура пхэндэ екх екхэсти:

— Джям, чювага жребиё, соб тэ уджянэ, пала ка кадыя грыжа авиля пы амэн. Вонэ чютэ жребиё, и жребиё выпыля пы Иона.

8 Тунчи вонэ пхэндэ лэсти:

— Пхэн амэнди, пала ка дорэсля амэн кадыя грыжа? Сога ту залэхпэ? Катар ту джях? Тев тири пхув? Савэндар ту манушэндар?

9 Вов пхэнда лэнди:

— Мэ евреё, даравпэ РАЕСТАР, Дэвлэ болыбнахкирэ, Саво стирда баро пани тай пхув.

10 Тунчи Иона пхэнда лэнди, со вов нашэл РАЕСТАР. Кала мануша уджянгле пала када, вонэ фартэ пэрэдэрэне тай пхэндэ лэсти:

— Сости ту када тирдан?

11 Море на пэрэачелас гвалтовать. Вонэ пхэндэ лэсти:

— Со амэнди тэ тирэ туга, тэ на гвалтует море?

12 Тунчи вов пхэнда лэнди:

— Лэн ман и вычювэн ды море, тай море пэрэачела гвалтовать важ тумэнди. Мэ джянов, со кадыя бари грыжа доросля тумэн пала ман.

13 Нэ кала мануша ачиле фартыдэр тэ тирэ бути, соб тэ прыяче пхуяятэ, лэндэ нисо на выджялас, колэсти со море на пэрэачелас гвалтовать.

14 Тунчи вонэ типисине РАЕСТИ тай пхэндэ:

— Мангах Тут, РАЕ, тэ на хасявах пала води кадылэ манушэ, тай на прычувэгэ амэнди навуджило рат. Ту, РАЕ, стирдан, со Ту камлян!

15 Вонэ лиле Иона тай вычютэ ды пане, тай пы море авиля пачя.

16 Матросура фартэ пэрэдaranепэ РАЕСТАР, андэ Лэсти жэртва и дыне солах.

2

Иона мангэллэ Дэвлэсти андрал машчестар

1 РАЙ бичялда баро машё, тайвой прозумавда Иона. Вов просля андрэ ды пэр машчестэ трин дивэ тай трин рият.

2 Кала Иона сля ды пэр машчестэ, вов помангляпэ РАЕСТИ, пэхкирэ Дэвлэсти.

3 Вов пхэнда:

— Ды бида мэ типисилём РАЕСТИ,

и Вов задэдуманя мандэ.

Мэ затиписилём кола ломлятар мулэндар —
тай Ту ушундан муро гласо.

4 Ту обмукийн ман фартэ тээз ды пане,
вой тирёлас тай подлэласпэ понад муро шэрэ.

5 Мэ пхэндом:
«Отчюто мэ Тирэ якхэндар,
нэ всаекх мэ джянав, со мэ удыкхава свэнто Тиро цэр».

6 Пани ушаравда ман,
чяря панестар обкхувдэ муро шэрэ.

7 Мэ тэлэ пхув сджилём, тев барён плая,
тай удара затердээз пала ман,
соб тэ на вымукэ ман вако.

Нэ Ту, РАЙ, муро Дэвэл,
вылиян ман хывьятар джюдэгэ.

8 Кала джювимо муро мурдёлас,
тай ачилёмпэ мэ би зорако,
мэ РАЕ срапирдом,
тай муро мангимо доджиля Тутэ,
ды свэнто Тиро цэр.

9 Кола, ко тэлёл хохавнэ, шушэ дэвлэнди,
придыне Тут.

10 А мэ ашаримахкирэ гласога анава Тути жэртва,
со пхэндом англа Тут, стирава!
Фирисаримо РАЕСТАР!

11 РАЙ пхэнда мачести, тай вов вычюта Иона мостар пы пхув.

3

Иона джял ды Ниневия

1 Авэр моло сля лав РАЕСТАР Ионасти:

2 — Вщи, джя ды Ниневия, баро форо, тай роспхэн ды лэ када, со Мэ пхэндом тути.

3 Иона вщилия тай джилия ды Ниневия, сар пхэнда лэсти РАЙ. Ниневия сля баро форо Дэвлэстэ, пэ трин дивэ тэ джя пээза.

4 Иона заджилия ды форо и састо диво пхирэлас тай пхэнэлас: «Интэ саранда дивэ, и Ниневия хасявлэа!»

5 Мануша ды Ниневия патиile Дэвлэсти тай отпхэндэпэ тэ ха и тэ пэ. Всаворэ — барвалэ и чёрэрэ — урявдэпэ ды ѫда гонэндар.

6 Кала кадыва лав доджиля ды тхагари, вов вщилия троностар, слия барвали ѫда, урявдапэ ды ѫда гонэндар тай бэшля ды прахо.

7 Вов прыаихарда барэ манушэн, тай вонэ пхэндэ всаворэнди ды Ниневия:
«Мануша нисо тэ на хан, тэ на пэн пани. Тай хулаимо, гурува, бакрэ бузненца тэ на пхирэн пы мален и тэ на пэн пани.

8 Мануша тай хулаимо тэ авэн ушаравдэ ды похтан гонэндар тай зоралэс тэ типисявшэ Дэвлэстэ. Соб кажно мануш отрисардапэ пэхкэрэндар мижэ дромэндар тай прохарицики рындонэндар.

9 Ко джянэл, на парувэла ли Дэвэл Пэхкиро гындо тай отрисарэла амэндар Пэхкири холи, тай амэ на хасявага».

10 Дэвэл удыкхля лэндирэ рыйндура, со вонэ отрисардэпэ пэхкирэ мижэ дромэндар, и ачиля Лэсти дор лэн, тай на бичялда бида, сави камля тэ бичялэ.

4*Дэвэл сиклярэл Иона*

1 Када сля бари бида ды якхэн Ионасти. Вов фартэ холявэлас.

2 Вов ачиля тэ мангэпэ РАЕСТИ:

— РАЕ! Мэ ж дэдуманём пала када, кала мэ инте слём пэстэ цэрэ. Колэсти мэ нашлём ды Таршиш. Мэ джяновас, со Ту, Дэвла, тирэх лачимо, Ту доруно, бут врязма на холявэх, Ту барвало камлимага тай на камэх тэ бичялэ бида.

3 Екхатар, РАЕ, лэ мури води. Манди фэдэр тэ мэрэ, сар тэ джювэ.

4 РАЙ пхэнда:

— Мишто када, со ту холявэх?

5 Иона выджиля форостар тай бэшля, тев восточно риг форостэ, стирда пэсти хотэ катуна рандендар тай бэшля тала ла, дэ шалин, соб тэ удыххэ, со авэла форога.

6 РАЙ Дэвэл прыпхэнда рандяти, и рандь подлиялэ понад шэро Ионасти, соб вов тэ авэл ды шалин, тэ авэл лэсти мишто. Иона сля фартэ лошало.

7 Тала дэнзор Дэвэл бичялда термэ тэ подха кодыя рандь, тай вой зашутила.

8 Кала вшиля кхам, Дэвэл бичялда зорало, пхабардо балвал, тай кхам ачиля тэ пхабарэ шэро Ионасти, кади со лэсти ачиля бибаخت. Вов манглия мэrimо тай пхэнэлас:

— Манди фэдэр тэ мэрэ, сар тэ джювэ.

9 Дэвэл пхэнда Ионасти:

— Мишто када, со ту холявэх пала кадыя рандь?

Вов пхэнда:

— Мишто! На кацик тэ холявэ, нэ и тэ мэрэ.

10 Тунчи РАЙ пхэнда:

— Тути дор кадыя рандь, пала савля ту на хирэгас тай на тирдан бути. Ды екх ряят рандь выбариля, тай ды екх ряят вой хасиля.

11 Манди ли на дор Ниневия, баро форо, ды саво фартэ бут хулаимо тай будэр тев шэл биш пхангля манушэн, савэ на джянэн, со мищимо, а со врытимо?

Бахтало Лав Лукастар

Драгэ амала!

Тумэ рицарэн дэ вастэн Евангелие, Бахтало Лав. Кадэва лав розпхэнэл пала кода, сар дүй пхангяа бэрш палал дэ амари люмля авиля Иисусо Христосо, Саво исин амаро Фирисари. Сар Вов джювда пэ пхув, састирэлэс и сиклярэлэс манушэн, эртисарэлэс лэнгэрэ бэзима, муяла пала лэн и отджювдinya, и сар рисявшлаа павпалэ дэ люмля. Евангелие Лукастар сля чиндо дэ екхто веко пэ греческо чиб. Штар Евангелия и Бути апостолэнгэри, лил, тев розпхэнэлэлэ пала кода, сар ачилия тэ авз кхандири и сарвой барёлас, авэр лила, чиндэ патявиэнца дэ Иисусо Христо, и кади ж лил Сикавимо (Откровение), всавэрэ вонэ сле стидэне Ѣтханэ дэ Ехк Лил, саво акхарэлэл «Нэво Завето».

Пав дума, сави пэрэдэлэлэ думутнья врятатар, амэ уджянах, со Евангелие, саво тумз рицарэн да вастэн, чинда Лука, джягнгло машкар патявиэн, сар «пативало састимари». Вов патиня дэ Дэвлэ и пативимо лэхкоро сля фартэ зорало; Ѣтханэ апостолога Павлога Лука пхирэлэс дэ дуратунэн пхуен, соб тэ долиджя манушэнди Дэвлэхкоро Лав и тэ ваздэ котэ кхандиря.

Лука чинда Бахтало Лав майанглаа важ ирвала манушэ, саво сля греко, пав лавэ Феофило, соб тэ сикавэ лэсти, Ко сля Иисусо пав чячима и со Вов стерда важ амэн. Соб тэ терэ пэхкири бути, Лука розпхуяа бутэн манушэн, савэ дыкхле, сар джювда Иисусо пэ пхуяа, и пробинда вса, со чиндэ пала Иисусо дэ кодыя врятьа.

Вса, со Лука уджянгяа пала Иисусо, вов зачинда дэ Бахтало Лав (Евангелие) пашэ 60-65 бэрша Иисусохкэрэ бэнимастар. Дэ пэхкоро лил Лука майанглаа розпхэнэл пала Иоанно Болдэмаре и лэхкири бути важ Дэвлэ, и пала кода, со тердапэ ды люмля англa кода, сар бэняпэ Иисусо. Лука бут со розпхэнэл пала барэ и цыкнэрындуря Иисусохкэрэ джювимастар и пала рындуря, савэ терэнаспэ дэ кодыя врятьа. Кадэлэгэ вов сикавэл, со Иисусо ачилия манушэгаа и авиля дэ люмля важ кода, со кади сля пэ гояд Дэвлэстэ, Саво на камэл, соб амэ тэ хасявах бэзимастар.

Амэ всавэрэ Ѣлэстар наисарах амалэнди, савэ подрицаарнаас и терэнас бути Ѣтханэ амэнца важ кода, соб тэ выдяял кадэва лил: манушэнди, савэ пэрэлиджянаас Евангелие пэ романи чиб и продыхэннаас лэ, и всавэрэ ромэнди, савэ шунэннаас и бинэннаас лил англa кода, сар амэ вымукле лэ дэ люмля.

Баро наис тумэнди!

Тэ дэл Дэвлэ тумэнди баҳт!

Пативага, бутярнэ дэ организация «Переводчики Библии Украины»

1 Кана бут ко манушэндар ачилия тэ зачинэ дума пала кода, со стердапэ машкар амэн,

2 и сар амэнди розпхэндэ мануша, савэ англунэ дивэндар дыкхле кода, со сля, тай терэнас бути важ Дэвлэхкэрэ Лавэ,

3 тунчи и манди, пативало Феофило, авиля пэ гындо тэ розлэлэ дэ кодэлэ, со стердапэ англунэ дивэндар, тай ехк пала авэр тэ чинэ тути,

4 соб ту тэ полэх, пэ скици исин чячюно сикляримо, саво ту прылиян.

Ангело розпхэнэл пала Иоаннохкоро бэнимо

5 Дэ кодыя врятьа, кала Иродо сля тхагари дэ Иудея, джювда ехк рашай, саво вджялас дэ рашаенгири группа, тев сля пхурэдэрэгэ Авии. Лэ акхарэнас Захария, тай лэхкирия ромнягэ сля Елизавета, манушни Ааронохкэрэ родостар.

6 Вонэ лэдуй сле дэвликунэ мануша, и лэнгоро джювимо сля бидошакоро. И вонэ джювда пав Дэвлэ Раехкэрэ заповеди и пав дума Дэвлэхкири.

7 Лэндэ на сля чяворэн, колэсти со Елизаветатэ на выдяялас тэ авэ пхарягэ, и вонэ лэдуй сле дэ пуранэн бэршэн.

8 Ехвар поджиля врятьа Захариясти рашаенца тэ лиджя бути англa Дэвлэ.

9 Сар прылита сля рашаендэ, вонэ чутэ жребии, касти тэ джя дэ храмо, тай Захариисти выпэлэ тэ заджя дэ храмо Раехкоро и тэ ваздэх тхув.

10 Дэ кодья врязма, кала Захария ваздэлас тхув дэ храмо, всавэрэ мануша мангэнаспэ аври, дэ греда.

11 Тунчи сикавдапэ Захариисти Раехкоро ангело, пав чячи риг жэртвеннистостар, пэ савэ ваздэнас тхув Дэвлэсти.

12 Кала Захария удыкхля ангело, дэнэ пэ лэстэ дар, и затинисиля даратар лэхкоро йло.

13 Ангело пхэнда лэсти:

— На дар, Захария! Шунда Дэвэл мангимо тиро, тай ромни тири, Елизавета, бэнёла тути чявэ, и дэгэлэсти лав Иоанно.

14 Тиро йло авэла баихтало баря лошатар, и Иоаннохкэрэ бэнимости лошавэнэ бут мануша.

15 Авэла вов барэ манушэгэ англа Рае: на пэла мол и мортхали тай Свэнтонэ Фанога авэла пхэрдо инте тала дакэрэ йлэ.

16 Бутэн манушэн дэ Израили вов рисарэла Раестэ, лэнгэрэ Дэвлэстэ.

17 Вов джяяла англа Рае, тай Ильяхкэрэ фано и зор авзна пэ лэстэ, и вов рисарэла дадэнгэрэ йлэ лэнгэрэ чярэндэ, тай накандунэн рисарэла свэнтонэ годятэ, тай лачярэла манушэн, соб тэ авэн вонэ англа Дэвлэ.

18 Захария пхэнда ангелости:

— Сар манди тэ патя кадэлэсти? Мэ пхуро, тай ромни мури дэ пуранэн бэршэн.

19 Ангело пхэнда лэсти:

— Мэ Гавриило, саво ачел англа Дэвлэ, тай бичалдо тэ дэдумэ туга и тэ розпхэнэ тути пала када вса.

20 Акэ, ту авэга лало и ни екх лав на пхэнэгэ ды кодэлэ, сар вса стерэлапэ. Кодэлэсти со ту на патинян мурэ лавэсти, пав савэ стерэлапэ вса дэ пэхкири врязма.

21 А мануша дожутярэнас Захария аври тай на полэнас,ости вов на выджаил храмостар сикици врязма.

22 Кала вов выджиля храмостар, тунчи на сгяловда тэ выпхэнэ ни екх лав, нэ кици сикавэлас вастэнца, сар лало. Тунчи мануша полиле, со Дэвэл сикавда лэсти вари-со дэ храмо.

23 Ай кала проджиля лэхкири врязма тэ лиджя бути дэ храмо, Захария рисиля цэрэ.

24 Проджиля набут врязма, и Елизавета, ромни лэхкири, ачиля пхари тай гаравэласпэ манушэндар панч чён.

25 Тай пхэнэлас:

— Со терда манца Рай? Вздыкхляпэ пэ ман! И слия ладжявимо мандар англа манушэн!

Лав пала Исусохкоро бэнимо

26 Пэ шовто чён, сар Елизавета ачиля пхари, ангело Гавриило сля бичалдо Дэвлэстар дэ форо Назарето, саво ачел дэ пхув Галилея,

27 чяэтэ, савя акхарэнас Мария, пала савя дэнэ лав тэ отдэ ла пала Иосифо Давидохкэрэ родостар.

28 Ангело авиля латэ тай пхэнда:

— Лошав, баихтали! Рай исин туга!

29 Вой на полиля, со када терэлпэ тай сар тэ полэ лэхкэрэ лава.

30 Ангело пхэнда лати:

— На дар, Мария! Дэвэл дэнэ тути баих бари!

31 Акэ, ту авэга пхари тай бэнёга Чаворэ, и дэгэлэсти Лав Исусо.

32 Вов авэла баро, тай Лэ авэна тэ акхарэ Барэдэрэхкоро Чяво. Дэвэл Рай дэла Лэсти троно, пэ савэ бэшэлас тхагари Давидо, дад Лэхкоро.

33 И авэла Вов Тхагари дэ родо Иаковохкоро, и Тхагаримо Лэхкоро никала на пэрэачела.

34 Мария пхучля ангелостар:

— Сар откада вса авэла, кала мэ чей и муршэ на джянав?

35 Ангело пхэнда лати:

— Свэнто Фано сдржяла упранл пэ тут, и зор Барэдэрэхкири ушарэла тут. И кодэлэсти Свэнто, Саво бэнёлапэ, акхарэлапэ Дэвлэхкэрэ Чявэга.

36 Акэ и Елизавета, тирэ родостар, пэ савя пхэнэнас «бичяворэнгири», шовто чён, сар ачиля пхари дэ пуранэн бэршэн.

37 Акэ, важ Дэвлэ нэнай нисо, соб Вов тэ на стерэл!

38 Тунчи Мария пхэнда:

— Дэвэл — муро Хулай, мэк авэла вса, сар ту пхэндан.

Тай отджиля латар ангело.

Мария джяял Елизаветатэ

39 Проджиля набут врязма, и Мария стидэняпэ тай сигэдэр джилия дэ форо Иудеенгоро, саво ачелас машкар плаен.

40 Тай авиля дэ цэр Захариястэ и наисардапэ Елизаветага.

41 Кала Елизавета шунда лакэрэ лава, подхукля чяворо тала лакэрэ Ѽлэ, и пэ Елизавета сджиля Свэнто Фано.

42 Вой ваздэнэ пэхкоро гласо тай пхэнда:

— Бахтали ту машкар джювлен, тай бахтало Чяворо, Савэ ту пхираавэх тала тирэ Ѽлэ!

43 Пала со манди кадыя бахт, со авиля мандэ Мурэ Раехкири дэй?

44 Кала ашундом тиро гласо, тунчи ваздэняпэ чяворо дэ мурэ Ѽлэ лошага.

45 Бахтали ту, колэсти со патинян и Раехкэрэ лавэсти и со авэла кади, сар Вов пхэнда!

46 И пхэнда Мария:

— Ашарэл Рае води муро,

47 и лошавэл фано муро англа Дэвлэ мурэ,

Саво фириласэл ман.

48 Вов удыкхля ман,

бутярня, сави нисо на ачел,

и акана всавэрэ родуря пхэнэна,

со бахтали мэ,

49 кала шунэна, со Дэвэл Зорало

стерда важ ман кадэва баро рымдо.

И свэнто исин Лав Лэхкоро!

50 И родонэндэ, савэ полэн и трашан Лэстар,

Вов обрисявэл ковло Ѽло Пэхкоро!

51 Барэ рымнуря стерда Вов зоралэ вастэгэ,

роззхагля дрома пхутимаренди.

52 Вов счута раен лэнгэрэ трононэндар

и ваздэня упрэ чёрэн,

53 бокхалэн чялярда лачимага,

ай барвалэн мукля шушэ вастэнца.

54 Авиля Лэсти пэ гындо

тэ подрицаэр Израиле,

бутярнэ Лэхкэрэ,

55 сар дэня Вов лав амарэ дадэнди,

Авраамости тай лэхкэрэ родости пэ всавири врязма.

56 Мария просля латэ пашэ трин чён тай рисиля цэрэ.

Иоаннохоро бэнимо

57 Тай авиля врима Елизаветати тэ бэнё, и вой бэня чаворэ.

58 Пашуунэ мануша и родо лакоро шундэ, сар Рай дэня лати баро лачимо Пэхкоро, тай лошавэнас ётханэ лага.

59 Пэ охто диво авиле вонэ тэ обчинэ чаворэ, и камле тэ дэ лэсти лав Захария, кади, сар акхарэнас лэхкэрэ дадэ.

60 Нэ Елизавета, лэхкири дэй, пхэнда:

— Нат, дэн лэсти лав Иоанно.

61 Пхэндэ лати:

— Ника дэ тумаро родо кади на акхарэн!

62 Тай пхученас вастэнца лэхкэрэ дадэстэ, Захариястэ, камле тэ уджянэ лэстэ, сар вов камэл тэ акхарэ чаворэ.

63 Захария поманглэ сандёры важ лилэн тай чинда упран: «Лэсти лав Иоанно». Всавэрэ прылиле када пала дыво.

64 Тунчи отмукля лэсти муй и чиб, и вов ачиля тэ дэдумэ тай тэ ваздэ слава Дэвлэсти.

65 И всавэрэн пашуунэн облия бари дар, и када вса розджиляпэ пав всавири Иудея плаенгири.

66 Мануша, савэ шундэ вса кода, пхученас еджинэ пэстэ:

— Кага дурэдэр авэла кадэва чаворо?

И Раехкоро васт сля пэ чаворэ.

Захария пхэнэл лав Дэвлэстар

67 Ай Свэнто Фано сджиля пэ Захария, Иоаннохкэрэ дадэ, и вов ачиля тэ дэдумэ Дэвлэстар:

68 — Тэлював англа Тут,

Бахтало Рай, Дэвл Иизраилхекоро!

Ту авилян Тирэ манушэндэ

тай фирикардан лэн.

69 Ваздэня важ амэн Фирисаре

цэрэстар, савэстар исин Тиро бутярно Давидо,

70 зрицардан Тиро лав,

саво Ту пхэнэгас

дэ думутни врима

Тирэ свэнтонэ англунаренца,

71 со фирисарэга амэн врыжымашэндар,

кодэлэндар, савэ вурыщён амэндар.

72 Вов сикавда ковло ѫло Пэхкоро

амарэ дадэнди

тай на бистарда, со спханглэ лэнца Еджино Пэ

Свэнтонэ заветога.

73 Солаханя Вов Авраамости,

амарэ дадэсти,

74 со фирисарэла амэн врыжымашэндар,

соб амэ битрашакаро

тэ терах свэнто бути англа Лэстэ,

75 соб тэ авэл амаро джювимо свэнто тай чячюно

англа Лэхкоро Муй всавэрэ бэрша амарэ.

76 И тут, чаворо, акхарэнна Барэдэрэхкоро англунари,

колэсти со ту джягэ англа Рае

и лачярэга Лэсти дром,

77 и тховэгэа Лэхкэрэ манушэнди дэ гындо,
со Дэвэл залл лэндар бэзимо
и фириасэрэл лэнгэрэ водя.

78 Пэхкэрэ ковлэ ёлэстар
Дэвэл бичалэла амэнди Кхам,
Саво ваздэлапэ дэнзор,

79 и манушэнди, савэ мэрэн дэ калима,
дэла одуд
и сикавэла амэнди дром,
саво анэл пачя.

80 Ай чиворо барёлас, тай фано лэхкоро ачелас зорало, и сля вов дэ шуки пхув
ды кодыя врязма, кала трэбуни лэсти сля тэ сикавэл манушэнди дэ Израили.

2

Исусохкоро бэнимо

1 Дэ кодыя врязма императоро Августо чинда упхэнимо, соб тэ пэрэдинэ и тэ
зачинэ, скици манушэн джювэл пав всавири римско пхув.

2 Када сля англуну упхэнимо пала кода, соб тэ пэрэдинэ и тэ зачинэ манушэн,
кодэла врятматар, кала Квиринии ачиля раега дэ Сирия.

3 И всавэрэ мануша джянас тэ зачинэлэ, кожно дэ пэхкоро форо.

4 Тунчи и Иосифо Назаретостар, саво ачел дэ Галилея, джилия дэ Иудея, дэ форо
Давидохкоро, Вифлеемо, колэсти со вов сля Давидохкэрэ родостар.

5 Иосифо джилия, соб лэ тэ зачинэн, ютханэ Мариягэ, лэхкирия тэрнягэ, сави сля
пхари.

6 Дэ Вифлеемо авиля врязма, кала лати трэбуни сля тэ бэнё.

7 Тай бэня пэхкэрэ англунэн Чивэ, закхувда Лэ дэ похтан тай тховда дэ граждо,
колэсти со дэ цэр важ акхардэн манушэн на сля лэнди тхан.

Ангелуря розпхэнэн чукньяренди пала бэнимо Исусохкоро

8 Надур сле чукньяя, савэ чяравэнас пэ маля пэхкэрэн бакрэн и бузнен и
прыдыхэнэас пала лэн ратяга.

9 И акэ, ачиля англа лэндэ ангело Раехкоро, и слава Дэвлэстар, сар баро одуд,
дэня пэ лэндэ. И бари дар облия лэн.

10 Нэ ангело пхэнда лэнди:

— На дараан! Мэ пхэнава тумэнди пала бари лош, сави авэла всавэрэ манушэнди.

11 Аканя бэняпэ тумэнди дэ форо Давидохкоро Фириасари, Саво исин Рай
Христосо.

12 И акэ тумэнди шпэра: тумэ аракхэна Чиворэ, закхувдэ дэ похтан, Саво
пашлэл дэ граждо.

13 Тунчи упрамастар авиле фартэ бут ангелонэн, савэ ваздэнэ бари слава
Дэвлэсти тай пхэнэнас:

14 — Слава Дэвлэсти из упрамата, а пэ пхуя пачя манушэнди, важ савэн ковлия
Дэвлэхкоро ѫло!

15 Кала ангелуря ваздэнепэ лэндар упрэ, чукньяя пхэндэ ехх екхэсти:

— Авэн дэ Вифлеемо, дыххагэ, со котэ стердапэ, пала со амэнди пхэнда Рай.

16 Вонэ сиго авиле дэ форо Вифлеемо и аракхле Мария, Иосифо тай Чиворэ, Саво
пашлэлас дэ граждо.

17 Ай кала дыххле Лэ, тунчи розпхэндэ лэнди вса, со vonэ ашундэ пала Чиворэ.

18 Всавэрэ, ко шундэ лэн, дэнас дыво лавэнди, савэ пхэндэ чукньяя.

19 Ай Мария стховэлас кадэла лава дэ пэхкэрэ ѹлэ тай думисарэлас пала лэн.

20 Тунчи чукньяя рисиле павпалаэ, ашарэнас Дэвлэ и ваздэнас Лэсти слава пала
кода, со дыххле и со лэнди сля пхэндо.

Исусо Чяворэ обчинэн

21 Пэ охто диво, кала авиля врьяма тэ обчинэ Чяворэ, Лэсти дэнэ Лав Иисусо. Кадэва Лав дэня Лэсти ангело, кала дэй Иисусохири инте на сля пхари.

22 Авиля врьама, кала Мария тай Иосифо жужардэп пав Моисеехкэрэ Упхэнима, тай тунчи вонэ лиджялдэ Чяворэ дэ Ерусалимо, соб тэ свэнтиласэр Лэ Раести.

23 Сар чиндо дэ Дэвлэхкэрэ Упхэнима: «Чяворэ, саво бэняпэ англuno, трэбуни тэ свэнтиласэр Раести».

24 И тэ анэ свэнто жэртва, дон голубонэн чи дон голубонэнгэрэ пуицен, сар пхэндо дэ Упхэнима Раехкэрэ.

Симеоно тай Анна пхэнэн лав Дэвлэстар

25 Тунчи джювда дэ Ерусалимо екх мануш, савэ акхарэнас Симеоно. Вов сля дэвликуно тай жүжэ ёлэга и дожутярэлас, со Дэвэл подрицаэрэла Израиле, тай Свэнто Фано сля пэ лэстэ.

26 Свэнто Фано пхэнда лэсти, со вов на мэрэла ды кодэлэ, сар на удыкхэла Христо Дэвлэхкэрэ.

27 Лэ лиджялда Свэнто Фано дэ храмо, кала дад и дэй андэ Чяворэ Иисусо, соб тэ стерэ вса, сар трэбуни пав Упхэнима.

28 Симеоно лиля Чяворэ пэ вастэн, ваздэня слава Дэвлэсти тай пхэнда:

29 — Акань отмукэх Ту, Дэвла, Хулае, Тирэ бутярнэ
и дэх лэсти пачя кади, сар Ту и пхэндан.

30 Колэсти со дыкхле мурэ якха фириласиро Тиро,

31 саво Ту лачярдан англа всавэрэн манушэн.

32 Вов — одуд,
саво дэла душлимо важ всавэрэ народуя
и анэла слава Тирэ манушэнди, Израиlesti.

33 Дад и дэй прылиле пала дыво лава, савэ Симеоно пхэнда пала Чяворэ.

34 Тунчи Симеоно пхэнда баихталэ лава лэнди тай дэдуманя Марияти, Иисусохирия дати:

— Важ Кадэлэ Чяворэ, Саво пашлёт катэ, бут манушэн дэ Израили тэлэдэнэ и бут ваздэнапэ. И тути еджиняти чюри заджяла дэ ёлэ.

35 Вов авэла сар шпэра, сави бут мануша на прылэнэ. И оттерэлапэ вса чёрахано, со мануша рицарэн пэстэ дэ ёлэн.

36 Катэ кади ж сля и англунарька Анна, чей Фануилохири, Асирохкэрэ родостар. Вой сля манушни дэ пуранэн бэршэн, сави выджиля паларом тэрня чяя и пэххэрэ ромэгэ проджювда эфта бэрш.

37 Тунчи латэ муля ром, ивой джювда еджини охтодэша штар бэрш. Диво и рятвой терэлэс бути важ Дэвлэ, сля дэ мангима и посто и на уджялас храмостар.

38 Дэ кодяя врьама вой поджила и ачилы тэ ашарэ Дэвлэ. Тай розпхэнэлас пала Чяворэ всавэрэнди, савэ дожутярэнас фириласиро важ Ерусалимо.

39 Кала Мария и Иосифо стердэ Чяворэгэ вса пав Упхэнима Раехкэрэ, тунчи рисиле павпалэ дэ Галилея, дэ пэххоро форо Назарето.

40 Чяворо ж барёлас тай бэршэнца прылэлас бары годи и зор, тай Дэвлэхкоро мищими сля Лэгэ.

Чяворо Иисусо пэ сырботори Патради

41 Иисусохкэрэ дад и дэй кожно бэрш пхирэнас пэ Патради дэ Ерусалимо.

42 И кала Лэсти сля дэшудуй бэрш, вонэ джиле дэ Ерусалимо пэ сырботори, сар сля прылито.

43 А кала проджиля сырботори и вонэ рисявшнаас цэрэ, Чяворо Иисусо ачиляпэ дэ Ерусалимо, нэ дад и дэй на додыкхле када.

44 Нэ думисардэ, со Вов джял аврэ манушэнца. Кала ж проджиле екх диво дромэгэ, тунчи ачиле тэ родэ Лэ машкар пэхкэрэн манушэн и джянглэн.

45 Тай на аракхле Лэ, тунчи рисиле дэ Ерусалимо и роденас Лэ котэ.

46 Кала проджиле трин дивэ, аракхле Лэ дэ храмо. Вов башэлас сиклимаренца, шунэлас лэн тай пхучелас лэндэ.

47 Всавэрэ шунэнас Лэ тай дэнас дыво Лэхкэрэ годяти тай лавэнди.

48 Кала дад и дэй удыкхле Лэ, прылиле када пала баро дыво. Тунчи Лэхкири дэй пхэнда Лэсти:

— Чаворо! Со Ту стердан амэнца? Мэ тай дад Тиро родагас Тут баря дукхага дэй ёлэн.

49 Вов пхэнда лэнди:

— Пэ со тумэ роденас Ман? Чи на джянэн тумэ, со Манди трэбуни тэ авэ дэ цэр Мурэ Дадээтэ?

50 Нэ вонэ на полиле, пала со Вов пхэнда.

51 Вов рисиля лэнца дэ Назарето тай сля кандуно лэнди. Лэхкири ж дэй стидэлас кодэла лава дэ пэхкэрэ йлэ.

52 Иисусо барёлас, и Лэхкири годи ачелас барэдэр, а Дэвэл и мануша камэнас Лэ вса будэр и будэр.

3

Иоанно Болдэмари терэл бути важ Дэвлэ

1 Пэ дэшупанчто бэрш, кала Тиверии сля императоро, и кала Понтии Пилато сля баэрдэрэгэ дэ Иудея, а Иродо сля тетрархо дэ Галилея, лэхкоро пхрал, Филиппо, сля тетрархо дэ Итурея тай дэ пхув Трахонитско, а Лисаний сля тетрархо дэ Авилиния.

2 Англунэ рашаенца тунчи сле Аннас тай Каиафа. Дэ кодыя вряма бичалдо сля Лав Дэвлэхкоро дэ шуки пхув Иоанностэ, Захарияхкэрэ чявштэ.

3 Иоанно пхирэлас пав всавири пхув паша Иордано, прыакхарэлас манушэн тэ отрисява бээзимастар тай тэ болдэпэ, соб Дэвэл тэ эртисарэл лэнгоро бэзимо.

4 Сар чинда англунари Исаия:

«Гласо дэ шуки пхув типисявл:

Лачярэн дром Раести,

терэн ваях Лэ чячे дромора.

5 Тхана, савэ машкар плаен, — ваздэнапэ,
а вуче плая тай цыкнэ плаёра — тэлёна,
бангэ дрома — выцырдэнапэ,
и помардэ дрома — авэна лачярдэ.

6 Тунчи всавэрэ мануша дыкхэна фиригаримо Дэвлэхкоро».

7 Иоанно пхэналас манушэнди, савэ авиле лэстэ тэ болдэл:

— Родо сапэнгоро! Ко пхэнда тумэнди тэ нашэ бидатар, сави пэ тумэн джял?

8 Мэк тумарэ риндууря сикавэн, со тумэ ачявдэ бэзимо, и на думисарэн: «Амаро дад исин Абраамо». Пхэнав тумэнди, со Дэвлэстэ исин зор кадэла барэндар тэ терэ чявшэн Абраамости.

9 Акэ, товэр лачярдо и тала каштэнгоро корни пашлёт: кожно кашт, саво на анэл лачё барило, сцинэн и чувэн дэ яга.

10 Пхученас лэ мануша:

— Со амэнди тэ терэ?

11 Вов пхэнда лэнди:

— Касть исин дуй гада, отдэ екх кодэлэсти, касть нэнай. И касть исин хамо, дэ епаши кодэлэсти, касть нэнай.

12 Авиile тэ болдэпэ стидэмаря, савэ лэнас налогуря, тай пхучле лэстар:

— Сиклимар! Со амэнди тэ терэ?

13 Вов пхэнда лэнди:

— На лэн манушэндар будэр, сар тумэнди прыпхэндэ тэ лэн!

14 Пхученас лэ и халавдэ:

— Со амэ тэ терах?

Вов пхэнда лэнди:

— На залэн манушэндар зорага, на дошарэн манушэн ёвья и джювэн пэ ловэн, савэ потинэн тумэнди.

15 Мануша дожутярэнас тай гинисардэ пала Иоанно:

— Чи на Христосо вов исин?

16 Иоанно пхэнда всавэрэнди:

— Мэ болдав тумэн панега, нэ джял пала ман зорэдэр мандар, мэ на ачяв тэ розпхандэ Лэсти пундрангэ. Вов болдэла тумэн Свэнтонэ Фанога тай ягага.

17 Каштуни ғанавди дэ вастэ Лэстэ, тай Вов жужарэла див и стховэла ла дэ граждо, а кода, со ачилиягэ, спхабарэла дэ яга, савя нащи тэ мурдарэ.

18 Бут инте со пхэнэлас Иоанно, кала дэдумэлас Бахтало Лав.

19 Кала ж Иоанно дошарда Иродо, саво сля тетрархо, пала кода, со вов лиля пала пэ пхралэжкия ромня, и пала авэр налаче рүндууря,

20 тунчи Иродо додэнэя пэхкэрэ бэзимастэ инте кода, со чута Иоанно дэ барунэ.

Исусо болдэлээ

21 Кала болдэнепэ всавэрэ мануша, болдэняпэ кади ж Исусо. И кала Вов мангэлэспэ, оттердапэ упралимо,

22 и Свэнто Фано сджиля упранл пэ Исусо, сар голубо, тай сля гласо упралимастар, саво пхэнэлас:

— Ту — Муро камло Чяво! Ту — Мури бари бахт!

Родо Исусохкоро

23 Кала Исусо ачилия тэ терэ бути важ Дэвлэ, Лэсти сля пашэ трянда бэрш. Сар думисарэнас, Вов сля Иосифохкоро Чяво. И Лэхкэрэ пхурэнца сле Илья,

24 Матфато, Левии, Мелхии, Ианнаи, Иосифо,

25 Маттафия, Амосо, Наумо, Елии, Наггей,

26 Маафо, Маттафия, Шымьи, Иосифо, Иодаи,

27 Иоханано, Рисай, Зоровавели, Шэалтиило, Нирии,

28 Мелхии, Аддии, Косамо, Элмадамо, Иро,

29 Иосии, Элиезеро, Иоримо, Матфато, Левии,

30 Симеоно, Иуда, Иосифо, Ионамо, Элиакимо,

31 Мелеаи, Майнаи, Маттафай, Нафано, Давидо,

32 Иессеи, Овидо, Боазо, Сала, Нахшоно,

33 Аминадаво, Админо, Арнии, Хецроно, Парецо, Иуда,

34 Иаково, Исаако, Авраамо, Терахо, Нахоро,

35 Серуго, Рейо, Пелего, Еверо, Шэлахо,

36 Каинано, Арпахшадо, Симо, Нои, Ламехо,

37 Мафусало, Енохо, Иаредо, Малелейло, Каинано,

38 Еноско, Сифо, Адамо, Дэвэл.

4

Баро бэнг зумавэл Исусо

1 Исусо, пхэрдило Свэнтонэ Фанога, рисиля Иорданостар тай лиджялдо сля Фанога да шуки пхув.

2 Котэ Лэ саранда дивэ зумавэлас баро бэнг. Всавэрэ кадэла дивэ Вов нисо на халас тай ачилия бокхало.

3 Тунчи пхэнда Лэсти баро бэнг:

— Кала Ту — Дэвлэхкоро Чяво, тер мандро кадэлэ барэстар.

4 Пхэнэл лэсти Исусо павпалэ:

— Чиндо: «На кици мандрэгэ джювэл мануш».

5 Тунчи ваздэня Лэ баро бэнг пэ вучё плай тай сикавда Лэсти всавэрэ тхагарима, савэ исин пэ люмля, пала цыро врьма.

6 Тай пхэнда Лэсти баро бэнг:

— Мэ отдава Тути всавэрэ зор тай слава, савэ исин дэ кадэлэн тхагаримэн. Вса када дэно манди, и мэ када дав, касти камав.

7 Вса када авэла Тиро, кала Ту тэлёга англа ман.

8 Исусо пхэнда лэсти:

— Чиндо: «Рае Дэвлэсти тэллюв тай кици Лэсти тер тири бути».

9 Тунчи баро бэнг лиджялда Лэ дэ Ерусалимо, тховда пэ майвучё тхан дэ храмо тай пхэнда Лэсти:

— Кала Ту — Дэвлэхкоро Чяво, тунчи хук тэлэ.

10 Колэсти со чиндо:

«Ангелонэнди Пэхкэрэнди Вов прыпхэнэла тэ фирикарэн Тут».

11 «Пэ вастэн пхиравэна Тут,
тэ на дукхавэллэ барэстар пуро Тиро».

12 Исусо пхэнда лэсти павпалэ:

— Пхэнэл: «На зумав Тирэ Рае Дэвлэ».

13 Тунчи баро бэнг пэрэачиля тэ зумавэ Лэ тай отджиля Лэстар пэ врьма.

Исусо ачел тэ сиклярэ дэ Галилея

14 Тунчи Исусо рисиля дэ Галилея, пхэрдило зорага Фаностар, тай розджиляя пала Лэ дума пав всавири кодыя пхув.

15 Вов сиклярэлас дэ синагоги, тай всавэрэ ашарэнас Лэ.

Исусо на прылэн дэ Назарето

16 Тунчи Исусо авиля дэ Назарето, тев Вов выбариля, и, сар Лэстэ сля прылито, дэ суббота заджиля дэ синагога тай вишия, соб тэ динэ.

17 Лэсти дэне лил, саво чинда англунари Исаия. Исусо оттерда лэ тай аракхля тхан, тев сля чиндо:

18 — Фано Раехкоро пэ Ман,
колэсти со Вов помакхля Ман
тэ пхэнэ Бахтало Лав чёрэнди.

Вов бичалда Ман тэ дэдумэ спханглэ манушэнди,
со лэн отмукэнэ пэ воля,
корэнди, со авэна тэ дыкхэз,
и тэ фирикарэ кодэлэн, савэ хан грыжа,

19 тай тэ розпхэнэ, со авиля лачи врьма Раехкири.

20 Тунчи Исусо стховда лил, отдэня павпалэ бутярнэсти дэ синагога тай бэшля. Тай всавэрэ ды екхэ дэ синагога дыкхэнас пэ Лэстэ.

21 Тай ачиля тэ дэдумэ лэнди:

— Авдивэ стердапэ пав лавэн, савэ тумэ шундэ екхатар.

22 Всавэрэ ашарэнас Лэ тай фартэ лошавэнас Лэхкэрэ бахталэ лавэнди. Тай пхэнэнас:

— Чи на Иосифохкоро Вов Чяво?

23 Исусо пхэнда лэнди:

— Тумэ дэна Манди пэ гындо лав, сар мануша пхэнэн: «Састимари, састяр еджино п!» И кади ж пхэнэнэ: «Амэ шундэ, со Ту тердан дэ Капернаумо. Стер када и катэ, тев Ту выбарилян».

24 Нэ пхэнав тумэнди чячимо: ни екхэ англунаре на прылэн котэ, тев вов бария.

25 Пхэнав тумэнди чячимо: дэ время, кала джювуда Илья, дэ Израили сля бут джювлен, савэндэ мule рома. Тунчи трин епашега бэрш на сля брышинд, тай пав всавири пхув сля бари бокх.

26 Тай никастэ лэндар на сля бичалдо Илья, кици дэ Сарепта паша Сидоно джювлятэ, савяzt муля ром.

27 Кади ж дэ Израили бут сля насвалэн, пэ савэн сля проказа, кала джювуда англунари Елисеи. Тай нико лэндар на састьярдалэ, кици екх Неемано Сириятар.

28 Кала мануша дэ синагога шундэ кадэла лава, вонэ фартэ мижыле.

29 Тунчи вонэ всхукле тай поцырдэне Исусо аври пэ плай, пэ савэ сля ваздэно форо, соб тэ счувэ тээл.

30 Нэ Вов проджилия машкар лэн тай уджиля котарь.

Исусо вытрапдэл бэнгэ манушэстар

31 Тунчи Исусо джилия дэ форо Капернаумо, саво дэ Галилея, тай дэ суббота сиклярэлас котэ манушэн.

32 Тай динэнас пала дыво сикляримо Лэхкоро, колэсти со дэ Лэхкэрэ лавэн сля барий зор.

33 Котэ, дэ синагога, сля мануш, дэ савэ сля нажужэ бэнгэхкоро фано. Тай вов фартэ затиписиля:

34 — Аа! Со Тути трэбуни амэндар, Исусо Назаретостар? Ту авилян, соб тэ хасярэ амэн? Мэ джяниав, Ко Ту Кацаво! Ту — Свэнто Дэвлэхкоро!

35 Нэ Исусо запхэнда лээти:

— Заач мулком тай выджая лэстар!

Тунчи бэнг аравда манушэ англа всавэрэн пэ пхуя, тай выджилия лэстар, тай на стерда манушэсти нисави бида.

36 Тунчи дэнэ пэ всавэрэн бари дар, тай пхэнэнас екх экхэсти:

— Катарь дэ Лэхкэрэ лавэн кацави бари зор, со Вов прыпхэнэл нажужэнди тай вонэ кандэн Лэ?

37 Тай дума пала Исусо розджилия пав всавири кодыя пхув.

Исусо састьярэл бутэн манушэн

38 Тунчи Вов ачявда синагога тай джилия Симоностэ цэрэ. Симонохири пхуромни пашлёлас насвали дэ пхабарима. Тай мангле Исусо, соб Вов тэ састьярэлла.

39 Вов тэлия латэ тай прыпхэнда пхабаримости тэ ачявл ла. Тунчи пхабаримо ачявда ла, тай джювли екхатар ушилия и ачилия тэ стидэ важ лэн скаминд.

40 Кала бэншэлас кхам, ачиле тэ анэ Исусостэ фартэ насвалэн манушэн. Вов тховлас пэ лэндэ васта тай састьярэлас лэн.

41 И бутэ манушэндар выджаинас бэнга тай типисявшнас:

— Ту — Чаво Дэвлэхкоро!

Нэ Исусо пхандэлас лэнди мую тай запхэнэлас тэ дэдумэ, колэсти со вонэ джяянгле, со Вов — Христосо.

Исусо джяял дэ аврэн форонэн

42 Кала авиля диво, Исусо джилия дэ шуки пхув, нэ мануша родэнас Лэ. Тай кала аракхле, мангнэас Лэ, соб тэ ачеллэ лэнца.

43 Нэ Исусо пхэнда лэнди:

— Манди трэбуни тэ пхэнэ Бахтало Лав пала Дэвлэхкэрэ Тхагарима и дэ аврэн форонэн. Пэ кадэва рындо Мэ и слём бичалдо.

44 Тай сиклярэлас дэ синагоги пав Иудея.

5

Сиклярнэ астарэн бут мачен

1 Ехвар Исусо ачила паша Генисаретско озеро, тай бут манушэн стидэнепе паша Лэстэ, соб тэ шунэ Дэвлэхкоро Лав, и стасавэнас Лэ всавэрэ ригэндар.

2 Вов удыкхля дуй лодкы пэ пане паша пхуя и мачярен, савэ выджели лодкэндар и халавэнас кхувдя.

3 Исусо заджила дэ Симонохкири лодка тай помангля Симоно тэ отлиджял ла пав пане надур пхуятар. Тунчи бэшля и лодкатар ачила тэ сиклярэ манушэн.

4 Кала ж пэрэачиля тэ сиклярэ, пхэнда Симоности:

— Отлиджя лодка дурэдэр пхуятар, тев будэр пани, тай зачув кхувдя тэ астарэн мачё!

5 Симоно пхэнэл Лэсти:

— Пхурэдэр амаро! Амэ всавири рят терағас пхари бути и камле тэ астарэ мачё, тай вса ивья. Нэ сар Ту пхэнэх, мэ кандава Тут тай инте зачувава кхувди.

6 Кала вонэ кади стердэ, тунчи астардэ фартэ бут мачен, пэ скици бут, со кхувди ачилга тэ чинэпэ.

7 Тунчи вонэ сикавдэ вастэнца амалэнди, савэ сле пэ авэр лодка, соб тэ подрицаарн лэн. Кодэла авиле тай ітханэ зачутэ пхэрдо мачё дэ лэдүй лодкы, када со лодкы ачиле тэ тасё.

8 Кала дыкхля вса откада Симоно Пётро, вов тэлиля Исусохкэрэ чянгэндэ тай пхэнда:

— Выджа мандар, Рае! Кодэлэсти со мэ мануш дэ бэзима!

9 Бари дар дэня пэ лэстэ тай пэ всавэрэн, ко дыкхля, скици мачё вонэ астардэ.

10 Трашане кади ж амала Симонохкэрэ, Иаково тай Иоанно, Зеведеехкэрэ чяве. Нэ Симоности Исусо пхэнда:

— На дар. Аканы манушэн авэгэ тэ астарэ.

11 Тунчи вонэ выцырдэне лодкы пэ пхув, ачывдэ вса тай джиле пала Исусо.

Исусо састиярэл манушэдэ проказа

12 Ехвар Исусо сля дэ екх форо. Тунчи авиля Лэстэ мануш, пэ савэстэ сля насвалимо проказа. Вов пэля англа Исусо пэ муй тай мангля Лэ мангимага:

— Рае! Коли закамэга, Ту жужарэга ман!

13 Исусо процырдэнэ васт, лиляпэ лэстэ тай пхэнда:

— Камав, жужарплз!

Тунчи проказа еххатар сджиля лэстар.

14 Исусо прыпхэнда лэсти:

— Никасти на розпхэн пала кода, нэ джя, сикавпэ рашаести тай ан жэртва пала кода, со жужарданлэ, сар пхэнда Моисеи, соб вонэ када тэ дыкхэн.

15 Нэ инте будэр розджиляпэ дума пала Исусо, тай фартэ бут манушэн джянас Лэстэ, соб тэ шунэ Лэхкэрэ лава тай тэ састиярэ бутэ дукхэндар.

16 Нэ Вов уджялас дэ тханэн, тев манушэн на сля, соб тэ мангэпэ.

Исусо састиярэл манушэ, саво на пхирэлас

17 Ехвар, кала Исусо сиклярэлас манушэн, котэ сле фарисея тай сиклимаря пав Упхэнима. Вонэ авиле всавэрэ тханэндар Галилеятар, Иудеятар тай Ерусалимостар. И зор Раехкири сля пэ Исусо, соб тэ састиярэ манушэн.

18 Тай акэ, андэ пэ пато насвалэ, саво на пхирэлас, тай камле тэ залиджя лэ дэ цэр тай тэ тховэ англа Исусо.

19 Тай на аракхле, сар тэ анэ лэ дэ цэр, колэсти со фартэ бут манушэн сля паша цэрэ. Тунчи вонэ ваздэнепэ упрэ пэ цэр, розлиле ушарди тай змукле насвалэ пэ пато англа Исусо.

20 Кала Вов удыкхля лэнгоро патявимо, тунчи пхэнда насвалэсти:

— Мануша! Отмукэллэ тути тиро бэзимо.

21 Сиклимаря пав Упхэнима тай фарисея ачиле тэ дэдумэ еджинэ пэсти дэ гындо:

— Ко Вов исин, со дэдумэл кацаэ бэзимахкэрэ лава? Кици Дэвлэстэ исин зор тэ эртисарэ бэзимо манушэсти!

22 Иисусо полиля, со лэндэ дэ гындо, тай пхэнда лэнди:

— Сости тумэ гинисарэн кади дэ тумарэн ёлэн?

23 Со локхэдэр, тэ пхэнэ: «Отмукэлпэ тиро бэзимо», — чи тэ пхэнэ: «Вщи тай пхир»?

24 Нэ соб тумэ тэ джянэн, со Манушыканэ Чавэстэ исин зор тэ эртисарэ бэзимо, — пхэнда Вов наасвалэсти:

— Тути пхэнав: Вщи, лэ пато тиро тай джя цэрэ!

25 Тунчи Вов екхатар вшия англа лэндэ, лиля кода, пэ со пашлёлас, джиля цэрэ и ваздэлас слава Дэвлэсти.

26 Тунчи и вонэ ваздэнас Дэвлэсти слава тай пхэнэнас:

— Авдивэ амэ пэхкэрэ якхэнца дыххле кода, со на сля никала!

Иисусо акхарэл Левие

27 Пала кадлэ Иисусо выджаилия тай удыххля стидэмаре, саво лэлэс налогуря, акхарэнас лэ Левии. Вов бэшэлас паша тханэ, тев здэнас налогуря. Тай пхэнда лэсти Иисусо:

— Джя пала Ман!

28 Вов ачявда вса тай джиля пала Иисусо.

29 Тунчи Левии тховда важ Иисусо баро скаминд пэстэ цэрэ. Лэнца пала скаминдэ сля бут аврэн манушэн и стидэмарен.

30 Фарисея тай сиклимаря пав Упхэнима сле дэ холя и пхученас Иисусохкэрэ сиклярнэн:

— Сости тумэ хан и пэн стидэмаренца тай бэзимахкэрэ манушэнца?

31 Иисусо пхэнда лэнди:

— На састэ манушэнди трэбүни састиами, нэ наасвалэнди.

32 Мэ авилём тэ прыякхарэ, соб тэ обрисявэнпэ Дэвлэстэ на бидошакэрэ мануша, а кодэла, сава джювэн дэ бэзима.

Иисусо пхэнэл пала посто

33 Тунчи вонэ пхэндэ Иусости:

— Иоаннохкэрэ тай фарисеенгэрэ сиклярнэ мангэнпэ тай рицарэн посто, а Тирэ сиклярнэ хан тай пэн.

34 Иисусо пхэнда лэнди:

— Сар тумэ пхэнэна пэ бяяв манушэнди тэ рицарэн посто, кала лэнца тэрно?

35 Нэ авэла вряза, кала лэндар залэлэлэ тэрно, тунчи авэна тэ рицарэн посто.

36 Тунчи Вов пхэнда лэнди кацави дума:

— Нико на прысювэл пуррана ёдатэ котор, саво отчиндо нэвя ёдатар. Кодэлэсти со тунчи и нэви ёда мусарэла, и пуранятэ на поджаяла.

37 Нико на чувэл тэрно мол дэ пуррано гравлицико гоноро, колэсти со и гоноро пхарола, и мол розчувэлапэ.

38 Нэ тэрно мол чувэн дэ нэвэн гравлицикунэн гонорэн.

39 Тай нико на закамэла тэ пэ тэрно мол, кала зумавда пуррано мол, нэ пхэнэла: «Пуррано фэдэр».

6

Иисусо терэл бути дэ суббота

1 Екхвар дэ суббота джялас Иисусо сиклярнэнца маляг'a, а сиклярнэ сцинэнас див, розхосэнас вастэнца тай ханас ворзо.

2 Койсавэ фарисеендар пхэндэ Лэсти:

— Сости тумэ терэн кода, со нащи тэ терэ дэ суббота?

3 Иисусо пхэнда лэнди:

— Тумэ со, на динэнас, со терда Давидо, кала вов тай лэхкэрэ мануша ачила бокхалэ?

4 Вов заджиля дэ Дэвликуно Цэр, лиля мандро, свэнтикардо Дэвлэсти. Вов еджино лэ хаял тай дэня пэхкэрэ манушэнди. А кодэва мандро нащи никасти сля тэ ха, кици рашаенди.

5 Тунчи Иисусо пхэнда лэнди:

— Чаво Манушыкано исин субботакоро Хулай.

Иисусо састьярэл дэ суббота

6 Дэ авэр суббота Иисусо заджила дэ синагога тай ачиля тэ сиклярэ. Котэ сля екх мануш, савэстэ чячё васт сля шуко.

7 Сиклимаря пав Упхэнима тай фарисея дыкхэнас пала Иисусо, чи састьярэла Вов дэ суббота, соб тэ дошарэ Лэ.

8 Нэ Вов джянэлас лэнгоро гындо тай пхэнда манушэсти шукэ вастэгэ:

— Вщи тай выджа машкар!

Мануш подлиляэ тай ачиля машкар.

9 Тунчи Иисусо пхэнда лэнди:

— Пхучяв тумэн: трэбуни дэ суббота тэ терэ лачимо чи бибаих? Тэ фирикарэ води чи тэ муляэрэ?

10 Тунчи Вов подыкхля пэ всавэрэн тай пхэнда манушэсти:

— Процырдэ тиро васт!

Вов стерда кади, и васт ачиля састо.

11 Вонэ фартэ мижыле тай ачила тэ дэдумэ екх екхэгэ, со лэнди тэ терэ Иисусога.

Иисусо вытидэл дэшдууен апостолонан

12 Дэ кодэлэн дивэн Иисусо джиля пэ плай тэ мангэпэ тай мангляпэ Дэвлэсти хотэ всавири рят.

13 Кала авиля диво, Иисусо акхарда Пэхкэрэн сиклярнэн тай вытидэнэ лэндар дэшдууен, савэнди дэня лав «апостолуря»:

14 Симоно, савэ акхарэнас Пётро, лэхкоро пхрал Андреи, Иаково, Иоанно, Филиппо, Варфоломеи,

15 Матфеи, Фома, Иаково Алфеекхоро, Симоно, пэ савэ пхэнэнас «Зилото»,

16 Иуда Иаковохкоро тай Иуда Искариото, саво ачиля здымарега.

Ко исин баахталэ, тай ко исин бибаахталэ

17 Тунчи Иисусо зму克ляпэ лэнца плаестар пэ маля. Паша Лэстэ стидэняпэ фартэ бут манушэн: Лэхкэрэ сиклярнэ, мануша всавирия Иудеятар тай Ерусалимостар, кади ж Тиростар тай Сидоностар, форонэндар, савэ ачен паша море.

18 Вонэ авиле тэ шунз Лэхкэрэ лава тай тэ састьярэпэ пэхкэрэ дукхэндар. Тай мануша, савэн марэнсан нажужэ, састьяренасти.

19 Всавэрэ вонэ камле тэ лэпэ Иисусостэ, колэсти со Лэстар выджаилас бари зор тай састьярэлас манушэн.

20 Тунчи Иисусо подыкхля пэ Пэхкэрэн сиклярнэн тай пхэнда:

— Баахталэ тумэ, чёрорэ!

Тумаро исин Тхагаримо Дэвлэхкоро.

21 Баахталэ тумз, бокхалэ акана!

Тумэ авэна чялярдэ.

Баахталэ, савэ ровэн акана!

Тумэ авэна тэ лошавэ.

22 Баахталэ тумэ,

кала мануша тумэн на камэнэ,
кала авэна тэ вытградэ тумэн,

тэ кошэ тумаро лав,
тэ пхэнэ пэ тумэн налаче лава пала Чявэ Манушыканэ.

23 Кадики ж теренас англunaренца и дада кадэлэ манушэнгэрэ! Лошавэн тунчи тай хүкэн лошатар! Бари цимин потинэна тумэнди пэ упралима.

24 Нэ бида тумэнди, барвалэ!

Тумэ катэ ужэ чялиле джювимага.

25 Бида тумэнди, чялэ!

Тумэ авэна бокхалэ.

Бида тумэнди, ко асалпэ акана!

Тумэ авэна тэ ровэ

и ваздэна типимо дэ грыжа.

26 Бида тумэнди,

кала авэна тэ ашарэ тумэн всавэрэ мануша!

Колэсти со лэнгэрэ дада кади ж ашаренас хохавнэн англunaрен.

Исусо сиклярэл тэ камэ врыжымашэн

27 Тумэнди, ко шунэн, Мэ пхэнав: камэн тумарэн врыжымашэн. Терэн лачимо кодэлэнди, ко тумэн на камэн.

28 Пхэнэн бахталэ лава кодэлэнди, савэ придэн тумэн мрая. Мангэн Дэвлэ пала кодэлэн, ко акошэл тумэн.

29 Ко дэла палма тут пав ех чямни, бандяр лэсти авэр. Ко залэл тутар упралини ѫда, дэ лэсти тэ отлэ и гад тиро.

30 Всавэрэнди, ко мангэл тутэ, дэ. Кодэлэстар, ко отлэл тутар, на манг павпалэ.

31 Сар тумэ камэн, соб тумэнди тэ терэн мануша, кади и тумэ терэн лэнди.

32 Кала камэн кици кодэлэн, ко камэл тумэн, пала со тумэн тэ ашарэ? Кади ж мануша дэ бэзима камэн кодэлэн, ко лэн камэл.

33 Кала терэн лачимо кодэлэнди, ко тумэнди терэл лачимо, пала со тумэн тэ ашарэ? Мануша дэ бэзима кади ж терэн.

34 Кала дэн ловэ дэ вуджилима кодэлэнди, каастар думисарэн тэ лэ павпалэ, тунчи пала со тумэн тэ ашарэ? Мануша дэ бэзима кади ж залэн кодэлэнди, каастар думисарэн тэ лэ павпалэ.

35 Нэ тумэ камэн тумарэн врыжымашэн, терэн лачимо лэнди, залэн дэ вуджилима тай на доожутяран, со тумэнди отдэна павпалэ. Тунчи бари цимин тумэнди потинэна. Тумэ авэна Барэдэрэхкэрэ чявэнца, колэсти со Вов терэл лачимо и налаченди, и мижэнди.

36 Сар ковло ѫло тумарэ Дадэстэ, кади тумэ ковлисарэн тумарэ ѫлэ манушэндэ.

Исусо сиклярэл, со наци тэ сундисарэ манушэн

37 На сундисарэн, тай еджинэ на авэна сундисардэ. На дошарэн, тай тумэн на дошарэн. Эртисарэн, тай тумэнди авэла эртисардо.

38 Дэнтэ, и тумэнди дэлапэ. Дэлапэ дэ бэрг тумэнди пхэрдо, кади чувэлапэ, со авэла прытасавдо и авэла тэ вычувэпэ аври. Сар тумэ дэна, кади и тумэнди дэно авэла.

39 Тунчи Иисусо пхэнда кацави дума:

— Чи лиджяла коро корэ? Чи на пэрэна вонэ лэдуй?

40 Сиклярно на барэдэр сиклимарестар, нэ сар высыклёлапэ, авэла, сар сиклимари.

41 Со ту дыкхэх сулуморы дэ якха тирэ пхралэстэ, нэ дэ пэхкиря якха баро кашт на дыкхэх?

42 Сар пхэнэгта тирэ пхралэсти: «Пхрала, дэ, вылава сулуморы тирия якхатар!» — кала ту дэ пэхкиря якха баро кашт на дыкхэх? Домуенгоро, англал вылэ кашт тирия якхатар, тунчи мишто дыкхэгта, сар тэ вылэ сулуморы якхатар тирэ пхралэстэ.

43 Лачё кашт на анэл цэрно барило. А цэрно кашт на анэл лачё барило.

44 Пав барило уджянэллэ кашт. На стидэн инжыро пусанэ рандендар, на стидэн виноградо пусанэ чярендар.

45 Лачё мануш вылэл лачимо мищимастар, саво исин лэстэ дэ ѹлэ. Налачё мануш вылэл пэхкэрэ ѹлэстар бибаихт. Кода, со пхэрдо дэ ѹлэ, выджаил чибатар манушэстэ.

Цэр пэ барэ

46 Со тумэ акхарэн Ман: «Pae! Pae!» — а на терэн, сар Мэ тумэнди пхэнав?

47 Мэ пхэнава тумэнди, пэ каастэ счувэллэ мануш, саво авэл Мандэ, ашунэл, со Мэ пхэнав, и терэл кода.

48 Вов — сар кодэва мануш, саво выг'анавда пхув ды барэн и ваздэня пэхкоро цэр пэ баруно фундаменто. Кала дэня пэ цэр баро пани лэнятар, вов на аравда цэр, колэсти со вов сля мишто стердо.

49 Мануш, саво шунэл Муро лав, нэ на джүвэл пав лэ, счувэллэ пэ манушэ, саво ваздэня цэр пэ пхуя. Тунчи дэня пэ цэр баро пани лэнятар, екхатар аравда кодэва цэр и фартэ розмарда лэ.

7

Исусо састиярэл шэлякэрэ халавдэхкэрэ бутярнэ

1 Кала Иисусо пэрэачиля тэ дэдүмэ манушэнди, Вов авиля дэ Капернаумо.

2 Котэ сля ехк шэлякоро пхурэдэр. Лэхкоро бутярно, саво важ лэ сля кучутно, фартэ занасвалия и сля паша мэримастэ.

3 Шэлякоро пхурэдэр шунда пала Иисусо тай бичалда Лэстэ иудеенгэрэн пхурэдэрэн тэ мангэн Иисусо, соб Вов тэ авэл и тэ састиярэл бутярнэ.

4 Вонэ авиле Иисусостэ, фартэ мангле Лэ и пхэнэнас:

— Кадэва мануш ачел, соб Ту тэ терэх важ лэ каварындо.

5 Колэсти со Вов камэл амаро народо тай ваздэня амэнди синагога.

6 Иисусо джилия лэнца. Кала Вов сля пашэ цэрэстэ, шэлякоро пхурэдэр бичалда Лэстэ англал пэхкэрэн амалэн, соб вонэ тэ пхэнэн:

— Rae! На трэбуни Тути тэ цинё! Мэ на ачяв, соб Ту тэ заджях мандэ дэ цэр!

7 Нэ мэ еджино на ачяв тэ авав Тутэ. Кици пхэн лав, и састиярэлапэ бутярно муро.

8 Упрэ мандар исин пхурэдэра, савэн мэ кандав. Нэ исин мандэ халавдэ, савэ ман кандэн. Пхэнав еххэсти: «Джя!» — и вов джаял. Пхэнав аврэсти: «Ав!» — и вов авэл. Пхэнав мурэ бутярнэсти: «Тер!» — тай вов терэла.

9 Иисусо шунда кадэла лава, прылия пала дыво, обрисиля тай пхэнда манушэнди, савэ джянас пала Лэ:

— Пхэнав тумэнди, со и дэ Израили на аракхлём Мэ кацаво патявимо.

10 Кала мануша, савэн бичалдэ Иисусостэ, рисиле цэрэ, вонэ удыкхле, со насвало састиярдапэ.

Исусо ваздэл мулэндар тэрнэ манушэ

11 Тунчи Иисусо джилия дэ форо, саво акхарэллэ Наино. Джянас пала Лэ бут Лэхкэрэн сиклярнэн и фартэ бут манушэн.

12 Кала Вов поджилия форохкэрэ вударэндэ, котарь вылиджянас тэ гаравэ тэрнэ чиявэ. Вов сля ехк пэхкирия датэ, савятэ муля ром. Фартэ бут манушэн кодэлэ форостар джянас ётханэ лага.

13 Кала Рай удыкхля ла, Лэсти ачиля дор кадэла манушня. Тай пхэнда Вов лати:
— На ров!

14 Тунчи Вов поджилия тай лиляпэ вастэгэ гробостэ. Мануша, савэ лиджянас гробо, ачиле. Вов пхэнда мулэсти:

— Чяво! Тути пхэнав, вщи!

15 Муло ваздэняпэ, бэшля тай ачиля тэ дэдумэ. Тунчи Иисусо отдэня лэ дати.

16 Пэ всавэрэн дэня бари дар. Вонэ ачиле тэ ваздэ слава Дэвлэсти тай пхэненас:

— Баро англуниари ваздэняпэ машкар амэн, и Дэвэл авиля Пэхкэрэ манушэндэ.

17 Кади дэдумане пала Иисусо пав всавири Иудея тай дэ пхуен, савэ сле пашэ.

Иисусо пхэнэл пала Иоанно

18 Иоаннохкэрэ сиклярнэ розпхэндэ Иоанности пала кода, со стердапэ. Иоанно акхарда дон пэхкэрэн сиклярнэн

19 тай бичалда Раестэ тэ пхучен Лэстар:

— Ту исин Кодэва, Касти трэбуни тэ авэ, чи трэбуни амэнди тэ дожутярэ аврэ?

20 Мурша авиле Иисусостэ тай пхэндэ:

— Иоанно Болдэмари бичалда амэн тэ пхуче Тут: «Ту исин Кодэва, Касти трэбуни тэ авэ, чи трэбуни амэнди тэ дожутярэ аврэ?»

21 Дэ кодыя връяма Иисусо бутэн манушэн састярэлас насвалимэндар и дукхэндар, вытрадэлас налачен тай бутэ корэнди оттерэлас якха.

22 Тунчи Вов пхэнда Иоаннохкэрэ сиклярнэнди:

— Джян, пхэнэн Иоанности, со тумэ дыкхле тай шундэ: корэ дыкхэн, лангэ пхирэн, мануша дэ проказа жужарэнпэ латар, кашукэ шунэн, мулэ отджювдён, и чёрэнди пхэнэлпэ Бахтало Лав.

23 Бахтало кодэва, ко пала Ман на змарэлапэ дромэстар.

Иисусо ашарэл Иоанно

24 Кала бичалдэ Иоанностар джиле, Иисусо ачиля тэ пхэнэ манушэнди пала лэ:

— Со тумэ пхирдэ тэ дыкхэ дэ шуки пхув? Чяр, сави тинисявлэл барвалятар?

25 А сар на кади, ка тумэ пхирдэ тэ дыкхэ: манушэ дэ ковля ѹда? Нэ кодэла, савэ урязвэнпэ дэ райканы ѹда тай джювэн дэ барвалима, бэшэн дэ тхагарнэн цэрэн.

26 Ка тумэ пхирдэ тэ дыкхэ: англунаре? Кади, пхэнав тумэнди, вов барэдэр, сар англунара.

27 Вов кодэва, пала каствэ чиндо:

«Акэ, Мэ бичалав Мурэ манушэ англа Тиро муй.

Вов лачярэла дром Тиро англа Тут».

28 Пхэнав тумэнди: машкар кодэлэн, савэ джювлендар бэнепэ, нэнай ни екхэ англунаре барэдэр Иоанностар. Нэ цыкнэдэр дэ Дэвлэхкэрэ Тхагарима исин барэдэр лэстар.

29 Всавэрэ мануша, савэ шундэ Иисусо, тай стидэмара прыдяянгле, со Дэвлэхкоро дром исин чячюно. Тунчи болдэнепэ Иоаннохкэрэ болдимага.

30 А фарисея тай сиклимаря пав Упхенима на прылиле Дэвлэхкири воля и на болдзнепэ.

31 Тунчи Рай пхэнда:

— Пэ каствэ счувэлпэ кадэва родо? Пэ каствэ счувэнпэ кадэла мануша?

32 Вонэ счувэнпэ пэ чяворэн, савэ бэшэн пэ форо, акхарэн екх екх тай пхэнэн: «Амэ цэлдэ тумэнди пэ дудка,

нэ тумэ на цэлэнас пэ пурэн.

Амэ дилибане тумэнди дили ровимахкэрэ,
нэ тумэ на ровэнас».

33 Акэ, авила Иоанно Болдэмари, на хал мандро и на пэл мол, а тумэ пхэнэн: «Дэ лэстэ бэшэл бэнг».

34 Авиля Чяво Манушыкано, хал и пэл, а тумэ пхэнэн: «Акэ исин Мануш, Касти чялёл тэ ха и тэ пэ. Вов амал стидэмаренди тай бэзимахкэрэ манушэнди!»

35 Нэ кодэла, ко прылэн бари Дэвлэхкири годи, кадэлэгэ сикавэн, со када чячимо.

Джюэли дэ бэзима макхэл кучутнэ мирога Иисусохкэрэ пурэ

36 Екх фарисеи акхарда Исусо скаминдэстэ, тай Вов заджиля лэстэ дэ цэр и залияа тхан пала скаминдз.

37 Тай акэ, екх джювилэ дэ бэзима кодэлэ форостар уджянглия, со Исусо дэ цэр фарисеестэ пала скаминдэ, анда алабастрово вакхор кучутнэ мирога.

38 Вой вшияа павпалэ, паша Исусохкэрэн пурэн, заровиня, тай лакэрэ ясва ачиле тэ чюлэ. А вой выкхосэлас Исусохкэрэн пурэ пэхкэрэ балэнца, чюминдэлас лэн и макхэлас мирога.

39 Фарисеи, саво акхарда Исусо, удыххля када тай пхэнда пэсти дэ гындо: «Тэ авэл Кадэва Мануш чячимага англунари, Вов бы джянэлас, сави манушни Лэстэ лэллэ тай дэ савэ бэзима вой джювэл».

40 Исусо пхэнда лэсти:

— Симоно! Камав тэ пхэнэ тути екх лав.

Кодэва дэдумана:

— Пхэн, Сиклимари!

41 Исусо пхэнда:

— Екх хулаестэ дуй мануша залиле ловэ. Екх сля вуджило лэсти панчшэл динарии, ай авэр — пандэша.

42 Нэ сар лэндэ на сля ловэ, хулай эртисарда лэдуенди вуджилимо. Ко дуендар авэла будэр тэ камэ кадэлэ мануш?

43 Симоно пхэнда:

— Гинисарав, со кадэва, кости вов будэр эртисарда.

Исусо пхэнда:

— Тиро чячимо.

44 Тунчи обрисиля манушнятэ и пхэнда Симоности:

— Ту дыкхэх кадэла манушня? Мэ авилём дэ тиро цэр, и ту на дэнян Манди пани, соб Мэ пурэ тэ халавав. А вой ясвэнца обхалавда Манди пурэ и выкхосяа лэн пэхкэрэ балэнца.

45 Ту на чюминдан Ман, а вой всавири время, сар Мэ заджилём дэ цэр, на пэрэачел тэ чюминдэ Мурэ пурэ.

46 Ту на помакхлян Муро шэро эзтога оливкэндар, а вой пурэ Манди помакхля кучутнэ мирога.

47 Пхэнав тути: эртисардэ бут бэзима лакэрэ, кодэлэсти вой и покамля бут. Кости набут эртисарэлапэ, кодэва набут и камэла.

48 Тунчи Исусо пхэнда джювляти:

— Эртисарэнпэ тути тирэ бэзима.

49 Авэр мануша, савэ сле пала скаминдэ, ачиле тэ гинисарэ:

— Ко Вов Кацаво, соб бэзима тэ эртисарэ?

50 Вов жэ пхэнда манушнятэ:

— Тиро патявимо тут фирикарда. Джя, и тэ авэл тутга пачя!

8

Джювля джян пала Исусо

1 Тунчи Исусо пхирэлас пав гавэн тай форонэн, сиклярэлас и розпхэнэлас Бахтало Лав пала Дэвлэхкэрэ Тхагарима. Паша Лэ сле дэшудуй апостолуря.

2 Сле паша Лэстэ кади ж и джювля, савэндар Вов вытрадэнэ налачен тай састьядра насвалимистар: Мария, савя акхарэнас Магдалина и савятар выджиле эфта бэнгэн,

3 Иоанна, ромни Хузохкири, саво Иродостэ дыкхэлэс пала цэр, Сусанна и бут аврэн джювлен, савэ подрицаэрэнас Исусо и сиклярнэн пэхкэрэ барвалимага.

Дума пала манушэ, саво чувэл ворзо дэ пхув

4 Еххвар, кала паша Исусо стидэнյап бут манушэн, савэ авэнас Лэстэ бутэ форонэндэр, Вов пхэнда кацви дума:

5 — Выджиля мануш тэ чувэ ворзо дэ пхув. Кала чувэлас, екх ворзо пэля паша дром. И койсаво ворзо чириклия упрамахкэрэ похале, а койсаво мануша тасавдэ пурэнца.

6 Авэр ворзо пэля пэ барэн тай сиго бариля, нэ зашутиля, колэсти со котэ на сля пани.

7 Трито ворзо пэля машкар пусани чяр. Кодыя чяр бариля тай затасавда ворзо.

8 Штарто ворзо пэля дэ лачи пхув, ваздэнյап тай анда барило дэ шэл молы будэр.

Тунчи Исусо пхэнда зоралэ гласога:

— Касть исин кана тэ шунэн, мэк шунэл!

9 Лэхкэрэ сиклярнэ пхучле Лэстар:

— Сар тэ полэ кадэла лава?

10 Вов пхэнда:

— Тумэнди дэно тэ джянэ чёраханэ лава пала Дэвлэхкэрэ Тхагарима. Ай аврэнди пхэнэлпэ дума,
соб вонэ тэ дыкхэн и тэ на удыкхэн,
тэ шунэн и тэ на полэн.

11 Акэ сар трэбуни тэ полэ кадыя дума. Ворзо — када исин Дэвлэхкоро Лав.

12 Ворзо, саво пэля паша дром, када исин мануша, савэ шунэн Лав. Нэ лэндэ авэл баро бэнг тай чёрэл Лав лэнгэрэ ёлндар, соб вонэ тэ на патян и тэ на фирисаэнпэ.

13 Ворзо, саво пэля пэ барэн, када мануша, савэ шунэн Лав тай прылэн лошага, нэ лэндэ нэнай корни. И набут врема вонэ патян. Нэ кала авэл пхари врема и вонэ зумавэнпэ, тунчи вонэ отджян Дэвлэстар.

14 Ворзо, саво пэля дэ пусани чяр, када мануша, савэ ашунэн Лав. Нэ пэ годя лэндэ кици, сар тэ джювэ пэ кадыя люмля и сар тэ затэрэ барвалимо, и соб тэ авэл драго важ лэнгоро трупо. Вса када положхэ авэл и затасавэл Лав, и мануша на анэн барило.

15 Ворзо, саво пэля дэ лачи пхув, када мануша, савэ шунэн Лав, рицарэн лэ дэ лачё и пативало ѫло, вса пэрэлиджян и кодэлэсти анэн барило.

Дума пала лампа

16 Кала пхабарэн лампа, тунчи на тховэн ла тала вакхор чи тала пато. Нэ тховэн упрэ, соб мануша, савэ заджян, тэ дыкхэн одуд.

17 Нэнай нисо гаравдо, со на авэла аракхло, нэнай нисо чёрахано, со на авэла уджянгло и на выджаля аври.

18 Дыкхэн, сар тумэ шунэн! Кодэлэсти, касть исин, инте дэлапэ. А касть нэнай, лэстар залэлэл и кода, со вов думисарэл, со лэстэ исин.

Чячюно Исусохкоро ѫри

19 Тунчи авиле Исусостэ Лэхкири дэй тай Лэхкэрэ пхрала и на поджиле Лэстэ, важ кода со паша Лэ стидэнյап фартэ бут манушэн.

20 Тай пхэндэ Лэсти:

— Дэй Тир и тай пхрала Тирэ ачен аври и камэн тэ дыкхэ Тут.

21 Исусо пхэнда лэнди:

— Мури дэй тай Мурэ пхрала исин кодэла, савэ шунэн Дэвлэхкоро Лав и терэн кади, сар вов пхэнэл.

Исусо улэл барии барвал

22 Еххвар Исусо заджиля дэ лодка Пэхкэрэ сиклярнэнца тай пхэнда лэнди:

— Авэн пэ авэр риг.

Тай лагле.

23 Кала вонэ джянас пав пане пэ лодка, Исусо засута. Ваздэняпэ бари барвал пэ пане, лодка пхэрдэнэ панега, и вонэ ачиле тэ тасё.

24 Поджиле Исусостэ, джюнгавдэ Лэ и пхэндэ:

— Сиклими! Сиклими! Амэ хасявах!

Исусо вшияя, запхэнда барваляти и барэ панести, саво ваздэласпэ. Тунчи барвал и пани улилепэ, и вса заачиля мулком.

25 Тунчи Исусо пхэнда сиклярнэнди:

— Тев тумаро патявимо?

Вонэ фартэ дарэнэ, и лэнди на заджялас дэ шэрэ, со када терэллэ. И вонэ кици пхэнэнас ехжээсти:

— Ко исин Кадэва, со и барваляти запхэнэл, и панести, и вонэ кандэн Лэ?

Исусо вытрадэл наажүжэн манушэстар

26 Тай авиле дэ пхув Гераса, сави исин пэ авэр риг Галилеятар.

27 Кала Исусо выджиля лодкатар, авилая Лэстэ форостар екх мануш, дэ савэ бэшэнас бэнга. Вов бут врязма пхирэлас нанго и джювэлас на дэ цэр, нэ дэ склепо, төв мулэн гаравэнас.

28 Кала вов удыкхля Исусо, чутапэ Лэхкэрэ пурэндэ тай затиписиля зоралэ гласога:

— Со Тути трэбуни мандар, Исусо, Чяво Дэвлэ Барэдэрэхкэрэ? Мангав Тут, на тер манди бида!

29 Вов типисиля, колэсти со Исусо прыпхэнда наажүжэсти тэ выджял манушэстар. Ай наажужо бут врязма марэлас кадэлэ манушэ, кади, со пхандэнас лэхкэрэ васта и пурэ ланцога и дыхкхэнас пала лэ. Нэ вов розчинэлас ланцуяя, и бэнг традэлас лэ дэ мален.

30 Исусо пхучия лэстэр:

— Сар тиро лав?

Вов пхэнда:

— Легионо, — колэсти со бут бэнгэн заджиле дэ лэ.

31 Тай мангле Исусо, соб Вов тэ на бичалэл лэн дэ хасютно тхан.

32 Котэ пэ плай чяравэнаспэ фартэ бут балэн, тай бэнга мангле Исусостар, соб лэнди тэ заджя дэ балэн. Исусо домуклия лэнди.

33 Бэнга выджиля манушэстар тай заджиле дэ балэн. Тунчи всавэрэ балэ чутэпэ плаастар дэ пане тай потасиле.

34 Чукняря, савэ чяравэнас балэн, удыкхле, со тердапэ, и тунчи прастэнэ и розпхэндэ пала кода дэ форо и пав гавзн.

35 Кала стидэнепэ мануша, соб тэ дыхкхэ, со тердапэ, воне авиле Исусостэ тай дыхкхле, со мануш, дэ каастэ сле бэнга, бэшэл дэ пурэн Исусостэ, урявдо и дэ пхжирия годя, тай фартэ дарэнэ.

36 Ай кодэла, савэ еджинэ дыхкхле, сар вса от када тердапэ, розпхэндэ лэнди, сар састьядрапэ мануш, дэ савэ сле бэнга.

37 Всавэрэ мануша кадэла пхуятар, сави акхарэлпэ Гераса, мангле Исусо, соб Вов тэ джял лэндар, колэсти со фартэ дарэнэ. Вов заджиля дэ лодка тай рисиля павпалэ.

38 Мануш, дэ савэ сле бэнга, мангля тэ джял лэсти Исусога. Нэ Исусо отмуклия лэ тай пхэнда:

39 — Рисиав пэстэ цэрэ и розпхэн, со терда туга Дэвлэ.

Мануш джилия и всавэрэнди дэ форо розпхэнэлас, со терда лэсти Исусо.

Исусо састьярэл джювэля и ваздэл мулэндар чиёра

40 Кала Исусо рисиля павпалэ, мануша прылиле Лэ, колэсти со вонэ докутярэнас Исусо.

41 Тай акэ, авиля екх мануш, савэ акхарэнас Иairo и саво сля пхурэдэр дэ синагога. Вов тэлэдэня Исусости дэ пурэн тай мангия, соб Исусо тэ авэл лэстэ цэрэ.

42 Кадэлэ манушэстэ сля кици екх чей, савяти сля пашэ дэшудуй бэрш, и вий мэрэлас насвалимастар. Исусо джиля лэстэ, и мануша всавэрэ ригэндар стасавэнас Лэ.

43 Машкар кадэлэн манушэн сля екх джювли, савятар дэшудуй бэрш джиля рат. Вий отдэня састимаренди вса, со латэ сля, нэ нико ла на састьярда.

44 Тунчи вий поджиля павпалэ, лиляпэ подятэ Исусохирия ёдатар, и екхатар рат пэрэачиля тэ джя.

45 Исусо пхучля:

— Ко лиляпэ Мандэ?

Нэ нико на прайдкянглияпэ. Тунчи Пётро пхэнда:

— Сиклимари! Бут манушэн пашэ Тут и всавэрэ ригэндар Тут стасавэн.

46 Нэ Исусо пхэнда:

— Койсаво мануш лиляпэ Мандэ, и Мэ шундом, со Мандар выджиля зор.

47 Кодыя джювли удыххла, со лати на выджиля тэ гаравээ, затинисиля, поджиля Исусостэ, тэлэдэня Лэсти дэ пурэн тай розпхэнда англа всавэрэн манушэн, сости вий лиляпэ Исусостэ и сар екхатар састьярдапэ насвалимастар.

48 Исусо пхэнда лати:

— Чей! Тиро пативимо тут састьярда. Джя, и мэй авэл туга пачя!

49 Кала Вов инте пхэнэлас кадэла лава, авиля екх мануш цэрэстар, тев джювда пхурэдэр дэ синагога, тай пхэнда лэсти:

— Тири чей муля. Будэр на замисар Сиклимаре!

50 Нэ Исусо шунда када тай пхэнда лэсти:

— На дар, кици патя, и тири чей састьярэлапэ.

51 Кала авиле дэ цэр, Исусо запхэнда тэ заджя пордэ манушэнди, а лиля Пэгэ кици Петро, Иаково тай Иоанно и чиёэрэктэрэн дадэ и да.

52 Всавэрэ ровэнас тай марэнас пэ дэ колинэн дэ баря грыжа. Нэ Исусо пхэнда лэнди:

— На ровэн! Вой на муля, вой совэл.

53 И асанас Лэстар. Вонэ ж джянгле, со чиёры сля мули.

54 Нэ Исусо лиля чиёра пала вастэ тай пхэнда:

— Вщи, чиёры!

55 Тай рисиля лакоро фано, и чиёры екхатар вшилия. Тунчи Исусо пхэнда, соб тэ дэн лати тэ ха.

56 Лакэрэ дад и дэй прылиле када пала дыво, нэ Исусо запхэнда лэнди тэ розпхэнэ пала кода, со стердапэ.

9

Исусо бичалэл дэшудуен апостолонэн тэ пхэнэ Бахтало Лав

1 Тунчи Исусо акхарда Пэхкэрэн дэшудуен апостолонэн и дэня лэнди бари зор тэ вытградэ бэнгэн и тэ састьярэ насвалимэндар.

2 Тунчи бичалда лэн тэ розпхэнэ пала Дэвлэхкэрэ Тхагарима и тэ састьярэ насвалэн.

3 Вов пхэнда лэнди:

— Нисо на лэнтэ дэ дром: ни дэсто, ни траста, ни мандро, ни рупь, ни инте екх гад.

4 Дэ саво цэр тумэ заджяна, котэ аченпэ и котарь джян дэ дром.

5 А кала тумэн на прылэна, тунчи джян кодэлэ форостар тай обмарэн прахо тумарэ пурэндар. И мэй кода авэла шпера важ лэн.

6 Вонэ джиле пав гавэн, пхэнэнас Бахтало Лав и пав всавэрэ тхана састьярэнас наасвалэн.

Иродо шунэл пала Иисусо

7 Дума пала кода вса доджиля Иродостэ, саво сля тетрархо. Вов на джянглия, сар када тэ полэ. Койсавэ мануша пхэнэнас, со када Иоанно Болдэмари отджювдиня мулэндар.

8 Авэр пхэнэнас, со када Илья авиля, а тритэ — со отджювдиня екх думутнэ англугунарендар.

9 Тай пхэнда Иродо:

— Мэ отчиндом шэрэ Иоанности, а ко исин Кадэва, пала Ка мэ шунав?
И родэлас тэ дыкхэ Иисусо.

Иисусо парварэл бутэн манушэн

10 Апостолуря рисиле Исусостэ и розпхэндэ Лэсти, со вонэ тердэ. Вов стидэня лэн, и вонэ джиле форостэ, саво акхарэллэ Вифсаида, еджинэ, би манушэн.

11 Нэ мануша уджянгле пала кода тай джиле пала Иисусо. Вов прылиля лэн тай дэдумана лэнца пала Дэвлэхкэрэ Тхагарима. И кости сля трэбуни тэ састьярэлэ, Вов састьярэлас.

12 Кала диво сля пашэ ряятэ, дэшудуй апостолуря поджиле Исусостэ тай пхэндэ Лэсти:

— Отмук манушэн, мэк джян вонэ дэ пашунэн гаворэн и гавэн, тэ аракхэн, тев лэнди тэ ратярэ и со лэнди тэ ха. Кодэлэсти со амэ катэ дэ шуки пхув.

13 Иисусо пхэнда лэнди:

— Тумэ дэн лэнди тэ ха.

Вонэ пхэндэ:

— Амэндэ исин кици панч мандрэ и дуй маче. Чи амэнди тэ джя тай тэ тинэ всавэрэнди хамо?

14 А котэ стидэнеп кици екхэн муршэн пашэ панч пханглия. Иисусо пхэнда Пхэхэрэ сиклярнэнди:

— Пхэнэн манушэнди, мэк розмарэнпэ пав пандэша манушэн и бэшэн.

15 Вонэ тердэ кади, и всавэрэ бэшле.

16 Иисусо лиял панч мандрэ и дуй маче, подыкхля дэ упралима, наисарда Дэвлэ пала хама, розпхагля мандро и мачё пэ которэн тай дэня сиклярнэнди, соб вонэ тэ роздэн манушэнди.

17 Всавэрэ хале и чялиле, и стидэне дэшудуй трасты которэнца, савэ ачилепэ.

Иисусо — Чячиюно Христосо Дэвлэхкоро

18 Ехвар, кала Иисусо ачиляпэ Еджино и мангляпэ, сиклярнэ поджиле Лэстэ. Тунчи Иисусо пхучля лэндар:

— Пала кастэ динэн Ман мануша?

19 Вонэ пхэндэ:

— Пала Иоанно Болдэмаре, ай авэр — пала Илья. А тритэ пхэнэн, со када отджювдиня екх думутнэ англугунарендар.

20 Вов пхучля лэндар:

— А тумэ пала ка Ман прылэн?

Пётро пхэндэ:

— Пала Христо Дэвлэхкэрэ.

Иисусо пхэнэл пала кода, со Вов мэрэла и отджювдёла

21 Нэ Иисусо запхэнда лэнди тэ дэдумэ пала кода.

22 Тунчи Вов дэдумана лэнди, со Манушынканэ Чявэсти трэбуни авэла тэ ха бары грыжка, со Лэстар отпхэнэнапэ пхурэдэра, англунэн рашая тай сиклимаря пав Упхэнима, со Лэ умарэна, нэ пэ трито диво Вов отджювдёла мулэндар.

23 А всавэрэнди пхэнда:

— Кала ко камэл тэ джя пала Ман, тунчи отпхэнпэ еджино пэстар, лэ пэхкоро трушуул кожно диво и джя пала Ман.

24 Ко камэл тэ фиригарэ пэхкоро води, кодэва хацарэла лэ. А ко хацарэла пэхкоро води важ Ман, кодэва сфиригарэла лэ.

25 Сави баих кодэлэстар, со мануш затерэла всавиря люмля, а еджино хасявэла чи терэла пэсти бида?

26 Ко ладжяла Мандар чи Мурэ лавэндар, кодэлэстар ладжяла и Чяво Манушыкага, кала авэла дэ Пэхкири слава, дэ слава Дадэхкири и свэнтононэ ангелонэнгири слава.

27 Чячимага пхэнав тумэнди: ачен катэ мануша, савэ инте ды мэрима дыкхэна Дэвлэхкоро Тхагаримо.

Исусо дэдүмэл Mouseeeta тай Ильяга

28 Кала проджиляла пашэ охто дивэ, Исусо лиля Пэгэ Пётро, Иаково тай Иоанно и джилия пэ плай тэ мангэпэ.

29 И кала мангляпэ, парувдапэ англа лэн муй Лэхкоро, тай ёда Лэхкири кади парниля, со дукхано сля тэ дыкхэ.

30 Тай акэ, авиле дуй мурша, савэ дэдумане Лэгэ. Када сле Моисеи тай Илья.

31 Вонэ авиле дэ бари слава и пхэнэнас, со Исусости трэбуни авэла тэ джя дэ Ерусалимо и тэ ачявэ кадыя люмля.

32 Пётро и кодэла, савэ сле лзга Ѣтханэ, созвнаас, а кала джунгавдэпэ, удыкхле слава Исусохкири и дон муршэн, савэ аченас Лэгэ.

33 Кала мурша ачиле тэ уджя, Пётро пхэнда Исусости:

— Сиклими! Сар мишто амэнди катэ! Тховага трин катуны, екх Тути, екх Моисеести и екх Ильясти.

Ай еджино на полэлас, со пхэнэл.

34 И кала вов инте дэдуманя, авиля хмаря и ушарда лэн упран. Кала ж вонэ ачиле дэ хмаря, лэн облияа бари дар.

35 Тай сля шундо гласо хмаратар:

— Када Чяво Муро вытидэно. Шунэн Лэ!

36 Кала гласо пэрэачиля тэ дэдумэ, Исусо ачиляпэ Еджино. И сиклярнэ аченас мулком и никости на розпхэнэнас, со дыкхле дэ кодыя врязма.

Исусо састьярэл чяворь, дэ савэ сля нажужо

37 Па авэр диво, кала вонэ сдкянаас плаестар, авиля Исусостэ гроза манушэн.

38 Екх мануш типисиля:

— Сиклими! Мангав Тут, подых пэ мурэ чяворэ! Мандэ вов екхоро исин.

39 Дэ лэстэ заджял бэнгано фано и чяворо ачел тэ типисиавэ. Нажужо марэл чяворэ кади, со лэхкэрэ мостар чюлён саля. И вов дэл тэ ха чяворэсти бари грыжа, и пхаро отмукал лэ.

40 Мэ манглём Тирэ сиклярнен, соб вонэ тэ вытрадэн нажужэ, нэ лэндэ нэнай зора.

41 Исусо пхэнда:

— Мануша бипатявшэ и родо мусардэ ѹлэнца! Скици инте тэ авэ тумэнца? Скици инте тэ вырицарав тумэн? Ай кордэ пэхкэрэ чявэ!

42 Кала чяворо джялас Исусостэ, бэнг аравда лэ пэ пхув тай ачиля тэ марэ. Тунчи Исусо запхэнда нажужэсти, састьярда чяворь и отдэня лэ дадэсти.

43 Всавэрэ дэнас дыво кодэлэсти, саво баро Дэвэл.

Исусо авэр моло пхэнэл пала Пэхкоро мэримо

И кала вонэ дэнас дыво кодэлэсти, со терда Исусо, Вов пхэнда Пэхкэрэ сиклярнэнди:

44 — Тховэн дэ тумарэ канэн кадэла лава: Чявэ Манушыканэ сиго здэна манушэнди дэ вастэн.

45 Нэ вонэ инте на полиле, пала со Иисусо дэдуманя. Лэнгири годи инте сля затерди, а тэ пхуче Иисусостар, сар тэ полэ Лэхкоро лав, вонэ даранас.

Ко пав чячима барэдэр

46 Ехквар Лэхкэрэ сиклярнэ ачиле тэ хапэ екх екхэгэй пала кода, ко лэндар исин барэдэр.

47 Иисусо джянгя, со лэндэ пэ годен, тунчи Вов лиля цыкнэ чяворэ тай тховда паша Пэстэ.

48 Тай пхэнда сиклярнэнди:

— Ко прылэла кадэлэ чяворэ важ Мурэ Лавэ, кодэва Ман прылэла. Ай ко прылэла Ман, прылэла Кодэлэ, Ко Ман бичалда. Ко тумэндар исин цыкнээр всавэрэндар, кодэва авэла всавэрэндар барэдэр.

49 Тунчи Иоанно пхэнда Лэсти:

— Сиклимари! Амэ дыкхле манушэ, саво вытрадэл бэнгэн Тирэ Лавэгэ, и запхэндэ лэсти кади тэ терэ. Кодэлэсти со вов на пхирэл амэнца ютханэ.

50 Иисусо дэдуманя:

— На запхэнэн лэсти. Кодэла, савэ на ваздэнпэ пэ тумэн, кодэла пала тумэн.

Иисусо на прылэн дэ Самария

51 Кала поджялас время тэ ваздэнпэ Иисусости пэ упралима, Вов лиля Пэсти дэ гындо тэ джя дэ Ерусалимо.

52 Тунчи Иисусо бичалда англал Пэстэ манушэн, и вонэ авиле дэ гав Самариякою, соб вса важ Лэ тэ лачярэ.

53 Нэ самариянуря на прылиле Иисусо, колэсти со Вов джялас дэ Ерусалимо.

54 Кала Иисусохкэрэ сиклярнэ Иаково тай Иоанно дыкхле кода, вонэ пхэндэ:

— Рае! Камэх, амэ пхэнага, соб тэ сджял яг упралимастар и тэ спхабарэл лэн?

55-56 Нэ Иисусо обрисиля лэндэ тай запхэнда када тэ терэ.* И джиле дэ авэр гав.

Сар тэ джя пала Иисусо

57 Кала вонэ джянас пав дром, екх мануш пхэнда Иисусости:

— Мэ джява пала Тут, курик Ту тэ на джях.

58 Иисусо пхэнда лэсти:

— Рувэндэ исин тхан, тев вонэ отцинён, и чириклендэ кади ж. Ай Манушыканэ чиавэстэ нэнай тхан, тев шэрэ тэ притховэ.

59 Аврэ манушэсти Иисусо пхэнда:

— Джя пала Ман!

Кодэва пхэнда:

— Рае! Мук ман майанглал тэ гаравав мурэ дадэ!

60 Иисусо пхэнда лэсти:

— Мэк мулэ гаравэн пэхкэрэн мулэн, а ту джя тай розпхэн пала Дэвлэхкэрэ Тхагарима!

61 Трито мануш пхэнда Иисусости:

— Рае! Мэ джява пала Тут, нэ дэ манди майанглал тэ джяв и тэ дыкхав муро ёри.

62 Иисусо пхэнда лэсти:

— Мануш, саво лэллэ пала плуго, нэ обрисявлэлпэ павпалэ, на поджял важ Дэвлэхкэрэ Тхагарима.

* **9:55-56** Дэ койсавэ пуранэ греческа лила (манускрипты) исин инте кацавэ лава: «И дэдуманя: — На джянэн тумэ, саво дэ тумэн фано. Чяво Манушыкано авиля тэ на хасярэ манушэнгэрэ водя, а тэ сфирисаэ лэн».

10

Исусо бичалэл эфтадэша сиклярнэн

1 Тунчи Рай Иисусо вытидэнэ эфтадэша аврэн сиклярнэн тай бичалда лэн пав дуй англал Пэстар дэ всавэрэн форонэн и тханэн, тев Еджино камля тэ авэ.

2 И пхэнда лэнди:

— Ваздэняпэ бут мандро пэ мален, а бутярнэн набут. Важ кода мангэн Хулае малиякэрэ, соб Бов тэ бичалэл бутярнэн, тэ злэн див малендар.

3 Джантэ! Мэ бичалав тумэн, сар бакрэн машкар рувэн.

4 На лэн пэгэ ни тышила, ни траста, ни пундрангэ. И пав дромэ на наисарэнпэ манушэнца.

5 Дэ саво цэр заджяна, майанглал пхэнэн: «Пачя кадэлэ цэрэсти!»

6 Кала котэ джювэл мануш, саво камэл пачя, кадья пачя ачела пэ лэстэ. А кала нат, тумари пачя рисявлэла тумэндэ павпалэ.

7 Аченпэ дэ кодэлэ цэрэ, хантэ тай пэнтэ кода, со тумэнди дэна. Бутярно мануш ачел кода, соб лэсти тэ потинэн важ лэхкири бути. На пэрэджян цэрэстар дэ цэр.

8 Кала авэна дэ форо и прылэнэ тумэн котэ, хантэ вса, со тумэнди дэна.

9 Састярэн лэнгэрэн насвалэн и пхэнэн лэнди: «Надур тумэндар Дэвлэхкоро Тхагаримо».

10 Кала авэна дэ форо тай на прылэнэ тумэн котэ, тунчи джян пэ гаса и пхэнэн:

11 «И прахо, саво прыячила амарэ пурэндэ дэ тумаро форо, амэ обмарах. Нэ джянэн, со надур тумэндар Дэвлэхкоро Тхагаримо».

12 Пхэнав тумэнди, дэ кодэва диво форости Содомо авэла локхэдэр, сар кадэлэ форости.

13 Бида тути, форо Хоразино! Бида тути, форо Вифсаид! Тэ дыкхэн форуря Тиро тай Сидоно дывуря, савэ сле тумэндэ, вонё б думут обрисявлэнаспэ пхкэрэ бэзимастар, урявэнаспэ дэ юда гонэндар и бэшэнас дэ прахо.

14 Нэ Тирости и Сидоности пэ сындо авэла локхэдэр, сар тумэнди.

15 И ту, форо Капернаумо, гинисарэх тэ ваздэпэ упрэ? Ту дэ адо тэлэдэгэ.

16 Кодэва, ко шунэла тумэн, кодэва Ман шунэла, и ко отпхэнэлпэ тумэндар, отпхэнэлапэ Мандар. А ко отпхэнэлапэ Мандар, отпхэнэлапэ и Кодэлэстар, Ко Ман бичалда.

Сиклярнэ рисявлэн павпалэ

17 Эфтадэша сиклярнэн рисиле баря лошага тай пхэндэ:

— Рае! И бэнга кандэн амэн важ Тиро Лав!

18 Иисусо пхэнда лэнди:

— Мэ дыххлём, сар сатана тэлэдэнэ упралимастар кади, сар тэлэдэл молния.

19 Акэ, дав тумэнди зор тэ тасавэ пурэнца сапэн и скорпионэн, и тэ чувэ пэ пхув врьжымашэн, и нисави бибаихт вонэ тумэнди на терэна.

20 Кици лошавэн на колэсти, со фануря кандэн тумэн, а колэсти, со тумарэ лава зачиндэ пэ упралима.

21 Тунчи Иисусо лошыля дэ Свэнто Фано тай пхэнда:

— Наисарав Тут, Дадэ, Тхагари пэ пхухя и пэ упралима, со Ту оттердан цыкнэнди гаравдо ёрвалэндар и годявэрэндар. Кади, Дадэ! Кацави сля Тири лачи воля!

22 Вса дэно Манди Мурэ Дадэстар. Нико на джянэл Чявэ, кици Дад, и нико на джянэл Дадэ, кици Чяво и кодэла, касти Чяво камэл тэ сикавэ Дадэ.

23 Тунчи обрисиля сиклярнэндэ тай пхэнда лэнди:

— Бахталэ якха, савэ дыххна кода, со тумэ дыххэн екхатар!

24 Пхэнав тумэнди, со бут ко англунарендар тай тхагарендар камле тэ дыххэ кода, со тумэ акана дыххэн, нэ на дыххле. Камле тэ шунэ кода, со тумэ акана шунэн, нэ на шундэ.

Дума пала самарянину, савэстэ ковло йло

25 Тунчи екх сиклимарендар пав Упхэнима вшиля, соб тэ зумавэ Иусо, тай пхуччя:

— Сиклими! Со манди тэ терэ, соб тэ авэл мандэ вечно джювимо?

26 Иусо пхэнда лэсти:

— Сар чиндо дэ Упхэнима? Сар ту полэх?

27 Кодэва пхэнда:

— Кам тирэ Рае Дэвлэ всавэрэ тирэ ѹлэгэ и всавэрэ тирэ водега, всавиря тиря зорага и всавиря годяга. И кам тирэ пашунэ, сар еджино пэ камэх.

28 Иусо дэдуманя:

— Чячимо ту пхэндан. Тер кади и авэга тэ джювэ.

29 Нэ кодэва камля тэ допхэнэ пэхкоро и пхуччя Иусостар:

— А ко исин муро пашун?

30 Иусо пхэнда:

— Екх мануш джиля Ерусалимостар дэ Ерихоно. Тай хутилдэ лэ прахаря, злиле лэстар ѫда, домардэ лэ и джиле, а вов ачиляпэ тэ пашлэ епашигуло.

31 Выджиля кади, со трэбуни сля тэ джя кодэлэ дромэгэрашаести. Вов удыкхля кадэлэ манушэ, пэрджиля пэ авэр риг и проджиля мамуй.

32 Джялас котэ и левито, удыкхля манушэ, пэрэджиля пэ авэр риг и проджиля мамуй.

33 Екх самарянину ладэлас кодэлэ дромэгэга, удыкхля манушэ, и ачиля лэсти дор лэ.

34 Вов поджиля манушэстэ, упрант чута мол, помакхля дукхавдэ тхана зэтога тай пэрэхангя лэн. Тунчи тховда лэ пэ пэхкэрэ мугаре, анда дэ гостиница тай прыдыххелас пала лэ.

35 Пэ авэр диво, кала трэбуни лэсти сля тэ уладэ, вов дэнэ хулаасти дуй динарии тай пхэнда: «Прыдыкх пала кадэлэ манушэ, а кала джяна будэр ловэ, мэ дава тути инте, кала рисиавава павпалэ».

36 Ко тринэндар сля пашуно манушэсти, савэ домардэ прахаря, сар ту гинисарэх?

37 Сиклими пав Упхэнима пхэнда:

— Кодэва, ко тердэ манушэсти лачимо.

Тунчи Иусо пхэнда лэсти:

— Джя и ту тер кади!

Марфа тай Мария

38 Кала вонэ джянас дурэдэр, Иусо заджиля дэ екх гав. Котэ манушни, савя акхарэнас Марфа, прылияа Лэ дэ пэхкоро цэр.

39 Латэ сля пхэнь Мария. Вой бэшля паша пурэн Раестэ тай шунда Лэхкэрэ лава.

40 Марфа ж эмэрдапэ пурэндар, соб тэ тховэ баро скаминд. Тунчи поджиля Иусоста и пхэнда:

— Рае! Чи ту на дыкхэх, со мури пхэнь всавири бути ачявда пэ ман? Пхэн лати, мэх терэл манца.

41 Рай Иусо пхэнда:

— Марфа! Марфа! Бут пала со ту думисарэх, и бут пала со тутэ дукхал шэро.

42 Нэ кици екх трэбуни. Мария ж вытидэнэ кода, со фэдэр, и када латар на залэлапэ.

Иусо сиклярэл, сар трэбуни тэ мангэпэ

1 Еххвар Иусо мангялэ, ай кала пэрэачиля, екх Лэхкэрэ сиклярнэндар пхэнда лэсти:

— Рае! Сикляр амэн тэ мангэпэ, сар Иоанно сиклярда пэхкэрэн сиклярнэн!

² Исусо пхэнда лэнди:

— Кала мангэнпэ, пхэнэн:

Дад! Мэй тэ свэнцолпэ Лав Тиро!

Мэй авэл Тхагаримо Тиро!

³ Пэ кожно диво мандро амэнди дэ авдивутно.

⁴ И бэзимо амаро эртисар амэнди,
сар и амэ дош эртисарах кодэлэнди,
ко исин амэнди вуджилз.

И на домук, соб тэ змаражхэ дромэстар.

⁵ Тунчи Исусо пхэнда лэнди:

— Кала варико тумэндар авэла рятягэ амалэстэ тай пхэнэла лэсти: «Морэ! Залэ манди трин питы мандро.

⁶ Амал дромэстар заджиля мандэ, и нэнай мандэ, со тэ дав лэсти тэ ха».

⁷ Чи пхэнэла амал тиро тути андрал: «На замисар ман! Мэ вудара затердом, и мурэ чяворэ совэн манца. Нисар манди тэ вище и тэ дэ тути мандро»?

⁸ Пхэнав тумэнди: кала на вщела и на дэла тути мандро, сар амал тиро, тунчи вщела и дэла тути кодэлэсти, со ту на пэрэачех тэ мангэ.

⁹ И Мэ пхэнав тумэнди: мангэн — и Дэвэл дэла тумэнди, родэн — и тумэ аракхэнэ, марэн дэ вудара — и Дэвэл оттерэла тумэнди.

¹⁰ Акэ, кожно, ко мангэл — лэл, кодва, ко родэл — аракхэл. И кодэлэсти, ко марэла дэ вударэн, — Дэвэл оттерэла.

¹¹ Чи исин машкар тумэн кацаво дад, саво подэла пэхкэрэ чяворэсти сапэ, кала вов мангэл лэстар мачё?

¹² И саво дад подэла чяворэсти скорпионо, кала вов мангэл дадэстар парноро?

¹³ Кала тумэ, мижэ мануша, джянэн, сар тэ терэ лачимо тумарэ чяворэнди, тунчи пэ скици будэр Дад Упралимастар дэла Свэнто Фано кодэлэнди, савэ мангэн Лэстар?

Исусо традэл бэнгэн Дэвлэхкиря зорага

¹⁴ Ехквар Исусо вытрайдэнэ бэнгэ, саво терэлас манушэ лалэгэ. Кала бэнг выджиля, лало мануш ачиля тэ дэдумэ, а всавэрэ мануша прылиле када пала баро дыво.

¹⁵ А койсавэ лэндар дэдумане:

— Вов вытрайдэл бэнгэн зорага, сави дэл Лэсти Веельзевуло, барэдэр бэнгэнгоро.

¹⁶ Авэр мануша зумавэнас Лэ и мангле Лэстар шпера упралимастар.

¹⁷ Нэ Исусо джянглия лэнгоро гындо тай пхэнда лэнди:

— Тхагаримо, дэ савэ ханпэ екх екхэга, авэла шушо. Тай цэр, дэ савэ ханпэ екх екхэга, розхаглагэ.

¹⁸ И кала сатана халпэ еджино пэгэ, тунчи сар выячела лэхкоро тхагаримо?

Тумэ пхэнэн, со Мэ вытрайдав бэнгэн зорага, сави дэл Манди Веельзевуло.

¹⁹ А кала Мэ вытрайдав бэнгэн зорага, сави дэл Манди Веельзевуло, тунчи савя зорага вытрайдэн бэнгэн тумарэ сиклярнэ? Кодэлэсти вонэ сундисарэнэ тумэн.

²⁰ А кала Мэ вытрайдав бэнгэн Дэвлэхкиря зорага, тунчи тумэндэ авиля Дэвлэхкоро Тхагаримо.

²¹ Кала зорало мануш дэстэнца и чюренца дыкхэл пала пэхкэрэ цэрэ, лэхкоро хулаимо нико залэла.

²² Нэ кала авэла зордээр лэстар, тунчи марэла лэ, залэла лэстар дэста и чюрия, пэ савэн лээстэ сля надия, и всаворо лэхкоро барвалимо роздэла.

²³ Ко на юханэ Манца, кодэва ваздэлпэ пэ Ман. Ко на стидэл Манца, кодэва розчувэл.

Кала рисявлэл најкужо

24 Кала нажужо выджяла манушэстар, тунчи пхирэл пав бипаненгирэн тханэн, родэл тхан, төв лэсти тэ отцинё, нэ нисар на аракхэл. Тунчи пхэнэл: «Рисявава павпалэ дэ муро цэр, катарь мэ выджилём».

25 А кала авэл павпалэ, дыкхэл, со цэр шулавдо и прытидо.

26 Тунчи джял, акхарэл пэстэ эфта аврэн нажужэн, мижэдэр пэстар, и вонэ заджян тай джювэн котэ. И кода авэла важ манушэ инте шымай, сар сля.

Ко исин пав чячима бахталэ

27 Кала Иисусо дэдуманя кадэва лав, ех манушни лэнгэрэ стидэмастар затиписиля зоралэ гласога:

— Бахтали джювли, сави бэня Тут и парварда!

28 Иисусо пхэнда:

— Нат, на кади! Бахталэ кодэла, савэ шунэн Дэвлэхкоро Лав и джювэн кади, сар вов пхэнэл!

Шпэра Ионахкири

29 Кала инте будэр манушэн стидэняпэ паша Исусостэ, Вов ачиля тэ дэдумэ:

— Кадэва родо — хохавно. Вов родэл пэсти шпэра, нэ лэсти авэла кици шпэра Ионахкири.

30 Сар Иона ачиля шпэра важ манушэн Ниневиятар, кади Чаво Манушыкано авэла шпэра важ кадэва родо.

31 Тхагарни югостар ваздэлэлэ пэ сындо ѹтханэ кадэлэ родога и дошарэла лэ, колэсти со вой авиля авря ригакирия пхуятар тэ пошуунэ годявэр лава Соломонохкэрэ. Нэ акэ, катэ Кодэва, Саво исин барэдэр Соломоностар.

32 Мануша Ниневиятар ваздэнапэ пэ сындо ѹтханэ кадэлэ родога и дошарэнэ лэ. Колэсти со вонэ ачаявдэ пэхкэрэ бэзима, кала Иона пхэнэлас лэнди лав Дэвлэстар. Нэ акэ, катэ Кодэва, Саво барэдэр Ионастар.

Дума пала запхабарди лампа

33 Кала мануш запхабарэл лампа, вов на тховэл ла ни дэ граждо, ни тала вакхор, нэ тховэл ла упрэ, соб лакири яг тэ дэл душлимо манушэнди, савэ заджян.

34 Якха — када лампа важ тиро трупо. Кала якха тутэ жужэ, тунчи дэ трупо тиро пхэрдо одуд. А кала якха тутэ налаче, тунчи и дэ трупо тиро авэла пхэрдо калимо.

35 Кади дыкх: одуд, саво дэ тут исин, соб тэ на авэл вов калимага.

36 Кала дэ тиро трупо исин одуд и нэнай калимо, тунчи ту всаворо жужо, пхэнэга, сар душлимо лампатар марэл пэ тут.

Иисусо дошарэл фарисеен

37 Кала Иисусо пхэнда кадэла лава, ех фарисеендар акхарда Лэ пэстэ тэ ха. Иисусо авиля лэстэ и залияа тхан пала скаминдэ.

38 Фарисеи удыкхля, со Вов на халавда васта англа колэ, сар тэ ха, и дэняпэ дыво.

39 Нэ Рай пхэнда лэсти:

— Акэ тумэ, фарисея, жужарэн аврял тахтай тай чярэ, нэ андрал тумэндэ пхэрдо ханджьвалимо тай вурьитимо.

40 Бигодякэрэ! Кодэва, Саво стерда кода, со аврял, чи на стерда кади ж и кода, со андрал?

41 Кала тэ пхэнэ пала кода, со андрал, тунчи подэн богудэнди ѹлэстар, и вса тумэндэ авэла жужо.

42 Нэ бида тумэнди, фарисея! Тумэ дэн Дэвлэсти дэшто котор чярендар мята и рута и всавэрэстар, со барёл тумэндэ пэ баря, нэ бистарэн чячюно сындо и Дэвлэхкоро камавимо. Трэбуни и када тэ терэ, и пала кода тэ на бистарэ.

43 Бида тумэнди, фарисея! Тумэ камэн тэ бэшэ пэ англунэн тханэн дэ синагоги, и чялэл тумэнди, кала пэ форо мануша наисарэнэ тумэнца.

44 Бида тумэнди! Тумэ сар могилы, савэ на душон, пав савэн пхирэн мануша и на джянэн.

45 Ех сиклимири пав Упхэнима шунда кадэла лава и пхэнда Лэсти:

— Сиклимири! Кадэлэ лавэнца Ту и амэн кошэх.

46 Нэ Исусо пхэнда:

— Бида и тумэнди, сиклимаря пав Упхэнима! Тумэ чувэн пэ манушэн баро пхаримо, саво нащи тэ подваздэ, а еджинэ и ангуштэгэ лэстэ на лэнпэ.

47 Бида тумэнди! Тумэ ваздэн пэ кладбищен памятникуя англунаренди, савэн мулярдэ тумарэ дада!

48 Тумарэ дада мулярэнас англунарен, а тумэ ваздэн лэнди памятникуя. Кадэлэгэ тумэ сикавэн, со тумэ цырдэн васта пала тумарэн дадэн.

49 Колэсти пхэнэл Дэвлэхкири годи: «Бичалава лэндэ англунарен и апостолонэн. Екхэн вонэ мулярэнса, а аврэн авэна тэ выгградэ».

50 Колэсти пхучелапэ кадэлэ родостар пала англунаренгоро рат, саво сля прочуто кодэла вряматар, сар Дэвэл тердэ люмля.

51 Ратэстар, саво прочута Авели, ды Захарияхкэрэ ратэ, кала лэ умардэ машкар храмо и жэртвеннико. Чячимага пхэнав тумэнди, пхучелапэ кадэлэ родостар.

52 Бида тумэнди, сиклимаря пав Упхэнима! Тумэ залиле тии вударэндэр, савэ лиджян джянимастэ. Нэ и еджинэ на заджиле, и аврэн, савэ камле тэ заджя, на мукле.

53 Кала Исусо джиля котарь, сиклимаря пав Упхэнима и фарисея фартэ мижыле пэ Лэстэ тай ачиле тэ долэ Исусо и тэ пхуче Лэстар бут пала со.

54 Вонэ родэнас, сар тэ астарэ Исусо пэ лавэн.

12

На авэн, сар домуенгэрэ мануша

1 Ехвар стиднянгэ бут пхангля манушэн, кади бут, со ачиле тэ тасавэ еххэ. Исусо ачиля тэ дэдүмэ англэдэр Пэххэрэ сиклярнэнди:

— Рицарэнгэ дурдээр фарисеенгэрэ закваскатар, соб тэ на авэн тумэ домуенгэрэ мануша, сар вонз.

2 Нэнай нисо гаравдо, со б тэ на оттерэлгэ, и нэнай чёрахано, со б тэ на авэл уджянгло.

3 Кода, со тумэ пхэндэ ряतягэ, шунэна дивэсэ, и со тумэ чёраханэ пхэндэ дэ цэр, пхэнэна зоралэ гласога пэ ушарди.

Даран кици Дэвлэстар

4 Пхэнав жэ тумэнди, Мурэ амалэнди: на даран кодэлэндэр, савэ умарэн трупо, а будэр нисо на терэнэ.

5 Нэ сикавава тумэнди, каастар трэбуни тэ дара: даран Кодэлэстар, Каастэ исин зор на кици тэ мулярэ, нэ тэ чувэ дэ геенна. Кади, пхэнав тумэнди, Кодэлэстар даран.

6 Пала дуй харумэ мардэ тинэн панч чириклен. Нэ ника лэндар Дэвэл на бистарда.

7 А тумэндэ Вов джянэл, и скици бала исин пэ тумаро шэро. На даран! Тумэ пэ бутэ кучэдэр цыкнэн чириклен!

На ладижян Исусостар

8 Пхэнав жэ тумэнди: кодэлэ, ко прыджаанэла Ман англа манушэн, прыджаанэла и Чяво Манушыкано англа Дэвлэхкэрэн ангелонэн.

9 А ко отпхэнэлапэ Мандар англа манушэн, кодэлэстар и Чяво Манушыкано отпхэнэлапэ англа Дэвлэхкэрэн ангелонэн.

10 Манушэсти, саво пхэнэла налачё лав пэ Чявэ Манушыканэ, эртисарэлапэ бэзимо, а кодэлэсти, ко кошэла Свято Фано, бэзимо на эртисарэлап.

11 Кала ж лиджяна тумэн дэ синагоги, пхурэдэрэндэ и раендэ, на пэрэджювэн пала кода, сар и со тэ пхэнэ лэнди дэ отпхэнима.

12 Дэ кодыя врьяма Свято Фано сиклярэла тумэн, со трэбуни тэ пхэнэ.

Дума пала барвалима

13 Екх мануш, саво ачиля машкар лэн, пхэнда Исусости:

— Сиклимар! Пхэн мурэ пхралэсти, соб тэ дэл манди кодэлэ хулаимастар, саво ачиляпэ амарэ дадэстар!

14 Нэ Исусо пхэнда лэсти:

— Ко тховда Ман тэ сундисарэ тумэн и тэ розлэ тумарорындо?

15 Тунчи пхэнда лэнди:

— Дыхкхэн, соб тэ на авэн тумэ ханджьвалэ. Саво б тэ на авэл мануш барвало, лэхкэрэ джювимастэ када бэрша на додэла.

16 Тунчи Вов розпхэнда лэнди кацави дума:

— Екх барвалэ манушэстэ выбариля бут ворзо пэ маля.

17 Тай дэдүмэлэс еджино пэсти: «Со манди тэ терэ? Нэнай мандэ, тев тэ стидэ див».

18 Тай пхэнда: «Пхагава мурэ граждуя и терава инте барэдэр. Стидава дэ лэн див и всаворо муро барвалимо.

19 Тай пхэнава пэхкэрэ водести: "Води муро! Бут исин тутэ барвалимо, саво ту стидэнян, хутилэла тути пэ бут бэрша. Отцинюв, ха, пи и ав лошало!"

20 Нэ Дэвэл пхэнда кадэлэ манушэсти: «Бигодякоро! Кадэла рягяга тиро води залэна тутар. Тунчи касти доросэлапэ кода, со ту стидэнян?»

21 Кади авэла кодэлэга, ко стидэл барвалимо важ пэ, а англа Дэвлэ ачеллэ чёро.

На пэрэджиовэн

22 И пхэнда Пэхкэрэ сиклярнэнди:

— Пхэнав тумэнди, на пэрэджювэн пала джювима, ни пала кода, со тумэнди тэха, ни пала трупо, дэсо тумэнди тэ урявэлэ.

23 Джювимо будэр хамастар, и трупо будэр ёдатар.

24 Подыкхэнтэ пэ воронэн: вонэ на чувэн ворзо дэ пхув, на стидэн мандро малендар. Лэндэ нэнай ни цэра, ни граждо, нэ Дэвлэ парварэл лэн. Тумэж пэ бутэ кучэдэр чириклендар!

25 Ко тумэндар, кала пэрэджювэл, додэла джювимастэ пэ екх чясо врьяма?

26 И кала тумэ кадэва цыкнорындо на стерэна,ости пала аврэ пэрэджювэн?

27 Подыкхэн пэ маленгэрэн лулуден, сар вонэ барён. Вонэ на терэн бути и на сүөвэн пэсти ѫда. Нэ пхэнав тумэнди, со и тхагари Соломоно дэ пэхкири слава на урявэлэспэ кади, сар кадэла лулуда.

28 Кала чяр малякири, сави авдивэ барёл, а атася чувэна ла дэ бов, Дэвлэ кади урявэл, пэ скици будэр Вов тумэн урявэла, мануша набарэ патывимага?

29 И тумэ на родэн, со тэ ха чи со тэ пэ, и на пэрэджювэн пала кода.

30 Вса откада родэн народуря кадэла люмлякэрэ, нэ тумаро Дад джянэл, со тумэнди када трэбуни.

31 Нэ родэн Лэхкоро Тхагаримо, и вса откада тумэнди дэлапэ прэдэбэ.

32 На даран, цыкнэ бакрора! Тумаро Дад закамля тэ дэ тумэнди Тхагаримо.

33 Битинэн тумаро хулаимо и дэн чёрорэнди! Лачярэн тышыла, савэ никала на чинэнапэ! Стидэн барвалимо, саво никала на хасявлэла, пэ упралима, курик чёр на пашола и тев цэрмо на схала.

34 Тев тумаро барвалимо, котэ и тумаро ѹло авэла.

Дума пала бутярнэ, саво дожутярэл хулае

35 Мэк всавири връяма тумарэ күщика тэ авэн зацырдэнэ, и мэк всавири връяма пхабон тумарэ ламты.

36 Авэн, сар бутярнэ, савэ дожутярэн пэхкэрэ хулае бъявэстар. Вонэ екхатар лэсти оттерэнэ вудара, кала шунэнэ, со вов марэл дэ лэн.

37 Бахталэ кодэла бутярнэ, савэ на совэна, кала авэла лэнгоро хулай. Чячимага пхэнав тумэнди: вов еджино зацырдэла күщик, акхарэла лэн пала скаминд и терэла важ лэн бути.

38 Бахталэ кодэла, савэ дожутярэн хулае и дэ епашрят, и дэнзор.

39 Полэн, тэ джянэл хулай, кала авэла чёр, вов бы на домукэлас лэсти тэ загуле дэ цэр.

40 А тумэ дожутярэн и авэн гата, колэсти со Чяво Манушыкано авэла тунчи, кала тумэ на думисарэн.

41 Тунчи Пётро пхэнда Лэсти:

— Раे! Ту кици амэнди пхэнэх кадэла лава чи важ всавэрэн?

42 Рай пхэнда:

— Со терэла пативало и годявэр бутярно, савэ хулай ачывда тэ дыкхэ пала цэрэ и аврэн бутярнэн, соб тэ роздэл лэнди хамо дэ пэхкири връяма?

43 Кала рисавэла хулай и дыкхэла, со бутярно терэл пэхкири бути, тунчи кадэва бутярно авэла бахтало.

44 Чячимага пхэнав тумэнди, со хулай терэла кадэлэ бутярнэ пхурэдэрэгэй пав всавэрэ пэхкэрэ хулаима.

45 Нэ кала кодэва бутярно пхэнэла еджино пэсти: «Муро хулай на сиго авэла», — и ачела тэ марэ аврэн бутярнэн и бутярнен, обхалапэ тай матёла,

46 тунчи авэла хулай дэ дивэ, кала бутярно лэ на дожутярэл, и дэ връяма, пала савя бутярно на джянэл. И мулярэла лэ, и авэла лэсти бида ѹтхан бидэвлэхкэрэ манушэнца.

47 Бутярно, саво джянгля, со камэл лэстар хулай, нэ на сля гата, и на стерда кади, авэла фартэ мардо.

48 А бутярно, саво на джянгля и стерда кода, пала со марэнэ, авэла мардо набут. Касти Дээвэл дэня бут, кодэлэстар бут и лэлапэ. И касти бут допатиня, кодэлэстар будэр пхучелапэ.

Мануша ханнэ екх екхэгэй пала Исусо

49 Мэ авилём, соб тэ запхабарэ яг пэ пхуя, и сар Мэ камав, собвой сигэдэр тэ розпхаболз!

50 Манди трэбуни тэ болдэпэ, и стасавэл грыжа Муро ѹло, кала кода вса дожутярав!

51 Тумэ гинисарэн, Мэ авилём, соб тэ анэ пэ пхув пачя? Нат, пхэнав тумэнди: Мэ авилём тэ анэ врыжымо.

52 Акань ёри панче манушэндар розджялапэ машкар пэстэ, трин ваздэнапэ пэ доин и дуй ваздэнапэ пэ тринэн.

53 Дад ваздэлапэ пэ чявэ, и чяво ваздэлапэ пэ дадэ. Дэй ваздэлапэ пэ чя, и чей ваздэлапэ пэ да. Сасуни ваздэлапэ пэ боря, а бори ваздэлапэ пэ сасуня.

Връямакэрэ шпэры

54 Тунчи Исусо пхэнда манушэнди:

— Кала тумэ дыкхэн, сар пэ западо ваздэлпэ хмара, тумэ пхэнэн: «Дэла брышынд». И кади исин, брышынд дэл.

55 И кала пхурдэл барвал южнона ригатар, тумэ пхэнэн: «Кхам пэкэла», — и кади выджал.

56 Домуенгэрэ! Тумэ дыкхэн пэ упралима и пэ пхуя и джянэн, со авэла аври, ай сави връяма авиля акань, тумэ на полэн?

57 И соости тумэ еджинэ на розлэнпэ, со исин чячимо?

58 Кала ту джях пэхкэрэ врыйжымашэгэ дэ сындо, стер вса, соб тэ допхэнэпэ лэгэ инте пав дром. А кала на допхэнэгэлэ, вов цырдэла тут сынди марестэ, а сынди мари отдэла тут халавдэсти, и халавдо чувэла тут дэ барунэ.

59 Пхэнав тути: на выджаага котарь ды колэ, сар на отдэга ды екхэ мардэ.

13

Ачявэн тумаро бэзимо

1 Дэ кодия врязма авиле Иисусостэ койсавэ мануша и розпхэндэ пала манушэн Галилеятар, савэн Пилато прыпхэнда тэ мулярэ и мукля лэнди рат, кала vonэ азнаас жэртвь.

2 Иисусо пхэнда лэнди:

— Тумэ гинисарэн, со кадэла галилеянурия тердэ бэзимо будэр аврэ манушэндар дэ Галилея и кодэлэсти хале грыжка?

3 Нат, пхэнав тумэнди. Нэ кала тумэ на ачявэна бэзимо, хасявшна, сар и vonэ.

4 А кодэла дэшуюхто манушэн, савэ помуле, кала тэлэдэнэ пэ лэн упрант башня дэ Силоамо? Тумэ гинисарэн, со vonэ сле дошадэр всавэрэндар, савэ джювэнас дэ Ерусалимо?

5 Нат, пхэнав тумэнди. Нэ кала тумэ на ачявэна бэзимо, тунчи всавэрэ хасявшна, сар и vonэ.

6 Тунчи пхэнда лэнди кацави дума:

— Ехкэ манушэстэ сля инжырно кашт дэ лэхкоро винограднико. Вов авиля тэ родд пэ кадэва кашт барило, нэ нисо на аракхля.

7 И пхэнда виноградарести: «Акэ, дыкх, мэ трито бэрш авав, соб тэ аракхэ барило пэ кадэва инжырно кашт, нэ нисо на аракхав. Сцин лэ! Пэ со вов ивья залэл пхув дэ садо?»

8 Нэ виноградари пхэнда лэсти: «Хулае! Мэк кадэва кашт инте екх бэрш барёла. А мэ пхув ковлярава и гуниво чувава.

9 И кала пэ авэр бэрш анэла барило — мишто. А кала на анэла, сцинэгэ лэ».

Иисусо састьярэл джюволя дэ суббота

10 Ехвар дэ суббота Иисусо сиклярда дэ синагога.

11 Котэ сля екх джювли, дэ касть дэшуюхто бэрш сля налачё фано, саво дэлас лати дукх. Вой сля бангги, кади со нащи лати сля тэ ваздэ шэрэ.

12 Иисусо удыххля ла, акхарда тай пхэнда:

— Джювлие! Ту састьярэх тирэ насвалимастар!

13 И тховда пэ латэ васта. Вой екхатар пэрэачиля тэ авэ бангги и ачиля тэ ваздэ слава Дэвлэсти.

14 Тунчи пхурэдэр дэ синагога мижыля, со Иисусо састьярда дэ суббота, и пхэнда манушэнди:

— Иisin шов дивэ, кала трэбуни тэ терэ бути. Дэ кадэлэн дивэн авэнтэ тэ састьярэпэ, а на дэ суббота.

15 Рай пхэнда лэсти дэ отпхэнима:

— Домуенгэрэ! Чи на отпхандэн тумэ пэхкэрэ мугаре чи гурувэ, на вылиджян лэ граждостар и на лиджян панестэ дэ суббота?

16 А вой исин чей Абраамохкири. Дэшуюхто бэрш ла спхандэлас сатана! И со, на трэбуни сля тэ розпхандэ ла дэ суббота?

17 Кала Иисусо пхэнда кадэла лава, всавэрэ Лэхкэрэ врыйжымашуря сле ладжжвардэ, а всавэрэ мануша лошавэнас важ кода, со Вов терэлас барэ и лаче рындууря.

Дума пала Дэвлэхкоро Тхагаримо

18 Иисусо ж пхэнда:

— Пэ со счувэллэ Дэвлэхкоро Тхагаримо? Сар Манди када тэ сикавэ?

19 Вов счувэлпэ пэ цыкно горчично ворзо, саво мануш лиля и чута дэ пхув дэ пэхкоро садо. И кадэлээр ворзостар бариля вучё кашт, кади со упралимахкэрэ чирикля джювэнас пэ лэхкэрэн ранден.

20 Инте пхэндэ Иисусо:

— Пэ со счувэлпэ Дэвлэхкоро Тхагаримо?

21 Вов счувэлпэ пэ закваска, савя лиля манушни тай чута дэ трин барэ чярэ варэга, а тунчи кадыя закваска розджиляяпэ пав всаворо хумэр.

Набуглэ будара

22 Тунчи Иисусо упалэ джиля дромэгэ дэ Ерусалимо, проджялас пав гавэн и форонэн и котэ сиклярэлэс.

23 Ехк мануш пхуччла Лэстар:

— Рае! Када чячимо, со кици набут манушэн фирикарэнапэ?

Иисусо пхэндэ:

24 — Прытховэн зора кодэлэстэ, соб тэ заджя тумэнди набуглэ бударэнца. Чячимага пхэнав тумэнди, со бут мануша закамэнэ тэ заджя, нэ нисо лэндэ на выджяла.

25 Кала цэрэхкоро хулай вщела и затерзла будара, тунчи тумэ авэна тэ аче аври, тэ марэ дэ бударэн тай тэ мангэ: «Рае, оттер амэнди!» Нэ Вов пхэнэла тумэнди: «На джянов, катарь тумэ».

26 Тунчи тумэ пхэнэна: «Амэ хале и пиле англа Тут, и пэ амарэн гасэн Ту сиклярэгас».

27 Нэ Вов пхэнэла: «На джянов, катарь тумэ. Нашэн Мандар всавэрэ, ко вуритимо терэн!»

28 Котэ тумэ авэна тэ ровэ и тэ ха бари грыжа, кала дыкхэна, со Авраамо, Исаако тай Иаково и всавэрэ англunaря дэ Дэвлэхкэрэ Тхагарима, а тумэн котарь вытградэна.

29 Авэна мануша штарэ пхуякэрэ ригэндар тай бэшэна пала скаминдэ дэ Дэвлэхкэрэ Тхагарима.

30 Тай акэ, мануша, савэ палунэ, авэна англэ. И кодэла, савэ англэ, авэна палунэ.

Иисусо рөвэл пала Ерусалимо

31 Дэ кодья вряза авиле койсавэ фарисеендар и пхэндэ Лэсти:

— Наш катарь, колэсти со Иродо камэл тэ мулярэ Тут.

32 Иисусо пхэндэ:

— Джян и пхэнэн кадэлэх хрантимарести кацавэ лава: «Акэ, Мэ авдивэ и атася авава тэ традэ бэнгэн и тэ састиярэ, а пэ трито диво дотерава пэхкорорындо».

33 Нэ Манди трэбуни тэ джя Мурэ дромэгэ авдивэ, атася и пэ авэр диво. Нэнай кади, соб англunaре тэ умарэн на дэ Ерусалимо.

34 Ерусалимо, Ерусалимо! Ту мулярэх англunaрен и барэнца помарэх кодэлэн, савэ сле бичалдэ тутэ! Скаци молы Мэ камлём тэ стидэ Тирэ чвяворэн кади, сар кағни стидэл пуицен тала пэхкэрэ пхака! Нэ тумэ на закамле кади.

35 Тай акэ, ачявав тумэн еджинэн дэ тумарэ цэрэ. Пхэнав тумэнди, со на дыкхэна Ман ды кодья вряза, сар пхэнэна: «Бахтало Кодэва, Саво джял важ Лав Раехкоро!»

14

Со трэбуни тэ терэ дэ суббота?

1 Екхвар дэ суббота Иисусо заджилия дэ цэр фарисеенгэрэ пхурэдэрэстэ, соб тэ ха мандро. И всавэрэ дыкхэнас пала Иисусо.

2 Тай акэ, англа Иисусо бэшля ехк мануш, саво сля всаворо шуло панехкия дукхатар.

3 Иисусо пхуччла сиклимарэндар пав Упхэнима и фарисеендар:

— Чи трэбуни пав Упхэнима тэ састиярэ дэ суббота?

4 Вонэ ачиле мулком. Иисусо лиляпэ наасвалэстэ, састиярда лэ и отмукля.

5 Тунчи пхэнда лэнди:

— Кала тумаро чаворо чи гуурв тэлэдэла дэ ханиг', чи тумэ на выцырдэна лэн ехкхатар и дэ суббота?

6 Вонэ на джянгле, со тэ пхэнэ Иисусости.

На бэшэн англал всавэрэндар

7 Кала Иисусо дыкхля, сар мануша, савэн акхардэ, вытидэнас пэсти фэдэр тхана, Вов пхэнда кацави дума:

8 — Кала тут акхарэнэ пэ бъяв, на бэш пэ фэдэр тхан. Кала машкар манушэн, савэн акхардэ пэ бъяв, авэла пативэдэр тутар,

9 тунчи кодэва, ко акхарда и тут, и лз, поджяла и пхэнэла тути: «Уштав тхан кадэлэ манушэсти». И авэла тути ладжяво, и прыджаляпэ тути тэ залэ шымай тхан.

10 Нэ кала акхарэнэ тут, бэш пэ шымай тхан. Тунчи кодэва, ко акхарда тут, поджяла тутэ и пхэнэла: «Морэ, бэш англэ!» И кодэла, ко бэшэна пала скаминдэ паша тут, дыкхэна, со тути дэне патив.

11 Кодэва, ко ваздэллэ упрэ, авэла тэллярдо. Нэ кодэва, ко тэллярэл еджино пэ, авэла ваздэно.

12 Пхэнда Иисусо и манушэсти, саво акхарда Лэ:

— Кала ту тховэх скаминд дивэс чи пашэ ряятэ, на акхар пала лэ ни тирэ амалэн, ни тирэ хяралэн, ни тиро родо, ни пашунэн, савэ исин барвалэ. Колэсти со и кадэла мануша акхарэнэ тут, кала терэнэ скаминд, и терэнэ тути кади, сар и ту лэнди тердан.

13 Нэ кала ту терэх скаминд, акхар пала лэ чёйрорэн, помардэн, ланггалэн и корэн.

14 Бахтало ту авэга, кала кадэла мануша на дэна тути павпалэ кода, со ту важ лэн стердан. Нэ рисявлэлэпэ вса тути дэ кодэва диво, кала дэвликунэ мануша отджювдэна мулэндар.

Дума пала манушэн, савэн акхардэ пала баро скаминд

15 Ех мануш, саво бэшэлас Иисусога пала скаминдэ, пхэнда:

— Бахтало мануш, саво хала мандро дэ Дэвлэхкэрэ Тхагарима!

16 Иисусо пхэнда лэсти:

— Ех мануш терда баро скаминд и акхарда бутэн манушэн.

17 И кала авиля врязма, соб тэ бэшэн пала скаминдэ, бичалда бутярнэ, соб вов тэ пхэнэл акхардэ манушэнди: «Авэн, вса дожутярэл түмэн».

18 Нэ всавэрэ мануша сар допхэндэпэ и ачиле тэ мангэ патив. Ех мануш пхэнда: «Мэ тиндом пхув, и манди трэбуни тэ джя и тэ дыкхэ ла. Мангав патив тутар!»

19 Авэр мануш пхэнда: «Мэ тиндом дэшэн гуурвэн, и манди трэбуни тэ дыкхэ, сар вонэ терэн бути. Мангав патив тутар!»

20 Трито мануш пхэнда: «Мэ лилём хуланя, на выджалял мандэ тэ авэ тутэ».

21 Кала бутярно рисиля, вов вса розхэнда хуласти. Тунчи хурай холиля и пхэнда пэхкэрэ бутярнэсти: «Джя сигдэр пав барэн и цыкнэн гасэн дэ форо тай стидэ кордэ чёйрорэн, помардэн, корэн и ланггалэн!»

22 Бутярно пхэнда: «Хулае! Вса тердом, сар ту манди прыпхэндан, нэ инте исин тхана».

23 Хурай пхэнда бутярнэсти: «Джя пав дромэн и паша грэдэн, и манг манушэн, соб муро цэр тэ авэл пхэрдо.

24 Пхэнав түмэнди, со нико кодэлэндар, савэ сле акхардэ майанглал, на хана муро хамо пала мурэ скаминдэ».

Сар тэ джяя пала Иисусо

25 Дэйнаас ётханэ Иисусога бут манушэн. Тунчи Иисусо обрисиля лэндэ и пхэнда:

26 — Кала мануш, саво авэл Мандэ, на покамэла Ман будэр пэхкэрэн дадэ и да, ромния, чвэрэн, пхралэн, пхэнен и будэр пэхкэрэ джювимастар, тунчи вов нисар на авэла Мурэ сиклярнэгэ.

27 Мануш, саво на лиджял пэхкоро трушул и на джяя пала Ман, нисар на авэла Мурэ сиклярнэга.

28 Кала ко тумэндар закамэла тэ ваздэ башня, чи на бэшэла вов англал и на бинэла, скици ловэ пэ када трэбуни, соб тэ дотерэ рындо?

29 Кала вов чувэла фундаменто тала башня, нэ на дотерэла кадэва рындо, мануша асаналз лэстар.

30 И пхэнэн: «Кадэва мануш ачиля тэ терэ бути, нэ на дотерда».

31 Кала тхагари стидэлпэ пэ марима аврэ тхагарегэ, чи на бэшэла вов англал и на гинисарэла, исин ли лэстэ зор дэшэ пхангленца манушэн тэ выджа пэ марима тхагарегэ, кастэ исин биш пханглья манушэн?

32 А кала нат, тунчи бичалэла пативалэн манушэн тхагарестэ, кала вов инте дур и мангэла лэстар пачя.

33 Кади и тумэндар нико на авэла Мурэ сиклярнэгэ, кала на ачявлэла вса, со лэстэ исин.

34 Лон — када мишто. Нэ кала лон хацарэла пэхкири зор, сар тэ терэ, соб тэ авэл вов лондо?

35 Ни дэ пхув, ни дэ гуниво лэ на чувэгэ. Лэ кици вычувэн аври. Кастэ исин каны тэ шунэ, мэк шунэл!

15*Дума пала бакря, сави хасиля*

1 Авэнас Иисусостэ всавэрэ стидэмаря, савэ лэнас налогуря, и бээзимахкэрэ мануша, соб тэ шунэ Лэ.

2 Нэ фарисеенди и сиклимаренди пав Упхэнима на чялёлас, со терда Иисусо, и вонэ пхэннаас:

— Вов прылэл бээзимахкэрэ манушэн и хал лэнца.

3 Нэ Иисусо пхэнда лэнди кацави дума:

4 — Пхэнагэ, ехкхэстэ тумэндар исин шэл бакря, и екх лэндар хасиля. Чи на ачявлэла вов енядэша тай еня бакрен дэ маля и чи на джяяла тэ родэ бакря, сави хасиля?

5 Ай кала аракхэла бакря, баря лошага тховэла ла пэ пхикэ и лиджяла.

6 Кала авэла цэрэ, аххарэла пэхкэрэн амалэн и пашунэн и пхэнэла лэнди: «Лошавэн манца, мэ аракхлём бакря, сави хасиля».

7 Пхэнав тумэнди, со кади ж пэ упралима пала екхэ манушэ, саво ачявда бээзимо, будэр лошавэнэ, сар пала енядэша еня патявиэн манушэн, савэнди на трэбуни тэ ачявэ бээзимо.

Дума пала драхма

8 Кала манушнятэ исин дэш драхмы ивой хацарэла екх лэндар, чи на пхабарэлавой лампа, на шулавэла всаворо пэхкоро цэр и на авэла тэ родэ, соб тэ аракхэ кадыя драхма?

9 А кала аракхэла ла, тунчи стидэла пэхкэрэн амалкэн и пашунэн джювлен тай пхэнэла: «Лошавэн манца, мэ аракхлём драхма, сави хацардом!»

10 Кади, пхэнав тумэнди, лошавэн ангелуря Дэвлэхкэрэ и пала екхэ манушэ, саво ачявда пэхкоро бээзимо.

Дума пала чяэ дадэхжэрэ, саво уджиля цэрэл

11 Инте пхэнда Исусо:

— Екхэ манушэстэ сле дуй чяве.

12 И тэрнэдэр лэндар пхэнда дадэсти: «Дадэ! Дэ манди тирэ барвалимстар котор, саво манди доросэлап». И дад розмарда вса, со лэстэ сля, пэ дон и дэня пэхкэрэ чявэнди.

13 Проджиля набут врима, и цыкнэдэр чявэндар стидэня вса, со лэсти доросляпэ, и джиля дур, дэ авэр пхув. Котэ розтерда вса, со лэстэ сля, и пав диниманз розчувэлас ловэ.

14 Кала вов розчула всавэрэ ловэ, дэ кодыя пхув авиля бари бокх, и чяво мэрэлас бокхатар.

15 Тунчи джиля и намисардапэ екхэ манушэстэ кодэла пхуятар, тэ чяравэ баличен пэ маля.

16 Вов мэрэлас бокхатар и сля лошало тэ ха ётханэ баличенца, нэ лэсти и кода на дэнэс.

17 Кала чявэстэ рисиля годи, тунчи вов пхэнда: «Бут намисардэн бутярнэн мурэ дадэстэ, и воң хан, скици закамэнэ, а мэ бокхатар катэ мэрэв!

18 Вщява, рисяава павпалэ мурэ дадэстэ и пхэнава лэсти: "Дадэ! Мэ тердом бэзимо англа Дэвлэ пэ упралима и англа тут

19 и на ачяв тэ акхарэпэ тирэ чявэгэ. Нэ прылэ ман сар тирэ бутярнэ».

20 Тунчи вщия и джиля пэхкэрэ дадэстэ.

Кала чяво сля дур цэрэстар, дад удыххя лэ. И ачиля лэсти дор пэхкэрэ чяве. Тунчи вов прастэн я лэстэ, облия и чюминдэнэя лэ.

21 Чяво пхэнда дадэсти: «Дадэ! Мэ тердом бэзимо англа Дэвлэ пэ упралима и англа тут и на ачяв тэ акхарэпэ тирэ чявэгэ».

22 Нэ дад пхэнда пэхкэрэ бутярнэнди: «Джян сигэдэр! Анэн фэдэр Ѣда, сави исин, и урявэнтэ чяве, дэнтэ лэсти ангрусни пэ ангушт и пундрангэ пэ лэхкэрэ пурэн.

23 Анэн парвардэ гурувэ и чинэн лэ пэ мас. Тховага баро скаминд и авага тэ лошавэ!

24 Кадэва муро чяво сля муло, нэ отджювдиня, сля хацардо, нэ канан аракхляпэ». Тай ачиile тэ лошавэ.

25 Пхурэдэр чяво сля пэ маля. Кала вов рисиля малятар и сля паша цэр, шунда, сар цэлэн и дилибэн.

26 Тунчи акхарда екхэ бутярнэ и пхучля: «Со када терэллэ?»

27 Бутярно пхэнда лэсти: «Авиля тиро пхрал. И тиро дад прыпхэнда тэ чинэ парвардэ гурувэ, колэсти со лэхкоро чяво рисиля цэрэ джювдо».

28 Тунчи пхурэдэр чяво холиля и на камля тэ заджя дэ цэр. Нэ дад выджиля цэрэстар и ачиля тэ акхарэ лэ.

29 Нэ вов пхэнда дадэсти: «Акэ, мэ скици бэрш терав бути важ тут, со никала тэ ваздэ шэрэ, и дэ всавэрэ кандав тут. Нэ ту и цыкнорэ бузнорэ на дэнян манди, соб мэ тэ лошавав мурэ амалэнца.

30 А кала кадэва тиро чяво, саво пртерда пэхкэрэ ловэ налаче джювленца, ачиля цэрэ, ту важ лэ чиндан парвардэ гурувэ».

31 Нэ дад пхэнда чявэсти: «Чяворо! Ту всавири врима манца. И вса, со мандэ исин, када тиро.

32 Нэ важ кода трэбуни тэ лошавэ, со тиро пхрал сля муло, нэ отджювдиня, сля хацардо, нэ аракхляпэ».

16

Дума пала билативалэ бутярнэ

1 Тунчи Исусо пхэнда Пэхкэрэ сиклярнэнди:

— Екхэ барвалэстэ сля бутярно, саво дыкхэлас пала лэхкоро цэр. Екхвар хулаести пхэндэ пэ кан, со бутярно протерэл вса кода, со лэстэ исин.

2 Тунчи хулай акхарда бутярнэ и пхэнда: «Со када мэ пала тут шунав? Здэ манди тири бути. Колэсти со ту будэр на терэгэ мандэ».

3 Тунчи бутярно пхэнда еджино пэсти: «Со манди тэ терэ? Муро хулай вытградэл ман кадэла бутятар. Тэ ганавэ пхув мандэ зора нэнай, а тэ мангэ ловэ манди ладжаво.

4 Дэжинав, со тэ терэ, соб тэ прылэн ман мануша дэ пэхкэрэн цэрэн, кала хацарава бути!»

5 Тунчи акхарда манушэн, савэ сле вуджилэ лэхкэрэ хулаести, тай пхэнда еххэсти: «Скици ту вуджило мурэ хулаести?»

6 Кодэва пхэнда: «Шэл барэ вакхор зэтэ». Бутярно пхэнда: «Залэ тиро лил, бэш и чин, со ту вуджило пандэша барэ вакхор».

7 Тунчи пхучля аврэстэ: «А ту скици вуджило?» Кодэва пхэнда: «Екх пхангли гонэ див». Бутярно пхэнда лэсти: «Залэ тиро лил, бэш и чин, со ту вуджило охтшэл гонэ див».

8 И ашарда хулай бипативалэ бутярнэ пала кода, сар годяга выджиля кадэлэрындостар. Кадэла люмлякэрэ чявэ лиджян рымдуяя пэхкэрэ амалэнца годявэдэр, сар чявэ Дэвлэхкэрэ, Саво исин Одуд.

9 Мэ ж пхэнэв тумэнди: азбан пэсти амалэн хасютнэ барвалимага. И кала тумаро барвалимо проджяла, тумэн прийлэнэ дэ катунэн, савэ авэна тэ аче вечно.

10 Ко дэ набарэ исин чячюно, кодэва и дэ барэ авэла чячюно. А ко начячюно дэ набарэ, кодэва и дэ барэ на авэла чячюно.

11 И кала нащи тэ допатя тумэнди хасютно барвалимо, ко тумэнди дэла барвалимо чячюно?

12 И кала тумэ на сле чячюнэ на дэ пэхкэрэ барвалима, ко тумэнди дэла тумаро?

13 Нисаво бутярно на авэла тэ терэ бути дуе хулаендэ. Важ кода со вов еххэ хула на камэла, а аврэ камэла, екхэ хулаести авэла чячюно, ай пэ аврэ авэла тэ чюнгардэ. Наши дэ екх вряза тэ тэрэ бути важ Дэвлэ и важ барвалима.

14 Шундэ вса откада фарисея, савэ камле ловэ, тай ваздэнэ Исусо пэ асама.

15 Исусо пхэнда лэнди:

— Тумэ камэн тэ сикавээз пативалэ манушэнца, нэ Дэвлэл джянэл тумарэ ёлэ. И кода, со драго важ манушэн, исин грязимо важ Дэвлэ.

Исусо пхэнэл пала Дэвлэхкэрэ Упхэнима

16 Упхэнимо тай англунаря сле англа Иоанно, нэ кана пхэнэллэ Бахтало Лав пала Дэвлэхкэрэ Тхагарима, и всавэрэ прытховэн зора, соб тэ заджя дэ лэ.

17 Нэ сигэр пхув и упралимо хасявшна, а Упхэнимастар на хасявшна ни екх цыкно лаворо.

18 Кожно мануш, саво чувэл пэхкия ромня и уджял аврятэ, терэл бэзимо и предэл пэхкия ромня. И кодэва, ко лэл джювля, сави розлиджялдапэ, терэл бэзимо.

Барвало мануш и Лазари

19 Сля екх барвало мануш, саво урявэласпэ дэ фартэ кучутни ѫда санэ похтаностар тай кожно диво джювда шукар дэ пэхкэрэ барвалима.

20 И паша ударэн лэстэ аври пашлёлас чёро мануш, савэ акхарэнас Лазари, и трупо лэхкоро сля помардо насвалимостар.

21 Вов фартэ камля тэ чялэ хамага, саво тэлэдэлас скаминдэстар. Авэнас лэстэ риконц и чибэнца тиндярэнас лэхкэрэ дукха.

22 Тай акэ, муля чёро, и ангелуяя отлиджялдэ лэ Авраамостэ. Муля и барвало мануш, тай заганавдэ лэ.

23 И кала барвало халас грыжа дэ адо, вов подыкхля упран и удыкхля дур пэстар Авраамо и Лазаре, саво сля паша лэстэ.

24 А тунчи акхарда: «Дадэ Авраамо! Ковлисар тиро ѹло важ ман! Бичал Лазаре, соб вов тэ тиндярэл пэхкоро ангушт дэ пани и тэ подлиджял муря чибатэ, колэсти со мэ хав бари грыжа».

25 Нэ Авраамо пхэнда: «Чяво! Взгинисар, со дэ тирэ джювима ту лилян лачимо, а Лазарестэ сля екх бида. Кана Лазари катэ улэлпэ грыжатар и лошавэл, а ту прылэх бари грыжа».

26 Када инте на вса, нэ машкар тумэн и амэн стердэ бари выганаавди, соб тумэндар нащи сля тэ пэрэджя амэндэ и амэндар — тумэндэ».

27 Тунчи барвало пхэнда: «Мангав тут, дадэ, бичал Лазаре мурэ дадэстэ дэ цэр.

28 Мандэ исин панч пхрала. Мэк Лазари розпхэнэла лэнди, соб и вонэ тэ на попэрэн дэ кадэва тхан, тев хан грыжа».

29 Авраамо пхэнда: «Лэндэ исин Моисеи и англунаря, мэк шунэн лэн».

30 Нэ барвало пхэнда: «Нат, дадэ Авраамо! Нэ кала ко мулэндар вщела и авэла лэндэ, тунчи вонэ ачявэна бэзимо».

31 Авраамо пхэнда лэсти: «Кала вонэ на шунэн Моисее тай англунарен, тунчи вонэ на патяна, кала и муло отджювдёла».

17

Исусо сиклярэл, сар трэбуни тэ эртисар, тэ патя и тэ терэ бути важ Дэвэл

1 Тунчи Исусо пхэнда Пэхкэрэ сиклярнэнди:

— Бут исин, со цырдэл мануш бэзимастэ. Нэ бида кодэлэсти, ко залиджял манушэн дэ бэзима.

2 Фэдэр важ лэ, соб тэ прыпхандэн лэсти баро и пхаро бар пэ кора и тэ чувэн лэ дэ море, сар тэ залиджял вов дэ бэзима екхэ кадэлэн цыкнэндэр.

3 Дыкхэн пала пэстэ! Кала пхрал тиро терэла бэзимо, запхэн лэсти када тэ терэ! И кала вов ачявэла бэзимо, эртисар лэ!

4 И кала пхрал тиро эфта молы дэ дивэ терэла бэзимо и эфта молы авэла тутэ и пхэнэла: «Дошало! Мангав патив!» — эртисар лэ.

5 Апостолуя екхвар пхэндэ Раести:

— Баряр амаро патявимо!

6 Рай пхэнда:

— Кала тумэндэ исин патявимо, сар цыкно горчично ворзо, и тумэ пхэнэна кадэлэ тутованэ каштэсти: «Вычинпэ пхуятар, джя дэ море и барюв», — тунчи кашт кандэла тумэн.

7 Ко тумэндар пхэнэла бутярнэсти, саво рисиля малятар, тев вов вушарэлас пхув чи чяравэлас бакрэн: «Джя сигэдэр, бэш пала скаминд»?

8 Нат, тумэ на кади дэдумэна, нэ пхэнэна лэсти: «Вщи, тав манди тэ ха! Об phxандэлэ тутованэ каштэсти: «Вычинпэ пхуятар, джя дэ море и барюв», — тунчи кашт кандэла тумэн.

9 Чи наисарэна тумэ бутярнэ пала кода, со стерда бути, сави лэсти трэбуни сля тэ терэ?

10 Кади и тумэ, кала терэна вса, со тумэнди прыпхэндо, дэдумэн пала пэстэ: «Амэ бутярнэ, савэ нисо на ачен. И стердэ кода, со амэнди трэбуни сля тэ стерэ».

Исусо састярэл дэшэн, касть сля насвалимо проказа

11 Пав дром дэ Ерусалимо Исусо проджялас машкар Самария тай Галилея.

12 Кала Вов заджиля дэ екх гав, авиле Лэстэ дэш мануша, савэндэ сля насвалимо проказа. Вонэ ачиле дэ рига

13 тай типисиле зоралэ гласога:

— Исусо Сиклимар! Ковлисар ѹло Тиро важ амэн!

14 Кала Иисусо удыкхля лэн, Вов пхэнда:

— Джян и сикавэнэ рашаэнди!

И кала мануша джиле, пав дромэ вонэ састьярдэпэ насвалимастар.

15 Ех х лэндар дыкхля, со састьярдапэ, рисиля павпалэ и ашарда Дэвлэ зоралэ гласага.

16 Вов тэлэдэня Иисусостэ дэ пурэн и наисарда Лэ. А кодэва мануш сля самарянино.

17 Тунчи Иисусо пхэнда:

— Чи на дэш манушэн састьярдэпэ? Тев жэ инте еня?

18 Сости вонэ на рисиле, соб тэ ваздэ слава Дэвлэсти? Ай рисиля кици кадэва самарянино?

19 И пхэнда кадэлэ манушэсти:

— Вщи, джя цэрэ! Тиро патявимо тут фирикарда.

Иисусо пхэнэл пала Дэвлэхкоро Тхагаримо

20 Тунчи фарисея пхучле Иисусостар, кала авэла Дэвлэхкоро Тхагаримо. Иисусо пхэнда:

— Дэвлэхкоро Тхагаримо на авэла кади, соб всавэрэ лэ тэ дыкхэн.

21 Нико на пхэнэла: «Акэ, вов катэ исин». Чи: «Акэ, вов котэ». Нэ Дэвлэхкоро Тхагаримо машкар тумэн исин.

22 Тунчи Иисусо пхэнда Пэхкэрэ сиклярнэнди:

— Авэла вряза, кала закамэнэ тэ дыкхэ ех дивэндар Манушыканэ Чавэхкэрэ, нэ на дыкхэнэ.

23 Кала пхэнэна тумэнди: «Акэ, Вов катэ!» Чи: «Акэ, Вов котэ исин!» — на джян пордэ и на прастан пала лэн.

24 Сар молния марэл упралимастар и дэл яг и душлимо пав всавири пхув, кади ж и Чаво Манушыкано рисявэла павпалэ.

25 Нэ англал кадэлэстар Чаво Манушыкано хала бари грыжа и кадэва родо Лэстар отпхэнэлапэ.

26 Сар сля дэ вряза, кала джювда Нои, кади авэла и дэ вряза, кала рисявэла Чаво Манушыкано.

27 Мануша ханас, пэнас, лэнас ромнен и джянас паларом аж ды кодыя вряза, сар Нои заджилия дэ ковчего, а тунчи джилия баро пани и всавэрэ хасиле.

28 Кади ж сля дэ вряза, кала джювда Лото: мануша хале, пиле, тинэнас, битинэнас, чувэнас ворзо дэ пхув, ваздэнас цэрэ.

29 Нэ дэ дивэ, кала Лото выджилия форостар Содомо, джиле упралимастар ягуно брышынд и сера и всавэрэ хасиле.

30 Кади ж авэла и дэ кодэва диво, кала Чаво Манушыкано сикавэлапэ.

31 Дэ кодэлэ дивэ мануш, саво авэла упрэ пэ ушарди, а кырпы лэхкэрэ — дэ цэрэ, мэк на змукалэпэ тэлэ пала лэн. Ко авэла пэ маля, мэк на рисявэл цэрэ.

32 Рипэрэн Лотохирия ромни!

33 Ко камэл тэ фирикарэ пэхкоро джювимо, кодэва хасярэла лэ. Ай ко хасярэла пэхкоро джювимо, кодэва сфирикарэла лэ.

34 Пхэнав тумэнди: дэ кодыя рят совэна дуй мануша, еххэ залэнэ, ай авэр мануш ачелапэ.

35-36 Дуй манушня авэна тэ терэ варо ворзостар: екха манушня залэнэ, ай авэр ачелапэ.

37 Тунчи пхэндэ Иисусости:

— Рае, тев када авэла?

Иисусо пхэнда:

* **17:35-36** Дэ койсавэ пурэн греческа лила (манускрипты) исин инте кацавэ лава: «Дуй мануша авэна пэ маля, еххэ мануш залэнэ, ай авэр ачелапэ».

— Пордэ, тев пашлёт мulo трупо, стидэнапэ орлуря.

18

Дума пала кода, сар трэбуни тэ мангэпэ

1 Тунчи Иисусо пхэнда лэнди пала кода, со трэбуни всавири время тэ мангэпэ и тэ на грисяве:

2 — Дэ екх форо сля сындимари, саво Дэвлэстар на даралас и манушэндар на ладжяласпэ.

3 Дэ кодэва форо сля и екх джювли, савятэ муля ром. Вой пхирэлас сындимарестэ и мангэлас: «Пав чячима розлэ муро рындо! Фирисар ман кодэлэстар, ко дошарэл ман!»

4 Нэ сындимари бут время нисо на камля тэ терэ. Тунчи пхэнда еджино пэсти: «Мэ Дэвлэстар на дарав и манушэндар на ладжявлэ.

5 Нэ важ кода со кадыя джювли на пэрэачел тэ доха ман, пав чячима розлава лакоро рындо, собвой будэр мандэ тэ на пхирэл и тэ на дохал ман».

6 И пхэнда Рай:

— Шунэн, со пхэнэл бибаахтало сындимари?

7 А кала кади, Дэвэл ли на фирисарэла пав чячима кодэлэн, савэн вытидэнэ и савэ зоралэ гласога акхарэн Лэ диво и рят? Чи помукэла лэн Дэвэл?

8 Пхэнав тумэнди, со Дэвэл сиго лэн фирисарэла пав чячима. Нэ Чаво Манушыкано кала авэла, чи аракхэла Вов пэ пхуя патявимо?

Дума пала фарисе тай стидэмэре

9 Пхэнда Иисусо кацави дума манушэнди, савэ гинисарэнас пала пэстэ, со вонэ фартга пативалэ, а пала аврэн пхэнэнас, со вонэ бибаахтала:

10 — Дуй мануша заджиле дэ храмо тэ мангэпэ. Екх лэндар сля фарисеи, ай авэр — стидэмари, саво лэлас налогура.

11 Фарисеи ачелас тай мангэлэ дэ пэхкэрэ юлэ кади: «Дэвла! Наисарав тут пала кода, со мэ на кацаво, сар авэр мануша, савэ исин чёра, хохавнэ, терэн биладжявиши ромнятар, чи сар кадэва стидэмари.

12 Мэ рицарав посто дуй молы дэ курко, отдав дэшто котор муря ворхатар».

13 Стидэмари жэ ачиля дэ рига и ладжяво лэсти сля тэ ваздэ яхса упрэ, нэ марэлас дэ колинэ еджино пэ и пхэнэлас: «Дэвла! Ковлисар юло Тиро важ ман, бэзимахкэрэ мануш!»

14 Пхэнав тумэнди, со стидэмари джиля бидошакоро англа Дэвлэ, а фарисеи ачиля дошало. Кодэлэсти со кожно мануш, саво ваздэл еджино пэ, авэла обмукло, а саво тэлэрэл еджино пэ, авэла ваздэнэ.

Иисусо мангэлэ пала чаворэн

15 Анэнас Иисусостэ цыкнэн чаворэн, соб Вов тэ лэлпэ лэндэ, а сиклярнэ дыххле кода и запхэндэ лэнди.

16 Нэ Иисусо акхарда сиклярнэн и пхэнда:

— Мукэн чаворэн, соб тэ авэн Мандэ, и на запхэнэн лэнди, колэсти со Дэвлэхкоро Тхагаримо исин лэнгоро.

17 Чячимага пхэнав тумэнди: ко на прылэла Дэвлэхкоро Тхагаримо кади, сар прылэн цыкнэн чаворэн, кодзва дэ Дэвлэхкэрэ Тхагарима на заджяла.

Барвало мануши пхучел Иисусо пала вечно джювимо

18 Екх пхурэдэрэндар пхучля Иисусостар:

— Сиклимары лачё! Со манди тэ терэ, соб тэ доросав вечно джювимо?

19 Иисусо пхэнда лэсти:

— Сости ту пхэнэх пала Ман «лачё»? Кици Екх Дэвэл исин лачё.

20 Ту джянэх заповедь: на тер биладжявимо тирэ ѫрестар, на умар, на чёр, на пхэн хохавимо пэ сындо, полэ тирэ дадэ и да.

21 Кодэва мануш пхэнда:

— Вса откада мэ терав тэрнэ бэршэндар.

22 Исусо шунда када и пхэнда лэсти:

— Ех тутына хутилэл: битин вса, со тутэ исин, и роздэ ловэ чёрорэнди, соб тэ авэл тутэ барвалимо пэ упралима. Тунчи ав и джя пала Ман!

23 Кала пхурэдэр шунда када, вов загрисиля, колэсти со сля фартэ барвало.

24 Исусо дыкхля, со вов загрисиля, и пхэнда:

— Сар пхаро барвалэнди тэ заджя дэ Дэвлэхкэрэ Тхагарима!

25 Локхэдэр верблюдости тэ проджя машкар сувякоро каноро, сар барвалэсти тэ заджя дэ Дэвлэхкэрэ Тхагарима.

26 Кодэла, ко шундэ, пхучле:

— Касть тунчи исин зора тэ фирикарэпэ?

27 Исусо пхэнда:

— Кода, со манушэсти нащи тэ стирэ, кода стирэла Дэвэл.

28 Пётро пхэнда Исусости:

— Акэ, амэ вса ачявдэ и джиле пала Тут.

29 Исусо пхэнда лэнди:

— Чячимага пхэнав тумэнди: мануш, саво ачявда важ Дэвлэхкэрэ Тхагарима цэр, чи ромня, чи прхалэн, чи дадэ и да, чи чяворэн,

30 лэла будэр дэ кадэлэ джювима, а дэ вряза, сави авэла, — вечно джювимо.

Исусо дэ трито моло пхэнэл пала Пэхкэрэ мэрима

31 Тунчи Исусо отлиджялда дэ рига Пэхкэрэ сиклярнэн и пхэнда лэнди:

— Акэ, амэ заджях дэ Ерусалимо, и терэлалэ вса, со чиндэ англунаря пала Чявэ Манушыканэ.

32 Кади со здэна Лэ бидэвлэхкэрэ манушэнди, и вонэ стерэна Лэстар асамо, дэна Лэстий барий дукх и барий грыжа, авэна тэ чунгардэ пэ Лэстэ,

33 тэ марэ Лэ чукняга, а тунчи умарэна. Нэ пэ трито диво Вов отджювдёла.

34 Нэ сиклярнэ нисо кадэлэстар на полиле, кадэла лава сле гаравдэ лэндар. Вонэ на джянэнас пала со Вов дэдумэл.

Исусо састиярэл корэ

35 Кала Исусо поджялас форостэ, саво акхарэлпэ Ерихоно, ехх коро бэшэлас паша дром и мангглас ловэ.

36 Кала коро шунда, со пашэ лэстар джян мануша, вов пхучля:

— Со када терэлпэ?

37 Лэсти пхэндэ:

— Када джял Исусо Назаретостар.

38 Тунчи коро ачиля тэ типисяэвэ:

— Исусо, Чяво Давидохкоро! Ковлисар Тиро ѫло важ ман!

39 Мануша, савэ джиле англал, прыпхэндэ лэсти, соб вов тэ заачел мулком, нэ коро типисия инте зоралдэд:

— Чяво Давидохкоро! Ковлисар тиро ѫло важ ман!

40 Исусо ачиля пэ дром и прыпхэнда, соб тэ анэн кадэлэ корэ Лэстэ. Кала коро поджиля, Исусо пхучля:

41 — Со ту камэх, соб Мэ тэ терав важ тут?

Коро пхэнда:

— Pae! Камав тэ дыкхэ!

42 Исусо пхэнда лэсти:

— Дыкх! Тиро патявимо тут фирикарда!

43 Коро екхатар ачиля тэ дыкхэ и джиля пала Иисусо, а еджино ачиля тэ ваздэ слава Дэвлэсти. И всавэр мануша, ко дыкхле кода, ваздэнас Дэвлэсти слава.

19

Закхеи ачявлэл пэхкоро бэзимо

1 Тунчи Иисусо заджилия дэ форо Ерихоно и проджялас пав лэ.

2 Тай акэ, ех барвало мануш, стидэмаренгоро пхурэдэр, савэ акхарэнас Закхеи,

3 закамля тэ дыкхэ Иисусо, Ко Вов исин. Нэ Закхеи сля цыкноро вучимага, и лэсти нащи сля тэ дыкхэ Иисусо, колэсти со котэ стидэняпэ фартэ бут манушэн.

4 Колэсти вов прастэня англэ, загульда пэ тутово кашт, соб тэ дыкхэ Иисусо, кала Вов проджяла мамуй.

5 Кала Иисусо авиля пэ кодэва тхан, Вов вздыкхля упрэ и пхэнда:

— Закхеи! Змуукэ тэлэ! Авдивэ Манди трэбүни тэ авэ тутэ цэрэ!

6 Закхеи сиго змуукляпэ и баря лошага прылия Иисусо.

7 Манушэнди, савэ сле котэ, фартэ на чялия кода, и вонэ пхэнэнас:

— Касть Вов заджилия дэ цэр! Манушэстэ, саво джювэл дэ бэзима!

8 Закхеи ж вшилия англа Рае тай пхэнда:

— Рае! Епаш мурэ хулаимастар мэ отдава чёрорэнди, и касть лилём будэр, сар трэбүни, мэ рисава штарвар будэр.

9 Иисусо пхэнда лэсти:

— Авдивэ фиригаримо авиля дэ кадэва цэр, колэсти со и Закхеи исин Абраамохкоро чяво!

10 Чяво Манушыкано авиля тэ аракхэ и тэ фиригарэ кодэлэн, савэ хасиле.

Дума пала барвалэ манушэ и лэхкэрэн бутярнэн

11 Кодэлэнди, ко када шунда, Иисусо пхэнда инте ех дума. Колэсти со Иисусо сля паша Ерусалимо, и мануша гинисардэ, со сиго оттерэлапэ Дэвлэхкоро Тхагаримо.

12 Иисусо пхэнда:

— Ех мануш барвалэ родостар лагля дэ дуратуни пхув, соб тэ аче лэсти тхагарега, а тунчи камля тэ рисиэв павпалэ.

13 Вов акхарда дэшэн бутярнэн, дэнэ лэнди пав шэл драхмы и пхэнда: «Затерэн пэ кадэлэн ловэн манди ворха ды кодыя врьяма, сар мэ рисиава павпалэ».

14 Нэ мануша лэхкиря пхуятар на камле кадэлэ рае и бичалдэ пативалэн манушэн пала лэ дэ дром, соб вонэ тэ пхэнэн: «Амэ на камах, соб кадэва мануш тэ авэл амарэ тхагарега».

15 Нэ вов ачиля тхагарега и рисиля павпалэ. Тунчи акхарда пэстэ бутярнэн, савэнди дэнэ ловэ, соб тэ уджянэ, скици вонэ затердэ лэсти ворха.

16 Авиля англuno бутярно и пхэнда: «Хулае! Пэ тирэ шэл драхмы мэ затердом ехк пхангли!»

17 Хулай пхэнда лэсти: «Мишто. Ту — лачё бутярно! Пала кода, со ту слян чячино дэ кадэва набаро рындо, дава дэш форуя тала тиро васт».

18 Авиля авэр бутярно и пхэнда: «Хулае! Тирэ шэл драхмы затердэ панч шэла драхмы!»

19 Хулай пхэнда кадэлэ бутярнэсти: «И ту ав пхурэдэрэгэ пэ панчен форонэн».

20 Авиля трито бутярно и пхэнда: «Хулае! Акэ тути тирэ шэл драхмы! Мэ запханглём лэн дэ кхоснэ и гаравдом.

21 Мэ даравас тутар, колэсти со ту мануш, саво бут мангэл: ту лэх кода, со на тховэгас, и чинэх кода, со на чувэгас дэ пхув».

22 Хулай пхэнда лэсти: «Бибаахтало бутярно, тирэ лавэнца сундисарава тут! Ту джянглиян, со мэ — мануш, саво бут мангэл, и со мэ лав котэ, тев на тховавас, и чинав кода, со на чувавас дэ пхув?»

23 Сости ту на дэнян мурэ ловэ дэрындо? И кала мэ рисилём, тунчи залилём бы лэн и ворха упрээ.

24 И пхэнда пашунэ манушэнди: «Залэнтэ лэстар шэл драхмы и дэнтэ кодэлэсти, каастэ исин екх пхангли!»

25 Мануша пхэндэ хулаести: «Хулае! Лэстэ и кади исин екх пхангли!»

26 Нэ хулай дэдуманя лэнди: «Пхэнав тумэнди, каастэ исин, кодэлэсти дэлапэ инте. А каастэ нэнай, залэлапэ и кода, со лэстэ исин.

27 Мурэн врыжымашэн, сава на камле, соб мэ тэ авав лэнгэрэ тхагарега, анэн кордэ и мулярэн англа ман».

Исусо дэ бари слава заджял дэ Ерусалимо

28 Исусо розпхэнда када и джилия пав дром дэ Ерусалимо.

29 Кала Вов поджиля гавэндэ Виффагия тай Вифания, савэ аченас паша Оливково плай, Вов бичалда англэ дон Пэхкэрэн сиклярнэн

30 и пхэнда:

— Джян дэ гав, саво англа тумэн. Кала заджяна, дыкхэна, со ачел прыпхангло тэрно мугари, пэ савэ инте нико на бэшэлас. Отпхандэн лэ и лиджян Мандэ.

31 Кала ко пхучела тумэндар: «Пэ со тумэ отпхандэн мугаре?» — пхэнэн кади: «Вов трэбүни Раести».

32 Бичалдэ сиклярнэ джиле тай аракхле мугаре, сар пхэнда Исусо.

33 Кала вонэ отпхандэнас мугаре, хулая пхучле лэндар:

— Пэ со тумэ отпхандэн мугаре?

34 Сиклярнэ пхэндэ:

— Вов трэбүни Раести.

35 Тунчи андэ мугаре Исусостэ, чутэ пэ лэстэ пэхкири упрануни ѫда тай тховдэ Исусо упран.

36 Кала Исусо ладэлас, мануша чувэнас пэ дром пэхкири упрануни ѫда.

37 Кала Исусо подлагя тханэстэ, тев дром эмзүкэлпэ Оливковонэ плаестар, фартэ бут сиклярнэн подваздэнэ пэхкоро гласо и лошага ачиле тэ ашарэ Дэвлэ пала барэрындуя, савэ вонэ дыкхле.

38 И пхэнэнас:

— Бахтало исин Тхагари, Саво авэл важ Раехкоро Лав! Пачя пэ упралима и слава Дэвлээсти пэ вуче упралима!

39 Койсавэ фарисея аченас котэ и пхэндэ Исусости:

— Сиклимари! Улэ Тирэ сиклярнэн!

40 Нэ Исусо дэдуманя лэнди:

— Пхэнав тумэнди: кала вонэ заачена мулком, тунчи бара затиписявшна.

Исусо рөвэл пала Ерусалимо

41 Кала вонэ поджили пашэдэр Ерусалимостэ, Исусо вздыкхля пэ форо и заровиня.

42 Тай пхэнда:

— О, тэ полэх бы ту авдивэ, со анэла тути пачя! Нэ кана гаравдо када тирэ якхэндар.

43 Авэна дивэ, кала тирэ врыжымашуря выдмяна маримага пэ тут, ваздэнэ пэ тут пхүяэн плая, поджяна тут тай стасавэна тут всавэрэ ригэндар.

44 Розпхагэна тут, тирэ чяворэн муллярэна, бар пэ барэ тути на ачявшна, пала кода со ту на уджанглын врязма, кала Дэвлэ авиля тутэ.

Исусо дэ храмо

45 Тунчи Исусо заджили дэ храмо и ачиля тэ вытрадэ тимисарен.

46 И пхэнэлас:

— Кади исин чиндо: «Муро цэр — када цэр мангимахкор», а тумэ тердэ лэстар прахарицико цэр.

47 Диво дивэстар Исусо сиклярэлас манушэн дэ храмо. Нэ англунэ рашая, сиклимаря пав Упхэнима тай манушэнгэрэ пхурэдэра родэнас, сар тэ мулярэ Исусо.

48 И на джянгле, сар када тэ стерэ, колэсти со всавэрэ мануша шундэ Исусохкэрэ лава и на камле тэ промукэ ни ехх лэндар.

20

Катарь Исусостэ зор

1 Еххвар, кала Исусо сиклярэлас манушэн дэ храмо и пхэнэлас Бахтало Лав, поджило Лэстэ англунэ рашая тай сиклимаря пав Упхэнима ётханэ пхурэдэрэнца

2 и пхучле Лэстар:

— Пхэн амэнди, савя зорага Ту вса кода терэх? И ко дэня Тути кадыя зор?

3 Исусо пхэнда лэнди дэ отпхэнима:

— Пхуччая и Мэ тумэн, пхэнэн Манди:

4 катарь Иоанностэ зор тэ болдэ, упралиастар чи манушэндар?

5 Тунчи вонэ дэдумане машкар пэстэ:

— Кала пхэнага: «Упралиастар», — Вов пхучела: «Сости ж тумэ лэсти на патине?»

6 А кала пхэнага: «Манушэндар», — тунчи всавэрэ мануша марэн амэн барэнца, вонэ ж динэн, со Иоанно сля англуниари.

7 И пхэндэ:

— Амэ на джянах, кастьар.

8 Исусо пхэнда лэнди:

— Тунчи и Мэ на пхэнава тумэнди, савя зорага терав вса откада.

Дума пала бибахталэн бутярнэн дэ винограднико

9 Тай пхэнда кацави дума:

— Ехх мануш выбарярда винограднико. Тунчи здэня лэ манушэнди пала ловэн, а еджино улаглая пэ бут вряза.

10 Кала поджиля вряза, бичалда лэндэ пэхкэрэ бутярнэ, соб тэ залэ котор виноградостар, саво стидэне. Нэ виноградаря дукхавдэ бутярнэ и отбичалдэ лэ павпалэ шүшэ вастэнца.

11 Хулай бичалда лэндэ аврэ бутярнэ, нэ вонэ мардэ лэ тай тэллярдэ лэхжири патив, и отбичалдэ шүшэ вастэнца.

12 Хулай бичалда лэндэ инте ехх бутярнэ. Нэ виноградаря и кодэлэ домардэ и вычутэ аври.

13 Тунчи хулай пав винограднико пхэнда: «Со манди тэ терэ? Бичалава лэндэ мурэ камлэ чавэ, чи на ладжяна лэстар?»

14 Нэ виноградаря дыкхле чавэ и пхэндэ ехх еххэсти: «Акэ кодэва, касти доросэлалт всаворо хулаимо, мулярага лэ, тунчи хулаимо доросэлапэ амэнди».

15 Тунчи вылиджялдэ чавэ аври виноградникостар тай мулярдэ лэ. И со терэла лэнца виноградникохкоро хулай?

16 Авэла тай мулярэла кадэлэн виноградарен, а винограднико отдэла аврэ манушэнди.

Мануша, савэ шундэ Исусо, пхэндэ:

— Тэ на авэл кади!

17 Исусо вздыкхля пэ лэн и пхучля:

— Сар тэ полэ кода, со чиндо: «Бар, саво вычутэ кодэла, ко ваздэнас цэр, ачиля шэрүтнэ барэгэ дэ вэнгло?»

18 Ко тэлэдэла пэ кодэва бар, розмарэлапэ, а пэ кастэ кодэва бар пэрэла, розтасавэла лз.

19 Дэ кодыя врьяма сиклимаря пав Упхэнима тай англунэ рашая полиле, со Иисусо пала лэн розпхэнэлас, и камле екхатар тэ хутилэ Лэ, нэ дарэне манушэндар.

Чи трэбүни тэ потинэ налогуря императости

20 Тунчи вонэ ачиле тэ дыкхэ пала Иисусо и подбичалэнас Лэстэ манушэн, савэ поддыксхэнас пала Лэ и прытховэнспэ пативалэ манушэнца, нэ роднаас, сар тэ астарэ Иисусо пэ лавэн тай тэ здэ Лэ раенди и прыбэшлэсти Римостар.

21 Вонэ пхучле Иисусостар:

— Сиклимари! Амэ джянах, со Ту пхэнэх тай сиклярэх пав чячима. И на дыкхэх пэ мо манушэсти, нэ сиклярэх манушэн чячюнэ Дэвлэхкэрэ дромэсти.

22 Чи мишто пав Упхэнима тэ потинэ налогуря императости, чи нат?

23 Иисусо полиля лэнгоро хрантимо тай пхэнда лэнди:

24 — Сикавэнтэ манди динарии: кахкоро муй исин вымардо пэр лэстэ и кахкоро катэ лав?

Вонэ пхэндэ:

— Императохкэрэ.

25 Иисусо пхэнда лэнди:

— Тунчи отдэн императости императохкоро, а Дэвлэсти отдэн Дэвлэхкоро.

26 Лэндэ на выджиля тэ схутилэ Иисусо пэ лавэ англа манушэн. Вонэ дэнепэ дыво Лэхкэрэ лавэнди и заачиле мулком.

Пала отджюндивимо мулэндар

27 Тунчи авиле койсавэ саддукея. Вонэ на патянас, со мулэ отджювдёна, тай пхучле Иисусостар:

28 — Сиклимари! Моисеи чинда амэнди, со, кала мэрэла мануш, кастэ сля ромни и на сля чяворэн, тунчи лэхкэрэ пхралэсти трэбүни тэ лэл боря паларом, соб тэ авэл пхралэстэ родо.

29 Сля эфта пхралэн. Пхурэдэр лэндар лиля пэсти ромня, нэ тунчи муля, и чяворэн на сля лэндэ.

30 Кади ж и авэр пхрал.

31 И трито пхрал лиля пэсти кадэла ромня, и кади ж всавэрэ эфта пхралэн. Всавэрэ пхрала помуле, и чяворэн лэндэ на сля.

32 Тунчи муля и ромни.

33 Кала муля отджювдёна, кахкири ромни кадыя манушни авэла? Вой жэ эфта молы паларом выджаилас!

34 Иисусо пхэнда лэнди:

— Мануша дэ кадэва вако лэн пэсти ромнен и джян паларом.

35 А кasti вытэлэдэла патив тэ джювэ дэ авэр вако тай савэ отджювдёна мулэндар, кадэла мануша на лэн пэсти ромнен и паларом на выджен.

36 Вонэ на мэрэна, нэ исин сар ангелуя. Вонэ важ Дэвлэ чявэ и чея, колэсти со авэна ваздэнэ мулэндар.

37 Ай кода, со мулэ отджювдён, сикавда Моисеи паша терново кашт, саво пхаболас, кала пхэнда Раести, со Вов — Дэвэл Авраамохкоро, Дэвэл Исаакохкоро тай Дэвэл Иаковохкоро.

38 Вов — Дэвэл джювдэн, а на мулэн. Лэстэ всавэрэ исин джювдэ.

39 Пэ кода койсавэ сиклимаря пав Упхэнима пхэндэ:

— Сиклимари! Ту мишто пхэндан.

40 И всавэрэ даранас тэ пхучле Иисусостар дурэдэр.

Ко исин Иисусо

41 Тунчи Иисусо пхучля лэндэ:

— Сар пхэнэн, со Христосо исин Чяво Давидохкоро?

42 Кала еджино Давидо пхэнэл дэ лил «Псалмы»:
«Пхэнда Рай Дэвэл мурэ Раести:

Бэш пав чяче вастэ Мандар

43 ды кодыя връяма,
сар Мэ чувава Тирэ връжымашэн
тала пурэн Тути».

44 Давидо аххарэл Лэ Раега. Сар Вов прыджаалпэ Давидости чявэга?

Исусо пхэнэл пала домуенгэрэн манушэн

45 И кала Иисусо шундэ всавэрэ мануша, Вов пхэнда Пэхкэрэ сиклярнэнди:

46 — Даран сиклимарендар пав Упхэнима, савэнди чялёр тэ пхирэ дэ лунго юда и соб мануша тэ наисарэнтэ лэнца пэ форо. Дэ синагога и дэ цэрэн, курик лэн аххарэн, вонэ камэн тэ бэшэ пэ англуюно тхан.

47 Вонэ залэн цэра джювлендар, савэндэ муле рома, и бут мангэнпэ кади, соб тэ дыкхэн лэн мануша. Лэн дожутярэл барэдэр сындо.

21

Манушни дэл ловэ пэ храмо

1 Тунчи Иисусо дыкхля, сар барвалэ мануша чувэнас даруля дэ храмохкоро сыртали.

2 Дыкхля кади ж, сар чёроры манушни, савятэ муля ром, чута дэ сыртали дуй харумэ хурдэ ловэнца.

3 Иисусо пхэнда:

— Чячимага пхэнав тумэнди, со кадыя чёроры манушни чута будэр всавэрэндар.

4 Всавэрэ пэхкэрэ барвалимстар дэне даро Дэвлэсти, а кадыя чёры отдэня всавэрэ ловэ, савэ сле латэ пэ джювима.

Исусо пхэнэл пала кода, со авэла

5 Кала мануша пхэнэнас пала храмо, сар вов стердо кучутнэ барэндар тай шукар обтховдо дарэнца, савэ анэнас Дэвлэсти, Иисусо пхэнда:

6 — Авэла връяма, кала кодэлэстар, со тумэ катэ дыкхэн, на ачелапэ бар пэ барэ, вса авэла розмардо.

7 Тай пхучле Иисусостар:

— Сиклими! Кала вса откада авэла? Сави шпэра, со када вса сиго авэла?

8 Иисусо пхэнда:

— Дыкхэн, соб тумэн тэ на хохавэн! Бут манушэн авэна тала Муро Лав и ханэна: «Када Мэ» и «Авиля връяма». На джян пала лэндэ.

9 Кала шунэнэ пала маримо и пала кода, сар ваздэнпэ мануша екх пэ екхэстэ, тунчи на даран. Англал кадэлэсти трэбуни тэ авэ. Нэ агор авэла на екхатар.

10 Иисусо пхэнэлас дурэдэр:

— Народуя ваздэнапэ пэ марима екх екхэга, и тхагаримо выджаля пэ марима тхагаримага.

11 Пхув затинисявлэла баря зорага, авэна пав тханэн бокха, насвалимо и бари дар, тай упралимо парувэлапэ.

12 Нэ англал мануша авэна тэ хутилэ тай тэ традэ тумэн, тэ отлиджя дэ синагоги тай тэ чувэ дэ барунэн. Вонэ лиджяна тумэн тхагарендэ и раэндэ пала Муро Лав.

13 Тунчи тумэндэ авэла връяма тэ пхэнэ пала Ман.

14 Нэ тховэн пэсти дэ ѥлэ: на пхагэн шэро, со тэ пхэнэ.

15 Мэ дава тумэнди кацавэ лава и годи, со тумарэ връжымашуря пхандэна муй и на выачена англа тумэн.

16 Доджяла ды кодэлэ, со дада и дэя, пхрала, родо тумаро и амала авэна тэ здэ тумэн, а койсавэн тумэндар муллярзна.

17 Всавэрэ мижона пэ тумэн пала Ман.

18 На ни екх балоро тумарэ шэрэстар на хасявэла.

19 Кодэлэсти рицарэнэ тумарэ патявимастэ, соб тэ фирикарэ тумаро джювомо.

20 Кала ж дыкхэна, со бут халавдэн стасавэн Ерусалимо, тунчи джянэн, со авиля врязма, кала форо кадэва авзла розмардо и ачявдо.

21 Тунчи кодэла, савэ дэ Иудея, мэк нашэн дэ плаен, и кодэла, ко дэ форо, мэк выджян лэстар, и савэ джювэн дэ гавэн, мэк дэ форо на заджян.

22 Кода исин врязма, кала Дэвэл дэла лэнди пав лэнгэрэнрындонэн и кала стерэлапэ вса, со чиндо.

23 Бида дэ кодэлэн дивэн джювленди, савэ исин пхарэ и савэ парварэн цыкнэ чяворэн. Важ кода со бари грыжа джял пэ кадыя пхув и бари холи пэ кадэлэн манушэн.

24 Койсавэн муллярзна барэ чюренца, бутэн схутилэнна тай отгиджяна дэ пхухя, тев джювэн авэр народуя. Наидея авэна тэ тасавэ пурэнца Ерусалимо ды кодэлэ, сар на пэрэачела лэнгири врязма.

Исусо пхэнэл, сар Вов рисявлэла

25 Тунчи парувэнапэ кхам, чён тай чергэня. Народуя пэ пхув шунэн, сар море дэла баро ғласо, и лэн облэна бари дар и бари грыжа.

26 Вонз авэна тэ хацарэ зора даратар, кала авэна тэ дожутярэ кода, со джял пэ кадыя люмля, и зора пэ упралима издрана.

27 Тунчи дыкхэна Чявэ Манушыканэ, Саво джял пэ хмара баря зорага и дэ бари слава.

28 Кала вса кода авэла, тунчи вщен ворта и ваздэн тумарэ шэрэ упрэ, колэсти со фирисаримо тумаро пашэ.

29 И пхэнда лэнди Исусо кацави дума:

— Подыкхэнтэ пэ инжырно кашт и пэ авэр кашта.

30 Кала тумэ дыкхэна, со пэ лэн рандя розмукэнпэ, тунчи джянэн, со сиго авэла милай.

31 Кала тумэ дыкхэна, со вса кода терэлпэ, джянэн, со надур тумэндар исин Дэвлэжкоро Тхагаримо.

32 Чячимага пхэнав тумэнди: родо кадэва на проджяла, сар вса откада терэлапэ.

33 Упралимо тай пхув проджяна, нэ лава Мурэ на проджяна никала.

Дыкхэн пала пэстэ

34 Дыкхэн пала пэстэ, соб тумарэ ѹлэ тэ на тасавэн биладжявимо, матимо и годи, сави кици думисарэл, сар дурэдэр тэ джювэ. Дыкхэн, соб кадэва диво тэ на авэл пэ тумэн, кала тумэ лэ на дожутярэн.

35 Сар кхувди чувэн пэ чириклен, кала вонэ на дожутярэн кода, кади ж и кадэва диво авэла пэ всавэрэн, ко джювэн пэ люмля.

36 Всавири врязма дыкхэн пала пэстэ тай мангэнпэ, соб тумэндэ тэ авэл зор тэ пэрэлиджя кода, со авэла пэ кадыя пхув, и тэ аче англа Чявэ Манушыканэ.

37 Дивэсэ Исусо сиклярэлэс дэ храмо. Кала ж бэшэлас кхам, Вов джялас пэ Оливково плай и ратярэлэс котэ.

38 Дэнзор всавэрэ мануша авэнас Исусостэ дэ храмо, соб тэ шунэ Лэ.

Иуда джял рашаенэ

1 Сля пашэ сырботори, саво акхарэлпэ Биковасно мандро, а инте — Патради.

2 Англунэ рашая и сиклимаря пав Упхэнима родэнас, сар тэ мулярэ Иисусо, нэ даранас манушэндар.

3 Тунчи сатана заджиля дэ Иуда, савэ акхарэнас Искариото, екхэ дэшдууе сиклярэндар.

4 Иуда джилия тай допхэндапэ англунэ рашаенца и халавдэнца, со вов здэла лэнди Иисусо.

5 Вонэ лошиле тай пхэндэ Иудасти, со потинэнэ лэсти.

6 Вов дэня лав и родэлас поджили връяма, кала Иисусо ачелапэ Еджино, соб тэ здэ Лэ.

Иисусо прылхэнэл тэ лачярэ скаминд

7 Авиля диво, саво акхарэлпэ Биквасно мандро, кала трэбуни тэ чинэ патрадякэрэ бакрорз.

8 Тунчи Иисусо акхарда Петро тай Иоанно и пхэнда лэнди:

— Джян и лачярэн патрадякоро хамо.

9 Вонэ пхэндэ Иусости:

— Тев Ту камэх, соб амэ тэ лачярах?

10 Иисусо пхэнда лэнди:

— Акэ, кала тумэ заджяна дэ форо, дыкхэнэ манушэ, саво лиджял вакхор панега. Джян пала лэ и заджян дэ кодэва цэр, курик вов заджяла.

11 Тай пхэнэн цэрэхкэрэ хуласти: «Сиклимири пхучел тутар: "Тев цэр, соб Манди тэ ха патради Мурэ сиклярэнца?"»

12 Хулай сикавэла тумэнди баро цэр упрэ, саво прытидэнэ важ сырботори. Котэ терэн скаминд.

13 Вонэ джиле тай вса аракхле, сар пхэнда лэнди Иисусо, и лачярдэ патрадякоро хамо.

Сиклярнэ тай Иисусо хан патрадякоро хамо

14 Кала авиля връяма, Иисусо тай апостолуяр бэшле пала скаминдэ.

15 Тунчи Иисусо пхэнда:

— Сар Мэ камлём тэ ха кадэва патрадякоро хамо тумэнца англа кода, сар прылава барий грыжа.

16 Пхэнав тумэнди, со будэр на хава Мэ лэ ды кодыя връяма, сар терэлапэ кадыя патради дэ Дэвлэхкэрэ Тхагарима.

17 Тунчи Вов лиля тахтай, наисарда Дэвлэ тай пхэнда:

— Прилэн кадэва тахтай и всавэрэ пэн лэстар.

18 Пхэнав тумэнди, со будэр на авава тэ пэ пимо виноградостар аж ды кодыя връяма, сар авзла Дэвлэхкоро Тхагаримо.

19 Тунчи Иисусо лиля мандро, наисарда Дэвлэ, пхагля мандро пэ которэн, дэня лэнди и пхэнда:

— Када исин Муро трупо, саво пала тумэн отдава. Кади терэн, соб тэ рапирэн Ман.

20 Кала вонэ хале, Иисусо кади ж лиля тахтай и пхэнда:

— Кадэва тахтай исин нэво завето дэ Мурэ ратэ, саво пала тумэн прочувэллпэ.

21 Тай акэ, васт кодэлэхкоро, ко здэл Ман, Манца пала екхэ скаминдэ.

22 Чаво Манушыкано джял кади, сар Лэсти трэбуни тэ проджя. Нэ бида кодэлэ манушэсти, саво здэл Лэ.

23 Тунчи сиклярнэ ачиле тэ пхуче екх екхэстар, ко лэндар камля кода тэ терэ.

Подрицарэн екх екхэ

24 Тунчи вонэ ачиле тэ хапэ екх екхэгэ пала кода, ко лэндар барэдэр.

25 Иисусо пхэнда лэнди:

— Тхагаря народонэнгэрээ прыпхэнэн лэнди. Кодэла, кастэ исин зор, пхэнэн, со вонэ терэн лачимо.

26 Нэ тумээ на терэн кади. Барэдэр тумэндар мээк тээ авэл сар цыкнэдэр всавэрэндар, и кодэва, ко прыбэшло тумэндээ, мээк авэл сар бутярно.

27 Ехээл пала скаминдээ, ай авэр стховэл пэ скаминдээ хамо. Ко лэндар барэдэр? Чи на кодэва, ко бэшэл пала скаминдээ? А Мэ машкар тумэн сар бутярно.

28 Тумээ пэрэлиджялдэ Манца бут зумавимо.

29 Сар Дад Муро дэня Манди Тхагаримо, кади и Мэ дав тумэнди,

30 соб тумээ тэхан и тэ пэн пала Мурэ скаминдээ дэ Мурэ Тхагарима. Тумээ бэшэна пэ тронурая тэ сундисарэ дэшудуй родуря Израилёхкэрэ.

Исусо дэдумэл, со Пётро отпхэнэланэ Лэстар

31 — Симоно, Симоно! Акээ, сатана мангля тээ зумавэ тумэн, соб тумээ тээ авэн жужардээ, сар див жужарэллэ сулумэндар.

32 Нэ Мэ манглёмпэ пала тут, соб тээ на хацарэх патявимо. И кала ту рисявэга павалале Мандэ, тунчи подрицаарэга тирээ пхралэн.

33 Пётро пхэнда Лэсти:

— Рае! Пала Тут мээ и дэ барунэ, и пэ мэрима джява!

34 Исусо дэдуманя:

— Пхэнав тути, Пётро, англа колэ, сар задилабэла башно авдивэ, ту тривал Мандар отпхэнэгапэ.

35 Тунчи Исусо пхэнда лэнди:

— Кала Мэ бичалавас тумэн и тумэндээ на сля ни тышила, ни трастэ, ни пундрангэ, чи на хутилэлас со тумэнди?

Вонэ пхэндээ:

— Нат.

36 Тунчи Исусо пхэнда лэнди:

— Нэ еххатар, кала кастээс исин тышила чи трастэ, лэнтэ лэн. Ай кастэ нэнай, мээк кодэва битинэла пэххири ёдаа тай тинэла чюри.

37 Пхэнав тумэнди, со Манца авэлэх кода, сар чиндо: «И пала пракхаре динэнас Лэ». Трэбүни, соб тээ стерэллээ вса, со пхэндо пала Ман.

38 Вонэ пхэндээ:

— Рае! Акээ, амэндэ исин дуй чюри!

Исусо пхэнда лэнди:

— Када хутилэлас.

Исусо мангэллэ пэ Оливково плай

39 Тунчи Исусо выджиля цэрэстар тай джиля, сар Лэстэ сля прылито, пэ Оливково плай. Джиле Лэгэ и Лэхкэрэ сиклярнэ.

40 Кала вонэ авиле пэ кодэва тхан, Исусо пхэнда:

— Мангэнпэ, соб тээ на авэн тумээ зумавдээ!

41 Еджино джиля лэндар пэ скици чувэн бар, пэля пэ чянгэн, ачиля тээ мангэллэ

42 тай пхэнда:

— Дадэ! Кала исин Тири воля, залээ кадэва тахтай Мандар! Нэ мээк авэла, на сар Мэ камав, а сар камэх Ту.

43 Тай авиля ангело упрамистар и подрицаарэлас Исусо.

44 Сля Лэсти фартэ пхаро, и Вов инте зоралэдэр мангэласпэ, кади со Лэхкоро пото сля сар рат и тэлэдэлас пэ пхув.

45 Кала помантгялээ, Исусо вшиля, поджиля сиклярнэндэ и дыкхля, со вонэ засутэ баря грыжатар.

46 Исусо пхэнда лэнди:

— Сости тумээ совэн? Вишен и мангэнпэ, соб тээ на авэн тумээ зумавдээ!

Иуда здэл Исусо

47 Кала Исусо инте пхэнэлас кадэла лава, авиля гроза манушэн. Англал лэндар джялас екх дэшдуундар, савэ акхарэнас Иуда. Вов поджиля Исусостэ тэ чюминдэ Лэ.

48 Исусо пхэнда лэсти:

— Иуда! Ту чюминдэх и дэ кодыя ж врьяма здэх Чявэ Манушыканэ?

49 Кодэла, ко аченас пашэ, полиле, со екхатар авэла, тай пхэндэ:

— Рае! Чи тэ на малавэ амэнди чюрягэ?

50 Екх лэндар вылияа чори, малавда англунэ рашаехкэрэ бутярнэ тай отчинда лэсти чячэ кан.

51 Тунчи Исусо пхэнда:

— Авэла тумэнди!

Вов лилягэ канэстэ и састьярда бутярнэ.

52 Англунэ рашаендер, халавдэндэ храмостар тай пхурэдэрэндэ, савэ авиле тэ схутилэ Исусо, Вов пхучияа:

— Сар пэ прахарэ, выджели тумэ пэ Ман чюренца тай дэстэнца?

53 Диво дивэстар Мэ слём тумэнца дэ храмо, и тумэ на ваздэне пэ Ман пэхкоро васт. Нэ екхатар тумари врьяма, кала калимо лиляа зор.

Пётро отпхэнэллэ Исусостар

54 Тунчи вонэ схутилдэ Исусо тай отлиджялдэ англунэ рашаестэ дэ цэр. А Пётро рицардапэ лэндар ригага, нэ джялас пала лэн.

55 Машкар грэда розлиджялдэ яг, и бэшле всавэрэ пашэ ягатэ. Бэшля и Пётро лэнца.

56 Екх бутярни дыкхля Петро, кала вов бэшэлас паша яга, прыдыхляпэ лэстэ тай пхэнда:

— И кадэва сля Лэгэ.

57 Нэ Пётро на прыдажянгялпэ тай пхэнда джювляти:

— Нат, джювлие, мэ на джянов Лэ.

58 Проджиля набут врьяма, авэр мануш дыкхля Петро и пхэнда:

— И Ту екх лэндар!

Нэ Пётро пхэнда кадэлэ манушэсти:

— Нат, мануша, када на мэ!

59 Проджиля екх мардо врьяма, тай инте екх мануш пхэнда дэ якхэн:

— Чячимага, кадэва кади ж сля Лэгэ, вов исин галилеянино.

60 Нэ Пётро пхэнда кадэлэ манушэсти:

— Мануша, на джянов, пала со ту пхэнэх.

И екхатар, кала вов инте пхэнэлас кадэва лав, затиписиля башно.

61 Тунчи Рай обрисилягэ тай вздыкхляа Петро. И Пётро взгинисарда Раехкоро лав, сар Вов пхэнда лэсти: «Ды колз, сар задилабэла башно авдивэ, ту тривал Мандар отпхэнэгэпэ».

62 Вов выджиля котарь и заровиня кэркэ ясвэнца.

63 Мануша, савэ рицарэнас Исусо, марэнас Лэ тай асанас Лэстар.

64 Вонэ запхангле Лэсти якха, мардэ Лэ пав муй и пхученас:

— Ту, англунари, пхэн, ко малавда Тут?

65 И бут налаче лава пхэнэнас пала Исусо.

Синедрионо сундисарэл Исусо

66 Кала проджиля рят, стидэнепэ манушэнгэрэ пхурэдэра, англунэ рашая и сиклимаря пав Упхэнима, андэ Исусо дэ лэнгоро Синедрионо

67 тай пхучие Лэ:

— Ту исин Христос? Пхэн амэнди.

Исусо дэдуманя:

— Кала пхэнава тумэнди, тумэ на патяна.

68 А кала Мэ пхучява тумэндар, тумэ нисо на пхэнэна Манди.

69 Нэ еххатар Чяво Манушыкано авэла тэ бэшэ пав чячи риг Дэвлэхкирэ зоратар.

70 Тай пхэндэ всавэрэ:

— И кади, Ту исин Дэвлэхкоро Чяво?

Исусо пхэнда лэнди:

— Тумэ еджинэ пхэнэн, со Мэ исин Дэвлэхкоро Чяво.

71 Кодэла мануша пхэндэ:

— Саво допхэнимо амэнди инте трэбуни? Амэ еджинэ шундэ, со Вов пхэнда.

23

Исусо англа Пилато

1 Тунчи всавэрэ, ко сле котэ, вшиле и отлиджялдэ Исусо Пилатостэ.

2 Тай ачиле тэ дошарэ Лэ и пхэнэнас:

— Амэ уджянгле, со Вов змарэл амаро народо дромэстар, пхэнэл, со на трэбуни тэ потинэн налогуря императости, и дэдумэл пала Пэстэ, со Вов — Христосо, Тхагари.

3 Пилато пхучия Лэстар:

— Ту Тхагари иудеенгоро?

Исусо пхэнда:

— Ту кади пхэнэх.

4 Пилато дэдумана англунэ рашаенди и всавэрэ манушэнди:

— Мэ на аракхав дэ Кадэлэ Манушэ нисави дош.

5 Нэ вонэ на пэрэченас тэ дошарэ Исусо и пхэндэ:

— Вов ваздэл манушэн и сиклярэл пав всавири Иудея, англал дэ Галилея, а тунчи авиля пэ кадэва тхан.

Иродо допхучел Исусо

6 Пилато шунда када и пхучия:

— Вов Галилеятар?

7 Кала Пилато уджянгля, со Исусо кодэлэ тханэстар, тев сля тхагарега Иродо, вов бичалда Исусо Иродостэ, саво дэ кадэлэн дивэн сля дэ Ерусалимо.

8 Иродо дыкхля Исусо и фартэ лошия. Вов думут камля тэ дыкхэ Исусо, колэсти со бут ашунда пала Лэ и камля, соб Вов тэ сикавэл лэсти варисаво дыво.

9 И бут пала со розпхучелас Лэ, нэ Исусо нисо на пхэнда Иродости.

10 Ай англунэ рашая и сиклимаря пав Упхэнима аченас котэ и дурэдэр дошарэнас Лэ.

11 Иродо ётханэ халавдэнца ачиле тэ обмукэ патив Исусохкири тай асанепэ Лэстар. Тунчи урявда Лэ дэ барвали ёда тай отбичалда павпалэ Пилатостэ.

12 Дэ кодэва диво Иродо тай Пилато ачиле амалэнца, а ды колэ вонэ сле врыжымашэнца.

Пилато уталэ допхучел Исусо

13 Пилато ж акхарда англунэ рашаен, пхурэдэрэн и всавэрэн манушэн.

14 Тай пхэнда лэнди:

— Тумэ андэ мандэ Кадэлэ Манушэ и пхэндэ, со Вов ваздэл манушэн. Тай акэ, мэ англа тумзн роздыкхлём Лэхкоро рындо и на аракхлём дэ Кадэлэ Манушэ нисави дош, дэ савя тумз Лэ буджилисарэн.

15 Тай Иродо на дошарда Лэ и бичалда павпалэ. Вов нисо кацаво на терда, пала со Лэ трэбуни тэ сундисарэ пэ мэрима.

16-17 Мэ прыпхэнава тэ марэн Лэ чукненца, а тунчи отмукава.*

* **23:16-17** Дэ койсавэ пурэн греческа лила (манускрипты) исин инте кацавэ лава: «Пилатости сля трэбуни пэ сырботори Патради тэ отмукэ екхэ манушэ барунэстар».

18 Нэ всавэрэ мануша затиписиле:

— Мэримо Лэсти! Отмук амэнди Варавва!

19 Ай Варавва бэшля дэ барунэ пала кода, со вов мулярэлас и ваздэлас манушэн дэ форо.

20 Пилато упалэ подваздэня пэхкоро гласо, колэсти со камля тэ отмукэ Исусо.

21 Нэ мануша типисиле:

— Прымар, прымар Лэ пэ трушул!

22 Пилато дэ трито моло пхэнда лэнди:

— Сави бида Вов терда? Мэ на аракхлём дэ Лэстэ нисави дош, пала савя Лэ трэбүни тэ сундисарэ пэ мэрима. Мэ прыпхэнава, соб Лэ тэ марэн чукненца, тай тунчи отмукава.

23 Нэ мануша затиписиле зоралэ гласога, соб тэ прымарэ Лэ пэ трушул, и типимага домардээ пэхкоро.

24 Тунчи Пилато сундисарда Исусо кади, сар вонэ камле.

25 И отмукля барунэстар прахаре, саво мулярэлас и ваздэлас всавэрэн манушэн дэ форо, а Исусо отдэня дэ лэнгэрэн вастэн, сар и мангле иудея.

Исусо лиджян пэ мэрима

26 Кала халавдэ лиджянас Исусо пэ мэрима, вонэ схутилдэ Симоно кирениянино, саво джялас малятар, и прыпхэндэ лэсти тэ лиджя трушул пала Исусо.

27 Фартэ бут манушэн джянас пала Исусо. Джянас пала Лэ и джювля, савэ марэнас еджинэ пэ дэ колинэн баря грыжатар тай фартэ ровэнас пала Лэ.

28 Исусо обрисиляпэ лэндэ тай пхэнда:

— Чеялэ Ерусалимостар! На ровэн пала Ман! Нэ ровэн пала пэстэ и пала тумарэн чяворэн.

29 Акэ, поджял врьяма, кала пхэнэна: «Бахталэ бичяворэнгэрэ, савэ на бэнёнас и на парварэнна цыкнэ чяворэн!»

30 Тунчи мануша пхэнэна вуче тай цыкнэ плаенди: «Тэлэдэн пэ амэн!» тай «Ушарэн амэн!»

31 И кала терэн када джювдэ каштэгэ, со тунчи терэнна шукэгэ?

Исусо прымарэн пэ трушул

32 Лицялдэ пэ мэрима ітханэ Лэгэ дон прахарен.

33 Кала авиле пэ тхан, саво акхарэлпэ Черепо, котэ прымардэ пэ трушул Исусо тай дон прахарен, еххэ пав чячи риг, ай аврэ пав зэрво риг Лэстар.

34 Исусо пхэнэлас:

— Дад! Эртисар лэн! Вонэ на джянэн, со терэн.

Халавдэ чутэ жребии и розлиле Лэхкири Ѣда.

35 А мануша аченас и дыхэннас. Пхурэдэра терэнна асамо Исусостар тай пхэнэнас:

— Аврэн фирикарда, а екхатар мэк Еджино Пэ фирикарэл, кала Вов исин Христосо, Савэ Дэвэл вытидэня.

36 Кади ж и халавдэ асанас Исусостар, поджянас Лэстэ тай дэннас Лэсти шукло мол.

37 И пхэнэнас:

— Кала Ту исин Тхагари иудеенгоро, тунчи фирикар Еджино Пэ!

38 Упрэ Лэстар сля чиндо: «Кадэва исин иудеенгоро Тхагари».

39 Ехх прахарендар, саво сля амблавдо пэ трушул, кошэлас Исусо и пхэнэлас:

— Кала Ту исин Христосо, фирикар Еджино Пэ и амэн!

40 Авэр прахари улэлас лэ тай пхэнэлас:

— Ту Дэвлэстар на дарах? Ту еджино сундисардо пэ мэрима, сар и Вов.

41 Амэн сундисардэ пала амари дош и дэне амэнди кода, со амэ затердэ. Нэ Вов на терда нисаво вурьитимо.

42 Тай пхэнда Лэсти:

— Иисусо, взгинисар пала ман, кала Ту авэгэ дэ Тирэ Тхагарима!

43 Тай пхэнда лэсти Иисусо:

— Чячимага пхэнав тути: авдивэ ту авэгэ Манца дэ раи.

Иисусохкоро мэримо

44 Сля диво аври, пашэ дэшудуй чясо время, тай пав всавири пхув зму克莱пэ калимо ды тритонэ чясо время.

45 Кхам калия, тай похтан, саво сля амблавдо дэ храмо, пхариля поепаш.

46 Тунчи Иисусо затиписиля зоралэ гласога:

— Дадэ! Дэ Тирэ вастэн отдав Муро фано!

Вов пхэнда када и отдэня фано.

47 Кала шэляжкою пхурэдэр дыкхля вса откада, вов ваздэня слава Дэвлэсти тай пхэнда:

— Чяче, Вов сля дэвликуно Мануш!

48 Всавэрэ мануша, савэ стидэнепэ, соб тэ дыкхэ Лэхжкою мэримо, дыкхле, со тердапэ, джиле павпалэ тай марэнас еджинэ пэ дэ колинэн.

49 Дурал ачиле и дыкхэнас пэ кода мануша, савэ джянгле Иисусо, тай джювля, савэ джянас пала Лэстэ Галилеятар.

Иисусо гаравэн

50 Котэ сля лачё и пативало мануш, савэ акхарэнас Иосифо. Вов сля екх пхурэдэрэндэр дэ Синедрионо,

51 нэ на подрицарэлас лэнгэрэ лава ирындуя. Вов выбариля дэ форо Аримафея тай дожутярэлас, кала авэла Дэвлэхжкою Тхагаримо.

52 Вов авиля Пилатостэ тэ мангэ, соб кодэва тэ отдал лэсти Иисусохжкою трупо.

53 Иосифо слия трупо трушулэстар, обкхувда похтанога, дэ савэ гаравэн мулен, тай тховда дэ склепо, саво сля вымардо дэ барэ и тев интеника на гаравэнэс.

54 Када сля диво, кала лачярэнас пэ субботатэ. И суббота сля пашэ.

55 Пала Иосифо джянас джювля, савэ авиile Иисусога Галилеятар. Вонэ дыкхле склепо и сар тховэнэс пордэ Иисусохжкою трупо.

56 Тунчи рисиле цэрэ и лачярдэ мастина и миро. Ай кала авиля суббота, вонэ отцинёнэс, сар чиндо дэ заповедь.

24

Иисусо отджювдэл мулэндар

1 Пэ англнуу куркэхжкою диво, дэнзор, кала кхам вщелас, джювля лиле лачярдэ мастина и джиле склепостэ.

2 Нэ кала авиле, удыххле, со бар склепостар оттховдо дэ рига.

3 Кала заджиле андрал дэ склепо, на аракхле Рае Иисусохжкою трупо.

4 Джювля на джянгле, сар кода тэ полэ. Тунчи ачиле англа лэн дуй мурша дэ юда, савятар марэлас одуд, сар молния.

5 Джювля фартэ дарэнэ и обмукле шэрэ тэлэ, нэ мурша пхэндэ лэнди:

— Сости тумэ родэн джювдэ машкар мулен?

6 Лэ нэнай катэ, Вов отджювдиня мулэндар. Взгинисарэн, сар Вов пхэнэлас тумэнди инте дэ Галилея:

7 «Чяво Манушыкано авэла отдено дэ вастэн бэзимахжэрэ манушэнди, авэла прымардо пэ трушул и отджювдэла мулэндар пэ трито диво».

8 Тунчи вонэ взгинисардэ Иисусохжэрэ лава.

9 Тунчи рисиле склепостар и розпхэндэ пала вса кода дэшүекхэнди и всавэрэнди, савз лэнца сле.

10 Кадэла джювля сле Мария Магдалина, Иоанна, дэй Иаковохири, савя кади ж акхардэ Мария. И авэр джювля, савз сле лэнца, кади ж пхэнэнас пала кода апостолонэнди.

11 Апостолуря думисардэ, со джювля дэдумане динимо, и на патине лэнди.

12 Нэ Пётро всаекх вшилия и прастнэя склепостэ. А кала тэллювда склепостэ, вов дыкхля, со котэ пашлёр екх похтан. Тай джиля павпалэ, а еджино на патялас колэсти, со дыхле лэхкэрэ якха.

Исусо сикавэлэл сиклярнэнди пав дром дэ Эммаусо

13 Дэ кодэва диво дуй сиклярнэндар джянас дэ гав Эммаусо, саво сля пашэ дэшудуй километры Ерусалимостар.

14 Тай дэдумэнас екх екхэгэ пала вса, со тердапэ.

15 Кала вонэ дэдумэнас тай розпхученас екх екхэ, Еджино Исусо пашыня лэндэ и джиля лэнца.

16 Нэ лэнди сля затердо, и вонэ на уджянгле Исусо.

17 Исусо пхучля лэндэр:

— Пала со тумэ дэдумэн дромэгэ?

Вонэ ачиле и помукле мую.

18 Екх сиклярнэндар, Клеопа, пхэнда:

— Всавэрэндар, ко авиля дэ Ерусалимо, Ту, выджаал, екх, Саво на джянэл, со стердапэ пэ дивэн?

19 Исусо пхучля:

— Пала со Мэ на джянав?

Вонэ пхэндэ Лэсти:

— Пала кода, со стердапэ Исусога Назаретостар, Саво сля англунари, зорало дэ всавэрэ, со терэлас и пхэнэлас англа Дэвлэ и англа манушэн.

20 Сар амарэ англунэ рашая и пхурэдэра отдэне Лэ пэ мэрима и прымардэ Лэ пэ трушул.

21 Ай амэндэ сля надия, со Вов фирирасэла Израили. Тай акэ, джиля трито диво, сар вса откада стердапэ.

22 Нэ койсавэ амарэ джювлендар розпхэндэ амэнди кода, состар амэ дэнепэ дыво. Вонэ авиле дэнзор, кала кхам вщелас, склепостэ

23 тай на аракхле котэ Исусохкоро трупо. Тунчи рисиле тай розпхэндэ амэнди, сар лэнди сикавдэлэ ангелуря и пхэндэ, со Исусо джювло.

24 Койсавэ амэндар джиле склепостэ и аракхле, со котэ вса кади, сар и пхэндэ джювля, нэ Исусо на дыххле.

25 Тунчи Вов пхэнда лэнди:

— Чи нэнай тумэндэ годи? Сар пхаро тумэ патян кодэлэсти, со пхэндэ англунара!

26 Чи на трэбуни сля Христости тэ ха бари грыжа и тэ заджя дэ бари слава?

27 И ачиля тэ розпхэнэ джикай Моисеестар тай всавэрэн аврэн англунарен и сикавда, со чиндо сля пала Лэ дэ всавэрэн Лилэн.

28 Тунчи сиклярнэ поджиле пашэ гавэстэ, курик джянас. Исусо сикавда лэнди, со камля тэ джя дурэдэр.

29 Нэ вонэ фартэ мангэнас Лэ:

— Ачпэ амэнца! Диво поджиле пашэ рятятэ.

Вов заджила дэ цэр и ачиляялэ лэнца.

30 Кала Вов бэшля лэнца пала скаминдэ, тунчи лиля мандро, наисарда, розпхагля и подэня лэнди.

31 Тунчи оттердэлэ лэнгэрэ якха, и вонэ уджянгле Исусо. Нэ Лэ на ачиля душло.

32 Вонэ ачиле тэ пхэнэ екх екхэсти:

— Чи на пхабонас амарэ ёлэ, кала Вов дэдуманя амэнца дромэга и оттерда амэнди, со чиндо дэ Лилэн?

33 Вонэ ехатар вщиле тай рисиле дэ Ерусалимо. Кала авиле, котэ аракхле дэшүекхэн и кодэлэн, савэ лэнца сле.

34 Апостолуря розпхэндэ лэнди, со Рай чячимага отджювдиня мулэндар тай сикавдапэ Симоности.

35 Тунчи кодэла розпхэндэ, со тердапэ лэнца пав дром и сар вонэ уджянгле Исусо, кала Вов пхагля мандро.

Исусо авэл сиклярнэндэ

36 Кала вонэ инте дэдумане, Еджино Исусо ачиля машкар лэн и пхэнда:

— Пачя тумэнди!

37 Вонэ замуле даратар и гинисардэ, со дыкхэн мулэхкоро фано.

38 Нэ Исусо пхэнда лэнди:

— Сости тумэ даран? Сости тумаро патявимо исин кацаво цыкно?

39 Подыхэнтэ пэ Мурэ вастэн и пурэн! Када Мэ исин. Лэнпэ Мандэ тай роздыхэнтэ. Фаностэ нэнай трупо и кокала, а Мандэ исин.

40 Исусо пхэнда откада тай сикавда лэнди Пэххэрэ васта и пурэ.

41 Кала вонэ лошатар инте на патянас и дэнаспэ дыво, Исусо пхучля лэндар:

— Исин тумэндэ хамо?

42 Вонэ дэнэ Лэсти котор пэкэл машестар.

43 Исусо лиля кода и хала англа лэн.

44 Тай пхэнда лэнди:

— Акэ пала со Мэ пхэнавас, кала инте слём тумэнца: трэбуни, соб тэ авэл вса, сар чиндо пала Ман дэ Моисеихэрэ Упхэнима, англунарендэ и дэ Псалмэн.

45 Тунчи Вов оттерда лэнди годи, соб тэ полэн кода, со чиндо.

46 И пхэнда лэнди:

— Чиндо, со Христосо хала бари грыжа и пэ трито диво отджювдёла мулэндар.

47 Важ Лэхкоро Лав джикай Ерусалимостар, ай тунчи всавэрэ народонэнди авэла розпхэндо, со, кала вонэ ачявшна бээзимо, тунчи Дэвэл эртисарэла лэн.

48 Тумэ авэна тэ розпхэнэ пала кода всавэрэ манушэнди.

49 Акэ, Мэ бичалава тумэнди кода, пала со Муро Дад пхэнда. Нэ тумэ аченпэ дэ форо джикай кодыя врьяма, кала сдкяла пэ тумэн зор упран.

Исусо ваздэллэ пэ упралима

50 Тунчи Исусо вылиджялда лэн форостар и джиля лэнца дэ Вифания. Котэ Вов ваздэнэ Пэххэрэ васта и пхэнда баихталэ лава пала лэн.

51 И кала инте пхэнэлас, ачявшна лэн и ачиля тэ ваздэлэ пэ упралима.

52 Сиклярнэ тэлловдэ Лэсти тай баря лошага рисиле дэ Ерусалимо,

53 тев всавири врьама сле дэ храмо и ваздэнас слава Дэвлэсти.

Бути апостолэнгири

Мурэ амала!

Түмэ рицарэн ды вастэн книга, ды савля вджян дуй части: «Евангелие Лукастар» тай «Бути апостолонэнгири». Вонэ сле заискрисардэ екхэ манушэга, сыклярно Иисусохжору Лука, тай исин лил ды Библия, лав Дэвлэстар. Ды Библия вджян дуй барэ части: «Пуррано Завето» тай «Нэво Завето». Дэ «Пурранэ Завето» роспхэнэлпэ, саво сля джюимо англал пэ пхув, кадиж пала израильские мануша, савэн вытидын я Дэвэл. Ды «Нэво Завето» заискрисардэ допхэнимо пала джюимо Иисусо Христохжору, кадиж роспхэнэлпэ, сар быяндялэ кхандир тай розджилиялэ пав всавори пхув.

Еджино лав «евангелие» — када «лошало лав». Кадыя дума пала кода, со дуй пхангяя бэрш павпалэ ды миро авила Иисусо Христосо, саво сля Фирисари, пала када со Вов джюду амэнди, састьярэлас тай сыклярэлас манушэн, отмукэлас лэнди бээзэх, муяя пала всаворэн манушэн тай отджюдия, кади пала кода со Вов упалэ рисявэла ды кадыва миро. Евангелие сикавдапэ ды перво вако джюима манушэндир тай сля заискрисардо пы греческо чиб. Штар евангелия, искрисардэ Иисусохжирэ апостолонэнца (Матфеега тай Иоаннога) тай савэ сле амала, савэ тирэнас бути апостолонэнца (Лука тай Марко), исин англал ды Нэво Завето. Пала лэн книга «Бути апостолонэнгири». Ды ла роспхэнэлпэ пала кода, сар вытидын Иисусога апостолы роспхэнэнас Лошало Лав Дэвлэстар, кадиж пала кода, сар быяндёнаспэ кхандиря. Кадиж ды перво вако авиле лила Иисусохжирэ сыклярнэндэр тай книга Откровение. Всаворэ кадыла книги сле залиджялдэ ды екх книга, сави акхарэлпэ Нэво Завето, ды саво вджял 27 книг тай лила.

Пы кадыва диво книги ды Нэво Завето тай евангелие пэрэлиджялдэ пав всаворэ чиба ды люмля, ды савэ исин искрисаримо. Библия тай лакирэ толмачи исин каци книга, сави динэн ды всавори люмля. Амэ паях, со тумэ тховэна циминд, сар искрисардэ дымутнэрындуя.

Амэ наисарах ёлэстар ко тирэлас бути, соб тэ выджен кала книги — толмачи, редакторы тай бутэнди ромэнди, пала кода со vonэ продинэнас кодыла книги тай чювзнаас пэхжири сама, сар vonэ заискрисардэ. Баро тумэнди наис!

Да благословит тумэн Дэвэл!

Пативага тумэнди,

Мануша, савэ тирэн бути ды организация «Переводчики Библии Украины»

Иисусо ваздэлпэ дэ болыбэн

¹ Пативало Феофило, дэ муро англуну лил мэ искриисардом пала вса, со терэлас Иисусо и сости Вов сиклярэлас

² ды колэ дивэ, кала Свэнтонэ Фанога прыпхэнда вытидэне апостолонэнди кода, со лэнди трэбуни тэ терэ, и сля лито дэ болыбэн.

³ Пала Пэхжири барий грыжа Вов сикавдапэ лэнди джювдэгэ тай допхэнда, со кода чячимо. Иисусо сикавэласпэ лэнди саранда дивэ и дэдумэлас пала Дэвлэхжору Тхагаримо.

⁴ Еххвар, кала vonэ сле їтханэ, Иисусо прыпхэнда лэнди тэ на уджян Ерусалимостар, нэ тэ дожүтээрэн кода, со Дад камля лэнди тэ дэ.

— Акэ, терэлпэ кода, со тумэ шундэ Мандэр.

⁵ Иоанно болдэнэя панега, нэ тумэ сиго авэна болдэ Свэнтонэ Фанога.

⁶ Тунчи кодэла, савэ котэ сле, пхучле Лэстар:

— Рае, на дэ кадыя врьяма Ту камэх тэ ваздэ упалэ Израилёхжору тхагаримо?

⁷ Вов пхэнда лэнди:

— На тумаро рындо тэ джянэ врьяма и чясо, савэ Дад тховда Пэхжирия зорага.

8 Нэ кала пэ тумэн сджяла Свэнто Фано, тумэ лэна зор и авэна тэ розпхэнэ пала Ман дэ Ерусалимо, пав всавири Иудея, дэ Самария и пав всавири люмля.

9 Кала Вов пропхэнда када, вонэ дыкхле, сар Вов ваздэняпэ упран, и хмара затерда Лэ лэнгэрэ яххэндар.

10 Вонэ на пэрэаченас тэ дыкхэ пэ болыбэн, кала Вов ваздэласпэ. Тай акэ, паша лэн ачиле дуй мануша дэ парни ѫда.

11 — Галилейнуря, — пхэндэ вонэ, — сости тумэ ачен и дыкхэн дэ болыбэн? Кадэва Исусо, Саво сля лито тумэндар дэ болыбэн, риسيвэла кади ж, сар тумэ дыкхле Лэ, кала уджялас.

Апостолуря вытидэн нээв манушэ пэ Иудахкоро тхан

12 Тунчи вонэ рисиле дэ Ерусалимо плаестар, саво акхарэллэ «Оливково». Вов сля надур форостар, дром, саво домукэнас тэ проджя дэ суббота.

13 Кала вонэ авиле дэ цэр, дэ саво джювэдэ набари врьяма, тунчи ваздэнепэ дэ упранлуни цэра. Котэ сле Пётро тай Иоанно, Иаково тай Андреи, Филиппо тай Фома, Варфоломеи тай Матфеи, Иаково, Алфеёхкоро чяво, Симоно Зилото тай Иуда, Иаковохкоро чяво.

14 Всавэрэ вонэ Ѣтханэ сле дэ мангима. Лэнца сле набут джювлен, дэй Исусохкири, Мария, тай Лэхкэрэ пхрала.

15 Дэ кодыя врьяма Пётро вишия машкар патякунэн (а лэн стидэняпэ паша шэл тай биш мануш) и пхэндэ:

16 — Мурша! Пхралалэ! Трэбуни сля, соб тэ стерэллэ кода, со чиндо дэ Лилэн, төв Свэнто Фано пхэнда чэрэз Давидо пала Иуда, саво лиджялас колэн, савэ пхангле Исусо.

17 Иуда сля екх амэндар, саво терэлас амэнца екх бути.

18 (Пэ ловэ, савэ вов затерда пала пэхкоро вурыто рындо, вов тинда маля. Нэ тэлэдэнэ и кади фартэ замардапэ, со пхариия лэхкоро води и выгульдэ лэстар всавэрэ пора.

19 Пала кода уджянгле всавэрэ, ко джювэдэ дэ Ерусалимо, и проакхардэ маля пав пэхкири чиб Акелдама, ай пав аврэ — «Ратэхкири маля».)

20 Дэ лил «Псалмы» искриисардо:

«Мэй лэхкоро цэр тэ авэл шушо,
и мэй котэ нико на джювэл».

Тай инте:

«Мэй авэр лэхкоро тхан залэла».

21 Колзсти амэнди трэбуни тэ вытидэ екхэ кодэла манушэндар, ко пхирилас амэнца всавири врьама, тев бы тэ на джял Рай Исусо,

22 кодэла врьамтар, кала Иоанно болдэня Лэ ды колэ дивэ, кала Исусо сля лито амэндар. Кадэва мануш, сар и амэ, трэбуни тэ авэл допхэнимари пала Исусохкоро отджюндивимо.

23 Вытидэнэ дон: Иосифо, савэ инте акхарэнас Варсавва, а кади ж — Иусто, тай Матфие.

24 Тай поманглепэ:

— Рае, Ту джянэх ѹло кожнонэхкоро; сикав екхэ кадэлэндар дондар, ка Ту вытидэнян

25 тэ лиджя бути апостолэнгири, соб вов тэ парувэл Иуда, саво ачявда амэн и джилия дэ тхан, тев трэбуни лэсти тэ авэ.

26 Тунчи вонэ чутэ жребии, тай вов выпэля пэ Матфие, саво прыачиля дэшуекхэ апостолонэндэ.

1 Авиля Пандэшахкоро^{*} диво, и всавэрэ вонэ сле ётханэ.

2 Еххатар болбынастар шундагэ фоно, саво сджялпэ, сар пхурдэл фартэ бари балвал, и саво пхэрдиля всаворо цэр, төв вонэ башле.

3 Сиклярнэ дыкхле сось, со поджило пэ ягунз чиба, савэ розджилепэ и ачиle по еххэ пэ кожно лэндар.

4 Всавэрэ вонэ пхэрдиле Свэнтонэ Фанога и ачиle тэ дэдумэ аврэ чибэнца, сар дэлас лэнди Фано.

5 Дэ кадья врьяма дэ Ерусалимо сле дэвликунэ иудея всавэрэ тханэндар, савэ исин дэ люмля.

6 Пэ кадэва фоно стидэнеп бут манушэн, тай на полэнас, со катэ терэлпэ, колэсти со кожно лэндар шунда, сар кодэла дэдумане пав лэхкири чячи чиб.

7 Вонэ фартэ дэнас дыво тай пхученас:

— Чи всавэрэ кадэла мануша, савэ дэдумэн, на галилеянууря?

8 Сар же када кожно амэндар шунэл, сар вонэ дэдумэн пав амари чячи чиб?

9 Машкар амэн исин кацава иудея: парфянууря, мидянуря, еламитууря, кодэла, ко джювэн дэ Месопотамия, Иудея тай Каппадокия, дэ Понто и дэ Цыкни Азия,

10 дэ Фригия тай Памфилия, дэ Египто, дэ котор Ливийско пхув, саво паша Кирена, и кодэла, ко джювэн дэ Римо,

11 иудея и кодэла, савэ прылиле иудеенгоро сикляримо, критянуря тай арабууря. И всавэрэ амэ шунах, сар вонэ дэдумэн пала барэрынуря Дэвлэхкэрэ пэ амарэн чибэн!

12 Вонэ дэнас дыво, на джянгле, сар кода тэ полэ, тай пхученас екх екхэстар:

— Со када исин?

13 А койсавэ подасанааспэ:

— Вонэ пиле тэрно мол тай матиле!

Петрохици дума

14 Пётро вшиля ётханэ аврэнца дэшуекхэнца, ачиля тэ дэдумэ манушэндэ, ваздэнэ пэххоро гласо тай пхэнда:

— Мурша иудея и всавэрэ, ко джювэн дэ Ерусалимо! Соб тумэ тэ полэн вса, шунэн тай чувэн сама, со мэ пхэнав.

15 Кадэла мануша на матэ, сар тумэ думисарэн: еххатар енякоро чясо дэ дэнзор.

16 Нэ када терэлпэ пав лавэн, савэ пхэнда англунари Иоили:

17 «Дэ кодэлэн дивэн, — пхэнэл Дэвэл, —

Мэ чувава Фано пэ всавэрэн манушэн.

Тумарэ чиявэ и чея авэнэ тэ дэдумэ сар англунаря,

тумарэ тэрнэ чиявэ дыкхэна сунэ англунарехкэрэ дивэсэга,

А тумарэ пуранэ — рятягэ.

18 Пэ Мурэн копылен, муршэн тай джювлен,

Мэ дэ кодэлэн дивэн чувава Фано

тай авэнэ тэ дэдумэ сар англунаря.

19 Мэ сикавава дывуря упрэ дэ болыбэн

и барэрынуря тэлэ пэ пхув:

рат, яг и тхува.

20 Кхам калёла,

а чён лолёла, сар рат

англa кода, сар авэла баро и чудно диво Дэвлэхкоро.

21 Тай кожно, ко прыакхарэла Раехкоро Лав,

авэла фирикардо».

* **2:1** Праздник Недель, иудейский праздник сбора урожая, праздновался на 50-й день после праздника Пасхи.

22 Мурша израильянуря, вышунэн, со мэ пхэнава! Бари бути, зоралэ рындууря и допхэнимо Дэвэл стерда чэрэз Исусо англа амарэн якхэн, и тумэ джянэн пала кода. Кадэлэгэ Дэвэл сикавда, со Мурш Исусо Назаретостар авиля Лэстар.

23 Пав воля Дэвлэхкири и пав кода, со Лэстэ сля пэ годя майанглал, тумэ умардэ Лэ, кала отдэне дэ вастэн кодэлэнди, ко на джювэн пав Упхэнима, соб вонэ тэ прымарэн Лэ пэ трушул карфинэнца.

24 Нэ Дэвэл отджювдярда Лэ, фирикарда мэримахкия грыжатар, и мэримастэ на сля зор Лэ тэ урицарэ.

25 Давидо дэдумэл пала Лэ:

«Всавири врьяма мэ дыкхлём Рае англа пэ:

Бов пав чячё васт мандар —

тэ на здявя дромэстар.

26 Колэсти цэлэл ѫло муро, тай лошавэл чиб, и трупо муро авэла тэ джювэ дэ надия.

27 Ту ж на ачявэгэ муро води да адо тай на дэгэ, соб свэнто Тиро тэ лэлпэ прахога.

28 Ту сикавдан манди дрома джювимахкэрэ, Ту дэгэ манди лош англа муй Тиро».

29 Пхралалэ, дэн манди тэ пхэнэ тумэнди ворта, со пропапо Давидо муля и сля загараавдо. Тай лэхкоро склепо ачел амэндэ и авдивэ.

30 Бов сля англунари и джянгя, со Дэвэл дэня лэсти солах тэ тховэ пэ лэхкоро трону манушэ, лэхкэрэ родостар.

31 Бов дыкхля англунни врьяма и дэдумэлас пала Христохкоро отджюндивимо, со Бов на авэла ачявидо дэ адо, и со Лэхкоро трупо на лэлапэ прахога.

32 Тай акэ, Дэвэл отджювдярда Кадэлэ Исусо, и амэ всавэрэ допхэнимаря кадэлэлсти!

33 Исусо сля ваздэно чяче Дэвлэхкэрэ вастэгэ, прылия Дадэстар, кода, со сля пхэндо — Свэнто Фано, тай чута Лэ пэ амэн, сар тумэ еххатар и дыкхэн и шунэн.

34 Давидо на ваздэласпэ пэ болыбэн, нэ дэдуманя:
«Пхэнда Рай Дэвэл мурэ Раести:

Бэш пав чячэ вастэ Мандар,

35 Ды коя врьяма, сар Мэ чувава Тирэ врыжимашен
Тути тала пурэн».

36 Колэсти, мэк всаворо цэр Израилёхкоро джянэл, со Кадэлэ Исусо, Савэ тумэ прымардэ пэ трушул, Дэвэл терда и Раегэ и Христога!

37 Кала мануша шундэ када, вонэ вса прылиле пашэ ѹлэстэ, и лэнди ачиля ладжяво. Вонэ пхученас Петро тай аврэн апостолонэн:

— Пхралалэ, со амэнди тэ терэ?

38 Пётро пхэнда:

— Ачявен тумаро бэзимо, и мэк кожно тумэндар авэла болдо пала лав Исусо Христохкоро, соб тэ отмукэнпэ тумарэ бэзима, тай тумэ прылэнэ бициминакоро даро — Свэнто Фано.

39 Колэсти со кади сля пхэндо тумэнди, тумарэ чяворэнди и всавэрэнди, ко дурал тумэндар: всавэрэнди, ко авэла прыакхардо Раегэ, амарэ Дэвлэгэ.

40 Тай бутэ аврэ лавэнца Пётро прыакхарэлэс лэн, тай дэдумэлас:

— Фирикарэнпэ кадэлэ хасютнэ родостар.

41 Кодала, савэ прылиле лэхкири дума, болдэнепэ. Дэ кодэва диво прыачиля лэндэ пашэ трин пхангя мануш.

Джювимо патякунэн манушэн

42 Вонэ рицарэнаспэ апостолонэнгэрэ сикляrimastэ, всавири врьяма сле їтханэ, прэхагэнас мандро и мангэннастэ.

43 Всавэрэ даранас Дэвлэстар и апостолуря терэнас баро допхэнимо тай барэ дыбууря.

44 Всавэрэ патякунэ мануша сле ётханэ, и вса лэндэ сля екх.

45 Вонэ битинэнас вса, со лэндэ сля, и всаворо пэхкоро хулаимо, и роздэнас всавэрэнди, касти скаци трэбууни.

46 Кожно диво вонэ стидэнаспэ дэ храмо, тай пав цэрэн прэпхагэнас мандро и ханас лошага и жужэ ёлэгэ,

47 ашарэнас Дэвлэ и сле дэ лачима всавэрэ манушэндэ. И кожно диво Рай прытховэлас лэндэ фирикардэн.

3

Пётро састиярэл чёрорэ, саво сля ланго

1 Еххвар, дэ трито чясо дэ дивэ, дэ время мангимахкири, Пётро тай Иоанно джянаас дэ храмо.

2 Паша храмохкэрэн вударэн, савэнди сля лав «Шукар», бэшэлас мануш, ланго бэнимастар. Кожно диво лэ ачявэнас паша вударэн, и вов манггия хурдимо кодэлэндэр, ко заджялас дэ храмо.

3 Кала вов удыххля Петро тай Иоанно, савэ джиле дэ храмо, тунчи манггия и лэндар.

4 Пётро тай Иоанно вхалепэ дэ лэ якхэнца, тай Пётро пхэнда:

— Подыхх пэ амэн!

5 Мануш ваздэнэ пэхкэрэ якха, дожутярэлас, со вонэ сось дэна лэсти.

6 Нэ Пётро пхэнда:

— Рупь тай совннак нэнай мандэ. Нэ кода, со исин, мэ дав тути. Дэ Лав Иусо Христохкэрэ Назаретостар — виши тай пхир!

7 Тунчи Пётро лилия лэ пала чячё васт, подрицарда, соб вов тэ вщел, и дэ кодыя же время пурэ тай чянга лангэхкэрэ састиле.

8 Вов всхукхя пэ пурэн и ачиля тэ пхирэ. Тунчи вов заджилия лэнца дэ храмо, пхирэлас, хукэлас и ашарэлас Дэвлэ.

9 И всавэрэ мануша дыкхле, со вов пхирэл и ашарэл Дэвлэ.

10 Вонэ уджянэнас, со када исин мануш, саво бэшэлас и мангэлас хурдимо аврят храмостар, паша Шукар вударэн, и дэнааспэ дыво кодэлэсти, со лэгэ тердапэ.

Пётро дэдумэл манушэнца дэ Соломонохкоро пусынд

11 Чёроро рицардапэ пала Петро тай Иоанно, тай всавэрэ мануша дэнаспэ дыво и стидэнаспэ лэндэ всавэрэ ригэндар дэ Соломонохкоро пусынд.

12 Пётро удыххля када и ачиля тэ дэдумэ манушэнди:

— Мурша израильтянуря,ости тумэ кади дэнээ дывости? Ости тумэ дыкхэн пэ амэн кади, сар бы амэ пэхкиря зорага тай пативаага тердэ кода, со кадэва мануш пхирэл?

13 Дэвэл Авраамохкоро, Исаакохкоро тай Иаковохкоро, Дэвэл амарэ дадэнгоро лошарда Пэхкэрэ Копыле Иусо, Савэ тумэ прэдэне, и Савэстар отпхэндэлэ англа Пилато, кала кодэва камля Лэ тэ отмукэ.

14 Нэ тумэ отпхэндэлэ Свэнтонэстар и Пативалэстар и вымангле, соб тумэнди тэ отмукэн прахаре.

15 Тумэ умардэ Кодэлэ, Ко дэл джювимо, нэ Дэвэл отджювдярда Лэ мулэндэр, и амэ кадэлэсти допхенимаря.

16 Лэхкоро Лав дэня зор кадэлэ манушэсти, савэ тумэ дыкхэн и джянэн, и пативимо, саво Лэстар, састиярда лэ тумэндэ пэ якхэн.

17 Пхралал! Мэ полав, со тумэ и тумарэ пхурэдэра на джянгле, со тердэ.

18 Нэ кади Дэвэл терда кода, со Вов пхэнэлас чэрээ всавэрэн англунарен, кала дэдуманя, со Христосты трэбууни тэ прылэ кадыя грыжка.

19 И кади, ачявлэн тумаро бэзимо и рисявлэн Дэвлэстэ, соб тумарэ бэзима тэ авэн скхослэ.

20 Соб Раестар тэ авэл время тэ отцинявлэн, и соб Вов тэ бичявлэн тумэнди Кодэлэ, Ка англэ вытидэнэ, Исусо Христо.

21 Нэ Исусости трэбүни тэ ачеллэ дэ болыблэн, кала авэла Лэхкири время и кала Дэвэл воэтховэла вса; время, пала сави Вов думут пхэнэлас чэрэз Пэхкэрэн свэнтонэн англунарен.

22 Сар пхэнда Моисей:

«Тумаро пхралэндар

Рай, тумаро Дэвэл,

тховэла тумэнди Англунаре, кацавэ, сар мэ.

Тумэнди трэбүни тэ кандэ Лэс дэ всавэрэ,

со Вов тумэнди пхэнэла.

23 И кожно, ко на кандэла кадэлэ Англунаре, авэла вычиндо кадэлэ манушэндар».

24 И всавэрэ англунаря, Самуило тай авэр пала лэ, кади ж допхэнэнас пала кадэлэн дивэн.

25 Тумэж англунаренгэрэ чявлэн, и тумэ прылиле завето, саво дэнэя Дэвэл тумарэ даддэнди. Вов пхэнда Абраамости:

«Тирэ родостар прылэнэ бахталимо

всавэрэ мануша дэ люмля».

26 Кала Дэвэл отджювдярда Пэхкэрэ Копыле, Вов англа всавэрэ бичалда Лэ тумэндэ, соб тэ дэ бахталимо и тэ прыакхарэ кожнонэ тумэндар тэ отджян налачерындостар.

4

Пётро тай Иоанно англа цудеенгоро Синедрионо

1 Кала Пётро тай Иоанно дэддумане манушэндэ, лэндэ поджилие рашая, халавдэнгоро пхурэдэр дэ храмо и саддукея,

2 савэ сле фартэ холярдэ кодэлэгэ, со вонэ сиклярэн манушэн и розпхэнэн, со кацик дэ Исусо исин отджювдинимо мулэндар.

3 Вонэ захутилдэ Петро тай Иоанно, и, кади сар сля бельвель, бэшардэ лэн ды дэнзор дэ барунэ.

4 Бут мануша, савэ шундэ лав, патине, и кодэлэн, савэ патянас, ачиля паша панч пхангяя.

5 Пэ авэр диво барэ рапа, пхурэдэра и сиклимаря пав Упхэнима стидэнепэ ётханэ дэ Ерусалимо.

6 Кота сле англуюн рашай Аннас, Каиафа, Иоанно, Александро и всавэрэ мануша англунэ рашаехкэрэ родостар.

7 Вонэ тховдэ Петро тай Иоанно помашкар и ачилие лэндар тэ пхуче:

— Савя зорага и савэ лавэгэ тумэ када тердэ?

8 Тунчи Пётро, саво пхэрдиля Свэнтонэ Фанога, пхэнда лэнди:

— Рая манушэнгэрэ и пхурэдэра!

9 Кала тумэ авдивэ пхучен амэндар пала лачимо, саво амэ тердэ кадэлэлангэсти, и сар амэ лэ высастярдэ,

10 тунчи джянэн тумэ и всавэрэ мануша Израилёхкэрэ: кадэва мануш екхатар ачел англа тумэн высастярдо важ лав Исусо Христосо Назаретостар, Савэ тумэ ваздэнэ пэ трушул и Савэ Дэвэл отджювдярда мулэндар!

11 Исусо исин кодэва

Бар, Саво сля отчуто тумэнцар, ко ваздэн цэра,

и Саво ачиля шэрутнэ барэгэ.

12 Нико авэр на дэла фиригаримо, колэсти со на дэно манушэнди нисаво авэр лав тала болыбэн, савэгэ тэрбуни амэнди тэ фиригарэпэ.

13 Всавэрэ дыкхле, со дэ Петро тай Иоанно нэнай дар, а душолас, со вонэ сле наирвалэ и набарэ мануша. Кала ж полиле, со вонэ сле Исусога, тунчи дэнепэ дьвэ.

14 Дыкхэнас паша лэн и высастьярдэ манушэ, колэсти никастэ на сля зор сось лэнди тэ пхэнэ.

15 Тунчи вонэ прыпхэндэ лэнди тэ ачявэ Синедрионо и ачиле тэ дэдумэ машкар пэстэ.

16 — Со амэнди тэ терэ кадэла манушэнца? — пхэнэнас вонэ. — Всавэрэ, ко джүүвэн дэ Ерусалимо, джянэн, со вонэ тердэ баро дыво, и амз колэстар на отригарахпэ.

17 Соб када тэ на розджялпэ инте буглэдэр помашкар мануша, прыдаравага лэн, соб вонэ никости тэ на пхэнэн пала кадэва лав.

18 Вонэ акхардэ апостолонэн тай прыпхэндэ лэнди тэ на дэдумэн и тэ на сиклярэн важ Исусохкэрэ лавэ.

19 Нэ Пётро тай Иоанно пхэндэ лэнди:

— Акэ, пхэнэн еджинэ, чи мишто англа Дэвлэл тэ кандэ будэр тумэн, а на Дэвлэ?

20 Нэнай амэндэ зор тэ аче мулком пала кода, со амз дыкхле тай шундэ.

21 Кодэла, ко вдянаас дэ лэнгоро Синедрионо, инте екхвар прыдаравдэ лэн тай отму克ле. Вонэ на аракхле дэ лэн нисави дош, а всавэрэ мануша ашарэнас Дэвлэ пала кода, со тердапэ.

22 Важ кода со манушэсти, савэгэ тердапэ кадэва састьrimахкоро дыво, сля будэр саранда бэрш.

Мангимо патякунэн

23 Кала отму克ле Петро тай Иоанно, вонэ рисиле пэхкэрэндэ тай розпхэндэ пала вса, со дэдумане англунэ рашая и пхурэдэра.

24 Кала патякунэ мануша шундэ пала када, вонэ всавэрэ ётханэ ваздэне гласо Дэвлэстэ тай пхэндэ:

— Дэвла Баро! Ту стердан болыбэн, пхув, море и вса, со дэ лэн исин.

25 Ту пхэндан Свэнтонэ Фанога вуштэндар амарэ дадэ и Тирэ копыле Давидо: «Сости ваздэнпэ тай мижон люмлякэрэ родуула, и мануша камэн сось тэ терэ, нэ вса лэндэ выджяла ювья?

26 Ваздэнпэ пхувякэрэ тхагаря, и пхурэдэра стидэнепэ ётханэ,

соб тэ выджя тэ Рае Дэвлэ

и тэ Христо Лэхкэрэ».

27 Чячюнэ, стидэнепэ дэ кадэва форо Иродо тай Понтии Пилато наиудеенца и Израилэхкэрэ манушэнца тэ Тиро Свэнто Копыли Исусо, Савэ Ту помакхлян.

28 Вонэ тердэ кода, со Ту тховдан Тиря зорага и пав Тири воля.

29 И екхатар, Рае, подыкх, сар вонэ даравэн амэн, и дэ Тирэ копыленди бидаракоро тэ розпхэнэ Тиро лав.

30 Процырдэ васт Тиро и састьяр насвалэн, сикав допхэнимо и барэ дывура важ лав Тирэ Свэнтонэ Копыле Исусо!

31 Кала вонэ поманглэпэ, тхан, тев вонэ сле, затинисиля. Вонэ всавэрэ пхэрдиле Свэнтонэ Фанога тай бидаракоро пхэнэнас Дэвлэхкоро лав.

Патякунэ мануша подрицаарэн екх екх

32 Бутэ манушэндэ, савэ патине, сле екх ѫло и води. Нико на бинэлас, со лэхкоро хулаимо исин кици важ лэ, нэ вса лэндэ сля екх.

33 Апостолуря баря зорага пхэнэнас пала отджондивимо Раехкоро Исусохкоро, и Дэвлэл дэлас Пэхкоро бахталимо лэнди всавэрэнди.

34 Помашкар лэн на сля ниекх мануш, саво авэлас бы чёроро. Колэсти со кодэла, каастэ сля пхув тай цэра, битинэнас лэн, анэнас всавэрэ ловэ

35 тай стховэнас паша пурэн апостолонэндэ. Кадэла ловэ роздэнаспэ кожнонэ манушэсти, пэ со лэсти трэбуни.

36 Акэ, Иосифо, савэ апостолуря акхарэнас Варнава (пав аврэ «чяво подрицаrimахкоро»), левито Кипростар,

37 савэстэ сля пхув, битинда пэхкири маля, анда ловэ и тховда паша пурэн апостолонэндэ.

5

Анания тай Сапфира

1 Ехк мануш, савэ акхарэнас Анания, ётханэ пэхкирия ромняга Сапфирага, битинда епаш хулаимо

2 и ловэндар, савэ лиля пала хулаимо, епаш ачявда пэсти, тай лэхкири ромни джянэллас пала кода. А епаш ловэ вов анда и тховда паша пурэн апостолонэндэ.

3 Пётро пхэнда лэсти:

— Анания, сар када выджиля, со сатана залия тиро ѫло пэ скацик, со ту пхэндан начячимо Свэнтонэ Фаности и ачявдан пэсти ловэ, кала битиндан пэхкири пхув?

4 Пхув, сави ту битиндан, и кади сля тири, и ловэ, савэ ту лилян пала ла, всавэрэ тирэ сле. Пэ со ту лилян када пэсти дэ гындо? Ту пхэндан начячимо на манушэнди, нэ Дэвлэсти.

5 Сар кацик Анания шунда кадэла лава, вов тэлэдэня тай выджиля лэстар води. Всавэрэ, ко сле котэ, фартэ пэрэдаравдэпэ.

6 Поджиле тэрнэ мануша, залашардэ лэхкоро трупо, вылиджялдэ тай гаравдэ лэ.

7 Проджиля пашэ трин чясуря, тай авиля лэхкири ромни, сави на джянэллас, со котэ тердапэ.

8 Пётро пхучия латар:

— Пхэн манди, тумэ ромэгэ пала скацик ловэ битиндэ пхув?

— Нэ, — пхэнда вой, — пала скацик.

9 Пётро пхэнда лати:

— Со када тумэ сдэдуманепэ тэ зумавэ Раехкоро Фано? Ту шунэх пасуря паша будара? Када джян павпалэ кодэла, савэ гаравдэ тирэ ромэ. Вонэ и тут вылиджяна.

10 Тай дэ кодыя вряза вой тэлэдэня лэхкэрэ пурэндэ тай выджиля латар води. Тэрнэ мануша заджиле, аракхле ла мулягэ, вылиджялдэ тай гаравдэ паша лакоро ром.

11 Пэ всавиря хандиря и кодэлэн, ко шунда пала када, сджиля бари дар.

Апостолуря терэн баро допхэнимо тай дывуяр

12 Апостолэнгэрэ вастэнца терэнаспэ баро допхэнимо тай дывуяр машкар манушэн. Всавэрэ ж сиклярнэ стидэнаспэ ётханэ дэ Соломонохкоро пусын.

13 И аврэ манушэндар даранас лэндэ тэ прыяче, нэ дэ патива вонэ сле всавэрэ манушэндэ.

14 А кодэлэн, ко патялас дэ Rae, ачелас будэр и будэр, муршэн тай джювлен.

15 Мануша вылиджянас пэ гаса насвалэн, тховэнас лэн пэ патуря тай пэ париндора, соб шалин Петрохкири тэлэдэллас пэ лэн, кала вов авэла тэ проджя пашэ.

16 Тай форонэндар, савэ сле паша Ерусалимо, авэнас фартэ бут манушэн. Вонэ анэнас насвалэн тай кодэлэн, дэ ка бэшэнас наужужэ фануря, и всавэрэ састиярэнаспэ.

17 Англuno рашай и всавэрэ паша лэ саддукея ханас пэ лэн данда.

18 Вонэ пхангле апостолонэн тай бэшардэ лэн дэ форохкэрэ барунэ.

19 Нэ ангело Раехкоро отрисарда рятягэ вудара барунэстар тай вылиджялда лэн хотарь.

20 — Джян тай ачен дэ храмо, — пхэнда вов, — тай дэдумэн манушэнди вса пала кадэва нэво джювимо.

21 Вонэ кандэне лэ, авиле дэнзор дэ храмо тай ачиле тэ сиклярэ. Кала авиле англuno рашай и всавэрэ паша лэ, вонэ акхардэ Синедрионо и всавэрэн Израилёхэрээн пхурэдэрэн тай бичалдэ дэ барунэ пала апостолуя.

22 Нэ кала бутярнэ авиле дэ барунэ, апостолонэн котэ на сля. Вонэ рисардэпэ и допхэндэ:

23 — Вудара дэ барунэ мишто затердэ, паша лэн ачен халавдэ, нэ кала амэ заджиле пордэ, амэ ника котэ на аракхле.

24 Халавдэнгоро пхурэдэр дэ храмо и англунэ рашая вышундэ лэн, тай нико на полиля, со ж када сля.

25 Тунчи кося авиля и пхэнда лэнди:

— Мануша, савэн тумэ тховдэ дэ барунэ, ачен дэ храмо тай сиклярэн кодэлэн, ко стидэняпэ котэ.

26 Тунчи халавдэнгоро пхурэдэр джиля бутярнэнца тай анда апостолонэн. Нэ вонэ на тердэ кода зорага. Вонэ даранас, со мануша помарэнэ лэн барэнца.

27 Апостолонэн андэ и тховдэ англа Синедрионо. Англuno рашай пхэнда лэнди:

28 — Амэ тумэнди прыпхэндэ, соб тумэ тэ на сиклярэн пала кадэва лав. Нэ тумарэ розлиджян пэхкоро сикляримо пав всаворо Ерусалимо тай чувэн пэ амэн дош дэ мэrima Кадэлэ Манушэхэрэ.

29 Пётро тай авэр апостолуя пхэндэ:

— Амэнди трэбуни будэр тэ кандэ Дэвлэ, а на манушэн.

30 Дэвэл амарэ дадэнгоро отджювдярда Исусо, Савэ тумэ умардэ тай амблавдэ пэ каштунэ трушулэ.

31 Нэ Дэвэл ваздэня Лэ и бэшарда пав чячё васт Пэстар сар Пхурэдэрэ и Фирисаре, соб Израили тэ ачявлэл пэхкоро бэзимо, и Дэвэл тэ отмукэл лэхкири дош.

32 Допхенимаря кадэлэсти — амэ тай Свэнто Фано, Савэ Дэвэл дэнэ кодэлэнди, ко кандэл Лэ.

33 Кала кодэла, савэ сле котэ, шундэ када, вонэ ачиле мижэ и камле тэ умарэ апостолонэн.

34 Нэ тунчи вшилия екх мануш, саво вджялас дэ Синедрионо. Лэ акхарэнас Гамалиило, вов сля сиклимари пав Упхэнима и дэ патива всавэрэндэ. Вов прыпхэнда тэ вылиджя апостолонэн пэ набут вряма.

35 Тунчи вов пхэндэ:

— Израильтняура, мишто думисарэн пала кода, со тумэ камэн тэ терэ кадэла манушэнца.

36 Надэмут катэ подлиялпэ Февда, вов выдэлас пэ пала савэс барэ манушэ. Пала лэ джянас пашэ штаршэла манушэн. Нэ кала лэ умардэ, всавэрэ, ко джиле пала лэ, розпрастэнепэ, и вса упалэ ачиял пэххэрэ тханэ.

37 А пала лэ сля Иуда Галилеятар. Вов авиля дэ кодыя врязма, кала искриисарэнас манушэн, тай улиджялда бутэн пала пэ. Вов кади ж хасиля, тай всавэрэ, ко джиле пала лэ, кади ж розпрастэнепэ.

38 Колэсти мэ пхэнав тумэнди екхатар: ачявлэн кадэлэн манушэн. Отмукэн лэн. Кала када вса исин манушэндар, тунчи када хасявэла.

39 А сар када Дэвлэстар, тумэ нисо на терэна, кацик еджинэ ачена врыжымашы Дэвлэсти.

И лэхкири дума прылиле дэ ёлэн кодэла, ко котэ сля.

40 Вонэ прыакхардэ апостолонэн и прыпхэндэ лэн тэ марэ чукненца. Тунчи инте екхвар запхэндэ лэнди тэ дэдумэ Иусохжэрэ лавэгэ тай отмукле лэн.

41 Апостолуря ачиявдэ Синедрионо тай лошавенас колэсти, со лэнди сля дэно тэ прылэ ладжэ пала Иусохжоро лав.

42 Тай кожно диво дэ храмо тай пав цэрэн вонэ на пэрэаченас тэ сиклярэ и тэ пхэнэ Бахтало Лав пала Иусо Христосо.

6

Вытидимо эфта бутярнэн

1 Дэ кадэла дивэ, кала ачила бут сиклярнэн, эллинистуря* холявэнас пэ катутнэн евреен. Вонэ дэдумэнас, со кодэла обджян лэнгэрэн джювлен, савэндэ муле рома, кала рөздэн кожно диво хамо.

2 Тунчи Дэшудуй акхардэ всавэрэн сиклярнэн тай пхэндэ:

— Амэнди нащи тэ ачява бути важ лав Дэвлэхжоро, соб тэ лашарэ скаминда.

3 Колэсти, пхралалэ, вытидэн пэстар эфта манушэн, савэндэ лачи патив и савэ пхэрдиле Фанога тай годягэ, и амэ дага лэнди тэ терэн кадыя бути.

4 Еджинэ амэ авага тэ мангэпэ и тэ лиджя бути лавэгэ.

5 Со вонэ пхэндэ, всавэрэнди чялия, тай вытидэне Стефано, манушэ, дэ каств сяя патявимо тай Свэнто Фано, Филиппо, Прохоро, Никаноро, Тимоно, Пармено тай Николае форостар Антиохия, саво прылия иудеенгоро сикляримо.

6 Лэн тховдэ англа апостолонэн, и кодэла поманглепэ пала лэн и воэтховдэ пэ лэн васта.

7 Лав Дэвлэхжоро розджяласпэ, и дэ Ерусалимо ачила фартэ бут сиклярнэн, и бут рашая прылиле кадэва патявимо.

Стефано схүтилдо шудеенца

8 Стефано, мануш, дэ каств сле Дэвлэхжэрэ лачимо тай зор, терэлас машкар манушэн барэ дывуря тай допхэними.

9 Лэгэ ачили тэ розлэпэ койсавэ мануша, ко пхирэнас дэ синагога отмуклэн пэ воля. Пордэ кади ж пхирэнас киренеянура, Александриянура, тай кодэла, ко джювдэ дэ Киликия тай дэ Цыкни Азия.

10 Нэ Стефано дэдумэлас годягэ и зорага Фаностар, тай вонэ кадэлэгэ нисо на галёнас тэ терэ.

11 Тунчи вонэ поддэдумане койсавэн манушэн тэ пхэнэ: «Амэ шундэ, сар Стефано дэдумэл начячюнэ лава пала Моисее и пала Дэвлэ».

12 Вонэ подваздэне манушэн, пхурэдэрэн и сиклимарен пав Упхэнима. Тунчи схүтилдэ Стефано и андэ дэ Синедрионо.

13 Тай подтховдэ хохавнэн допхэнимарен, савэ пхэндэ:

— Кадэва мануш всавири вряза пхэнэл налаче лава пала свэнто храмо и Упхэнимо.

14 Амэ шундэ, сар вов дэдуманя, со Иусо Назаретостар розмарэла кадэва храмо и парувэла сикляримо, саво пэрэдэнэ амэнди Моисеи.

15 Всавэрэ кодэла, ко бэшле дэ Синедрионо, чувэнас сама пэ Стефано и дыкхле, со лэхжоро муй исин сар муй ангелостэ.

7

Стефанохжир дума англа Синедрионо

1 Тунчи англуно рашай пхучля Стефаностар:

— Када чячимо?

2 Стефано пхэнда:

* **6:1** Кади акхарэнас евреен, савэ дэдумане пав греческо, а на пав еврейско чиб.

— Пхралалэ тай дада! Пошунэн ман! Пативакоро Дэвэл авиля амарэстэ пропастэ Абраамостэ, кала вов инте джювда дэ Месопотамия — ды кодэлэ, сар вов ачиля тэ джювэ дэ Харрано.

3 «Ачяв кадэва тхан тай пэхкоро родо, — пхэнда лэсти Дэвэл, — тай джя дэ пхув, сави Мэ сикавава тути».

4 Абраамо ачявда пхув халдеенгири тай пэрэлагля дэ Харрано. Котарь, сар муля Абраамохкоро дад, Дэвэл пэрэлиджялда Абраамо дэ кодыя пхув, дэ сави тумэ еххатар джювэн.

5 Дэвэл на дэня лэсти катэ нисави пхув, и которици пхуюяко на дэня. Нэ Дэвэл пхэнда, со дэла кадыя пхув лэсти тай лэхкэрэ родости, кала Абраамостэ инте на сля чяворэн.

6 Дэвэл пхэнэлас лэсти: «Тирэ чявлэ на авэна хулая котэ, тев джювэнэ; вонэ авэна котэ копыля и лиджяна грыжа штаршэл бэрша.

7 Нэ Мэ марава кодэлэн манушэн, ко терэла лэн копыленца, — пхэнда Дэвэл, — и тунчи вонэ выдженяна котарь тай авэна тэ тэлэй Манди пэ кадэва тхан».

8 Тунчи Дэвэл дэня Абраамости завето тэ обчинэпэ. Абраамо ачиля дадэга Исаакости и обчинда лэ пэ охтанго диво. Исаако ачиля дадэга Иаковости, а Иаково — дэшдууенди патриархонэнди.

9 Патриархуля калэ ёлэга дыкхэнас пэ Иосифо и битиндэ лэ дэ Египто. Нэ Дэвэл сля Иосифога

10 тай фирикарда лэ всавирия бидатар. Вов дэня Иосифости годи тай терда кади, тэ авэл вов дэ патива фараоностэ, саво сля тхагари дэ Египто. Кодэва терда Иосифо прыбэшлэгэй дэ всаворо Египто тай дэ всаворо лэхкоро цэр.

11 Тунчи дэ всаворо Египто тай Ханаано ачиля бокх тай сля бари грыжа. Тай амарэ пропапуря нитев на аракхэнэс хамо.

12 Кала Иаково шунда, со дэ Египто исин ворзо, вов бичалда пордэ амарэн пропапонэн пэрво моло.

13 Кала вонэ авиле авэр моло, Иосифо оттердапэ пэхкэрэ пхралэнди, тай фараоно уджянглия пала родо Иосифохкоро.

14 Тунчи Иосифо бичалда тэ акхарэ пэхкэрэ дадэ Иаково тай всаворо пэхкоро родо, савэн сля эфтадэш пац манушэн.

15 Иаково ачиля дэ Египто, тев муля и вов, и амарэ пропапуря.

16 Лэнгэрэ трупуля пэрэлиджялдэ дэ Шэхемо и тховдэ дэ склепо, саво Абраамо тинда пала рүпь Хаморохкэрэ чявлэндэ дэ Шэхемо.

17 Кала поджиля пааш врьяма, соб тэ терэлпэ пав лавэ, саво дэня Дэвэл Абраамости, амарэн манушэн дэ Египто ачеласпэ будэр.

18 Кади сля ды колэ, сар ваздэняяпэ дэ Египто авэр тхагари, саво на джянглия пала Иосифо.

19 Вов прытасавэлас амарэн пропапунэн тай хрантимага выджалас пэ амарэн манушэн: вов заачявлэлас тэ вычувэ чяворэн, савэ бэяндепэ, соб вонэ тэ мэрэн.

20 Дэ кадыя врьяма бэяндялэ Моисеи и сля фартэ шукар англа Дэвэл. Трин чён лэ парварэнас дэ дадэхкоро цэр,

21 а кала поджиля врьяма тэ ачявлэлэ, Моисее лиля пэстэ фараонохири чей тай выбарярда лэ, сар пэхкэрэ чявлэ.

22 Моисеи сля сиклярдо дэ всавири Египтохири годи; вов сля зорало и дэ лав, и дэ рындонэн.

23 Кала лэсти сля саранда бэрш, вов задумисарда тэ дыкхэ, сар джювэн лэхкэрэ пхрала израильтняура.

24 Тунчи вов удыкхля, со екхэ лэндар марэл египтятнино. Лэсти ачиля дор кадэлэ манушэн, тай вов умарда египтятнино.

25 Моисеи думисарэлас, со лэхкэрэ пхрала полэна: чэрэз лэ Дэвэл отмукэл лэн пэ воля, нэ вонэ када на полиле.

26 Пэ авэр диво Моисеи удыкхля, сар марэнпэ дуй израильянуря. Вов камля тэ слиджя лэн, соб тэ на марэнпэ. «Чивалэ, тумэ ж пхрала, — пхэнда вов, — пэ со ж тумэ задэн холи екх яхь?»

27 Тунчи кодэва, саво марэлас аврэ, отчута пэстар Моисее тай пхэнда: «Ко тховда тут, соб ту тэ авзх пхурэдэрэга тай сундисарэгэ понад амэн?»

28 Чи ту камэх и ман тэ умарэ, сар арати умардан египтянино?»

29 Кала Моисеи шунда кадэла лава, вов нашля тай ачиля тэ джювэ дэ Мадианохкири пхув, сар мануш авря пхувятар. Котэ лэстэ дэ ире бэяндепэ дуй чывэ.

30 Проджиля саранда бэрш, тай Моисеести авиля ангело дэ шуки пхув, надур плаестар Синаи, дэ яга, савягэ пхаболас терново рандь.

31 Моисеи дэласпэ дыво, кала када дыкхля. Вов поджиля пашэ, соб фэдэр тэ роздыкхэ, и шунда гласо Раехкоро:

32 «Мэ Дэвэл тирэн пропапонэн, Дэвэл Авраамохкоро, Исаакохкоро тай Иаковохкоро». Моисеи ж тинисявлас даратар и даралас тэ подыххэ.

33 Рай пхэнда лэсти: «Злэ пэхкэрэ цуруя, колэсти со тхан, пэ саво ту ачех — свэнто пхув.

34 Мэ удыкхлём, дэ савэ бибахталима джювэн Мурэ мануша дэ Египто и ушундом лэнгоро ровимо. Мэ сджилём, соб тэ дэ лэнди воля. А кана джя, Мэ бичалав тут дэ Египто».

35 Кодэлэ Моисея, ка вонэ отчутэ пэстар тай пала ка дэдумане: «Ко тховда тут, соб ту тэ авзх пхурэдэрэгэ тай сундисарэгэ понад амэн?» — Дэвэл бичалда кана сар пхурэдэрэ и фирирасе чэрэз ангело, саво сикавдапэ лэсти дэ терново рандь.

36 Моисеи вылиджялда лэн Египтостар, терэлас дывуря тай допхэнимо дэ Египто, паша Лоло море и дэ шуки пхув, тев сле вонэ саранда бэрш.

37 Кадэва ж Моисеи пхэнда израильянонэнди: «Тумарэ пхралэндар Дэвэл ваздэла тумэнди Англunaре, сар ман».

38 Кала вов ютханэ Израилёхкэрэ манушэнца стидэнялэ дэ шуки пхув, ангело пхэнэлэс лэгэ тай амарэ пропапунэнца пэ плай Синаи. Тунчи Моисеи прылия джювдо лав и пэрэдэня лэ амэнди.

39 Нэ амарэ дада отпхэндэпэ тэ кандэ лэ, отчутэ лэ тай скамле тэ рисявэ дэ Египто.

40 Вонэ пхэндэ Аароности: «Стер амэнди дэвлэн, савэ англа амэн джяна. Колэсти со амэ на джянах, со тердапэ кадэлэ Моисеега, саво вылиджялда амэн Египтостар».

41 Дэ кодэлэ дивэ вонэ тердэ совнакунэ гуруворз, андэ кадэлэ дэвлорэсти жэртва тай сле лошалэрындостар, саво тердэ пэхкэрэ вастэнца.

42 Дэвэл же отрисардапэ лэндар и ачявда лэн тэ тэлэн болыбнахкэрэ чэргэнэнди, сар искриисардо пала када дэ лилэн англunaренгэрэн:

«Цэр Израилёхкоро! Чи важ Ман тумэ чинэнас тай анэнас жэртвы дэ шуки пхув, сар саранда бэрш котэ сле?»

43 Тумэ лиле пэгэ дэвлорэ Молохохкири катуна,
чэргэнь тумарэ дэвлорэстар Ремфаностар,
и кода, со тердэ тумарэ васта, соб кадэлэсти тэ тэлэй.

Пала кода Мэ бичалава тумэн дэ копылен дурэдэр Вавилоностар».

44 Тумарэ дадэндэ дэ шуки пхув сля Катуна Допхэнимахкири, стерди пав прыпхэнимо, саво Дэвэл дэня Моисеести, и пав кодэва рымдо, саво дыкхля Моисеи.

45 Кала амарэ дада прылиле кадыя Катуна, вонэ тай лэнгоро пхурэдэр Исусо Навиёхкоро влиджялдэ ла дэ пхувен, тев джювдэ манушэнгэрэ родуля, савэн Дэвэл розтрадэнэ англа лэн. И кади сля ды колэ, кала ачила тхагарега Давидо,

46 савэ Дэвэл камэлас и саво мангия Дэвлэстар тэ аракхэ цэр, тев тэлён, важ родо Иаковохкоро.

47 Нэ цэр Дэвлэсти стерда Соломоно.

48 Барэдэрэхкоро же на джювэл дэ цэрэн, савэ стердэ мануша. Англунари дэдүмэл пала када:

49 «Болыбэн — троно Муро,
тай пхув исин тхан, тев ачен Мурэ пурэ.

Саво тумэ камэн тэ терэ Манди цэр?

— пхэнэл Рай.

— Тев тхан, соб Манди тэ отцинявэ?

50 Чи на Мурэ вастэга вса откада стердо?»

51 Тумэ — накандинэ, тумэ — мануша барунэ ёлэнца и кашукэ канэнца! Тумэ, сар тумарэ пропапуря, всавири время на уштавэн Свэнтонэ Фаности!

52 Ка англунарндар на камле тэ вытградэ тумарэ пропапуря? Вонэ умардэ кодэлэн, ко пхэнэнас пэ англал, со авэла Чячюно. А кана тумэ предэне тай умардэ Лз!

53 Тумэ прылиле Упхэнимо, саво пэрэдэне тумэнди ангелуря, нэ на тердэ пав лэ.

Стефенохкоро мэримо

54 Кала вонэ шундэ када, вонэ мижыле и ачила тэ стасавэ пэхкэрэ данда.

55 Стефено же пхэрдии Свэнтонэ Фанога и ваздэнэ якха дэ болыбэн, и удыкхля патив Дэвлэхкири тай Исусо, Саво ачелас пав чячи риг Дэвлэстар.

56 — Дыкхэн, — пхэнда вов, — мэ дыкхав оттердо болыбэн и Чявш Манушыканэ, Саво ачел пав чячэ васт Дэвлэстар.

57 Тунчи вонэ всавэрэ затердэ пэхкэрэ кана, фартэ типисиле и чутэпэ пэр лэстэ.

58 Вонэ выцырдэнэ Стефено пала форо тай ачила тэ чувэ дэ лэ бара. Кодэла, ко дыкхле сар лэ дошарэнас, тховдэ пэхкири ѹда паша пурэн тэрнэ чявштэ, савэ акхарэнас Савло.

59 Кала вонэ чувэнас пэр лэстэ барэнца, Стефено мангияпэ:

— Рае Исусо! Прыла муро фано!

60 Тунчи вов тэлэдэнэ пэ чянгэн и фартэ затиписиля:

— Рае, отмук лэнди кадэва бээзимо!

Кадэлэ лавэнца вов муля.

8

Савло традэл патякунэн манушэн

1 Савло же подэлас гласо пала кодэлэн, ко умарда Стефено.

Кодэлэ дивэстар ачила фартэ тэ традэ кхандири дэ Ерусалимо. И всавэрэ розпрастэнепэ пав Иудея и Самария, кици апостолуря ачиленэ дэ Ерусалимо.

2 Пативалэ мануша гаравдэ Стефено и фартэ ровэнас пала лэ.

3 Ай Савло традэлас кхандири. Вов захукэлас дэ цэрэн патякунэ манушэндэ, выцырдэлас муршэн тай джювлен тай чувэлас лэн дэ барунэ.

Филиппо пхэнэл Дэвлэхкоро лав дэ Самария

4 Машкар колэ мануша, савэн традэнас лэнгэрэ тханэндэр, розпхэнэнас Бахтало Лав пав всавэрэ рига.

5 Филиппо ж авиля дэ екх форо Самариякоро и розпхэнэлас котэ пала Христосо.

6 Гроза манушэн чувэнас сама, кала шунэнас лэхкэрэ лава, тай дыкхэнас допхэнимо, саво вов терэлас.

7 Бутэй манушэндэр выджаинас барэ типимага нажужэ фануря, тай бут попхаглэ и лангэ высастярэнаспэ.

8 Тай дэй кодэва форо сля бари лош.

9 Кота сля ехж мануш, саво аххарзласпэ Симоно. Ды колэ вов врысарэлэс дэй кодэва форо, и мануша, ко джювдэ дэ Самария, дэнаспэ дыво кадэлэсти. Вов выдэлэс еджино пэ пала савэсь барэ манушэ.

10 Всавэрэ мануша, и тэрнэ, и пхурэ, фартэ прышунэнэаспэ лэстэ тай пхэнэнас:
— Кадэва мануш исин бари зор Дэвлэхкири.

11 А прышунэнэаспэ вонэ колэсти, со вов бут врьяма сикавэлэс дыво пэхкэрэ врысаримага.

12 Нэ кала мануша патине Филиппости, саво розпхэнэлэс пала Дэвлэхкоро Тхагаримо тай лав Исусохкоро Христохкоро, тунчи бут муршэн тай джювлен болдэнепэ.

13 Симоно кади ж патиня тай болдэняпэ. Вов всавири врьяма пхирэлэс пала Филиппо, дыхкхэлэс баро допхэнимо тай барэрындуля, и дэласпэ дыво кадэлэсти.

14 Кала апостолуря дэ Ерусалимо шундэ, со дэ Самария прылиле Дэвлэхкоро лав, вонэ бичалдэ пордэ Петро тай Иоанно.

15 Кодэла авиле тай манглепэ, соб Дэвэл дэня манушэнди Свэнто Фано.

16 Ни пэ касть лэндар Фано инте на сджялас, вонэ кацик болдэнепэ важ Рае Исусохкоро лав.

17 Тунчи Пётро тай Иоанно тховдэ пэ лэн васта, тай кадэла мануша прылиле Свэнто Фано.

18 Кала Симоно удыкхля, со Свэнто Фано дэлпэ, кала апостолуря тховэн васта пэ манушэн, вов анда лэнди ловэ

19 тай пхэнда:

— Дэн и манди кацави зор, соб кодэва, пэ касть мэ тховава васта, тэ лэл Свэнто Фано.

20 Нэ Пётро пхэнда:

— Мэк тиро рупь хасявлэл ётханэ туга, колэсти со ту Дэвлэхкоро даро камлян тэ тинэ пала ловэ!

21 Ту на вджягтэ дэ кадэва рындо, важ кода со тиро ѫло начячюно англа Дэвлэ.

22 Прыджян кадэва бэзимо тай манглэ Раести, соб Вов тэ отмукэл тути кода, со тутэ исин пэ годя.

23 Мэ дыхкхав, со дэ тиро ѫло пхэрдо кэркимо тай со ту спхангло ланчукугэ, саво исин начячимо.

24 Симоно пхэнда:

— Помангэнпэ пала ман Раести, соб манца тэ на авэл кади, сар тумэ пхэндэ.

25 Апостолуря ж допхэнэнас котэ тай розпхэнэнас Раехкоро лав. Тунчи вонэ джиле павпалэ дэ Ерусалимо и пав дром розпхэнэнас Бахтало Лав дэ бутэн гавэн дэ Самария.

Ефиопско мануш обрисявлэл Дэвлэлстэ

26 Ангело Раехкоро пхэнда Филиппости:

— Джя пэ юго, пэ дром, саво проджял пав шуки пхув Ерусалимостар дэ Газа.

27 Филиппо вшияла тай джиля. Дэ кадыя врьяма котэ сля ефиопско мануш. Вов терэлэс бути прыбэшлэгэ тхагарнятэ дэ Ефиопия, Кандакиятэ, тай прыдыхкхэлэс пала всаворо лакоро барвалими. Вов авэлэс дэ Ерусалимо тэ тэлэ Дэвлэсти,

28 и кана рисявлэлэл цэрэ. Кала кадэва мануш бэшэлэс дэ пэхкоро вурдон тай динэлэс лил, саво искриисарда англнунари Исаия.

29 Фано пхэнда Филиппости:

— Поджя кадалэ вурдонэстэ и джя пашэ.

30 Филиппо подпрастэнэ вурдонэстэ тай шунда, со котэ динэлпэ лил, саво искриисарда англнунари Исаия.

— Ту полэх, со ту динэх? — пхучля Филиппо.

31 — Сар же мэ полава, кала манди нико на розпхэнэл, — пхэнда кодэва мануш тай акхарда Филиппо, соб вов тэ подваздэлпэ и тэ бэшэл лэгэ дэ вурдонэ.

32 Ай вов динэлас кацаво тхан Лилэндар:

«Сар бакрорэ, лиджялдэ Лэ, соб тэ чинз,

и, сар бакроро на ваздэл пэхкоро гласо англа кодэлэ, ко злэл лэстар бал,
кади ж и Вов ушта Пэхкэрэ на оттерэлас.

33 Вов сля ладжъвардо и на домукуло чаячюнэ сындостэ.

Ко розпхэнэла пала Лэхкоро родо?

Колэсти со джювимо Лэхкоро пхүятар залэлпэ».

34 Ефиопско мануш пхучля Филиппо:

— Мангав тут, пхэн манди, пала ка дэдумэл катэ англунари? Пала пэ чи пала кась аврэ?

35 Тунчи Филиппо ачиля тэ розпхэнэ кадэлэ тханэстар Бахтало Лав пала Иусо.

36-37 Вонэ ладэнас дурэдэр пав дром тай подлагле пашэ панестэ.

— Дыкх, акэ исин пани, — пхэнда ефиопско мануш. — Со на дэл манди тэ болдэпэ?*

38 Вов прыпхэнда, соб тэ тэрдёл вурдон, и дуйджинэ вонэ, ефиопско мануш тай Филиппо, заджиле дэ пани. И Филиппо болдэнэ лэ.

39 А кала вонэ выджиле панестар, Фано Раехкоро улиджялда Филиппо, тай ефиопско мануш будэр ла на дыкхля. Баря лошага вов лагля дурэдэр.

40 Ай Филиппо попэля дэ форо Ашдодо. Вов розпхэнэлас Бахтало Лав пав всавэрэн форонэн, а тунчи авиля дэ Кесария.

9

Савло обрисявэл Дэвлэстэ

1 Савло жэ пхурдэлас холягэ и мэримага пэ Раехкэрэн сиклярнэн. Вов авиля англунэ рашаастэ

2 и мангля лэстар лила дэ синагоги, савэ сле дэ Дамаско, соб вов, кала аракхэла кодэлэн, ко прырицаэрлпэ Дромэстэ, муршэн тай джювлен, тэ спхандэл лэн тай тэ анэл дэ Ерусалимо.

3 Кала вов поджялас дэ Дамаско, пэр лэстэ сджиля душлимо болыбнастар.

4 Вов тэлэдэнэ пэ пхув и ушунда гласо, саво пхэнда лэсти:

— Савло, Савло, сости ту традэх Ман?

5 — Ко Ту, Rae? — пхучля Савло.

— Мэ Иусо, Савэ ту традэх, — пхэнда Вов.

6 — Вщи тай джя дэ форо. Котэ тути пхэнэна, со трэбуни тэ терэ.

7 Мурша, савэ сле Савлога дэ дром, ачиле сар мутуял: вонэ шундэ гласо, нэника на дыкхле.

8 Савло вщилия пхүятар, нэ кала вов оттерда якха, тунчи полиля, со корыля, и лэ пала васт андэ дэ Дамаско.

9 Трин дивэ вов на халас и на пэлас, и сля коро.

10 Дэ Дамаско джювда сиклярно, савэ акхарэнас Анания. Рай пхэнда лэсти дэ дыкхлима:

— Анания!

— Кади, Rae! — пхэнда вов.

11 Рай дэдуманя лэсти:

* **8:36-37** Дэ койсавэ пуранэ греческа манускрипты исин инте кацавэ лава: «Филиппо пхэнда: "Кала ту патях всавэр ёлэгэ, нисо тут на рицарэл". Ефиопско мануш пхэнда: "Мэ патяв, со Иусо Христосо исин Дэвлэхкоро Чаво"».

— Джя пэ гаса, сави акхарэлпэ «Вортага», аракх котэ Иудахкоро цэр, и пхуч Савло, саво акхарэлпэ «Тарсянино». Вов еххатар мангэлэз.

12 И дэ лэхкэрэ дыкхлима мануш пав лавэ Анания авиля и тховда пэр лэстэ васта, соб вов тэ на авэл коро.

13 Анания пхэнда:

— Рае, мэ бутэ манушэндар шундом пала лэ, саво вуритимо вов терда Тирэ свэнтонэнди дэ Ерусалимо.

14 И лэстэ катэ исин бари зор англунэ рашаендар тэ пхандэ всавэрэн, ко прыакхарэл Тиро Лав.

15 Нэ Рай пхэнда лэсти:

— Джя, колэсти со кадэва мануш — вытидэно Манца, соб тэ розпхэнэ пала Муро Лав англа наиудеен, англа тхагарен тай англа Израилёхкэрэн манушэн.

16 Мэ сикавава лэсти, сави бари грыжа вов прылэла пала Муро лав.

17 Анания джилия, заджиля дэ кодэва цэр, тховда пэ Савло васта тай пхэнда:

— Пхрал Савло, Рай Иисусо, Саво сикавадапэ пэ тиро дром, бичалда ман тутэ, соб ту упалэ тэ дыкхэх и тэ пхэрдэх Свэнтонэ Фанога.

18 Дэ кодыя връяма калимо уджиля лэхкэрэ якхэндар, и вов ачиля тэ дыкхэ. Савло вишия тай болдэняйэ.

19 А тунчи вов халя, и лэстэ рисардапэ зор.

Савло пхэнэл Дэвлэхкоро лав дэ Дамаско

Савло сля набут дивэн сиклярнэнца дэ Дамаско

20 тай сиго ачиля тэ пхэнэ дэ синагоги пала кода, со Иисусо исин Дэвлэхкоро Чяво.

21 Всавэрэ, ко лэ шундэ, дэнаспэ дыво тай пхэнэнас:

— Чи када на вов, ко умарэлас манушэн Ерусалимостар, савэ прыакхарэнас кадэва лав? И чи на авиля вов кордэ, соб тэ пхандэ лэн и тэ лиджя англунэ рашаендэ?

22 Савло же инте зоралэдэр пхэнэлас тай допхэнэлас, со Иисусо исин Христосо. Тай иудея, савэ джювэнэас дэ Дамаско, на джянгле, со лэсти тэ пхэнэ.

23 Кала проджиля бут дивэн, иудея стидэнэ дума, соб тэ умарэ Савло.

24 Нэ Савло уджянглэ пала кода. Иудея диво и рят дожутярэнас паша вударэн дэ форо, соб тэ умарэ лэ,

25 нэ сиклярнэ риятгэлилэ тай обмуkle лэ дэ бари траста пав форицико ванта.

Савло дэ Ерусалимо

26 Савло авиля дэ Ерусалимо и камля тэ прыаче сиклярнэндэ, нэ всавэрэ даранас лэстар и на патянас, со вов кади ж ачиля сиклярнэгэ.

27 Тунчи Варнава анда лэ апостолонэндэ тай розпхэнда, сар Савло пэ дром дыкхля Рае, сар Рай дэдүмэлэс лэгэ, и сар дэ Дамаско Савло бидаракоро пхэнэлас важ Иисусохкоро лав.

28 Савло сля лэнца койсави връяма, пхирэлас пав Ерусалимо и битрашакоро пхэнэлас пала Раехкоро лав.

29 Вов бут молы дыкхэлэспэ эллинистонэнца, розпхэнэлас тай допхэнэлас лэнди, и кодэла терэнас вса, соб лэ тэ умарэ.

30 Кала пхрала уджянглэ пала када, вонэ отлиджялдэ Савло дэ Кесария, а котарь отбичалдэ лэ дэ Тарсо.

31 А манушэн хандириятар пав всавири Иудея, Галилея тай Самария будэр нико на традэлас. Хандири прылэлас зор тай барёллас, джювда дарага англа Рае, тай Свэнто Фано подрицаэрэлас ла.

Пётро састирэл Энэе

32 Кала Пётро джялас форо форостэ, вов авиля свэнтонэндэ, савэ джювдэ дэ Лидда.

33 Котэ вов удыкхля екхэ манушэ, савэ акхарэнас Энеи, вов сля насвало, попхагло мануш и пашлёлас пэ пато охта бэрш.

34 Пётро пхэнда лэсти:

— Энеи! Иисусо Христосо састьярэл тут. Вщи тай стидэ тиро тхан.
Дэ кодыя ж врима Энеи вшилия.

35 Кала всавэрэ мануша, савэ джювдэ дэ Лидда тай Шароно, удыкхле, со вов састьярдял, вонэ обрисиле Раестэ.

Тавита отджювдэл мулэндар

36 Дэ Яффа сля екх сиклярни, савя акхарэнас Тавита, ай пав аврэ «Бузнори». Вой всавири врима терэлэс лаче рындура и подрицаарэлас чёрорэн.

37 Тай акэ, дэ кодыя врима вой занасвалия тай муля. Лакоро трупо обхалавдэ и тховдэ дэ упранлуни цэра.

38 Важ кода со Лидда наудр Яффатар, кала сиклярнэ шундэ, со Пётро исин котэ, вонэ бичалдэ лэстэ дон манушэн, соб кодэла мангле лэ:

— Ав амэндэ сигэдэр!

39 Пётро джиля лэнца, и кала вов авиля, лэ пролиджялдэ дэ упранлуни цэра. Паша лэ стидэнепэ всавэрэ джювля, савэндэ муле рома. Вонэ ровэнас тай сикавэнас лэсти гада тай авэр ѵда, савэ сювда Бузнори, кала сля джювди.

40 Пётро выбичалда всавэрэн цэрэлтар, вшилия пэ чянгэн тай помангляпэ. Тунчи вов обрисардапэ мулятэ тай пхэнда:

— Тавита, вщи!

Вой оттерда яхха, удыкхля Петро тай бэшля.

41 Вол лиля ла пала вастэ и подрицаarda, собвой тэ вщел. Тунчи вов акхарда джювлен и патякунэн, и сикавда лэнди, со Тавита джювди.

42 Пала када уджянгле пав всавири Яффа, и бут манушэн патине Раести.

43 Пётро сля дэ Яффа инте бут дивэн, вов джювда Симоностэ, саво вытерэлас морця.

10

Корнилиехкоро дыкхлимо

1 Дэ Кесария сля мануш, савэ акхарэнас Корнилии, шэляконо пхурэдэр, халавдэнгэрэ Италиякэрэ стидэмстар.

2 Корнилии, сар и всавэрэ лэхкэрэ цэрүнэ, сля пативалэ манушэга тай даралас Дэвлэстар, роздэлас чёрорэнди пэхкэрэ хулаимастар и всавири врима мангляпэ Дэвлэлти.

3 Ехвар, паша трин чясуря дэ дивэ, Корнилииести сля дыкхлимо. Вов мишто дыкхля Дэвлэхкэрэ ангело, саво авиля лэстэ тай пхэнда:

— Корнилии!

4 Вов подыкхля пэр лэстэ дарага тай пхэнда:

— Со, рае?

Ангело пхэнда:

— Дэвэл срапирда пала тут. Тиро мангимо и лачимо, саво ту терэх манушэнди, ваздэнэпэ Лэстэ.

5 Бичал манушэн дэ Яффа, соб вонэ акхарэн Симоно, савэ инте акхарэн Петрога.

6 Вов джювэл Симоностэ, саво вытерэл морця, дэ цэр паша море.

7 Кала ангело, савэга вов дэдуманя, уджила, Корнилии акхарда дон пэхкэрэн копылен тай пативалэ халавдэ, саво терэлас важ лэсти бути.

8 Вов розпхэнда лэнди пала вса, со тердапэ, и бичалда лэн дэ Яффа.

Петрохкоро дыкхлимо

9 Пэ авэр диво, кала бичалдэ поджянас форостэ, паша дэшудуй чясуря, Пётро ваздэняпэ пэ цэрэхкири стрэха, соб тэ помангэпэ.

10 Вов ачиля бокхало и фартэ закамля тэ ха. Кала тавэнас хамо, Петрости сля дыкхлимо.

11 Вов дыкхля оттердо болыбэн и кода, со сля поджило пэ бари цэрга, сави обмукэлaspэ пэ пхув пала штар рига.

12 Дэ кадыя цэрга сля всаворо штарэтурэнгоро ското, сапа тай болыбнахкэрэ чириклия.

13 Тунчи роздэняпэ гласо тай пхэнда лэсти:

— Пётро, виши, чин и ха!

14 — Нат, Рае! — пхэнда Пётро. — Мэ никала на халём кода, со исин магрисардо тай нажужо.

15 Тунчи гласо пхэнда лэсти авэр моло:

— На акхар магрисардэг а кода, со Дэвэл жужарда.

16 Кади сля тривар, и тунчи цэрга сля подлити дэ болыбэн.

17 Пётро вса на полэлас, со када за дыкхлимо, кала мануша, савэн бичалда Корнилии, розпхучле, тев исин Симонохкоро цэр, поджиле тай ачиле паша бударэн.

18 Вонэ ачиле тэ пхуче, чи на джювэл катэ еххатар Симоно, сав э инте акхарэн Пётро.

19 Пётро инте думисарэлас пала дыкхлимо, кала Фано пхэнда лэсти:

— Тут родэн трин мануша.

20 Виши тай змукпэ тэлэ. Джя лэнца тай на думисар ни пала со. Колэсти со када Мэ лэн бичалдом.

21 Пётро змукляпэ тэлэ тай пхэнда кадэлэ манушэнди:

— Мэ кодэва, ка тумэ родэн. Пав саворындо тумэ авиле?

22 Вонэ пхэндэ:

— Шэлляжко пхурэдэр Корнилии, мануш пативало, саво дарал Дэвлэстар, и пэ савэ тховэл патив рода иудеенгоро, прылия свэнтонэ ангелостар лав тэ акхарэ тут дэ пэхжко цэр тай тэ вышунэ, со ту лэсти пхэнэга.

23 Тунчи Пётро акхарда лэн тэ заджя дэ цэр тай стховда лэнди патив. Пэ авэр диво Пётро и койсавэ пхрала Яффатар джиле лэнца.

Пётро дэ Корнилиехжко цэр

24 Пэ авэр диво вонэ авиле дэ Кесария. Корнилии дожутярэлас лэн. Вов акхарда всаворо пэхжко рода тай пашунэн амалз.

25 Кала Пётро авила, Корнилии выджиля лэстэ, тэлэдэня лэхкэрэ пурэндэ тай тээлия лэсти.

26 Нэ Пётро подлия лэ тай пхэнда:

— Виши, мэ кацово ж мануш, сар и ту.

27 Кала Пётро инте дэдуманя Корнилии, вов заджиля дэ цэр тай дыкхля, со котэ стидэняпэ бут манушэн.

28 Тай пхэнда лэнди:

— Тумэ еджинэ джянэн, со иудеести наши тэ авэ амалэг а наиудеенгэрэ манушэг тай тэ заджя лэстэ дэ цэр. Нэ Дэвэл сикавда манди: наши тэ дэдумэ ни пала савэ манушэн, со вов магрисардо чи нажужо.

29 Колэсти, кала пала ман авиле, мэ джилём и нисо на пхэнавас. Кана мэ камав тумэндэр тэ пхуче: пэ со тумэ бичалдэ пала ман?

30 Корнилии пхэнда:

— Штар дивэ павпалэ, дэ кадыя вряза, паша трин чясуря дэ дивэ, мэ манглёмпэ дэ пэхжко цэр. Тай англа ман ачиля мануш дэ ёда, сави сар яг пхаболас.

31 «Корнилии, — пхэнда вов, — тиро мангимо ушундо, тай лачимо, саво ту терэх, срапирда Дэвэл.

32 Бичал манушэн дэ Яффа пала Симоно, савэ инте акхарэн Пётро. Вов еххатар джюковэл дэ цэр паши море, Симоностэ, саво вытерэл морця».

33 Мэ сиго бичалдом пала тут, тай ту мишто тердан, со авилян. Еххатар амэ всавэрэ катэ, англа Дэвлэ, и камах тэ шунэ кода, со Рай прыпхэнда тути тэ пхэнэ.

34 Пётро ачиля тэ дэдумэ:

— Кана мэ полав, со Дэвлэл на дыкхэл пэ муй манушэхкоро,

35 нэ дэ всавэрэн манушэнгэрэн родонэн Лэсти чялёл кодэва, ко дарал Лэстар и терэл чичимо!

36 Вов бичалда Израилёхкэрэ родости Бахтало Лав пала кода, со Иисусо Христосо, Саво исин Рай всавэрэ манушэндэ, слиджял амэн Дэвлэга.

37 Тумэ джянэн пала кода, со тердапэ пав всавири Иудея, майнанглал Галилеятар и пала кодалэ, сар Иоанно прыакхарэлас манушэн тэ болдээ.

38 Дэвлэл помакхля Свэнтонэ Фанога тай зорага Иисусо Назаретостар тай Вов пхирэлас, терэлас лаче рындуя и састьярэлас всавэрэн, ко сля дэ копылен барэ бэнгэстэ, колэсти со Лэгэ сля Дэвлэ.

39 Амэ — допхэнимаря пала кода, со терэлас Иисусо дэ иудеенгири пхув тай дэ Ерусалимо. Лэ амблавдэ пэ каштунэ трушулэ тай умардэ,

40 нэ Дэвлэл пэ трито диво отджювдярда Лэ и дэня, соб Вов тэ сикавэлпэ манушэнди, —

41 на всавэрэнди, нэ амэнди, допхэнимаренди, ка майнанглал вытидэня Дэвлэл. Тай амэ хале и пиле Лэгэ пала колэ, сар Вов отджювдиня мулэндар.

42 Вов прыпхэнда, соб амэ тэ розпхэнах манушэнди тай тэ авах допхэнимаря, со Вов исин Кодэва, Ка вытидэня Дэвлэл тэ сундисарэ джювдэн тай мулэн.

43 Пала Лэ допхэнэн всавэрэ англunaяя, кала дэдумэн, со кожно мануш, саво патял дэ Лэ, фирикарэлэпэ бэзимастар важ Лэхкоро лав.

44 Кала Пётро инте дэдумэлас пала кода, пэ всавэрэн, ко шунда лэхкэрэ лава, сджиля Свэнто Фано.

45 Патякунэ иудея, савэ авиле Петрога, дэнаспэ дыво, со Дэвлэл бичалда Свэнто Фано дэ даро кади ж и наиудеенди,

46 колэсти со вонэ шундэ, сар кодэла дэдумэнас пэ аврэн чибэн и ашарэнас Дэвлэл. Тунчи Пётро пхэнда:

47 — Ко на дэла тэ болдээпэ панега кадэлэ манушэнди, савэ прылиле Свэнто Фано кади ж, сар и амэ?

48 И вов прыпхэнда лэнди тэ болдэнпэ важ Иисусохкоро Христохкоро лав. Тунчи хулая мангле Петро, соб тэ ачелпэ лэнца пэ набут дивэн.

11

Пётро дэдумэл дэ Ерусалимо

1 Апостолуря тай пхрала, савэ джювдэ дэ Иудея, шундэ, со кади ж и наиудея прылиле Дэвлэхкоро лав.

2 Колэсти, кала Пётро авиля дэ Ерусалимо, патякунэ иудея ачиле тэ выпхэнэ лэсти:

3 — Ту пхирдан наобчиндэ манушэндэ и халян лэнца, — пхэнэнас вонэ.

4 Тунчи Пётро ачиля тэ розпхэнэ лэнди вса, со сля майнанглал и пала кодэлэ.

5 — Мэ слём дэ форо Яффа тай манглёмпэ, — пхэнда вов, — и дэ кадыя время мандэ сля дыкхлимо: кода, со сля поджило пэ бари цэрга, сави пала штар рига обмукэласпэ боловнастар ворта пордэ, тев мэ слём.

6 Мэ подыкхлём андрал тай удыкхлём штарэпурэнгоро ското, сапэн тай боловнахкэрэн чириклэн.

7 Тунчи мэ шундом гласо, саво дэдумэлас манди: «Пётро, вщи, чин тай ха!»

⁸ Мэ пхэндом: «Нат, Рае! Ни пала со! Мэ никала на халём кода, со исин маг'рисардо тай нажужо».

⁹ Гласо болыбнастар пхэнда манди авэр моло: «На акхар маг'рисардэга кода, со Дэвэл жужарда».

¹⁰ Кади сля тривар, и тунчи цэрга сля подлити дэ болыбэн.

¹¹ Дэ кодяя ж врьяма паша цэр, дэ саво мэ слём, пашыле трин мануша, бичалдэ мандэ Кесариятар.

¹² Фано прыхэнда манди тэ джяв лэнца и тэ на розпхучяя ни пала со. Акэ кадэла шов пхрала кади ж джиле манца, тай амэ авиле дэ цэр кодэлэстэ, ко ман акхарда.

¹³ Вов розпхэнда амэнди пала кода, сар дыкхля пэстэ ангело. Ангело пхэнда лэсти: «Бичал манушэн дэ Яффа пала Симоно, савэ инте акхарэн Пётро,

¹⁴ и вов розпхэнэла, сар тэ фирикарэпэ тути и всавэрэ тирэ цэрэсти».

¹⁵ Кала мэ ачилём тэ дэдумэ, пэ лэндэ сджиля Свэнто Фано, кади, сар Вов сджиля англэ и пэ амэн.

¹⁶ Тунчи мэ срапердом лава Раехкэрэ: «Иоанно болдэня панега, а тумэ авэна болдэ Свэнтонэ Фанога».

¹⁷ Колэсти, кала Дэвэл дэня лэнди кацаво даро, сар и амэнди, савэ патине Раести Иусости Христости, ко ж мэ кацаво, соб тэ запхэнэ Дэвлэсти?

¹⁸ Кала вонэ вышундэ када, тунчи пэрэачиле тэ розпхуче тай ваздэне патив Дэвлэсти. Тай дэдумэнас:

— Выджаля кади, со Дэвэл дэня и наиудеенди тэ уджян бэзимастар тай тэ лэн джювимо!

Кхандири дэ Антиохия

¹⁹ Патякунэ, савэ розджилепэ, кала лэн ачиле тэ традэ пала кодэлэ, сар муля Стефано, проджиле Финикия, Кипро тай Антиохия, нэ розпхэнэнас Лав кацик иудеенди.

²⁰ Нэ койсавэ лэндар, савэ сле Кипростар тай дэ Киренеятар, авиле дэ Антиохия тай ачиле тэ розпхэнэ Бахтало Лав пала Рае Иусос эллинистанэнди.

²¹ Раехкоро васт сля лэнца, и бут манушэн патине тай обрикардэпэ Раестэ.

²² Дума пала кода доджиля кхандиряятэ дэ Ерусалимо. Котарь бичалдэ дэ Антиохия Варнава.

²³ Кала Варнава авиля тай удыкхля Дэвлэхкоро мищимо, вов лошия тай умангэлас всавэрэн, соб тэ аченпэ дэ патявима Раести.

²⁴ Варнава сля лачё мануш, пхэрдо Свэнтонэ Фанога тай патявимага. Тай фартэ бут манушэн ачиле тэ патя Раести.

²⁵ Тунчи Варнава джилия дэ Тарко, соб тэ аракхэ котэ Савло.

²⁶ И кала аракхля лэ, тунчи анда дэ Антиохия. Састо бэрш вонэ аченаспэ дэ антиохийско кхандири тай сиклярэнас бутэн манушэн. Дэ Антиохия сиклярнэн дэ перво моло ачиле тэ акхарэ «христианура».

²⁷ Дэ кадяя врьяма Ерусалимостар дэ Антиохия авиле койсавэ англунаря.

²⁸ Ехж лэндар, савэ акхарэнас Агаво, вцилия тай Фанога пропхэнда, со пав всавири пхув авэла барий бокх. Кади и тердагэ, кала Клавдий сля императоро.

²⁹ Колэсти сиклярнэ допхэндэпэ, со кожно лэндар дэла пэхкэрэ хулаимастар скици исин, тэ подрицаар пхралэн дэ Иудея.

³⁰ Кади вонэ и тердэ. Тай бичалдэ Варнава тай Савло тэ отлиджя ловэ, савэ вонэ стидэнэ, и тэ отдэ лэн пхурэдэрэнди.

1 Тэвсэй дээ кадыя врёма тхагари Иродо спханглия койсавэн манушэн хандирятар, соб тээ терэ лэнди бибахт.

2 Вов прыхэнда тээ умарэ чюорягэ Иоаннохкэрэ пхралэ, Иаково.

3 Кала вов удыкхля, со када чялия иудеенди, тунчи прыхэнда тээ пхандэ и Петро. Када сля пэ сырботори, саво акхарэлэп Биквасно мандро.

4 Петро пхангле, чутээ дэ барунэ и тховдэ дэшушов халавдэн, по штар мануша дэчера. Иродо камля тээ вылиджя Петро манушэндэ, кала проджяя Патради.

5 Петро сля дэ барунэ, а хандири фартэ манглия пала лэ Дэвлости.

6 Рятияга, англа колэ, сар Иродо камля тээ вылиджя лэ пэ сындо, Пётро совэлас машкар дон халавдэн тай сля спхангло донца ланчугонэнца, а халавдэ паша бударэн прыдыкхэнас пала барунэ.

7 Тай акэ, авиля ангело Раежкоро, тай дэ барунэ запхабиляпэ душлимо. Ангело малавда Петро дэ рига тай джюнгавда лэ.

— Вщи сигэдэр! — пхэнда вов, тай ланчугуяр тэлэдэне Петрохкэрэ вастэндар.

8 Тунчи ангело пхэнда:

— Подпхандэпэ күшникага тай уряв цыруля.

Пётро терда када.

— Уряв упранлуни ѫда и джя пала ман, — пхэнда ангело.

9 Пётро выджиля пала ангело барунэстар тай на полэлас, со ангело терэл вса пав чячима. Вов думисарэлэс, со када дыкхлимо.

10 Вонэ проджиле англунэн халавдэн, тунчи — аврэн тай поджиле саструнэ бударэндэ, савэндар выджаяс дэ форо. Вудара еджинэ оттердэпэ англа лэн, тай вонэ выджиля. Вонэ проджиле ехж гаса, тай акэ, ангело уджиля.

11 Кала Пётро авиля дэ пэстэ, вов пхэнда:

— Кана мэ чяче джяняв, со Рай бичалда пэхкэрэ ангело и фирисарда ман Иродохкорэ вастэстар и кодэлэ бибахтамистар, саво камле тээ терэ манди иудеенгерэ мануша.

12 Кала Пётро полиля, со тердапэ, вов джилия цэрэстэ, тев джювда Мария, дэй Иоаннохкири, савэ инте акхарэнас Марко. Котэ бут манушэн стидэнепэ тээ мангэпэ.

13 Пётро помарда дэ бударэн, тай лэстэ выджиля бутярни, савя акхарэнас Роза.

14 Вой уджянглия Петро пав гласо тай лошатар бистарда тээ оттерэ будара. Тунчивой прастэнья павпалэ, соб тэ пхэнэ, со Пётро ачел паша бударэн.

15 — Ту на дэ пэхкия годя! — пхэндэ лати.

Нэвой на пэрэачелас лэнди тээ допхэнэ.

— Када лэхкоро ангело! — дэдумане вонэ.

16 Пётро вса ж марэлас дэ бударэн, и кала вонэ оттердэ будара и удыкхле лэ, тунчи дэнепэ дыво.

17 Пётро сикавда лэнди вастэга, соб вонэ тэ заачен мулком, тай розпхэнда, сар Рай вылиджялда лэ барунэстар.

— Розпхэнэн пала кода Иаковости и аврэ пхралэнди, — дэдумане вов лэнди тай уджилия котарь дэ авэр тхан.

18 Дэнзор халавдэ ачиле тээ прастэ пордэ котарь, и нико на джянглия, со тердапэ Петрога.

19 Иродо родэлас лэ тай на аракхля, колэсти допхучия халавдэн тай прэдэня лэн мэrimasti. Тунчи Иродо лагля Иудеятар дэ Кесария тай ачеласпэ котэ набут врима.

Иродохкоро мэримо

20 Иродо ж фартэ мижкия пэ манушэн, савэ джювдэ дэ Тиро тай Сидено. Кодэла ж допхэндэпэ машкар пэстэ, авиile Иродостэ тай помангле Бласто, саво прыдыкхэлэс пала тхагарехкири цэра, соб вов тэ подрицарэл лэн. Тунчи мангле

тхагаре, соб тэ на рицарэл холи пэ лэн, колэсти со лэнгири пхув парварэласпэ тхагарехкия пхүятар.

21 Дэ ехж диво, саво вов вытидэня, Иродо урявда тхагаримахкири ёда, бэшля пэ сундисарехкоро тхан и ачиля тэ дэдумэ манушэндэ.

22 Мануша затиписиле:

— Када гласо дэвликуно, а на манушыкано!

23 Нэ дэ кодыя ж връяма ангело Раехкоро малавда Иродо, колэсти со вов на ваздэня лашаримо Дэвлэсти, тай цэрмэ захале лэ, и вов муля.

24 Лав Дэвлэхкоро розджяласпэ дурэдэр тай дурэдэр.

25 Варнава ж тай Савло стердэ пэхкоро рындо тай рисиле дэ Ерусалимо. Пэгэ вонэ лиле Иоанно, савэ инте акхарэнас Марко.

13

Варнава тай Савло бичалдэ пэ бутя

1 Дэ антиохийско кхандири сле англunaя тай сикляримаря: Варнава, Симеоно, савэ инте акхарэнас «Нигеро», киренеянино Луции, Манаино, саво бариля ётханэ тетрархога Иродога, тай Савло.

2 Екхвар, кала вонэ тэлёнас Раести и рицарэнас посто, Свэнто Фано пхэнда:

— Оттховэн Манди Варнава тай Савло важрындо, ды савэ Мэ лэн прыакхардом.

3 Тай вонэ, кала проджиле посто и мангимо, тховдэ пэ лэн васта и отму克莱 лэн.

Савло тай Варнава пхэнэн лав пэ Кипро

4 Кадэла дуй, савэ сле бичалдэ Свэнтонэ Фанога, джиле дэ Селевкия, а котарь лагле пав пане пэ Кипро.

5 Вонэ авиле дэ Саламино и котэ пхэнэнас Дэвлэхкоро лав дэ иудеенгерэ синагоги. Иоанно сля лэнца тай дэлас лэнди зор.

6 Вонэ облагле всаворо острово тай авиле дэ Пафосо. Котэ вонэ удыххле екхэ иудее, пав лавэ Вар-Исусо, саво сля джянимари тай хохавно англunuни.

7 Вов сля паша римско проконсулу пав лавэ Сергии Павло, манушэ баря годяга. Проконсулу камля тэ пошүнэ Дэвлэхкоро лав тай акхарда пэстэ Варнава и Савло.

8 Нэ кадэва Вар-Исусо, савэ инте акхарэнас Элима, (пав аврэ «джянимари»), камля тэ терэ лэнди бибаих тай тэ отмарэ пхурэдэрэ патявимастар.

9 Тунчи Савло, вов же Павло, пхэрдия Свэнтонэ Фанога, вхалялэ дэ Элима яххэнца

10 тай пхэнда:

— Чыво барэ бэнгэхкоро, врыжымашо всавэрэ чячимасти, пхэрдо хохавимага тай хрантимага! Кала ту пэрэачега тэ выбандярэ чячюно Раехкоро дром?

11 Аж, екхатар васт Раехкоро ваздэнялэ пэ тут! Ту авэга коро и савись връяма на дыххэга душлимо кхамэхкоро!

Тунчи сджиле пэр лэстэ ряят тай калимо, тай вов ачиля тэ чувэпэ дэ всавэрэн ригэн и тэ родэ кодэлэ, ко лиджяла лэ пала васт.

12 Кала проконсулу удыххля, со тердапэ, вов патиня, колэсти со дэнялэ дыво сикляримасти пала Дэвлэ.

Бути дэ писидийско Антиохия

13 Павло и кодэла, ко сле лэгэ, отджиле пав пане Пафосостар тай авиле дэ Перга, сави сля дэ Памфилия. Котэ Иоанно ачявда лэн и рисиля дэ Ерусалимо.

14 Пергатар вонэ лагле дурэдэр дэ писидийско Антиохия. Дэ суббота вонэ авиле дэ синагога тай бэшле котэ.

15 Пала колэ, сар прориндэ Упхэнимастар и Англunuрендар, пхурэдэрэ дэ синагога пхэндэ лэнди:

— Пхралалэ, сар исин тумэндэ лав, соб тэ подрицарэ манушэн, тунчи дэдумэн.

16 Павло вишия, подлия васт и пхэнда:

— Мурша израильянуря и всавэрэ, ко даран Дэвлэстар, шунэн ман!

17 Дэвэл Израилёхкэрэн манушэн вытидэня дадэн амарэн. Вов ваздэня манушэн, кала вонэ сле дэ Египто, и зоралз вастэга вылиджялда лэн котарь.

18 Саранды бэрш Вов прыдыкхэлас пала лэн дэ шуки пхув.

19 Вов предэня мэристи дэ Ханаано эфта манушэнгэрэн родонэн и отдэня лэнгири пхув амарэ дадэнди.

20 Кади проджилия пашэ штар шэла пандэша бэрш. Ды колэ, сар авиля англунари Самуило, Дэвэл дэлас лэнди сундисарен.

21 Тунчи мануша помангле тхагаре, тай Дэвэл дэня лэнди Сауло, Кишохкэрэ чиявэ, Вениаминохкорэ родостар. Сауло сля тхагарега саранды бэрш.

22 Тунчи Дэвэл залия тхагаримо Саулостар тай тердэ тхагарега Давидо. Вов допхэнэлас пала лэ: «Мэ аракхём Давидо, Иессеихкэрэ чиявэ, кадэва мануш Манди пав ёлэ, вов терэла вса, со Мэ камав».

23 Давидохкэрэ родостар Дэвэл дэня Израилёхкэрэ Фирисаре — Исусо, сар и дэлас лав пала кода.

24 Англа колэ, сар авиля Исусо, Иоанно пхэнэлас всавэрэ Израилёхкэрэ манушэнди, со трэбуни тэ ачявэ бэзимо тай тэ болдээ.

25 Кала ж Иоаннохири бути проджялас, вов пхэнэлас: «Пала ка тумэ ман прылэн? Мэ на Вов. Нэ пала ман джял Кодэва, Касти мэ на ачяв тэ розпхандэ доря пэ цыруляя».

26 Пхралал! Чиявэр А враамохкэрэ и кодэла тумэндар, савэ даран Дэвлэстар! Кадэва лав фирисаримахкоро сля бичалдо амэндэ!

27 Кодэла, савэ джювэн дэ Ерусалимо тай лэнгэрэ пхурэдэра на уджянгле Фирисаре. Вонэ сундисардэ Лэ и кади тердэ пав англунаренгэрэн лавэн, савэ динэн кожно суббота.

28 Вонэ на аракхле дэ Лэ нисави дош, пала со Лэ трэбуни сля тэ умарэ, нэ умангле Пилато, соб тэ предэ Лэ мэристи.

29 Кала вонэ стердэ вса, со сля пала Лэ искриисардо, вонэ слиле Лэ каштунэ трушулэстар тай тховдэ дэ склепо.

30 Нэ Дэвэл отджювдярда Лэ мулэндар,

31 и бут дивэн кодэла, савэ авиile Лэгэ Галилеятар дэ Ерусалимо, дыкхэнас Лэ. Тай ехжатар вонэ Лэхкэрэ допхэнимара англа манушэн.

32 И амэ кади ж дэдумах кадэва Бахтало Лав: кода, пала со Дэвэл пхэнэлас амарэ дадэнди,

33 Вов тердэ важ амэн, лэнгэрэ чиявэрэн, кала отджювдярда Исусо. Дэ авэр псалмо искриисардо:

«Ту — Чяво Муро,
авдивэ Мэ ачилём Тирэ Дадэгэ».

34 Тай пала кода, со Дэвэл отджювдярда Лэ мулэндар, кади, со трупо Лэхкоро на прахола, Вов пхэнда:

«Мэ дава тумэнди свэнто Давидохкоро бахталимо,
саво на парувэлапэ».

35 Тай дэ авэр тхан Вов дэдумэл:

«Ту на дэгэ, соб Свято Тиро тэ лэллэ прахога».

36 Давидо дэ пхэкири время терэлас бути пав воля Дэвлэхкири. Тунчи вов муля, лэ прахосардэ лэхкэрэ дадэнца, тай трупо лэхкоро лиляпэ прахога.

37 Нэ Кодэва, Ка Дэвэл отджювдярда, прахога на лиляпэ.

38 Калэсти, пхралалэ, джянэн: чэрэз Лэстэ Дэвэл отмукэл тумэнди бэзимо.

39 И сар тумэндэ на сля зор тэ ачявэ бэзимо пав Моисеихкэрэ Упхэнима, кожно ко патяла дэ Лэстэ, ачявэла пхэхкоро бэзимо.

40 Дыкхэн, соб тумэнца тэ на терэлпэ кода, пала со дэдумэнас англунаря:

41 «Подыхэн, асамаря,

дэнпэ дывости и хасявэн!

Мэ терава дэ тумарэн дивэн кацаворындо,

со тумэ никала б на патине,

кала б тумэнди розпхэндэ пала кода».

42 Кала Павло тай Варнава джянас котарь, лэн помангле тэ дэдумэ пала кода дэ авэр суббота.

43 Мануша розджилепэ, нэ бут иудея тай пативалэ, савэ прылиле иудеенгоро сикляrimo, джиле пала Павло тай Варнава. Вонэ дэдумане лэнца тай умангэнас лэн тэ джювэ пав Дэвлэхкоро мищимо.

44 Дэ авэр суббота гроза манушэн кодэлэ форостар стидэняпэ, соб тэ шунэ лав Раехкоро.

45 Кала иудея удыкхле скацик манушэн, вонэ мижыле тай ачиле намишто тэ дэдумэ пала Павлохкэрэн лавэн тай тэ кошэ Павло.

46 Тунчи Павло тай Варнава пхэндэ лэнди ворта:

— Лав Дэвлэхкоро трэбүни сля англал всавэрстар тэ дэдумэ тумэнди. Нэ кала тумэ отпхэнэнпэ лэстар, тай на бинэн, со вечно джювимо исин важ тумэн, амэ джях наиуденгэрэ манушэндэ,

47 сар и прыпхэнда амэнди Рай:

«Мэ тердом Тут душлимага важ всаворо манушыкано родо,
тэ авэн фирикардэ Тутар пав всавири люмля».

48 Кала наиудея шундэ када, вонз сле лошалз тай лашарэнас Рае пала Лэхкэрэ лавэ. Тай патине всавэрэ, савэ сле вытидэне вечно джювимастэ.

49 Раехкоро лав розджилияпэ пав всавири кодья пхув.

50 Иудея ж подмардэ пативалэн джювлен барвалэ ёрендар тай форохкэрэн пхурэдэрэн. Тай всавэрэ вонэ ачиле тэ традэ Павло и Варнава и вытрайдэне лэн пэхкирэ пхуятар.

51 Тунчи вонэ обмардэ прахо пэхкэрэ пурэндар тай джиле дэ Иконии.

52 А сиклярнэ пхэрдёнас лошага тай Свэнтонэ Фанога.

14

Дэ Иконии

1 Дэ Иконии Павло тай Варнава ютханэ заджиле дэ иудеенгири синагога тай дэдумане кади, со патине фартэ бут иудеен тай греконэн.

2 Ай иудея, савэ отпхэндэпэ лэнди тэ патя, ваздэне тай мижардэ пэ пхралэн наиудеен.

3 Нэ вса ж Павло тай Варнава сле котэ бут время. Вонэ бидаракоро дэдумане пала Рае, Саво допхэнэлас лав пала Лэхкоро мищимо и дэлэс лэнди зор тэ терэ допхэнимо тай дывуря.

4 Кодэла, ко джювэнас дэ форо, розмардэпэ по епаш. Ехх мануша подрицарэнас иудеен, ай авэр — апостолонэн.

5 Нэ кала наиудея тай иудея ютханэ пэхкэрэ пхурэдэрэнца закамле тэ прытховэ зор тай тэ помарэ лэн барэнца,

6 вонэ уджянгле пала кода, нашле тай проджиле пхув Лицаония, форуля Листра тай Дервия и пхуя, савэ сле пашэ лэн,

7 тев дурэдэр розпхэнэнас Бахтало Лав.

Бути дэ Листра

8 Дэ Листра джювда бизоракоро мануш, саво пэхкэрэ бэнимастар на пхирэлас пурэнца. Еххвар, кала вов бэшэлас,

9 вов шунда Павлохкоро лав. Павло же подыкхля пэр лэстэ тай полиля, со лэстэ исин патявимо, соб тэ састьярээз.

10 — Вщи пэ тирэ пурэ тай пхир! — зоралэ гласога пхэнда Павло.
Кодэва всхукля тай ачиля тэ пхирэ.

11 Мануша удыкхле, со терда Павло тай типисиле пав ликаонско чиб:
— Амэндэ сджиле дэвэла, поджилэ пэ манушэн!

12 Вонэ пхэннаас пэ Варнава «Зевсо», а пэ Павло — «Гермесо», колэсти со вов будэр дэдүмэлас.

13 Англа форо сля храмо, тев тэлёнаас Зевсости, тай лэхкоро рашай анда форохкэрэ вударэндэ гурувэн тай винци, колэсти со камля ѹтханэ манушэнца тэ анэ лэнди жэртва.

14 Кала апостолуя Павло тай Варнава ушундэ пала кода, вонэ розчиндэ пэхкири ѫда, чутэпэ машкар манушэн тай ачиile тэ типисявлээ:

15 — Муршалэ, со тумэ терэн? Амэ — кацавэ ж мануша, сар и тумэ! Амэ андэ тумэнди Бахтало Лав тай камах, соб тумэ тэ отпхэнэнпэ хохавнэ дэвлэндэр и обрисиле джювдэ Дэвлэстэ, Саво стерда болыбэн, пхув, море и вса, со дэ лэн исин.

16 Дэ думутни врьяма Вов помукалас всавэрэ манушэнгэрэ родонэнди тэ пхирэ лэнгэрэ дромэнца,

17 нэ на пэрэчелас тэ допхэнэ пала Пэ, кала терэлас мищимо тай бичалэлас тумэнди брышынд болыбнастар и врьяма тэ стидэ плодуря, кала дэлас тумэнди хамо тай пхэдрярэлас тумарэ Ѣлэ лошага.

18 Тай кацик кадэлэ лавэнца вонэ допхэндэ манушэнди, соб важ лэн тэ на анэн жэртва.

19 Иудея, савэ авиле Антиохиятар тай Икониестар, пэрэцырдэнэ гроза манушэн пэ пэхкири риг. Павло помардэ барэнца тай выцьрдэнэ пала форо. Вонэ думисардэ, со вов муля.

20 Нэ кала сиклярнэ стидэнепэ паша лэ, вов ушия тай упалэ джилия дэ форо. Пэ авэр диво вов тай Варнава джиле дэ Дервия.

Апостолуя рисявен дэ цирийско Антиохия

21 Вонэ дэдумане Бахтало Лав дэ кадэва форо тай тердэ сиклярнэнца бут манушэн. Тунчи вонэ упалэ проджиле Листва, Иконий тай Антиохия.

22 Котэ вонэ подрицааренас сиклярнэнгоро фано тай прыакхаренас, соб кодэла тэ аченпэ дэ патявима.

— Англа колэ, сар тэ заджя дэ Дэвлэхкоро Тхагаримо, амэнди трэбуни тэ прылэ бут грыжка, — пхэннаас вонэ.

23 Павло тай Варнава дэ кожно кхандири возтховэнас васта пэ манушэн тай терэннаас лэндэр пхурэдэрэн. Тунчи лиле посто тай поманглэпэ, и пэрэдэнэ лэн Раести, дэ Савэ вонэ улатине.

24 Тунчи вонэ проджиле Писидия тай авиле дэ Памфилия.

25 Кала ж вонэ пхэндэ лав дэ Перга, котарь авиле дэ Атталия.

26 Котарь вонэ лагле пав пане дэ Антиохия, тев, пав Дэвлэхкоро мищимо, лэн майанглал вытидэнэ пэ бути, сави вонэ и тердэ.

27 А кала вонэ авиле дэ Антиохия, тунчи стидэнэ кхандири тай розпхэндэ пала вса, со Дэвэл терда лэнгэрэ вастэнца, и сар Вов оттерда вудара патявимастэ наиудеенди.

28 Тай бут врьяма просле котэ ѹтханэ сиклярнэнца.

15

Кхандириякэрэ пхурэдэра стидэнпэ дэ Ерусалимо

1 Иудеятар дэ Антиохия авиле мануша, савэ ачиile тэ сиклярэ пхралэн:

— Кала тумэ на авэна тэ обчинепэ пав прыпхэнима Моисеехкэрэ, тумэ на фирикарэнэпэ.

² Павло и Варнава бут молы допхэнэнас лэнди тай вджянас дэ бари дума. Тунчи Павлости и Варнавости прыпхэндэ тэ джя дэ Ерусалимо ітханэ койсавэ авэр патякунэ манушэнца тай тэ обдэдумэ кадэварындо апостолонэнца и пхурэдэрэнца.

³ Кхандири пролиджялда лэн, тай вонэ джиле пав Финикия и Самария тай розпхэнэнас хотэ, сар наиудея обрисиле Дэвлэстэ. Кадлэсти фартэ лошыле всавэрэ патякунэ мануша.

⁴ Дэ Ерусалимо лэн прылиле кхандири, апостолуря тай пхэрэдэра, а вонэ розпхэндна пала вса, со Дэвэл терда лэнгэрэ вастэнца.

⁵ Нэ патякунэ, савэ сле фарисеенгэрэ стидэмастар, пхэнэнас, со наиудеен трэбуни тэ обчинэ тай тэ прыпхэн лэнди, соб тэ джювэн вонэ пав Моисеехкэрэ У phxenima.

⁶ Апостолуря тай пхурэдэра стидэнепэ, соб тэ мишто роздыкхэ кадыя дума.

⁷ Вонэ лунго врьяма дэдумэнас пала кода, тунчи Пётро вциля тай подэнэ пэхкоро гласо:

— Пхралалэ, сар тумэ джянэн, проджиля бут врьяма кодэлэ дивэстар, кала Дэвэл вытидэнэ всавэрэндэр амэндар ман, соб тэ розпхэнав Бахтало Лав наиудеенди, и соб вонэ тэ патян.

⁸ Дэвэл джянэл юлэ манушэнгэрэ, тай Вов дэня допхэнимо, со прылэл и наиудеен, кала бичалда лэнди Свэнто Фано кади ж, сар и амэнди.

⁹ Вов на думисарэл, со амэ фэдэр лэндар, колэсти со патявимага жужарда лэнгэрэ юлэ!

¹⁰ Сости ж тумэ зумавэн Дэвлэ и тховэн пэ кор сиклярнэнди гамо, тэ лиджя саво на сля зора и амарэ дадэндэ и амэндэ?

¹¹ Амэ патях дэ колэ, со прылах фирикаримо пав мищимо Рае Исусохкоро, кади ж, сар и вонэ.

¹² Тунчи всавэрэ прыячиле мулком тай ачиле тэ шунэ, сар Варнава и Павло розпхэнэн пала допхэнима тай дывуя, савэ Дэвэл терэлэс лэнгэрэ вастэнца машкар наиудеен.

¹³ Кала вонэ вса розпхэндэ, Иаково пхэнда:

— Пхралалэ, пошунэн ман!

¹⁴ Симоно еххатар розпхэнда амэнди, сар Дэвэл перво моло авиля наиудеендэ, соб тэ вытидэ лэндар кодэлэн, ко лашарэла Лэхкоро лав.

¹⁵ И кадлэстэ подлиджянас англunaя, кала пхэнэнас:

¹⁶ «Тунчи Мэ рисявава

тай подваздава катуна Давидохири, сави тэлэдэня.

Вса стерава упалэ, со розпхагляпэ,

вортасавава ла,

¹⁷ соб авэр мануша

тай всавэрэ манушэнгэрэ родуля,

савэ акхарэнаспэ Мурэ Лавэга,

ачиле тэ родэ Рае.

Кади пхэнэл Рай, Саво терэл вса откада,

¹⁸ со джянэл англумимастар».

¹⁹ Колэсти мэ думисарав, со амэнди на трэбуни тэ тховэн пхаримо пэ наиудеен, савэ обрисыянэл Дэвлэстэ.

20 Нэ трэбуни тэ искриисарэ лэнди лил, соб вонэ на тэ магрискарэнпэ стердэ дэвлорэндар, тэ на терэн биладжавимо ёрестар, тэ на хан мас затасавдэ хулаимастар тай тэ на пэн рат.*

21 Колэсти со Упхэнимо Моисеихкою англунэ родостар розпхэнэн тай динэн кожно суббота дэ всавэрэ синагоги пав всавэрэн форонэн.

Лил наиудеендэ

22 Тунчи апостолуря тай пхурэдэра ютханэ всавиря кхандиряга прылиле дэ гындо тэ вытидэ манушэн, тай тэ бичалэ лэн дэ Антиохия Павлога и Варнавага. Вонэ вытидэн Иуда, савэ инте акхарэнас Вар-Савва, тай Сила. Кадэла сле пхурэдэра машкар пхралэн.

23 Лэнца пэрэднэ кацаво лил:

«Пхрала апостолуря тай пхурэдэра,
пхралэнди наиудеендар, савэ джювэн дэ Антиохия, Сирия тай Киликия.
Тэ авэн бахталэ!

24 Сар доджиля амэндэ дума, со койсавэ амэндар змардэ тумэн годятар пэхкэрэ лавэнца и тховдэ калимо дэ тумарэн юлэн, нэ амэ на пхэнагас лэнди тэ терэ кади.

25 Колэсти амэ прылиле дэ гындо тэ вытидэ койсавэн муршэн тай бичалдэ лэн тумэндэ ютханэ амарэ пативалэнца Варнавага тай Павлога,

26 савэ отдэн пэхкоро джювимо важ Лав амарэ Рае Иисусо Христо.

27 Амэ бичалах тумэнди кади ж Иуда тай Сила, соб вонэ розпхэндэ тумэнди кода, со амэ искриисарах.

28 Свэнто Фано тай амэ прылиле дэ гындо, соб тэ на тховах пэ тумэн нисаво пхаримо, кацик откада, со трэбуни:

29 Тэ на хан кода, со андэ дэ жэртва стердэ дэвлорэнди и мас затасавдэ хулаимастар, тэ на пэн рат, тэ на терэн биладжавимо ёрестар. Сар авэна када тэ терэ, терэна мишто.

Тэ авэн састэ!»

30 Бичалдэ джиле дэ Антиохия. Котэ вонэ стидэне кхандири тай пэрэднэ лил.

31 Мануша динэнас лэ тай лошавэнас подрицаримости.

32 Иуда тай Сила, савэ сле англунаря, кади ж подрицарэнас пхралэн пэхкэрэ лавэнца дэ патявима.

33-34 Вонэ сле котэ койсави врязма тай пхрала бахтага отму克莱 лэн кодэлэндэ, ко лэн бичалда.[†]

35 Павло тай Варнава ачилепэ дэ Антиохия, тев вонэ аврэ бутэ пхралэнца сиклярэнас Раехкэрэ лавэсти тай розпхэнэнас Бахтало Лав.

Павло тай Варнава роздэжянти

36 Проджиля набут врязма, тай Павло пхэндэ Варнавасти:

— Заджяга пхралэндэ дэ всавэрэн форонэн, тев амэ дэдумане Раехкоро лав, тай подыххага, сар вонэ джювэн.

37 Варнава камля тэ лэ пэгэ Иоанно, савэ инте акхарэнас Марко.

38 Нэ Павло прылиля дэ гындо, со на трэбуни тэ лэ кодэлэ, ко ачявда лэн дэ Памфилия тай на терэлас лэнца бути.

39 Вонэ нисар на допхэндэпэ машкар пэстэ, колэсти розджилепэ. Варнава лиля Марко и вонэ лагле пав пане пэ Кипро.

40 Ай Павло вытидэня Сила, и, кала пхрала предэне лэн Раехкэрэ мищимости, джиле дэ дром.

41 Тунчи вов проджаялас Сирия тай Киликия, тев подрицарэлас кхандиря дэ патявима.

* **15:20** Дэ койсавэ пурэн греческа манускрипты исин инте кацавэ лава: «Тай соб тэ на терэн аврэнди кода, со на камэн пэстэ». † **15:33-34** Дэ койсавэ пурэн греческа манускрипты исин инте кацавэ лава: «Сила закамля тэ ачепэ котз, нэ Иуда рисиля дэ Ерусалимо».

16

Тимофеи заджял дэ бутя Павлога тай Силага

1 Тунчи Павло авиля дэ Листра тай дэ Дервия. Котэ джювда сиклярно, савэ акхарэнас Тимофеи. Лэхкири дэй сля патякуни иудеянка, ай дад сля греко.

2 Пала Тимофеес мишто дэдумане пхрала дэ Листра тай дэ Иконии.

3 Павло закамля тэ лэ Тимофеес дэ пэхкоро дром. Тай важ иудеен, савэ джювдэ дэ кодэлэн тханэн, обчинда лэ. Важ кода, со всавэрэ джянгле: Тимофеехкоро дад исин греко.

4 Кала Павло тай мануша, савэ сле лэгэ, пэрэджянас форо форостар, вонэ прыакхарэнас патякунэн тэ терэ кади, сар пэрэдэнэ апостолуря тай пхурэдэра Ерусалимостар.

5 Кхандиря састёнас дэ патявима, тай патякунэн диво дивэстар ачелас будэр.

Павло дыкхэл мануша Македониятар

6 Вонэ проджянас пав Фригия тай Галатиякири пхув, нэ Свэнто Фано на домуклия лэн тэ пхэнэ лав дэ Цыкни Азия.

7 Вонэ поджиле Мисиятэ и камле тэ джя дэ Вифиния, нэ Исусохкоро Фано на домуклия лэн.

8 Тай вонэ проджиле Мисия и авиле дэ Троада.

9 Риятга Павлости сля дыкхлимо: лэсти сикавдапэ мануш Македониятар. Вов ачелас тай мангэлас Павло:

— Ав дэ Македония тай дэ амэнди зор!

10 Пала кодэл дыкхлима амэ полиле, со Дэвэл прыакхарэл амэн тэ пхэнэ котэ Бахтало Лав. Тай екхатар лагле дэ Македония.

Лидия обрисявлэл Дэвлэсти

11 Троадатар амэ лагле пав пане дэ Самофракия тай котарь пэ авр диво лагле дэ Неаполи.

12 Котарь амэ лагле дэ Филиппы. Када сля Римохкири колония и баро форо дэ Македония. Дэ кадэва форо амэ сле набут врязма.

13 Дэ суббота амэ выджиле пала форохкэрэн ударэн лэнятэ. Котэ, сар амэ думисардэ, сля тхан важ мангима. Амэ бэшле и ачиле тэ дэдумэ джювленца, савэ котэ стидэнепэ.

14 Машкар лэн сля ех, савя акхарэнас Лидия. Вой тэлёлас Дэвлэсти, сля форостар Фиатира тай битинэлас кучутнэ шүкар похтана. Лидия шунда Павло, и Рай оттерда лакоро ѥло тэ прылэ лэхкэрэ лава.

15 Тунчи, кала вой тай лакэрэ цэрүнэ болдэнепэ, вой акхарда амэн пэстэ.

— Сар тумэ динэн, со патяв Раести, тунчи джян и поавэн мандэ цэрэ, — фартэ акхарэлас вой амэн, тай амэ джиле.

Павло тай Сила бэшарэн дэ барунэ

16 Екхвар, кала амэ джиле дэ тхан важ мангима, пав дром амэ удыкхле екха бүтэярня. Дэ латэ бэшэлэс нахужко фано врэжакоро. Вой врысарэлас и кадэлэгэ затэрэлэс барэ ловэ пэхкэрэ хулаэнди.

17 Бутярни джялас пала Павло тай пала амэн тай типисявлас:

— Кадэла мануша — копыля Дэвлэ Барэдэрэхкэрэ! Вонэ розпхэнэн тумэнди пала дром фирисаримастэ!

18 Вой терэлас када диво дивэстар. И кала Павлости вса откада вурыцыля, вов обрисиля тай пхэнда фаности:

— Важ Лав Исусо Христохкоро мэ прыпхэнав тути: выджа латар!

Дэ кодяя ж врязма фано ачявда ла.

19 Кала хулая полиле, со лэндэ хасиля затиримо, вонэ схутилдэ Павло тай Сила тай цырдэне пэ бари гаса форохкэрэ раенде.

20 Вонэ андэ лэн пхурэдэрэндэ тай пхэндэ:

— Кадэла мануша — иудея. Вонэ подваздэн амаро форо.

21 Вонэ влиджян дэ амаро джювимо кода, со амэнди, римсконэ манушэнди, нахи ни тэ прылэ, ни тэ терэ.

22 Гроза манушэн кади ж ачиля тэ буджилисарэ Павло тай Сила. Тунчи пхурэдэра прыпхэндэ тэ эзэ лэндар ѫда тай тэ марэ лэн дэстэнца.

23 Лэн фартэ помардэ тай чутэ дэ барунэ. А барунэхкэрэ бутярнэсти прыпхэндэ мишто тэ дыкхэ пала лэн.

24 Кала вов шунда кадэва прыпхэними, вов затерда лэн дэ андралатуни цэра дэ барунэ и замарда лэнгэрэ пурэ дэ лэпунза.

25 Паашэ епаширят Павло тай Сила манглепэ тай диленца лашарэнас Дэвлэ. И авэр мануша, савэ котэ бэшле, шундэ лэн.

26 Еххатар пхув тинисиля баря зорага, кади, со тинисилем и ванты дэ барунэ. Дэ кодыя ж врьяма всавэрэ удара оттердэпэ, и всавэрэ барунарендэ ланчугурая тэлдэнене пурэндар.

27 Кала барунэхкоро бутярно проджюнгавдапэ тай удыкхля, со всавэрэ удара дэ барунэ оттердэ, вов думисарда, со всавэрэ барунаря унашле. Колэсти хутилда чори тай камля тэ зачинэпэ.

28 Нэ Павло затинисиля лэсти:

— На тер нисо пэсти! Амэ всавэрэ катэ!

29 Бутярно прыпхэндэ, соб тэ анэн яг, запрастэнэ дэ цэр, затинисиля даратар тай тэлдэнэя англа Павло и Сила.

30 Тунчи вылиджялда лэн барунэстар тай пхучля:

— Рая мурэ! Со манди тэ терэ, соб тэ фирисаравпэ?

31 — Патя дэ Rae Исусо, — пхэндэ вонэ, — и фирисарагэпэ ту тай всаворо тиро цэр.

32 Вонэ розпхэндэ лав Раехкоро лэсти тай всавэрэнди, ко сля лэстэ дэ цэр.

33 Дэ кодыя ж рятуни врьяма барунэхкоро бутярно халавда лэнгэрэ дукхавдэ тхана, а тунчи болдэняпэ вов и всавэрэ, ко сля лэстэ дэ цэр.

34 Вов анда Павло тай Сила пэстэ цэрэ и тховда важ лэн скаминд. Всавэрэнди, ко сля лэстэ дэ цэр, вов лошавэлас, со ачиля тэ патя Дэвлэсти.

35 Авила диво, тай форохкэрэ пхурэдэра бичалдэ пэхкэрэн дэстарен дэ барунэ тай прыпхэндэ лэнди:

— Отмукэн пэ воля кадэлэн манушэн!

36 Барунэхкоро бутярно пхэндэ Павлости:

— Пхурэдэра прыпхэндэ тэ дэ тумэнди воля! Джян бахтага!

37 Нэ Павло пхэндэ лэнди:

— Амэ — римска мануша, ай вонэ бисындохкоро помардэ амэн англа всавэрэн тай чутэ дэ барунэ. Аканы камэн чёраханэ амэн тэ вытрадэ? Нат! Мэк вонэ еджинэ авэна тай вылиджяна амэн.

38 Бутярно розпхэндэ када форохкэрэ пхурэдэрэнди. Кала кодэла шундэ, со Павло тай Сила — римска мануша, тунчи пэрэдараавдэпэ.

39 Вонэ авиле, помангле лэндар патив, вылиджялдэ лэн барунэстар и помангле, соб кодэла ачявшэ форо.

40 Кала Павло тай Сила выджиile барунэстар, вонэ джиле Лидиятэ. Котэ вонэ удыкхлепэ пхралэнца тай подрицардэ лэн. Тунчи вонэ джиле.

2 Павло, сар лэстэ сля прылито, джиля дэ синагога и котэ трин субботы дэдумэлас иудеенца пала Лила.

3 Вов оттерэлас тай допхэнэлас лэнди, со Христости трэбуни сля тэ прылэ грыжа тай тэ отджювдэ мулэндар.

— Иусо, пала Савэ мэ тумэнди розпхэнав, исин Христосо, — пхэнэлас Павло.

4 Лэнди патине койсавэ иудея, бут пативалэн греконэн и бут джювлен барэ родостар. И всавэрэ вонэ прыачиле Павлостэ тай Силастэ.

5 Авэр иудея холиле пала кода. Вонэ лиле пэгэ налачен манушэн, савэн аракхле пэ форо, стидэне инте гроза манушэн и ачиле бутэн тэ подваздэ. Тунчи джиле Иасонохкэрэ цэрэстэ, родэнас Павло тай Сила, соб тэ вылиджя лэн манушэндэ.

6 Ай кала на аракхле лэн котэ, цырдэне Иасоно тай аврэн пхралэн форохкэрэ пхурэдэрэндэ.

— Кадэла мануша терэн бибахталимо пав всавири люмля, тай еххатар авиле амэндэ, — типисиле вонэ.

7 — Тай Иасоно прылия лэн дэ пэхкоро цэр. Вонэ на прылэн императохкоро упхэнимо, тай дэдүмэн, со исин авэр тхагари, Савэ акхарэн Иусо.

8 Гроза манушэн и форохкэрэ пхурэдэра ушундэ када тай пэрэдаравдээ.

9 Тунчи Иасоно тай авэр потиндэ пала пэ, тай лэн отмуkle.

Бути дэ Верия

10 Сар кацик авиля рят, пхрала отбичалдэ Павло и Сила дэ Верия. Кала вонэ авиле пордэ, тунчи заджиле дэ иудеенгири синагога.

11 Веринянуя сле мануша оттердэ Ѽлэгэ, а на кади, сар дэ Фессалоника. Вонэ прылиле Павлохири дума всавэрэ Ѽлэга и кожно диво розлэнас Лила, соб тэ продыххэ, чячимо када чи нат.

12 Бут лэндар патине. Патине кади ж греконэнгэрэ пативалэ джювля тай бут греконэн.

13 Нэ кала иудея дэ Фессалоника уджянгле, со Павло пхэнэл Дэвлэхкоро Лав дэ Верия, вонэ авиле пордэ и ачиле тэ подмарэ и тэ подваздэ манушэн.

14 Пхрала сиго отбичалдэ Павло морестэ, а Сила тай Тимофеи ачилепэ дэ форо.

15 Кодэла, савэ отлиджялдэ Павло, авиле лэга дэ Афины, а тунчи рисиле павпалэ. Павло прыпхэнда лэнди тэ пэрэдэ, соб Сила тай Тимофеи сигэдэр тэ авэн лэстэ.

Бути дэ Афины

16 Кала Павло дожутяэрэлас лэн, вов пхирэлас пав Афины и лэсти сля пхаро тэ дыххэ, сар бут дэвлорэн исин дэ кадэва форо.

17 Вов пхэнэлас дэ синагога иудеенца тай кодэлэнца, савэ тэлёнас Дэвлэсти. И кожно диво дэдүмэлас кодэлэнца, каға дыххэласпэ пэ форо.

18 Лэгэ дэдумане койсавэ ирвалэ мануша — эпикурейцуя тай стоикуря. Ехх мануша пхученас:

— Со кадэва башлимурι камэл тэ пхэнэ?

Авэр пхэнэнас:

— Амэнди сикавэлпэ, со вов дэдүмэл пала аврэпхүякэрэн дэвлэн, — колэсти со Павло дэдуманя Бахтало Лав пала Иусо тай Отджуңдивимо.

19 Павло андэ пэ форохкоро стидамо, Ареопаго, тай помангле:

— Розпхэн амэнди, со када за нэво сикляримо, пала савэ ту дэдүмэх?

20 Ту пхэнэх пала кода, со на полах. И амз камах тэ уджянз, со када исин.

21 Афинянуя ж и мануша авря пхуятар, савэ котэ джювэнас, фартэ камэнас тэ залээпэ кодэлэгэ, соб тэ дэдүмэ чи тэ шунэ сось нэво.

22 Тунчи Павло вшияла машкар Ареопаго тай пхэнда:

— Афинянуя! Мэ дыххав, со тумэ будэр аврэн манушэндар тэлён дэвлэнди.

23 Кала мэ пхиравас и роздыкхавас тумарэ свэнтийи тхана, мэ дыкхлём, со пэ еекж жэртвеннико сля искриисардо: «Наджянглэ Дэвлэсти». Пала Кадэлэ Дэвлэ, Ка тумэ на джянэн, нэ Касти тэлён, мэ тумэнди и розпхэнав.

24 Дэвлэ, саво стерда люмля и вса, со дэ латэ исин, Вов исин Рай болыбнасти тай пхуяти. Вов на джювэл дэ храмонэн, савэ тердэ манушэнгэрэ васта.

25 Тай на мангэл, соб мануша тэ терэн бути Лэсти пэхкэрэ вастэнца, сар бы Лэсти сось на хутилэл. Вов Еджино дэл манушэнди, соб вонэ тэ джювэн и тэ пхурдэн, и вса авэр.

26 Екхэ манушэстар Вов стерда всавэрэ манушэнгэрэ родуря, соб мануша тэ джювэн пав всавири люмля, тай майанглал вытидэнья връяма и пхуя лэнгэрэ джювимости.

27 Вса откада Дэвлэл терда, соб мануша тэ родэн Лэ, тэ полэн, тев Вов исин, тай тэ аракхэн Лэ, нэ пав чячима Вов исин надур амэндар.

28 Дэ Лэстэ амэ джювах, пхирах тай исин дэ люмля. Сар пхэнэнас пала кода и койсавэ тумарэ поэтуря: «Амэ исин Лэхкоро рodo».

29 И кала амэ Дэвлэхкоро рodo, амэнди нащи тэ думисарэ, со Дэвлэл поджило пэ кода, со тердо совнакастар, руптар чи барэстар пав манушхкири годи.

30 Англэ Дэвлэл промукэлас връяма, кала мануша на джянгле пала Лэ, нэ екхатар припхэнэл всавэрэ манушэнди пав всавири люмля тэ ачявэ бэзимо.

31 Вов екхатар вытидэнья диво, кала сундисарэла люмля пав чячима, тай кади ж вытидэнья Манушэ, Саво авэла сундисарега. Дэвлэл допхэнда када англэ всавэрэн, кала отджювядярда Лэ мулэндар.

32 Кала вонэ ушундэ пала отджюндивимо мулэндар, койсавэ лэндар ачиле тэ асанэ, ай авэр пхэндэ:

— Пала кода амэ пошунага тут дэ авэр моло.

33 Кадэлэгэ Павло и ачявда лэнгоро стидэмө.

34 Нэ набут манушэн прыачиле Павлостэ тай патине. Машкар лэн сле Дионисий, саво вдяжалас дэ Ареопаго, джювли, савя акхарэнас Дамарь, тай авэр мануша.

18

Бути дэ Коринфо

1 Тунчи Павло ачявда Афины и лагля дэ Коринфо.

2 Котэ вов дыкхля иудеев пав лавэ Акила, саво бэняпэ дэ Понто. Кодэва надумут авиля Италиятар пэххияра ромняга, савя акхарэнас Прискилла, колэсти со императоро Клавдии припхэнда всавэрэ иудеенди тэ ачявэн Римо. Павло авиля тэ дыкхэпэ лэнца.

3 Вонэ терэнас кодыя ж бути, со и Павло: терэнас катуны. Колэсти Павло ачиляпэ лэндэ тэ терэлас лэнца бути.

4 Кожно суббота вов дэдүмэлэс дэ синагога иудеенца тай греконэнца и камля тэ пэрэцырдэ лэн пэ пхэхкири риг.

5 Кала Македониятар авиile Сила тай Тимофеи, тунчи Павло всавири пэххикири връяма отдэнья колэсти, соб тэ пхэнэ лав. Тай допхэнэлэс иудеенди, со Иисусо исин Христосо.

6 Кала вонэ ачиле тэ пэрэмэр тай тэ кошэ лэ, вов обмарда прахо пэххиря юдатар тай пхэнда лэнди:

— Тумэ еджинэ дошалэ дэ пэхкэрэ хасывима! Мэ жужо и каны джяя наиудеенди!

7 Павло выджаиля котарь тай джилия дэ цэр, саво ачелас пашэ синагога. Котэ джювэлас Титий Иусто, мануш, саво тэлэлэс Дэвлэсти.

8 Пхурэдэр дэ синагога Криспо и всавэрэ лэххэрэ цэрүнэ патине Раести. Тай бут коринфянуря, савэ шунэнас Павло, патине и сле болдэ.

9 Екхвар рягтага Рай пхэнда Павлости дэ дыкхлима:

— На дара! Дэдумэ тай на пэрэач!

10 Мэ туга, тай нико на терэла тут бибахт. Дэ кадэва форо исин бут Мурэн манушэн.

11 Павло сля котэ бэрш епашэгэ тай сиклярда лэн Дэвлэхкэрэ Лавэсти.

12 Дэ кодыя врьяма, кала Галлионо сля проконсуло дэ Ахаяя, иудея стидэнепэ, схутилдэ Павло тай андэ лэ пэ сындо.

13 Вонэ ачиле тэ дошарэ лэ:

— Кадэва мануш сиклярэл тэ полэ Дэвлэ на кади, сар сиклярэл амаро Упхэнимо.

14 Павло инте нисо на пхэнда, кала Галлионо ачиля тэ дэдумэ кодэлэнди, ко дошарэнас лэ:

— Иудея, тэ авэл бы када начячимо чи мижкорындо, мэ бы шунавас тумэн.

15 Нэ сар тумэ ханпэ пала сиклярима, лава тай тумаро Упхэнимо, тунчи розлэнпэ еджинэ. Мэ на камав тэ авэ сундисарега дэ кодэлэ.

16 Тай вов вытрайдэн я лэн сундисарехкэрэ тханэстар.

17 Тунчи всавэрэ схутилдэ пхурэдэрэ дэ синагога, савэ акхарэнас Сосфено, тай помардэ лэ англа сундисарехкоро тхан. Нэ Галлионо пэ када нисо на терда.

Павло рисявлэл дэ Антиохия

18 Павло просля инте бут дивэн дэ Коринфо. Тунчи вов розачиляяпэ хяралэнца тай Прискилага и Акилагэ лагля пав пане дэ Сирия. Англа колэ, сар лэнди тэ ладэ, Павло обчинда бала дэ Кенхреи, колэсти со калась дэня солах Дэвлэсти.

19 Вонэ авиле дэ Эфесо. Котэ Павло ачявда Прискилла тай Акилла, а еджино джилия дэ синагога тай дэдумэлас иудеенца.

20 Вонэ мангле, соб вов тэ ачелпэ лэндэ пэ савись врьяма, нэ вов отпхэндапэ.

21 — Мэ рисявава, сар авэла пэ када Дэвлэхкири воля, — пхэнда Павло, кала розачеласлэлэцэ, тай лагля пав пане Эфесостар.

22 Вов лагля дэ Кесария, авила дэ Ерусалимо, дыкхляяпэ котэ хандиряягэ тай джилия дэ Антиохия.

23 Павло просля котэ савись врьяма, тунчи джилия котарь тай проджялас галатиакири пхув и Фригия, а пав дром подрицаэрэлс сиклярнэн.

Аполлосохкери бути дэ Эфесо

24 Да кодыя врьяма дэ Эфесо авила иудеи, савэ акхарэнас Аполлосо. Вов шукар дэдумэлас, бэняяпэ тай барилла дэ Александрия и мишто джянэлас Лила.

25 Вов сля сиклярдо Раехкэрэ Дромэсти тай всавэрэ водегэ розпхэнэлас пала Иусу чичимага, нэ еджино джянэлас кацик Иоаннохкоро болдимо.

26 Аполлосо ачиля бидаракоро тэ дэдумэ дэ синагога, и кала Прискилла тай Акила ушундэ лэ, вонэ акхардэ лэ пэстэ тай сар исин фэдэр розпхэндэ пала Дэвлэхкоро Дром.

27 Аполлосо камля тэ джя дэ Ахаяя, тай пхрала, соб тэ подрицаэр лэ, искриисардэ лил сиклярнэнди, савэ котэ джювдэ. Дэ лил вонэ мангле тэ прылэ Аполлосо. Кала вов авила пордэ, тунчи дэня бари зор кодэлэнди, ко пав Дэвлэхкоро мищимо ачиля тэ патя.

28 Аполлосо пхабардэс сикавэлас иудеенгоро начячимо тай англэ манушэн допхэнэлас Лилэндар, со Христосо исин Иусу.

19

Павлохкери бути дэ Египто

1 Дэ кодыя врьяма, кала Аполлосо сля дэ Коринфо, Павло проджиля пав плаехкэрэ тхана тай авила дэ Эфесо. Котэ вов дыкхляяпэ койсавэ сиклярнэнца.

2 — Прыйлилे тумэ Свэнто Фано, кала патине? — пхучяла вов.

— Амэ и на шундэ пала кода, со исин Свэнто Фано, — пхэндэ кодэла.

3 Тунчи Павло пхучля:

— Сар жэ түмэ сле болдэ?

— Кади, сар сиклярда Иоанно, — пхэндэ вонэ.

4 Павло пхэндэ:

— Иоанно болдэлас, кала мануш прыджянааслэс пэхкоро бэзимо. Вов прыакхарэлас манушэн тэ патя дэ Кодэлэ, Касти трэбуни тэ авэ пала лэ, дэ Иисусо.

5 Кала вонэ ушундэ пала када, тунчи болдэнепэ важ Рае Иисусохкоро Лав.

6 И кала Павло тховда пэ лэн васта, пэ лэндэ сджиля Свэнто Фано. Тунчи вонэ ачиле тэ дэдумэ авэр чибэнца и тэ пхэнэ Дэвлэстар.

7 Всавэрэн лэн сля паша дэшудуй манушэн.

8 Павло трин чёна бидаракоро пхэнэлас дэ синагога. Вов дэдуманя манушэнца пала Дэвлэхкоро Тхагаримо тай допхэнэлас лэнди.

9 Нэ койсавэ лэндар мижонаас и отпхэнэнаслэ тэ патя, тай дэдумэнас англа всавэрэн, со Дром Раехкоро на исин чячюно. Тунчи Павло ачява лэн. Вов вытидэнэ сиклярнэн и кожно диво дэдуманя лэнца дэ Тираннохири школа.

10 Кади процырдэняя дуй бэрша, и всавэрэ иудея тай грекуря, савэ джювдэ дэ Цыкни Азия, шундэ Раехкоро Лав.

11 Дэвл терэлас Павлохкэрэ вастэнца фартэ барэ дывуря.

12 Насвалэ лэнаслэ хоснэндэ тай күщикэндэ, савэн майнанглал лэласлэ Павло, тай высастэёс всавэрэ дукхэндэр, тай мижэ фануря выджаас лэндар.

13 Койсавэ иудеенгэрэ джянимаря, савэ пхирэнас пав дромэн, кала вытградэнас мижо фано манушэндар, прыакхарэнас Лав Рае Иисусохкоро. Вонэ пхэнэнас:

— Прыхэнав тумэнди вах Иисусо, пала Савэ розхэнэл Павло.

14 Када терэнас и эфта Скевахкэрэ чявш. А Скева сля иудеенгоро англuno рашай.

15 Нэ мижо фано пхэндэ лэнди:

— Джянов Иисусо, тай Павло джянов. А ко тумэ кацавэ?

16 Тай мануш, дэ саво сля мижо фано, чутапэ пэ лэн кацавя зорага, со домарда лэн всавэрэн и вонэ вынашле цэрэстар нангэ тай зранглэ.

17 Кала пала када уджянгле иудея тай грекуря, савэ джювдэ дэ Эфесо, лэн всавэрэн обхутилда дар, тай вонэ ачиле тэ отлиджяя Рае Иисусохкэрэ Лавэстэ баря пативаага.

18 Бут савэ лэндар патине, авэнас тай оттердо прыджянааслэ дэ пэхкэрэнрындонэн.

19 Бут мануша, савэ майнанглал залэнас врэжага, анэнас пэхкэрэ джянимахкэрэ лила и англал всавэрэн спхабарэнас лэн. Кала биндэ, сави цимин сля всавэрэ спхабардэ лилэндэ, тунчи выджиля пандэша пхангля руль.

20 Кади Дэвлэхкоро лав розджяласлэ тай лэлас зор.

Мануша дэ Эфесо подлэн ваздимо

21 Пала кадэлэ всавэрэ Павло прылияа дэ гындо тэ заджя пав Македония тай Ахаяя, ай тунчи тэ ладэ дэ Ерусалимо.

— Сар мэ авава дэ Ерусалимо, манди трэбуни тэ попэрэв и дэ Римо, — пхэндэ вов.

22 Вов бичалда дэ Македония дон пэхкэрэн амалэн, Тимофеэ тай Эрасто, а еджино пэ койсави вряма ачиляяя дэ Цыкни Азия.

23 Тунчи сля баро ваздимо важ Раехкорэ Дромэ.

24 Мануш, савэ акхарэнас Димитрии и саво залэласлэ рупунэрындонэнца, терэлас рупластар храмуря, кацавэ, сар храмо, тэв тэлёнэас дэвляти пав лавэ Артемида. И кадэлэга вов дэлас тэ затэрэ и авэр пэхкэрэ амалэнди.

25 Вов акхарда лэн и аврэн кацавэн бутярнэн дэ кадэварындонэнца:

— Тумэ джянян, со кадыя бути дэл амэнди лачэ затиримо.

26 Нэ тумэ дыкхэн и шунэн, со кадэва Павло пэрэцэрдэнэя пэ пэхкири риг тай слиджялда годятар бутэн манушэн, савэ джювэн на кацик дэ Эфесо, нэ пав всавири Цыкни Азия. Вов пхэнэл, со дэвэла, савэ стердэ вастэнца, — на дэвэла.

27 Када лиджял колэстэ, со на кацик амари бути на авэла дэ патива, нэ и храмо, төв тэлён баря дэвлти Артемидати, нисо на ачела. Тай еджини дэвли, савиати тэлён всавири Цыкни Азия и всавири люмля, хацарэла пэхкири патив.

28 Кала вонэ ушундэ када, тунчи мижыле тай ачиле тэ типисяве:

— Бары исин Артемида Эфесохири!

29 Тунчи всаворо форо подваздэняпэ. Мануша схутилдэ кодэлэн, ко авиля Павлога (када сле македонянуря Гай тай Аристархо), и всавэрэ, сар екх, прастэнэ дэ театро.

30 Павло камля тэ выдяжя манушэндэ, нэ сиклярнэ на дэне лэсти.

31 И койсавэ Азиякэрэ пхурэдэра, амала Павлохкэрэ, пэрэдэнэ лэсти, соб тэ на авэл дэ театро.

32 Мануша, савэ стидэнепэ, выдяянаас годятар, колэсти со екх лэндар типисявэнаас пала екхэ, ай авэр — пала аврэ. Бут манушэн на полэнас, и сости вонэ порда авиле.

33 Лэнгэрэ стидэмастар выцырдэнэ пэ англал Александро — када тердэ иудеи. Александро сикавда манушэнди вастэга, соб вонэ тэ заачен мулком, и камля тэ отрисарэ пэстэр лэнгэрэ лава.

34 Нэ кала всавэрэ удяянгле, со вов исин иудеи, упалэ ачиле фартэ тэ типисяве:

— Бары исин Артемида Эфесохири!

И типисявэнаас паша дуй чясуря.

35 Тунчи екх форохкэрэ пхурэдэрэндар ачиля тэ улэ лэн тай пхэнда:

— Эфесиануря, чи на джянэл всавири люмля, со дэ форо Эфесо прыдыкхэн пала храмо, төв тэлён баря Артемидати тай свэнтонэ барэсти, саво тэлэдэнэ болыбнастар?

36 Калэсти нико на запхэнэла. Важ кода тумэнди трэбууни тэ улэпэ тай тэ на терэ бибахт.

37 Тумз андэ кордэ манушэн, нэ ни екх лэндар на обчёрда храмо тай на пхэнда бибахтало лав пэ амаря дэвля.

38 А сар исин Димитриестэ и аврэ бутярнэндэ пав кадэварындо, дэ со лэн тэ дошарэ, тунчи амэндэ исин сындуя тай проконсулы. Котэ пхэнэн, со исин тумэндэ екх пэ екхэ.

39 Кала исин тумэндэ, со тэ пхуче, мэх роздыкхэн када дэ упхэнимахкоро стидэмо.

40 Тэ на дошарэн амэн авдивэ, со терах ваздимо, и амэнди на авэла, со тэ пхэнах.

Кадэла лавэнца вов розмуял лэнгоро стидэмо.

20

Павло ладэл дэ Македония тай Греция

1 Кала ваздимо пэрэачиля, Павло акхарда сиклярнэн, подрицаарда лэн, тунчи розачиляпэ лэнца тай джиля дэ Македония.

2 Кала Павло проджялас авэр пхуя, вов бутэ лавэнца подрицаарэлас патякунэн. Тунчи вов авиля дэ Греция

3 тай просля котэ трин чёна. Кала вов стидэняпэ тэ ладэ пав пане дэ Сирия, иудея камле тэ умарэ лэ. Нэ вов удяянгля пала када тай прылия дэ гындо тэ типисявэ пав Македония.

4 Лэгэ сле Сопатро, Пиррохкоро чяво, Вериятар, фессалоникийцуя Аристархо тай Секундо, Гайи Дервиятар тай Тимофеи, Тихико тай Трофимо Цыкни Азиятар.

5 Вонэ джиле англал и дожүтэрэнас амэн дэ Троада.

6 Кала проджиля сырботори, саво акхарэлпэ Биквасно мандро, амэ сле дэ Филиппы. Тунчи лагле котарь пав пане. Проджиля панч дивэ тай амэ дыкхлепэ лэнца дэ Троада. Котэ амэ просле эфта дивэ.

Евтихий отджювдэл мулэндар

7 Дэ перво куркэхкоро диво амэ стидэнепэ ѹтханэ, соб тэ пхагэ мандро. Павло дэдумэлас лэнца. И кади сар вов камля пэ авэр диво тэ джя дэ дром, лэхкири дума зацирдэняяпэ ды епашрят.

8 Дэ упратули цэра, тев амэ стидэнепэ, пхабонас бут лампы.

9 Пэ фэлястра бэшля тэрно мануш пав лавэ Евтихий. Нэ сар Павло бут врьяма дэдумэлас, Евтихий засута тай тэлэдэнэ пэ пхув барэ вучимастар. Кала лэ подлиле, вов сля муло.

10 Павло зму克ляяпэ тэлэ, пэля упрант пэ тэрнэ мануш э облиял лэ.

— На пэрэджювэн! — пхэнда Павло. — Вов джювдо!

11 Тунчи подваздэняяпэ упрант, пхагля мандро и ачиля тэ ха. Вов дэдумэлас ды дэнзор, ай тунчи джилия дэ дром.

12 Тэрнэ ж манушэ отлидяялдэ цэрэ джювдэгэ, и всавэрэ фартэ лошавэнас кадэлэсти.

Дром Троадатар дэ Милето

13 Амэ бэшле пэ корабли тай лагле дэ Ассо, камле котарь тэ залэ Павло. Вов едкино кади прыхэнда, колэсти со камля тэ джя пээз.

14 Дэ Ассо вов дыкхляяпэ амэнца, амэ лиле лэ пэ корабли тай джиле дэ Митилина.

15 Кала амэ отджиле котарь, тунчи пэ авэр диво авиле дэ Хиосо. Проджиля инте ехк диво тай авиле дэ Самосо, инте ехкэ дивэсти — дэ Милето.

16 Павло прылила дэ гындо тэ обдяя Эфесо, соб тэ на пролиджя бут врьяма дэ Цыкни Азия, колэсти со камля сигэдэр тэ авэ дэ Ерусалимо пэ Пандэшахкоро диво.

Павло дэдумэл пхурэдэрэнца кхандирятар дэ Эфесо

17 Милетостар Павло бичалда дэ Эфесо. Вов мангля пхурэдэрэн кхандирятар тэ авэн лэстэ.

18 Кала вонэ авиле, вов пхэнда лэнди:

— Тумэ джянэн, сар мэ джювдом катэ тумэндэ всавири врьяма англунэ дивэстар, кала авилём дэ Азия.

19 Мэ на слём пхутярдо и ясвэнца теравас бути Раести и на дыкхавас ни пэ всавири грыжа, сави родэнас важ ман иудея.

20 Мэ на умукаvas нисо кодэлэстар, со б тэ авэл мишто важ тумэн, пхэнавас Лав тай сикляравас тумэн пэ гаса англа всавэрэн и пав цэрэн.

21 Мэ допхэнавас иудеенди тай греконэнди, со лэнди трэбуни тэ прыдяяна эпхкоро бэзимо англа Дэвлэ и тэ патя дэ амарэ Rae Исусо.

22 Еххатар лиджял ман Фано, тэ джяв дэ Ерусалимо, нэ на джянов, со котэ манца авэла.

23 Джянов кацик, со дэ кожно форо Свэнто Фано допхэнэл манди, со дожутярэн котэ баруно тай бари грыжа.

24 Нэ мэ на тховав цимин пэхкэрэ джювимости, кацик манди тэ проджя муро дром тай тэ стерэ бути, сави дэня Рай Исусо, тэ розпхэнэ Бахтало Лав пала мищимо Дэвлэхкоро.

25 И еххатар мэ джянов, со всавэрэ тумэ, кага мэ дыкхаваспэ тай розпхэнавас пала Тхагаримо, никала будэр ман на удыххэна.

26 Колэсти пхэнав тумэнди авдивэ: кала кось тумэндар мэ на авава вуджило дэ кодэлэ,

27 колэсти со мэ на гаравдом ни ехк лав пала всавири Дэвлэхкири воля.

28 Дыкхэн пала пэстэ и пала всавири кхандири, дэ савя Свэнто Фано тховда тумэн тэ чяравэн отара Дэвлэхкири, сави Вов тинда Пэсти Пэхкэрэ ратэгэ тай тэ дыкхэн пала ла.

29 Мэ джянав, со кала уджаява, тумэндэ авэна мижэ рува, савэнди на дор отара.

30 И машкар тумэн авэна мануша, савэ чячимо пэрэболдэна дэ хохавимо, соб тэ улиджа сиклярнэн пала пэ.

31 Колэсти на совзэн! Рапирэн, со мэ трин бэрша ясвэнца, диво тай рят на пэрэачаявас тэ дэ годи кожнонасти тумэндар.

32 Еххатар мэ отдав тумэн Дэвлэсти тай Лэхкэрэ мищимахкэрэ Лавэсти. И Дэвэл барярэла тумаро патявимо сиклярэла тумэн и дэла тумэнди котор машкар всавэрэн Лэхкэрэн свэнтонэн манушэн.

33 Мэ никастар на камлём тэ лэ ни рупь, ни совнак, ни ёда.

34 Тумэ еджинэ джянэн, со мэ пэхкэрэ вастэнца затеравас пэ котор мандро и пэсти и кодэлэнди, ко манца сля.

35 Дэ всавэрэ мэ сикававас, со кади и тумэнди трэбуни тэ терэ бути и тэ дэ зор бизоракэрэ манушэнди тай тэ рапирэ Раехкоро Исусохкоро Лав: «Бахтало мануш, саво прылэл, нэ бахталдэр кодэва мануш, саво дэл».

36 Кала Павло пхэнда када, вов тэлия всавэрэнца пэ чянга тай помангляпэ.

37 Всавэрэ ровэнас, облэнас Павло тай чюминдэнас лэ.

38 Лэнди сля бибахт лэхкэрэ лавэндар, со на дыкхэна лэ будэр. Тунчи вонэ пролиджялдэ Павло пэ корабли.

21

Павло ладэл дэ Ерусалимо

1 Кала амэ розачилепэ лэнца, тунчи выджиле дэ море. И лагле ворта пэ острово Косо. Пэ авэр диво амэ авиле дэ Родосо тай котарь лагле дэ Потара.

2 Котэ амэ аракхле корабли, саво ладэлас дэ Финикия, бэшле пэ лэстэ и лагле дурэдэр.

3 Амэ облагле Кипро, ачявшэ лэ зэрвонэ ригатар тай лагле дэ Сирия. Амэ прыачиле берегостэ дэ Тиро, колэсти со котэ амарэ кораблести трэбуни сля тэ ачявшэ савэсь бужэ.

4 Дэ Тиро амэ аракхле сиклярнэн и просле котэ эфта дивэ. Вонэ дэдумане Павлости Фаностар, соб вов тэ на джял дэ Ерусалимо.

5 Нэ кала авила время, амэ лагле дурэдэр. Всавэрэ сиклярнэ, лэнгэрэ ромня тай чавэрэ вылиджялдэ амэн форостар. Тай пэ берего амэ чутэ чянга и манглэпэ.

6 Тунчи амэ розджилепэ лэнца тай бэшле пэ корабли, а вонэ рисиле цэрэ.

7 Амэ дурэдэр лагле пав пане тай Тиростар авиле дэ Птолемаида. Котэ амэ наисардэпэ пхэралэнца и просле лэнца ехж диво.

8 Пэ авэр диво амэ упалэ лагле дэ дром, авиле дэ Кесария тай заджиле дэ цэр Филиппостэ. Вов пхэнэлас Бахтало Лав и сля еххэгэ эфта манушэндар.

9 Лэстэ сля штар чея. Вонэ сле напаларом тай сле англунаръки.

10 Амэ просле котэ бут дивэ. Тунчи Иудеятар авила англунари пав лавэ Агаво.

11 Вов поджиля амэндэ, лиля Павлохкоро кущик, пхангля пэстии васта и пурэ, тай пхэнда:

— Свэнто Фано пхэнэл: «Кади иудея дэ Ерусалимо спхандэна и отдэна дэ вастэн наиудеенди кодэлэ, каихкоро исин кадэва кущик».

12 Кала амэ ушундэ када, тунчи и амэ, и катутнэ мануша ачиле тэ мангэ Павло тэ на джял дэ Ерусалимо.

13 Нэ Павло пхэнда пэ кода:

— Пэ со тумэ ровэн и розчинэн муро ѹло? Мэ лошало на кацик тэ авав спхангло, нэ и тэ мэрав дэ Ерусалимо пала Лав Рае Исусохкоро.

14 Кала амэ полиле, со нисо лэсти на допхэнага, заачиле мулком тай пхэндэ:
— Мэк стерэлэпэ воля Раехкири.

15 Тунчи амэ стицэнепэ тай лагле дэ Ерусалимо.

16 Амэнца джиле койсавэ сиклярнэ Кесариятар. Вонэ андэ амэн дэ цэр, төв джювда кипреянино Мнасоно, саво думут сля сиклярнэга. Лэстэ амэ и ачилепэ.

Иаково подпхэнэл Павлости

17 Кала амэ авиле дэ Ерусалимо, пхрала прылиле амэн лошага.

18 Пэ авэр диво Павло ютханэ амэнца джиля Иаковостэ. Котэ сле всавэрэ пхурэдэра.

19 Павло наисардапэ лэнца и розпхэнда вса пала кода, со терда Дэвэл машкар наиудеен лэхкэрэ вастэнца.

20 Вонэ шундэ лэ тай лашардэ Дэвлэ. Тунчи пхэндэ Павлости:

— Пхрал, тү дыкхэх скацик пхангля иудеен патине? Тай всавэрэ вонэ фартэ прырицарэнтэ Упхэнимастэ.

21 И пала тут вонэ шундэ, со ту сиклярэх иудеен, савэ машкар наиудеенэ джювэн, тэ отджаян Моисеихэрэ Упхэнимастар. И со ту пхэнэх, тэ на обчинэн вонэ пэхкэрэн чяворэн тай тэ на джювэн кади, сар амэндэ прылито.

22 Со ж тэ терэ? Вонэ шунэна пала кода, со ту авилян.

23 Колэсти тер кода, со амэ пхэнага. Машкар амэн исин штар мануша, савэ дэне колах.

24 Лэ кадэлэн, жужарпэ лэнца и потин пала кода, соб лэнди тэ обчинэн бала пэ шэрэ. Тунчи всавэрэ полэнэ, со пала тут пхэнэн начячимо и со ту джювэх пав Упхэнима.

25 А наиудеенди, савэ патине, амэ искриисардэ кади: лэнди нащи тэ ха кода, со андэ дэ жэртва дэвлорэнди, тай мас затасавдэ хулаимастар, тэ пэ рат и тэ терэ биладжявимо ёрестар.

26 Пэ авэр диво Павло лиля пэгэ кадэлэн манушэн, соб тэ жужарпэ лэнца. Тунчи вов заджиля дэ храмо тай пхэнда, дэ сави връяма вонэ пэрэачена тэ жужарпэ, и кала пала кожнонэ лэндар анэнэ жэртва.

Павлохкоро пхангли

27 Кала проджянас эфта дивэ, койсавэ иудея Цыкня Азиятар удыкхле Павло дэ храмо, подваздэне гроза манушэн тай схутилдэ лэ.

28 Тай типисявшас:

— Израильтняур! Дэн амэнди зор! Кадэва мануш пав всавири люмля сиклярэл всавэрэн, соб вонэ тэ на прылэн амаро народо, амаро Упхэнимо и амаро храмо. Ехкатар вов анда дэ храмо греконэн, сога магрисарда кадэва свэнто тхан.

29 Ды колэ вонэ дыкхле дэ форо Павло тай эфесянино Трофимо и думисардэ, со Павло анда лэ дэ храмо.

30 Тунчи всаворо форо подваздэняпэ и спрастэнепэ мануша. Павло схутилдэ тай выцьирдэне храмостар, и храмохкэрэ будара ехкатар затердэ.

31 Вонэ камле тэ умарэ Павло, нэ дума пала кода, со всаворо Ерусалимо подваздэняпэ, доджиля пханглякэрэ пхурэдэрэстэ дэ римско халавдэнгоро стидэмо.

32 Вов лиля халавдэн тай шэллякэрэ пхурэдэрэн и чутапэ манушэндэ. Кала иудея дыкхле пханглякэрэ пхурэдэрэ и халавдэн, вонэ пэрэачиле тэ марэ Павло.

33 Пхурэдэр поджиля, прыпхэнда тэ схутилэ Павло тай тэ спхандэ лэ донца ланчугонэнца. Вов пхучля манушэндэ, ко исин кадэва мануш и со вов терда.

34 Нэ мануша типисявшас кожно пэхкоро, и пхурэдэр нисо на полэлас. Важ кода прыпхэнда тэ отлиджа Павло дэ халавдэнгоро цэр.

35 Кала вонэ подлэннаспэ пав лестница, мануша ачиле тэ стасавэ лэн кади, со халавдэ лиджялдэ Павло пэ вастэн.

36 Гроза манушэн джялас пала лэн тай типисявлас:
— Мэк вов мэрэл!

Павло пхэнэл лав манушэнди

37 Паша халавдэнгоро цэр Павло пхэнда пханглякэрэ пхурэдэрэсти:

- Ту дэгэ манди тэ пхэнэ тути лав?
- Ту джянэх греческо чиб? — пхучля пхурэдэр.

38 Выджаял — ту на кодэва египтиянино, саво надумут подваздэня манушэн тай улиджаалда пала пэ дэ шуки пхув штар пханглья прахарен?

39 Павло пхэнда:

— Мэ иудеи Тарсостар, саво дэ Киликия, мануш барэ форостар. Мангав тут, дэ манди тэ дэдумэ манушэндэ.

40 Пхурэдэр домуклия кода. Тунчи Павло вишия пэ лестница и сикавда вастэгэ, соб вонэ тэ ачен мулком. Кала вонэ пэрэачиле тэ типисявлэ, Павло дэдуманя пав еврейско чиб.

22

1 — Пхралалэ тай дада! Дэн манди тэ пхэнэ, со мэ надошало.

2 Кала вонэ ушундэ, со вов дэдумэл пав еврейско чиб, тунчи заачиле мулком. Тай вов пхэнда:

3 — Мэ иудеи, саво бэньяпэ дэ Тарсо дэ Киликия, выбарярдо дэ кадэва форо паша пурэн Гамалиилостэ и сиклярдо пав чичима Упхенимасти амарэ дадэнгоро. Мэ отданём еджино пэ Дэвлэхкэрэрынности, сар и кожно тумэндар авдивэ.

4 Мэ традавас ды мэрима кодэлэн, ко джянас Исусохкэрэ Дромэга, пхандавас муршэн тай джювлэн и чувавас лэн дэ барунэ.

5 Допхенимаря кадэлэсти — англнуо рашай тай всавэрэ пхурэдэра. Мэ лилём лэндэр лила пхралэндэ дэ Дамаско тай лаглём пордэ, соб тэ пхандэ кодэлэн, ко котэ сля, тай тэ анэ лэн дэ Ерусалимо и тэ мулярэ.

6 Пав дром, кала мэ слём пашэ Дамаско, дэ епашибиво, болыбнастар паша ман запхабиляпэ душлимо, пэ саво наци сля тэ дыххэ.

7 Мэ тэлэдэнём пэ пхув тай ушундом ғласо, саво дэдумэлас манди: «Савло, Савло! Сости ту традэх Ман?»

8 Мэ пхучлём: «Ко Ту, Раे?» Вов пхэнда: «Мэ Исусо Назаретостар, Савэ ту традэх.»

9 Кодэла, ко сле манца, дыххле душлимо, нэ ғласо, саво манца дэдуманя, вонэ на шундэ.

10 Мэ пхучлём: «Рае, со манди тэ терэ?» Рай пхэнда: «Виши тай джя дэ Дамаско. Котэ тути пхэнэнэ вса, со тути трэбүни тэ терэ.»

11 Кодэла, ко сле манца, пала васт андэ ман дэ Дамаско, колэсти со мэ корылём душлимахкэрэ пхабаримастар.

12 Котэ мандэ авиля мануш пав лавэ Анания, саво джювда пав Упхенима и сля дэ патива всавэрэ катутнэ иудеендэ.

13 Вов поджиля мандэ, ачиля пашэ тай пхэнда: «Пхрал Савло! Мэк оттерэнлэ тирэ яхса!» Дэ кодяя врязма мэ ачилём тэ дыххэ и удыххлём кадэлэ манушэ.

14 Вов пхэнда: «Дэвэл амарэ дадэнгоро вытидэня тут, соб ту тэ уджянэх Лэхкири воля, тэ удыххэх Чячюонэ и тэ шунэх лава Лэхкэрэ уштэндэр.

15 Ту авэга важ всавэрэн манушэн допхенимари пала кода, со дыххлян и шундан.

16 Со ту цырдэх врязма? Виши, прыакхар Лэхкоро Лав, болдэпэ и схалав пэхкоро бэзимо.

17 Тунчи мэ рисилём дэ Ерусалимо. И кала мэ манглёмпэ дэ храмо, манди сля дыххлимо.

18 Мэ удыкхлём Рае, Саво пхэнда манди: «Сиго выджя Ерусалимостар, колэсти со катэ на прылэнна тиро допхэнимо пала Ман».

19 Мэ пхэндом: «Рае! Кадэла мануша джянэн, со мэ чувавас дэ барунэ и маравас дэ синагоги кодэлэн, ко патян дэ Тут.

20 Кала чюлия рат Стефаностар, саво сля Тиро допхэнимири, мэ ачявас котэ и подавас гласо пала кодэлэн, ко умарэнас лэ, и дыкхлём пала лэнгири ѹда».

21 Тунчи Рай пхэнда манди: «Джя! Мэ бичалав тут народонэндэ, савэ джювэн дурал».

Павло дэдумэл пханглякэрэ пхурэдэрэгэ

22 Ды кадэлэн лавэн мануша шунэнас Павло, нэ катэ ачиле тэ типисявл:

— Мэк вов мэрэл! Лэсти наци тэ джювэ!

23 Вонэ типисиле тай розчинэнас пэхкири ѹда и чувэнас прахо пхуюжко упран.

24 Тунчи пхангляжко пхурэдэр прыпхэнда тэ улиджя Павло дэ халавдэнгоро цэр. Вов прыпхэнда тэ марэ лэ чукненца тай тэ допхуче, соб тэ уджянэ, сости мануша кади мижон пэ лэстэ.

25 Нэ кала Павло прыпхангле, соб тэ марэ, вов пхэнда шэлякэрэ пхурэдэрэсти, саво ачелас пашэ:

— Чи мишто авэла тэ марэ римсконэ манушэ, ай тэ на пролиджя пав лэ сындо?

26 Кала шэляжко пхурэдэр шунда када, вов джиля тай пхэнда пханглякэрэ пхурэдэрэсти:

— Со ту терэх? Када римско мануш!

27 Пхангляжко пхурэдэр выджиля Павлостэ тай пхучля:

— Ту римско мануш?

— Нэ, — пхэнда кодэва.

28 Тунчи пхурэдэр пхэнда:

— Мэ потиндом бут ловэ пала кода, соб тэ аче римсконэ манушэгэ.

— Ай мэ бэнимастар римско мануш, — пхэнда Павло.

29 Кодэла, савэ камле тэ допхуче лэ, екхатар отджиле лэстар. Кала пхурэдэр уджянгя, со пхангля ланчукога римсконэ манушэ, вов фартэ пэрэдаравдапэ.

Павло англа Синедрионо

30 Пэ авэр диво пхурэдэр закамля тэ уджянэ ды лавэ, дэ со иудея дошарэн Павло. Тунчи розпхангя лэ и прыпхэнда, соб тэ стидэнпэ англунэ рашая и всаворо Синедрионо. Тунчи анда Павло и тховда англа лэн.

23

1 Павло вхаляпэ якхэнца пэ кодэлэн, ко сля дэ Синедрионо, тай пхэнда:

— Пхралалэ! Ды авдивутно диво мэ всавэрэ ѥлэгэ тераавас бути Дэвлэсти.

2 Катэ англuno рашай Анания прыпхэнда кодэлэнди, ко ачелас пашэ, тэ марэ Павло пав уштэн.

3 Тунчи Павло пхэнда:

— Дэвэл тут марэла, мануш домуенгоро! Ту бэшэх катэ, соб тэ сундисарэ ман пав Упхэнима. А еджино пэрэхуках Упхэнимо, кала прыпхэнэх ман тэ марэ!

4 Кодэла, савэ аченас паша Павло, пхэнда лэсти:

— Сости ту кошэх англунэ рашае?

5 Павло пхэнда:

— Пхралалэ, мэ на джяновас, со вов англuno рашай. Колэсти со искриисардо: «На дэдумэ бибаих пала пхурэдэр тирэ народостар».

6 Павло джянгя, со дэ Синедрионо екх лэндар сле саддукея, ай авэр — фарисея. Колэсти вов зоралз гласога пхэнда:

— Пхралалэ, мэ фарисеи, чяво фарисеехкоро. Ман сундисарэн пала кода, со мандэ исин надия пэ отджюндивимо мулэндар.

7 Кала вов када пхэнда, машкар фарисея тай саддукея ваздэняпэ баро гвалто, тай всавэрэ розджилеп дэ дума.

8 Саддукея пхэнэн, со нэнай ни отджюндивимо, ни ангелонэн, ни фано, нэ фарисея пятян, со када вса исин.

9 Ваздэняпэ баро типимо, койсавэ сиклимаря пав Упхэнима фарисеендар вшилэй тай пхэндэ:

— Амэ на аракаха дэ кадэлэ манушэ нисави дош. Со, кала лэсти дэдумэлас фано чи ангело?

10 Гвалто фартэ розпхабиляпэ, и пханглякоро пхурэдэр пэрэдаравдапэ, со Павло розчинэна поепаш. Вов прыпхэнда халавдэнди тэ залэ лэ котарь зорага тай тэ отлиджя дэ халавдэнгоро цэр.

11 Па авэр ряят англа Павло ачиля Рай тай пхэнда:

— На дара! Сар ту допхэнэгас пала Ман дэ Ерусалимо, кади авэга тэ допхэнэ дэ Римо.

Иудея камэн тэ умарэ Павло

12 Дэнзор койсавэ иудея стидэнепэ тай лиле солах нисо тэ на хан и тэ на пэн ды колэ, сар умарэна Павло.

13 Кади здэдуманепэ пашэ саранда манушэн.

14 Вонэ джиле англунэ рашаендэ тай пхурэдэрэндэ и пхэндэ:

— Амэ солахане нисо тэ на ха и тэ на пэ ды колэ, сар умарага Павло.

15 Кана тумэ тай Синедрионо помантэн пханглякэрэ пхурэдэрэ тэ анэ лэ тумэндэ, соб пашэ тэ роздыкхэ кадэва рындо. Ай амэ стидаагапэ тай умарага лэ инте ды колэ, сар вов доджяла кадэлэ тханстэ.

16 Пала лэнгири дума уджянглия Павлохирия пхэняжко чяво. Вов джиля дэ халавдэнгоро цэр тай розпхэнда када Павлости.

17 Тунчи Павло акхарда екхэ шэлякэрэ пхурэдэрэндар и пхэнда лэсти:

— Отлиджян кадэлэ чявэ пханглякэрэ пхурэдэрэстэ, лэстэ исин койсо тэ пхэнэ.

18 Шэляжко пхурэдэр отлиджялда чявэ пханглякэрэ пхурэдэрэстэ тай пхэнда:

— Павло, савэ амэ схутилдэ, акхарда ман тай поманглия тэ анэ тутэ кадэлэ чявэ.

Лэстэ исин койсо тути тэ пхэнэ.

19 Пхангляжко пхурэдэр лиля чявэ пала вастэ, отлиджялда дэ рига тай пхучля:

— Со ту камзх манди тэ розпхэнэ?

20 Чяво пхэнда:

— Иудея прылиле дэ гындо тэ мангэ тут, соб ту тэ анэх атася Павло дэ Синедрионо. Вонэ пхэнэн, со камэн будэр тэ уджянэ пала лэхжко рындо.

21 Нэ ту на патя кадэлэсти, колэсти со пэ дром чёрял дожутярэн лэ саранда манушэн. Вонэ солахане тэ на ха тай тэ на пэ ды колэ, сар умарэна Павло. Важ када лэндэ вса исин. Вонэ дожутярэн кацик лав тутар.

22 Пхангляжко пхурэдэр отмуклия чявэ тай прыпхэнда лэсти:

— Никасти на розпхэн пала кода, со ту пхэндан манди.

Павло отбичалэн дэ Кесария

23 Тунчи пхангляжко пхурэдэр акхарда дон шэлякэрэн пхурэдэрэн и прыпхэнда лэнди:

— Стидэн дуй шэла халавдэн, эфгадэша анклистарен тай дуй шэла аврэн халавдэн, соб вонэ тэ джян дэ Кесария, сар авэла еня чясо рятягэ.

24 Дэн Павлости грастэ тай дыхкэн, соб лэгэ тэ на авэл бибаихт. И отлиджян лэ барздэрэстэ Феликсостэ.

25 Тунчи вов искриисарда кацаво лил:

26 «Клавдии Лисии

Пативалэ барздэрэсти Феликсости:

Тэ авэх баахтало!

27 Кадэлэ манушэ схутилдэ иудея тай камле тэ умарэ. Нэ мэ поджилём халавдэнца и выхутилдом лэ лэнгэрэ вастэндар, сар уджянглём, со вов римско мануш.

28 Мэ закамлём тэ уджянэ, дэ со вонэ дошарэн лэ, тай андом лэ дэ лэнгоро Синедрионо.

29 Мэ полилём, со вонэ дошарэн лэ важ лэнгоро Упхэнимо. И со лэ ни пала со тэ мулярэ чи тэ чувэ дэ барунэ.

30 Мэ уджянглём, со лэ камэн чёрял тэ умарэ, и еххатар отбичалдом лэ тутэ. И прыпхэндом, соб лэ тэ дошарэн англа тут».

31 Халавдэ тердэ, сар вов прыпхэнда, лиле Павло тай лиджялдэ рятяга дэ Антипатрисо.

32 Пэ авэр диво анклистаря лагле Павлога дурэдэр, ай кодэла, ко джянас пэза, рисиле дэ Ерусалимо.

33 Кала анклистаря авиле дэ Кесария, вонэ отдэне барэдэрэсти лил тай пэрэдэне лэсти Павло.

34 Барэдэр продинда лил тай пхучля Павло, савя вов пхуятар. Кала вов уджянгля, со Павло Киликиятар,

35 тунчи пхэнда:

— Мэ вышунава тут, кала авэна кодэла, ко дошарэнас тут, — тай прыпхэнда, соб халавдэ тэ аракхэн тхан Павлости дэ райкано цэр, саво терда тхагари Иродо, тай тэ рицарэн лэ котэ.

24

Павло дошарэн

1 Проджила панч дивэ, и англuno рашай Анания койсавэ пхурэдэрэнца тай манушэга пав лавэ Тертулло, саво розлэласпэ дэ римско упхэнима, авила дэ Кесария, соб тэ дошарэ Павло англа барэдэрэ.

2 Кала Павло анда, Тертулло ачилия тэ дошарэ лэ.

3 — Пативало Феликсо! Наис тути пала пачя, сави ту дэх амэнди и пала кода, со тердан важ амарэн манушэн пэхкия баря годяга.

4 Соб бут тэ на зарицаах тут, мэ мангав тэ дэх амэнди набут врэма и тэ вышунэх амэн пав тирэ мищима.

5 Амэ бинах кадэлэ мануш бидага дэ амари пачя. Вов подваздэл иудеен пав всавири люмля тай исин пхурэдэр дэ назарийнгоро стидэмэ.

6-7 Вов камля тэ магрисарэ храмо, нэ амэ схутилдэ лэ.*

8 Кала ту допхучега лэ, ту еджино уджянэга пала вса, дэ со амэ лэ дошарах.

9 Иудея ж подрицаардэ лэ тай пхэндэ, со лэхкэрэ лава исин чячимо.

Павло дэдумэл англа Феликсо

10 Барэдэр сикавда Павлости, соб вов тэ пхэнэл. И Павло пхэнда:

— Мэ джянов, со ту бут бэрша сундисарэх амаро народо. Колэсти лошало тэ пхэнэ лав англа тут, соб тэ сикавэ пэхкоро чячимо.

11 Тути напхаро авэла тэ уджянэ, со пашэ дэшудуй дивэ павпалэ мэ авилём тэ тэлэ дэ Ерусалимо.

12 Кодэла, савэ дошарэн ман, на дыкхле, соб мэ хаваспэ кагась дэ храмо чи подваздавас манушэн дэ синагоги чи дэ форо.

13 Лэндэ на выджаля тэ допхэнэ кода, пала со вонэ дошарэн ман.

* **24:6-7** Дэ койсавэ пурэн греческа манускрипты исин инте кацавэ лава: «И камле тэ сундисарэ пав амарэ Упхэнима. Нэ пхангляко пхурэдэр Лисии зорага залия лэ амэндар и прыпхэнда кодэлэнди, ко дошарэн лэ, тэ джян тутэ».

14 Мэ прыджяна, со джяв чячюнэ Дромэгэ, саво вонэ акхарэн хохавимага. Мэ тэлував Дэвлэсти амарэ дадэнгоро и патяв всавэрэсти, со искриисардо дэ Улхэнима тай дэ Англунарен.

15 Мандэ кади ж исин надия пэ Дэвлэ, сар и кадэлэ манушэндэ. Надия пэ кода, со отджювдёна мулэндар сар патякунэ, кади ж напатякунэ.

16 Колэсти прытховав всавири зор, соб муро ѹло всавири время тэ авэл жужо англа Дэвлэ и англа манушэн.

17 Набут бэршэн мэ на слём дэ Ерусалимо, ай тунчи авилём пордэ, соб тэ пэрэдэ мурэ народости даро важ чёрорэн и тэ анэ жэртвы.

18 Вонэ аракхле ман дэ храмо, кала мэ жужараваспэ. Нэ котэ на сля нисави гроза манушэн тай нисаво гвалто.

19 Тунчи авиле койсавэ иудея Цыкни Азиятар. Акэ лэнди трэбуни сля тэ авэ катэ, соб тэ дошарэ ман, кала лэндэ сось исин пэ ман.

20 Чи мэк кодэла, ко исин катэ, пхэнэна, сави дош вонэ аракхле дэ ман, кала ман допхучелас Синедрионо.

21 Чи мэ дошало дэ кодэлэ, со типисилём: «Ман сундисарэн пала кода, со мэ патяв дэ отджюндивимо мулэндар»?

22 Феликсо, саво мишто джянэлас пала Дром, оттховда кадэварындо.

— Мэ пхэнава лав пав тумарорындо, кала авэла пханглякоро пхурэдэр Лисии, — дэдумана вов.

23 Бов прыхэнда шэлякэрэ пхурэдэрэсти, соб халавдэ тэ дыкхэн пала Павло, нэ и тэ дэн лэсти набут воля и тэ на запхэнэн лэхкэрэ амалэнди тэ лашарэ лэхкэрэрындууря.

24 Проджиля набут дивэ, тай Феликсо авиля пэхкиря ромняга, сави сля иудеянка пав лавэ Друзилла, и бичалда пала Павло, соб тэ пошунэ пала лэхкоро патявимо дэ Иисусо Христо.

25 Кала Павло ачиля тэ дэдумэ пала джювимо пав чячима, пала кода, со трэбуни мишто тэ дыкхэ пала пэ и пала сындо, саво авэла, Феликсо пэрэдаравдап тай пхэнда:

— Хутилэла пэ авдивэ, джя! Сар трэбуни авэла, мэ тут акхараава.

26 Лэстэ кади ж сля надия, со Павло дэла лэсти ловэ. Колэсти бут вов молы прыхэнэлас тэ анэ Павло тай дэдумэлас лэга.

27 Проджиля дуй бэрша, тай пэ Феликсожкоро тхан ачиля Порции Фесто. Нэ Феликсо ачявида Павло дэ барунэ, соб тэ тера мишто иудеенди.

25

Павло мангэл императохкоро сындо

1 И кади, трин дивэнди Фесто авиля дэ кодяя пхув. Тунчи лиля дром Кесариятар дэ Ерусалимо,

2 тэв англунэ рашая тай иудеенгэрэ пхурэдэра сикавдэ дош пэ Павло.

3 Вонэ фартэ мангле Фесто, соб вов тэ тховэл пэ лэн патив тай тэ пэрэлиджял Павло дэ Ерусалимо. Еджинэ вонэ камле тэ стидэпэ тай тэ умарэ Павло пав дром.

4 Фесто пхэнда:

— Пала Павло дыкхэн халавдэ дэ Кесария. И мэ сиго котэ авава.

5 Мэк тумарэ пхурэдэра джяна манца и сикавэна дош пэ лэстэ, кала вов терда сось налачэ.

6 Фесто сля лэнца пашэ охто чи дэш дивэ, ай тунчи рисиля дэ Кесария. Пэ авэр диво вов бэшия пэ сундисарехкоро тхан тай прыхэнда тэ анэн Павло.

7 Кала Павло авиля, иудея, савэ авиле Ерусалимостар, ачиле тэ дошарэ лэ дэ бутэн пхарэнрындонэн, нэ тэ допхэнэ када лэндэ на выджалас.

8 Павло ж камля тэ сикавэ пэхкоро чячимо тай пхэнда:

— Мэ на пэрэхуклём иудеенгоро Упхэнимо, и нисо на тердом ни храмости, ни императости.

9 Фесто камля тэ дэ патив иудеенди, колэсти пхучля Павлостар:

— Камэх тэ джя дэ Ерусалимо, соб котэ тут тэ сундисарэн пры ман?

10 Павло пхэнда:

— Мэ ачяв англа сындо императохкоро, и лэгэ трэбуни тэ авав сундисардо. Мэ на тердом иудеенди нисо налачё, сар ту еджино джянэх.

11 Кала мэ прахари и затердом мэримо, мэк авэл кади. Нэ кала иудея дошарэн ман ивья, никастэ нэнай зор тэ выдэ ман лэнди. Мэк ман сундисарэл императоро!

12 Фесто дэдуманя пхэхэрэ стидэмага тай пхэнда:

— Кала мангэх сындо императохкоро, джягэ императостэ.

Павло англа тхагари Агринна

13 Проджиля набут дивэ, тай дэ Кесария тэ ваздэ патив Фестости авиле тхагари Агринна тай лэхкири ромни Берника.

14 Вонэ сле котэ койсавэ дивэ, тай Фесто дэдумэлас тхагарега пала Павлохкоро рындо.

— Катэ исин екх мануш, савэ Феликсо ачявда дэ барунэ.

15 Кала мэ слём дэ Ерусалимо, иудеенгэрэ рашая тай пхурэдэра сикавдэ пэ лэстэ дош. Вонэ мангле тэ сундисарэ лэ.

16 Мэ пхэндом лэнди, со римсконё манушэндэ на прылито тэ отдэ манушэ дэ вастэн кодэлэнди, ко лэ дошарэн, кала вов майанглал на дыхэлэлэ лэнца тай на допхэнэла, со вов надошало.

17 Вонэ авиле манца кордэ, и мэ пэ авэр диво бэшлём пэ сундисарехкоро тхан тай прыпхэндом тэ анэн кордэ кадэлэ манушэ.

18 Вонэ ачиле паша лэ, нэ нисо на тердэ, соб тэ долиджя лэхкири дош хоть дэ екх налачёрындо, пала саво мэ думисаравас.

19 Нэ машкар лэн сля гвалто пала кода, сар трэбуни тэ тэлё Дэвлэсти, тай пала Иссусо, Саво муля, нэ пала Савэ Павло пхэнда, со Вов джювдо.

20 Мэ на джянглём, сар манди тэ роздыкхэ кадэва рындо. Тай пхучлём Павлостар, чи камэл вов тэ джя дэ Ерусалимо тай тэ прылэ котэ синдо.

21 Павло закамля, соб лэхкоро рындо тэ роздыкхэл императоро. И мэ прыпхэндом тэ рицэрэ лэ дэ барунэ ды колэ, сар отбичалава лэ императостэ.

22 Агринна пхэнда Фестости:

— И мэ камав тэ пошунэ кадэлэ манушэ.

— Атася шунэгэ, — пхэнда Фесто.

23 Пэ авэр диво Агринна тай Берника барэ пхутимага заджиле дэ цэра синдохкири. Лэнца сле пханглякэрэ пхурэдэра тай пативалэ мануша кодэлэ форостар. Фесто прыпхэнда, соб тэ анэн Павло.

24 Тунчи Фесто пхэнда:

— Тхагари Агринна и всавэрэ, ко катэ исин! Тумэ дыхээн манушэ, пала савэ гроза иудеен анзнаас дош манди дэ Ерусалимо тай катэ дэ Кесария и типисиле, со лэстэ наци тэ джювэ.

25 Мэ ж на аракхав дэ лэ нисави дош, пала сави лэ трэбуни тэ умарэ. Нэ сар вов мангли императохкоро синдо, мэ тховдом дэ гындо тэ отбичалэ лэ дэ Римо.

26 Нэ мандэ нэнай нисо пэ кадэлэ манушэ, соб тэ искриисарав раести. Колэсти мэ вылиджялдом лэ тумэндэ, и англал всавэрэстар тутэ, тхагари Агринна, соб ту тэ допхучех лэ тай мэ тэ джянов, со манди тэ искриисарэ.

27 Мэ думисарав, со на пав чячима тэ бичалэ барунаре и тэ на пхэнэ, дэ со исин лэхкири дош.

26

Павло допхэнэл пэхкоро чячимо

1 Агриппа пхэнда Павлости:

— Мишто, дэдумэ пала пэ.

Павло подлияла васт и ачиля тэ дэдумэ:

2 — Тхагари Агриппа! Мэ бахтало тэ допхэнэ англа тут пэхкоро чячимо, кала ман дошарэн иудея.

3 Ту ж мишто джянэх, со прылito иудеендэ тай кода, пала со вонэ ханпэ екх еххэга. Колэсти фартэ мангав тут, соб ту тэ на холявэх, нэ тэ шунэх ман.

4 Иудея мишто джянэн, сар мэ джювдом машкар мурэн манушэн дэ Ерусалимо тэрэн бэршэндар.

5 Вон э дэмут джянэн ман. И кала закамэна, допхэнэна, со мэ джювдом сар фарисеи тай слём стидэмстар, тев всавири зор прытховэнас, соб тэ терэ пав Упхэнима.

6 Авдивз мэ ачяв англа сындо пала надия пэ Дэвлэхкоро Лав, саво Дэвэл дэня амарэ дадэнди.

7 Дэшудуй чянга амарэ народостар диво тай рят терэн бути Дэвлэсти тай дожүтэрэн, кала заджяла дэ зор кадэва Лав. Пала кадыя надия, тхагари, ман дошарэн иудея.

8 Сости тумэ на патян, со Дэвэл отджувдярэл мулэн?

9 Мэ кади ж на прылавас Лав Исусохкоро Назаретостар тай мараваспэ кадэлэ сикляримага.

10 Када мэ теравас дэ Ерусалимо, кала манди дэне лачимо англунэ рашая. Мэ бичалавас дэ барунэ бутэн свэнтонэн и, кала лэн умарэнас, подавас пала кода пэхкоро гласо.

11 Мэ бут маравас лэн дэ всавэрэ синагоги, соб вонэ тэ отпхэнэнпэ пэхкэрэ патявимастар. И кади мижылём пэ лэн, со традавас лэн и дэ авэр форуря.

12 Еххвар мэ ладавас дэ Дамаско пав кадэва рындо зорага тай прыпхэнимага англунэ рашаендар.

13 Тай пав дром пордэ, тхагари, мэ удыкхлём дэ епашидиво душлимо болыбнастар, саво пхаболас зоралэдэр кхамэстар. И дэ кодэва душлимо попэлём и мэ, и кодэла мануша, савэ сле манца.

14 Амэ всавэрэ тэлэдэнэ пэ пхув, тай мэ ушундом гласо, саво дэдумэлас манди пав еврейско чиб: «Савло, Савло, сости ту традэх Ман? Пхаро тути пэ Ман тэ выджа».

15 Мэ пхучлём: «Ко Ту, Раे?» — «Мэ Исусо, Савэ ту традэх, — пхэнда Рай. —

16 Ваздэпэ, вщи пэ пурэн тирэн. Мэ авилём, соб тэ терэ тут Мурэ бутярнэга и допхэнимарэгэ пала кода, со ту дыкхлян и со Мэ терава англа тирэ якха.

17 Мэ фирисарава тути тирэ манушэндар тай наиудеендар, савэндэ Мэ тут бичалав,

18 соб тэ оттерэ лэнди якха и тэ рисарэ лэн калимстар душлимастэ, и сатанастар тай лэхкия зоратар тэ рисарэ лэн Дэвлэстэ. Соб лэнгоро бэзимо тэ авэл отмуцло и соб вонэ кади ж тэ авэн машкар кодэлэн, ка Мэ свэнтисадром патявимага дэ Ман».

19 Тхагари Агриппа, манди нащи сля тэ на кандэ болыбнахкэрэ дыкхлима.

20 Мэ пхэнавас лав майанглал кодэлэнди, ко сля дэ Дамаско, тунчи дэ Ерусалимо тай пав всавири Иудея. Ай тунчи наиудеенди, тэ ачявэн вонэ бэзимо тай тэ обрисявшэн Дэвлэстэ, тэ допхэнэн пэхкэрэ рындонэнца, со чячимага ачявдэ бэзимо.

21 Пала када иудея схутилдэ ман дэ храмо и камле тэ умарэ.

22 Нэ Дэвэл ды авдивэ дэл зор манди. Тай акэ, мэ ачявш катэ тай допхэнав цыкнэнди и барэнди. Мэ на прытховав нисо кодэлэстэ, со пхэндэ Моисеи тай аянлунария.

23 Нэ пхэнав, со Христости сля трэбуни тэ пэрэлиджя кадья грыжка, пэрвонэсти тэ отджювдё мулэндар и тэ пхэнэ пала душлимо и амарэ манушэнди, и науидаа.

24 Кала вов кади допхэнэлас пала пэ, Фесто обчинда лэхкоро лав.

— Ту на дэ пэхкия годя, Павло, — затиписиля вов, — баро юрвалимо терэл тут динилэг!

25 Павло пхэндэ:

— Пативало Фесто, мэ на динило. И кода, со мэ пхэнав, исин чячимо тай годявэримо.

26 Тхагари, англа савэ мэ пхэнав бидаракоро, джянэл пала када. Нисо кадэлэстар на гаравдо важ лэ, колэсти со терэласпэ всавэрэндэ пэ якхэн.

27 Тхагари Агриппа, ту патях англунаренди? Мэ джяниав, со патях.

28 — Ту думисарэх пала кадья скурто врэма тэ терэ кади, соб мэ тэ авав христианино? — пхэндэ Агриппа.

29 Павло дэдуманя:

— Сави б кадья врэма тэ на авэл, скурто чи лунго, мэ мангавпэ Дэвлэсти, соб на кацки ту, нэ и всавэрз, ко шунэл ман авдивэ, тэ авэн кацаавэ, сар мэ, кици тэ на прылэн кадэла ланчугура.

30 Тхагари вишия тай лэгэ вишиле барэдэр, Берника тай кодэла, савэ бэшэнас лэнца.

31 Вонэ выджиле тай дэдумэнас екх екхэсти:

— Кадэва мануш на терда нисо, соб тэ умарэ лэ чи тэ чувэ дэ барунэ.

32 — Лэ б фэдэр тэ отмукэ пэ воля, нэ вов поманггия сындо императохкоро, — пхэндэ Агриппа Фестости.

27

Павло ладэл дэ Римо

1 Кала сля пхэндо, со амэ ладах дэ Италия, Павло и аврэн барунарен пэрэдэне шэлякэрэ пхурэдэрэсти пав лавэ Юлии, императохкэрэ халавдэнгэрэ стидэмастар.

2 Амэ бэшле пэ адрамитско корабли, савэсти трэбуни сля тэ заджя дэ портуяр пав Цыкни Азия, тай лагле. Амэнца сля македонянину Аристархо, саво бариля дэ Фессалоника.

3 Пэ авэр диво амэ авиле дэ Сидено. Юлии сикавда дорымо Павлостэ тай отмукля лэ, соб вов тэ спхиэрэл пэхкэрэ амалэндэ и соб вонэ тэ лашарэн лэхкэрэ рийндууря.

4 Тунчи амэ упалэ выджиле дэ море тай проджиле Кипро кодэла ригатар, тев на пхурдэлас балвал. А кала на кади, балвал бы пхурдэлас ворта пэ амэн.

5 Амэ пэрэлагле море паша пхувен дэ Киликия тай Памфилия и ачиле дэ форо Мира, саво дэ Ликия.

6 Котэ шэлякоро пхурэдэр аракхля корабли Александриятар, саво джялас дэ Италия, тай тховда амэн пэ лэстэ.

7 Бут дивэн амэ полокхэ ладагас англал. Сля фартэ пхаро тэ ладэ, нэ амэ авиле дэ Книдо. Важ кода со балвал на дэлас амэнди тэ ладэ, амэ подлагле Критостэ кодэла ригатар, тев на пхурдэлас балвал, пашэ Салмони.

8 Амэнди сля фартэ пхаро тэ ладэ паша берего, нэ амэ авиле дэ тхан, саво акхарэлз Лаче Пристани, надур форостар Ласея.

9 Амэ хасардэ бут врэма и нащи сля тэ ладэ пав пане дурэдэр, соб тэ на хасявш, колэсти со проджиля иудеенгоро посто. Тунчи Павло подпхэнда:

10 — Мэ дыкхав, со тэ ладэ дурэдэр авэла фартэ пхаро. И на кицик мищимо пэ корабли хасявлэла, нэ хасявага и амз.

11 Нэ шэллякоро пхурдэр на кандэня Павло, ай кандэня кодэлэ, ко лиджялас корабли тай кораблехжэру хулае.

12 Ай сар дэ кодэва форо нащи сля тэ пэрэмэр ёвэнд, бут манушэн прылиле дэ гындо, со трэбуни тэ ладэ якорь и тэ авэ дэ Финиксо, тхан пэ Крито, тев заджянас бут корабли, и саво сля оттердо пэ юго тай северо-западо, соб тэ ачепэ котэ.

Пэ море вазэлэлз бары балвал

13 Пхурдэнэ южно балвал тай бутярнэ кораблестар прылиле дэ гындо, со када лэнди трэбуни. Тунчи ваздэне якори тай лагле паша Критохжоро берего.

14 Проджила набут время тай пхурдэнэ бары северно-восточно балвал, сави акхарэллэ Эвракилоно.

15 Амэндэ на сля зора тэ ладэ дэ кодыя риг, тев пхурдэлас балвал, колэсти балвал порисарда корабли тай ачиля тэ традэ лэ. Тунчи амэ отдэнепэ кодэлэсти, со авэла, тай балвал традэнэ корабли пав пане.

16 Амэ подлагле островостэ, саво акхардапэ Кавда. Котэ амэндэ баря зорага выджаля тэ фирисаэр лодка.

17 Кала ла подлиле пэ корабли, бутярнэ зму克莱 доря кораблестар тай обхангле лэ. Вонэ дарзне тэ заджэ да Сирто, тев набут пани, колэсти обму克莱 парусо тай балвал дурдээр лиджялас амэн пав пане.

18 Бары балвал кади чувэлэс корабли дэ рига, со пэ авэр диво вонэ ачили тэ вычувэ бужэ кораблестар.

19 Пэ трито диво вонэ пэхкэрэ вастэнца вычутэ дэ пани и вса авэр, со ачиляпэ пэ корабли.

20 Койсавэ дивэ на душолас ни кхам, ни чергэня, тай зорали балвал пхурдэлас. Амэ хацаардэ надия, со фириса'гапэ.

21 Мануша бут время нисо на хале. Тунчи Павло вишия машкар лэн тай пхэнда:

— Тумэнди трэбуни сля тэ кандэ ман тай тэ на выладэ Критостар. Тунчи б тумэ на прылиле кадыя грыжка и на хацаардэ б амарэ бужэ.

22 Нэ каны пхэнав тумэнди, соб тумэ тэ лошавэн. Нико тумэндар на хасявлэла, кицик корабли розмарэлэлэ.

23 Кодэла рятягэ мандэ авиля ангело Дэвлэстар, Кахжоро мэ исин и Касти терав бути.

24 Вон пхэнда манди: «Павло, на дара! Тути трэбуни тэ аче англа императоро. Акэ, Дэвэл отдэня тути всавэрэн, ко ладэл туга».

25 Колэсти лошавэн! Мэ патяв Дэвлэсти. Вса авэла кади, сар манди пхэндо.

26 Корабли вычувэла пэ савось острово.

Корабли розмарэлэл

27 Пэ дэшүштарто диво, кала амэн инте чувэлэс пав Адриатическо море, дэ ешааряят бутярнэ кораблестар полиле, со амэ поджях пхүйтэ.

28 Вонэ продыххле панхжоро лунгимо тай выджаля, со лунгимо сля пашэ трянда шов метруря. Ай кала подыххле инте ех моло, лунгимо сля пашэ бишта эфта метруря.

29 Бутярнэ даранас, со амэн розмарэла пав барэн, и зму克莱 палал кораблестар штар якоря, тай еджинэ манглэпэ, соб сигэдэр тэ авэл диво.

30 Вонэ камле тэ нашэ кораблестар тай ачили тэ змуке лодка, соб тэ фирисаэрэпэ, ай сикавэнас, со камэн тэ змуке якори кади ж и англал кораблестар.

31 Павло пхэнда шэллякорэ пхурдэрэсти тай халавдэнди:

— Кала кадэла мануша на аченапэ пэ корабли, тумэ хасявлэна.

32 Тунчи халавдэ пэрэчиндэ доря, савэ рицарэнас лодка, ивой тэлэдэня дэ море.

33 Дэнзор Павло мангия манушэн, соб вонэ тэ хан.

— Дуй куркэ, сар тумэ бэшэн дэ грыжя, аченпэ бокхалэ и нисо на хан, — пхэнда вов.

34 Мэ мангав тумэн тэ хан, тай када дэла зор тумэнди тэ фирикарэпэ. Никастэ тумэндэр ни екх бал на тэлэдэла шэрэстар.

35 Кала Павло пхэнда, вов лиля мандро, наисарда Дэвлэ англа всавэрэн, пхагля и ачиля тэ ха.

36 Мануша лошиле, и всавэрэ хале.

37 Всавэрэн сля пэ корабли дуй шэла эфтадэша шов манушэн.

38 Кала мануша чялиле, вонэ ачиле тэ терэ корабли локхэгэ тай тэ чувэ ворзо дэ море.

39 Дэнзор вонэ на уджянгле пхув, сави сикавдапэ, нэ удыкхле кацик тишаехкоро берего, тев и камле тэ выцвирда корабли.

40 Бутярнэ обчиндэ якоря тай ачявдэ лэн дэ море, тунчи розпхангле кораблекири рули, подлиле цыкно парусо тай бичялдэ корабли берегостэ.

41 Нэ котэ сля набут пани тай корабли заджиля дэтишай. Епаш корабли сля пэтишай, а епаш розмарэлас пани.

42 Халавдэ ж камле тэ умарэ всавэрэн барунарен, соб вонэ тэ на нашэн, кала выдажяна панестар.

43 Нэ пханглякою пхурэдэр камля тэ фирикарэ Павло тай на домукля лэн тэтерэ кади. Вов прыхэнда манушэнди, савэ джянэнас, сар пэ тэ лиджя дэ пани, тэхукэ дэ море англал всавэрэндар и тэ авэ пэ берего.

44 Ай савэ ачилепэ, лэнди трэбүни сля тэ доджя берегостэ пэ сандя кораблестар тай пэ котора сандендар. Кади всавэрэ фирикардэпэ тай выджиле пэ пхув.

28

Пэ Мальта

1 Кала амэ фирикардэпэ, тунчи уджянгле, со кодэва острово акхарэлпэ Мальта.

2 Мануша, савэ котэ джювдэ, тердэ важ амэн бари патив. Вонэ тховдэ яг тай акхардэ амэн пэстэ, колэсти со сля шылало тай джялас брышынд.

3 Кала Павло стидэнья кашта и ачиля тэ чувэ дэ яг, лэсти дэ вастэ вхалияпэ сап, саво выгульда каштэндар, кала фирикарэласпэ ягатар.

4 Кала катутнэ мануша удыкхле, со Павлостэ пэ вастэ амгладёл сап, вонэ ачиле тэ дэдүмэ екх аврэсти:

— Душол, со кадэва умарэлас манушэн. Вов фирикардапэ панестар, нэ чячимахкири дэвли отлэл лэхкоро джювимо.

5 Нэ Павло счута салз дэ яг, и вов на терда лэсти нисаво бибахталимо.

6 Мануша жэ дожутярэнас, со вов ачела тэ шулёл чи сиго мэрэла. Вонэ дожутярдэ бут врязма и кала удыкхле, со лэгэ нисо на терэлпэ, тунчи парувдэ пхэкири дума тай ачиле тэ пхэнэ, со када савось дэвэл.

7 Надур ачелас грэда, тев джювдэ пхурэдэр пав острово, савэ акхарэнас Публии. Вов пативалэ прылия амэн, тай амэ сле лэстэ трин дивэ.

8 Лэхкоро дад сля насвало тай пашлёлас пэ пато. Лэстэ сля пхабаримо тай фартэ дукхалас води. Павло авиля лэстэ, помангляпэ, тховда пэ лэстэ васта тай састьядра лэ.

9 Тунчи и авэр насвалэ островостар ачиле тэ авэ лэстэ тай высастярэнаспэ.

10 Вонэ дэнэ амэнди бари патив, и кала амэ лагле, стидэне амэнди вса, со трэбүни важ дром.

11 Проджиля трин чёна, и амэ выджиле дэ море пэ корабли Александриятар, саво пролиджялас ёвэнд пэ кодэва острово и акхареласп «Дуй пхрала»*.

12 Амэ авиле дэ Сиракузы и просле котэ трин дивэ.

13 Котарь амэ ваздэнеп тай авиле дэ Ригии. Пэ авэр диво пхурдэнэ южно балвал, тай дивэгэ амэ авиле дэ Путеолы.

14 Котэ амэ аракхле пхралэн, тай вонэ мангле амэн тэ пролиджя лэнца састо курко.

Тай акэ, амэ авиле дэ Римо.

15 Пхрала дэ Римо ушундэ, со амэ авиле, тай джиле тэ удыкхэ амэн ды Аппиёхкоро форо тай ды тханэ, саво акхарэлсп «Трин гостиницы». Кала Павло удыкхля лэн, вов наисарда Дэвлэ тай прылия зор.

16 Амэ авиле дэ Римо, тай Павлости дэне воля тэ джювэ екхэсти. Паши лэ джювда кацик халавдо, саво дыкхэлас пала лэ.

Бути дэ Римо

17 Проджиля трин дивэ, тай Павло акхарда пативалэн иудеен. Кала вонэ авиле, вов пхэнда лэнди:

— Пхралалэ, ман спхангле дэ Ерусалимо тай отдэне дэ вастэн римлянёнэнди. Нэ мэ на теравас нисо амарэ народости и на отпхэнааспэ кодэлэстар, со сля прылито амарэ дадэндэ.

18 Римлянуря роздыххле муро рындо тай камле тэ отмукэ ман, колэсти со дэман нэндай дош, пала сава трэбуни тэ умарэ.

19 Нэ сар иудея на сле пала ман, мэ манглём сындо императохкоро. Мэ тердом кади на важ кода, соб тэ дошарэ муро народо.

20 Колэсти мэ акхардом тумэн авдивэ, соб тэ дыкхэпэ тай тэ подэдумэ тумэнца. Пала надия Израилекири ман спхангле кадээз ланчугонэнца.

21 Кодэла пхэндэ:

— Амэнди нико на искриисарда пала тут Иудеятар. Тай котарь нико пхралэндар амэндэ на авэлас и на дэдумэлас пала тут намишто.

22 Нэ амэ камле тэ пошуунэ, со ту думисарэх. Амэ кицик джянах, со мануша пав всасэрэн тханэн осундисарэн кадэва сикляримо.

23 Вонэ допхэндээз Павлога тай дэ диво, саво вонэ вытидэне, лэстэ цэрэ авилия бут манушэн. Павло дэнзор и ды бельвеля пхэнэлас лэнди пала Дэвлэхкоро Тхагаримо тай допхэнэлас пала Иисусо Моисеехкэрэ Упхэнимастар и англугунарендэр.

24 Ехк лэндар патине, ай авэр — нат.

25 Вонэ ачиле тэ хапэ машкар пэстэ, и кала вонэ уджянас, Павло дэдуманя кацаавэ лава:

— Мишто пхэнда Свэнто Фано тумарэ дадэнди уштэнца англугунарехкэрэ Исаияхкэрэ:

26 «Джя кадэлэ народостэ тай пхэн:

“Авзна тэ шунз, нэ на полэна,

авэна тэ дыкхэ, нэ на дыкхэнэ.

27 Йло кадэлэ манушэнгоро забариля чеченэга,

вонэ на шунэн канэнца

тай затердя якха,

соб тэ на дыкхэн якхэнца,

тэ на шунэн канэнца,

тэ на полэн ѹлэга

и тэ на обрисявшэн,

* **28:11** Пав греческо чиб «Диоскуры», Касторо тай Поллуксо, пала савэн пхэнэнас, со лэнгоро дад сля дэвэл Зевсо. Сар пятынас мануша да кодыя врима, кадэла пхрала прыдыхэннас пала кодэлэн, ко терэнас бути пэ корабли.

соб Мэ састьярдом лэн"».

28:29 Нэ джянэн кана, со фирисаримо Дэвлэхкоро бичалдо наиудеенди: вонэ и ушунзна кадэва Лав.[†]

30 Павло инте дуй бэрша джювда дэ Римо, тев намисарэлас цэр тай прылэлас всавэрэн, ко авэлас лэстэ.

31 Бов нисостар на даралас тай на сля ника, соб тэ запхэнэл лэсти тэ розпхэнэ пала Дэвлэхкоро Тхагаримо и тэ сиклярэ пала Рае Иусо Христо.

[†] **28:28-29** Дэ койсавэ пуранэ греческа манускрипты исин инте кацавэ лава: «Пала кадэлэ, сар вов пхэнда, иудея розджилепэ, ай еджинэ фартэ допхэнэнас екх аврасти».